

# Jeremías

## *Cati quipyia ni amatapohuali*

<sup>1</sup> Ni amatapohuali quipyia nopa camanali ten Jeremías, icone Hilcías. Jeremías elqui se ten nopa totajtzitzi ipan altepet Anatot ipan tali Benjamín. <sup>2</sup> TOTECO achtohui quinojnotzqui Jeremías huan quimacac icamanal para tayolmelaahuas quema Josías, icone Amón, yahuiyaya para majtacti huan eyi xihuit para tanahuatis ipan tali Judá. <sup>3</sup> Huan teipa TOTECO quisehuiquili quimacac camanali miyac huelta quema Joacim, icone Josías, elqui tanahuatijquet ipan tali Judá huan hasta quema Sedequías, cati nojquiya icone Josías, quiaxiti itamiya nopa majtacti huan se xihuit ipan itequi quej tanahuatijquet. Elqui ipan nopa xihuit quema ajsicoj tocualancaitacahua ipan nopa metzti macuili ipan tocalendario israelita\* huan quiyahualojque altepet Jerusalén huan quinhuicaque Jerusalén ehuani ilpitoque para tetequipanotij ipan seyoc tali.

## *TOTECO quitequimacac Jeremías*

<sup>4</sup> TOTECO technojnotzqui huan techmacac ni camanali, techilhui: <sup>5</sup> “Na nimitzixmatqui hasta

---

\* <sup>1:3</sup> 1:3 Ipan agosto o septiembre 586 a.C. ipan tocalendario ten ama.

quema ayemo nimitzchijchijtoya ipan iiji monana. Huan quema ayemo titacatiyaya, nimitztapejpeni huan nimitziyocatali para titayolmelaahuas ten na ica masehualme cati ehuani nochitalme ipan nochitaltipacti.”

<sup>6</sup> Huan na nijnanquili: “¡Ay, TOTECO ta Cati Más Tijpiya Tanahuatili, amo huelis nicamanaltis para ta pampa tahuel niconetelpocat!”

<sup>7</sup> Pero TOTECO techilhui: “Amo xiquijto para sanoc tieli se titelpocat, pampa ta tiyas campa na nimitztitanis huan tiquijtos nochitati na nimitznahuatis. <sup>8</sup> Amo xiquinimacasi nopa masehualme pampa na, nimoTECO, niitztos mohuaya para nimitzmanahuis.”

<sup>9</sup> Huajca TOTECO quixitajqui imax huan quiasic nocamac huan techilhui: “Xiquita, na nimitztalilijtoc nocamanal ipan mocamac. <sup>10</sup> Huan ama nimitztequimacatoc para tijpiyas tanahuatili ica tanahuatiani huan inintanahuatijcayo para tiquijtos taya ininpantis. Sequij tiquinquixtis ten campa itztoque huan tiquintzontamiltis. Sequij tanahuatijcayot tiquinsosolos huan tiquintahuisos. Huan sequij tiquintananas huan tijchihuas ma mohueyichihuaca.”

<sup>11</sup> Teipa TOTECO sempa technojnotzqui huan techilhui: “Jeremías, ¿taya tiquita?”

Huan na niquilhui: “Niquita se imacuayo nopa cuahuit cati itoca almendro.”

<sup>12</sup> Huan TOTECO techilhui: “Quena, ya nopa quinequi quiijtos para nitachixtoc huan melahuac nitetatzacuiltis senquisa quej niquijtohua.”

<sup>13</sup> Teipa TOTECO ica ompa techtatzintoquili: “¿Taya tiquita ama?”

Huan na niquilhui: “Niquita se chachapali ica at cati molontoc huan motalijtoc ten norte para toyahuis ica taní.”

<sup>14</sup> Huan TOTECO techilhui: “Nimantzi quisas cati fiero huan tahuel temajmati ten nopa talme ica norte huan quinajsis nochí masehualme cati itztoque ipan ni tali Judá. <sup>15</sup> Quena, na niquinnotzas nochí nopa tanahuatiani huan inisoldados ten nopa talme cati mocahuaj ica norte para ma hualaca. Mosehuiquij ipan inisiyas yejyectzi para tanahuatise campa nopa caltemit ipan nopa tepamit cati quiyahualohua altepet Jerusalén huan ma quitehuica. Nopa soldados ma quiyahualoquij itepa ni altepet huan ma pehua quicoyonica. Nojquiya ma quintehuica nochí nopa sequinoc altepeme ten tali Judá. <sup>16</sup> Quej nopa niquintatzacuiltis nomasehualhua pampa techtahuelcajque. Quinhueyichijque huan quinmacaque tacajcahualisti nopa teteyome cati injuanti quinchijchijque ica inimax. <sup>17</sup> Pero ta, Jeremías, ximoquetza, ximocualtali huan xiya xiquinlhuiti masehualme nochí cati na nimitznuhatis. Amo xiqunimacasi, pampa sintá timajmahuis, huajca na nimitzpinahualtis iniixpa. <sup>18</sup> Xiquita, ama ni tonali na nimitzchihuas titetic para amo aqui huelis mitztanis. Nimitzchihuas titemachti quej se altepet cati moyahualojtoc ica tepamit cati tilahuac huan yeca amo aqui hueli quiitzquia. O nimitzchihuas quej se taquetzali o se tepamit ten nopa teposti bronce cati amo aqui hueli quixitinis, pampa amo aqui huelis mitzchi-

huilis se tamanti cati fiero. Huan amo huelis mitztanis yon se ten nopa tanahuatiani ten tali Judá, yon inintayacancahua, yon inintotajtzitzí, yon inimasehualhua. <sup>19</sup> Inijuanti mitztehuise, pero amo huelise mitztanise pampa na niitztos mohuaya para nimitzmanahuis. Quej nopa na nimoTECO niquistohua.”

## 2

*Israelitame ipan Judá quitahuelcajtoque  
TOTECO*

<sup>1</sup> Huan TOTECO sempa nechcamanalhui huan techilhui: <sup>2</sup> “Xiya huan xitayolmelahuati chicahuac ni camanali ipan calles ipan altepet Jerusalén para nochima quicaquica. Xiquinilhuiti israelitame: ‘Ya ni cati niamoTECO niquistohua: Na niquelnamiqui para huejcajquiya amojuanti tahuel anquinequiyayaj antechpaquilismacase quej se ichpocat quinequi quipaquilismacas nopa telpocat cati quicuitoc. Nojquiya niquelnamiqui quenicatza antechicnelyayaj huan antechtoquiliyayaj ipan nopa huactoc tali campa amo teno eli.’ <sup>3</sup> Ipan nopa tonali israelitame eliyayaj tatzejzeloltique huan taiyocatalilme san para na. Quej se achtohui ejquet cati más quiselis tatiochihualisti ten itata, israelitame itztoque nopa masehualme cati más niquinmacatoc tatiochihualisti ten sequinoc tali ehuani. Huan nochia cati quintaijyohuiltiyayaj israelitame, niquinatayaya para quihiucayayaj tajtacoli huan niquinatzacultiyaya chicahuac. Na niamoTECO nimechilhuía ya ni.”

<sup>4</sup> Xijtacaquilica cati TOTECO quijtohua, nochí amojuanti anisraelita masehualme\*. <sup>5</sup> TOTECO quijtohua: “¿Taya tajtacoli quipantijque ipan na amohuejapan tatahua cati quinchihualti ma techtahuelcahuaca? ¿Para ten tahuel huejca nechcajque? Inijuanti quinhueyichijque teteyome cati amo teno ininpati, cati san masehualme huihuitique quinhueyichihuaj. Huan yeca mohuihuichijque iniselti. <sup>6</sup> Inijuanti amo techtemojque. Amo quijtojque: ‘¿Canque itztoc TOTECO cati techquixti ipan tali Egipto ica cuali huan techyacanqui ipan nopa huactoc tali campa amo teno eli? Techyacanqui campa tepexico campa amo onca at huan campa tahuel tafiero huan mahuilili. Nopona campa amo aqui itztoya huan campa amo aqui pano, techyacanqui huan tipanoque cuali.’

<sup>7</sup> “Quena, na niquinhualicac amohuejapan tatahua nochí nopa ojti hasta niquincalaqui ipan se tali cati tahuel taeliltia para ma quicuaca nochí cati nopona eli. Pero inijuanti hualajque huan quisoquihuijque notal ica nochí tamanti tajtacoli. Huan quej nopa quichijque notal amo tapajpactic noixpa. <sup>8</sup> Hasta nopa totajtzitzi nojquiya amo mocuesojque por na, yon amo techtemojque. Nopa tamachtiani ten notanahuatilhua quichijque quej amo techixmatiyayaj. Nopa tayacanani mosisinijque ica na. Huan nopa tajtolpanextiani quihueyichijque nopa teteyot Baal, huan tayolmelajque ipan ya itoca ten tamanti moilhuiyayaj para hualas teipa. San motonalpolojque ica teteyome cati amo aqui quinpalehuíaj.

---

\* **2:4** 2:4 O ichaj Jacob.

**9** “Yeca na niquixnextis amotajtacolhua iniixpa nochí huan nijsenhuiquilis nimechtatelhuis. Nimechtatelhuis amojuanti, huan amoconehua huan amoixhuihua cati tacactiyase teipa pampa antechtahuelcajtoque quej amohuejcapan tatahua. **10** Xitachiyaca yahualtic huan xiquitaca sinta anquipantise se tamanti quej ni. Masque se tachiyas hasta occidental campa nopa piltaltzitzí cati mopantíaj ipan hueyi at o masque anquititanise se para yas hasta tali Cedar, amo oncas yon se lugar quej ni. **11** Xiquitaca sinta onca seyoc tali campa quinpatatoque inindioses cati quinixmatiyayaj hasta huejcajquiya ica sequinoc cati yancuique. Amo aqui quinpata idioses masque nopa teteyome amo teno ininpati. Pero nomasehualhua techtahuelcajtoque na niiniDios cati nieliyaya niiniyejca para quinhueyichihuase teteyome cati amo teno ininpati. **12** Cati itztoque ipan ilhuicac momajmatijque por ni hueyi tamanti. Pejque huihuipicaj ica majmajti quema quiitaque. Quej nopa na, niamoTECO, niquijtohua.

**13** “Nomasehualhua quichijtoque ome tamanti cati amo cuali. Achtohui techtahuelcajque na cati niitztoc quej at cati temaca nemilsti. Huan teipa inijuanti mochijchihuilijque piletas cati amo huelis quitequihuise para quitecase at pampa cocoyocafoc.

**14** “¿Para ten anisraelitame anmocuectoque antetequipanohuani? Quema anquipehualtijque anmochihuaj se hueyi altepet ten masehualme, amo antetequipanohuayayaj. Huajca, ¿para ten amechilpise huan amechhuicase huejca ipan

seyoc tali para antetequipanotij san tapic? <sup>15</sup> Na niquinita miyac soldados cati hualahui para quitehuise altepet Jerusalén. Nanalcatihualahui quej leones para quintamitahuisose huan quintamisosolose nochi nopa altepeme ipan tali Judá. Nojquiya quintatise huan ayecmo aqui mocahuas nopona. <sup>16</sup> Niquita motananaj nopa soldados ten tali Egipto para quitehuise Jerusalén. Nochi cati ehuani nopona ipan altepet Menfis huan Tafnes hualahui para quiixpolihuiltise amohueyitilis huan amochicahualis anisraelitame. <sup>17</sup> Pero nochia ya ni panos pampa antechtahuelcajque na, niamotECO Dios, quema nijnequiyaya nimechyacanas huan nimechnextilis noojhui. <sup>18</sup> ¿Taya anquitantoque ica nopa camanali cati anquisencajque ica nopa egiptome huan nopa asirios? <sup>19</sup> Amotajtacolhua quichihuas para xiselica tatzacultili. Huan huajca anquimachilise para nelía elqui fiero para anmosisinijque ica na niamotECO Dios huan antechtahuelcajque. Amojuanti yon amo antechimacasque. Quej nopa niquijtohua, niamotECO Cati Niquinyacana Noilhuicac Ejcahua Ma Tatanitij.

### *Israelitame mosisinijke ica TOTECO*

<sup>20</sup> “Huejcajquiya quema antetequipanohuayayaj ipan tali Egipto, nimechmaquixti huan nimechcotonili nopa cadenas cati ica amechilpitoyaj, pero amojuanti anmosisinijke ica na huan antechhuejcamajcajque. Anquijtojque: ‘Amo tijtequipanose TOTECO.’

Huan amo anquinejque antechtepanitase. Huan ipan nochí tepeme huan tatzinta ten sesen cuahuit anmotancaquetzque iniixpa teteyome huan anquinhueyichijque. Anitztoque quej se ahuiñenca sihuat cati quicahua ihuehue para itztos ica cati hueli tacat. <sup>21</sup> ¿Para ten panoc ya ni? ¿Quenicatza elqui? Quema nimechchijqui para anelise se altepet ten masehualme, nijchijqui quej se cati quitoca se xocomeca mili. Nijtapejpeni nopa xinachti cati más cuajcualtzi. Pero ama anmochijtoque masehualme cati tahuel fierojtique. <sup>22</sup> Huan masque anmopajpacasquíaj ica xapo cati nelía cuali, amo quema ixpolihuis nopa mancha ten amotajtacolhua. Pampa anquihuicaj tajtacoli cati amo quema huelis ixpolihuis. Quena, eltos noixpa para nochipa. Quej nopa niquijtohua niDIOS Cati Más Nijpiya Tanahuatili. <sup>23</sup> Huajca ¿quenicatza huelis anquijjtose para amo amosoquihuijtoque huan amo anquinhueyichijtoque teteyome? Xiyaca huan xiquitatij nochí nopa tamayamit campa hueli. Ipan sesen nopa tamayamit anquichijtoque tajtacoli cati tahuel huejhueyi. Anitztoque quej se sihua camello cati motalojtinemi campa hueli para quipantis se camello cati oquichti. <sup>24</sup> Anitztoque quej se sihua burro cati nemi cuatita huan taijnectinemi pampa quimonequilía para quipantis se oquich burro. ¿Ajquia huelis amechtzacuilis para amo xijchihuaca ten hueli? Ten hueli oquich burro cati quinequis nopa sihua burro, amo monequi quitemojtinemis, pampa ya iseltitzi yas campa ya itztoc. Quej nopa anitztoque huan quej nopa anquintemohuaj amoteteyohua.

**25** “¿Para ten amo anquintahuelcahuaj nopa teteyome? Inijuanti amo amechpalehuise. Pero anisraelitame anquijtohuaj: ‘Amo teno tijnequij techilhuis pampa tojuanti tahuel tiquinixtocaj huan tiquinicnelíaj ininteteyohua nopa sequinoc talme. Huajca amo hueli tiquintahuelcahuase.’

*Israelitame quinamiqui quiselise tatzacuiltyili*

**26** “Quej se tachtejquet pinhua quema quipantíaj quiichtectoc se tenijqui, quej nopa nojquiya anpinahuase anisraelitame. Huan nojquiya pinahuase nochí israelita tanahuatiani, tayacanani, totajtzitzi huan tajtolpanextiani.

**27** Anquiihluiáj se teteyot cati tachijchihuali ica cuahuit: ‘Ta tinotata.’ Huan se teteyot ten tet anquiihluiáj: ‘Ta tinonana.’ Pero quema huala amopani se taijyohuilisti, nimantzi antechtzajtzilíaj na para ma nimechmanahui.

**28** Nimechtajtani quema huala cati ohui, ¿para ten amo anquintajtzilíaj nopa teteyome cati amojuanti anquinchijchijtoque para ma amechmanahuica sintia huelij? Amojuanti anquinpiyaj teteyome quej imiyaca nopa altepeme cati onca ipan ni tali Judá. **29** ¿Para ten antechtaijilhiúaj na? Elque amojuanti cati tahuel anmosisinijque noixpa. Quej nopa niquijtohua na niDIOS. **30** Na niquintatzacuiltyili amoconeohua, pero san tapic pampa amo quinpalehui para moxitahuase. Quejipa amo quinequij tatepanitase. Huan amojuanti anquinmictijtoque amotajtolpanextijcahua cati nimechtitanili. Anquinchihuiliijque quej se león cati quimictía seyoc tapiyali para quicuas.

<sup>31</sup> “Ay annomasehualhua cati ama anitztoque, xijtacaquilica nocamanal niDIOS. ¿Amo nimechchihuilijtoc cati xitahuac? ¿Antechitaj nieltoc quej se tali campa amo teno eli, o se tali campa san onca tzintayohuilot? Huajca, ¿para ten annomasehualhua anquijtohuaj: ‘Tojuanti ayecmo tiitztoque imaco TOTECO huan ayecmo quema timocuepase ica ya?’ <sup>32</sup> ¿Para ten quej nopa anquichihuaj ica na? ¿Huelis se ichpocat quielcahuas nopa cati ica moyectalia quema monamictía? O ¿quielcahuas canque quitali iyoyo? Pero ica nomasehualhua, quena. Para miyac xihuit antechelcajtoque na cati más ipati para amojuanti.

<sup>33</sup> “Anisraelitame, tahuel anquixmatij ica taya anquinyoltilanase amomecahua. Hasta nopa ahuiلنeca sihuame cati más talnamiquij noja huelij quiyecohuaj miyac tamanti ten amojuanti pampa amojuanti más anquimati. <sup>34</sup> Nochi amoyoyo anquisoquihuijtoque ica inieso masehualme cati teicneltzitz huan cati amo teno quichijtoque. Anquinmictijque masque amo amechixpanoque. <sup>35</sup> Pero masque anquichijtoque cati fiero, amojuanti anquijtohuaj: ‘Tojuanti amo teno tijchijtoque. TOTECO amo huelis cualantos ica tojuanti ica yon se tamanti.’ Huan anquijtohuaj: ‘Amo titajtacolchijtoque yon quentzi.’ Huajca pampa anquijtohuaj amo antajtacolchijque, nimechtatelhuis huan nimechtatzacuiltis chicahuac.

<sup>36</sup> “Amojuanti san annentinemij nica huan neca para campa hueli anquitemojtinemij ajquia amechpalehuis, pero san tapic. Nopa

tali Egipto ehuani amechtahuelcahuase huan amechpinahaultise san se quej achtohuiya amechchihuilijque nopa tali Asiria ehuani. <sup>37</sup> Huan ten tali Egipto anhualase ica pinahualisti huan ica amomax ipan amoxayac quema sequinoc amechyacantiyase ipan seyoc tali para antetequipanotij. Pampa niquinhuejcamajcajtoc nopa Egipto ehuani cati ipan anmotemachiyayaj huan amo quisas cuali para amojuanti masque inijuanti amechpalehuisquíaj.”

### 3

#### *Israelitame tahuel quiixpanotoque TOTECO*

<sup>1</sup> TOTECO quiijtohua: “Onca se tanahuatili cati quiijtohua sintia se tacat quicahua isihua huan nopa sihuat monamictis ihuaya seyoc tacat, huajca teipa nopa sihuat ayecmo huelis mosejcotilis ica cati achtohui ihuehue pampa ya nopa se hueyi taixpanoli. Pero masque anisraelitame cati aneliyayaj quej nosihua antechtahuelcajtoque huan anmosejcotilijoque ica miyac amo-mecahua, na nimechtajtanijtoc miyac huelta para ximocuepaca ica na. Quej nopa niamotECO niqijtohua.

<sup>2</sup> “Ximotajtachilica huan xiquitaca sintia anquipantise ipan nochí amoojhui se lugar campa amo antechixpanotoque huan anquinhueyichijtoque teteyome. Anquintemohuaj teteyome para anquinhueyichihuase quej se ahuilnenca sihuat ten tali Arabia mosehuía ipan ojti ipan nopa huactoc tali huan quitemohua ajquiya ihuaya itz-tos. Anquichijtoque cati fiero iniixpa teteyome

campa hueli huan anquinenpolojoque nochí ni tali. <sup>3</sup> Huan yeca ayecmo huetzis at quema antatojtocase pampa anquichijtoque quej se ahuilnenca sihuat cati amo pinahua huan tahuel antechixpanotoque. <sup>4</sup> Pero masque anquichihuaj ya nopa, antechilhuaj: ‘Ta tiTotata. Nochipa timochijtoc titonelhuampo huan techyacantoc hasta huejcajquiya. <sup>5</sup> Huajca temachti amo ticualantos ica tojuanti. Huan nojquiya timotemachíaj para tiquelcahuas totajtacolhua.’ Ya nopa anquijtohuaj pero anquisehuiquilíaj anquichihuaj tamanti cati amo cuali.’

*TOTECO quinilhuía israelitame ma moyolcuetypeca*

<sup>6</sup> TOTECO technojnotzqui quema tanahuatiyaya Josías huan techilhui:

“¿Tiquitztoc taya quichihuaj nopa israelitame ipan tali Israel ica norte? Quej se ahuilnenca sihuat taloxtzitz motemactilía ica seyoc tacat, quej nopa israelitame quinhueyichiijtin enque teteyome ipan campa hueli tepeme huan itantita sesen cuahuit. <sup>7</sup> Nimoilhui para teipa quema ya quichijtoyaj nochí ya nopa, nopa israelitame sempa mocuectosquíaj ica na huan sempa eltosquíaj noaxcahua, pero amo. Huan iniisraelita icnihua cati itztoque ipan tali Judá quiitaque nochí cati quichijque, pero amo mocuetque ica na. <sup>8</sup> Inijuanti quiitaque quenicatza niquintahuelcajqui nopa israelitame ipan tali Israel. Nijchijqui quej se tacat moamasosolo ihuaya isihua cati momecatía. Pero masque israelitame ipan

tali Judá quiitaque nochí ya nopa, amo moyolilhuijque, yon amo quichihuilijque cuenta. Huan ama nopa israelitame ipan tali Judá nojquiya techtahuelcajtoque para quintoquilise teteyome. Motemactilijtoque para quinhueyichihuase teteyome quej se sihuat motemactilia ipan ahuilnencajot. <sup>9</sup> Israelitame ipan tali Israel moilhuijque amo teno quichihuilía sintia quinhueyichihuase teteyome ten tet huan cuahuit. Huan yeca nopa tali mocajqui nempolijtoc huan mahuispolijtoc. <sup>10</sup> Pero masque israelitame ipan tali Judá quiitaque taya panoc ica iniicnihua ipan tali Israel ica norte, quichijke quej amo quiitayayaj. Huan Judá ehuani amo nelía moyolcuetque ica nochí iniyolo, san nechcajcayajque. Quej nopa niinintECO niquijtohua.”

<sup>11</sup> Huan TOTECO techilhui: “Huan ama nesi para nopa israelitame ipan tali Israel ica norte cati techtahuelcajque, quipiyaj pilquentzi tajtacoli, pero israelitame cati tali Judá ehuani, huejhueyi tajtacoli quichijtoque pampa mochijke quej noaxcahua, pero san nechcajcayahuayayaj. <sup>12</sup> Huajca ama xiya huan quej ni xiquinyolmelahuati nopa israelitame ipan tali Israel ica norte. Xiquinilhuiti: ‘Antajtacolchijca israelitame cati ayecmo antechneltocaj, ximocuepacá ica na, pampa na tahuel nitetasojta. Amo nicualanis ica amojuanti para nochipa. Quej nopa niamoTECO niquijtohua. <sup>13</sup> Ximoilhuica ten nochí nopa tajtacoli cati anquihuicaj noixpa na niamoTECO Dios huan techpohuilica nochí nopa tajtacoli cati anquichijtoque.

Xiquijtoca para melahuac antechixpanoque huan anquinhueyichijtoque teteyome itantita sesen cuahuit. Nojquiya techilhuica xitahuac quenicatza amo anquinequiyayaj antechtoquilise, yon amo anquichihuayayaj cati nimechnahuati xijchihuaca. Quej ni niamotECO niqijtohua.”

<sup>14</sup> Huan TOTECO quiijo: “Huajca amojuanti, annoconehua cati anmosisiníaj ximoyolcuepaca, pampa na niamoteco. Se ten amojuanti nijcuis nica huan ome neca hasta nimechtamiquixtis ten nochí talme campa nimechsemantoc.

<sup>15</sup> Huan nimechmacas tayacanani cati amechmocuitahuise quej na techyolpactía huan amechyacanase ica miyac talnamiquili huan ica cuali.

<sup>16</sup> “Huan quema amotal sempa temitos ica masehualme, ayecmo anmotequipachose por nopa cuali tonali cati panoque huejcajquiya quema anquipixtoyaj nocaxa niamotECO cati quipiyayaya notanahuatilhua. Ayecmo anquinequise nopa tonali, yon ayecmo anquielnamiquise. Huan amo monequis quichijchihuase seyoc caxa pampa na noseltitzi niitzos amohuaya. <sup>17</sup> Huan ipan nopa tonali quitocaxtise altepet Jerusalén: ‘Altepet Campa Mosehuía TOTECO Para Tanahuatis.’ Huan masehualme cati ehuani nochí talme hualase ipan Jerusalén huan ayecmo quichihuase cati inifiero yolo quipactía ma quichihuaca.

<sup>18</sup> “Huan ipan nopa tonali nopa masehualme ten tali Judá huan tali Israel mocuepase sentic ten nopa tali ica norte campa tetequipapanohuayayaj.

Huan hualase ipan ni tali cati na niquinmacac inihuejcapan tatahua para ma moaxcatica para nochipa.

*Inintajtacol israelitame*

<sup>19</sup> “Niquelnamiqui quema nimoilhuiyaya para nelía cuajcualtzi elis para nimechpixtos quej noconebla. Nijnequiyaya nimechmacas ni tali cati más cuali huan más cuajcualtzi ten nochitaltipacti. Huan nimochiyayaya ica paquilisti para antechtocaxtisquíaj: Totata. Huan nimoilhuiyaya para amo quema antechtahuelcahuasquíaj. <sup>20</sup> Pero anisraelitame, anquichijque quej se ahuilnencia sihuat cati quicajtehua ihuehue. Antechtahuelcajque huan anmotemactilijque ica sequinoc dioses. Quej nopa niamoTECO niquijtohua.

<sup>21</sup> “Na nijcajqui cati chocayayaj huan tzajtziyayaj ipan nopa tepeme campa amo onca cuame. Eliyayaj israelitame cati techelcajtoyaj huan mohuejcaquixtijtoyaj ten noojhui niinintECO Dios. <sup>22</sup> ¡Ay anisraelitame, annoconebla cati ansentamique! Xihualaca campa na huan na nimechchicahuas ipan amoyolo cati anquinequij tajtacolchihuase. Quej nopa niamoTECO niquijtohua.”

Huan amojuanti anquijtohuaj: “Quena, timocuepase ica ta, pampa ta tiTOTECO. <sup>23</sup> Ya ticuesijque tiquinhueyichihuaj teteyome ipan tepeme huan ten hueli tijchihuaj iniixpa. Nochi ya nopa san tapic. Pampa san TOTECO toDios hueli techpalehuis huan techmaquixtis nochitojuanti tiisraelitame. <sup>24</sup> Hasta quema tieliyayaj

ticoneme tojuanti tiquitaque para tantiyajqui nochí catí totatahua tequitique para quipiyase. Quinpiyayajay borregojme, huacaxme, telpocame huan ichpocame, pero nochí ya nopa quinpolojoque pampa quintamimacaque nopa totajtzitzi huan teteyome.<sup>25</sup> Huan yeca ama timopantíaj ipan tequipacholi huan ipan pinahualisti pampa hasta quema ticonetzitzi titajtacolchijque inihuaya totatahua huan timitzixpanotoque TOTECO Dios. Amo quema timitztepanitztoque quej monequi.”

## 4

<sup>1</sup> Huan TOTECO quijito: “Israelitame, sinta anquinequij anmocuepase, ximocuepacá ica na. Xiquintahuelcahuaca amoteteyohua huan ayecmo ximocuapoloca ipan seyoc ojti. <sup>2</sup> Xitatetigojquetzaca san ica na notoca, ni amoTECO huan xijpiyaca se nemilisti catí cuali, xitahuac huan tapajpactic. Anelise se tatiochihualisti para nochí talme ipan taltipacti huan inijuanti hualase Jerusalén huan techhueyichihuase na.”

### *Soldados hualase para moaxcatise tali Judá*

<sup>3</sup> TOTECO quej ni quinilhuía nopa masehualme ten tali Judá huan ten altepet Jerusalén: “Xijyamanilica amoyolo catí tahuel tetique para huelis anquicaquise nocamanal. Pampa sinta amo, elis quej ni camanali huetzis ipan se tali campa onca huitzti huan amo hueli quipiya itajca huan amechpalehuis. <sup>4</sup> AnJerusalén huan anJudá ehuani, xijtapajpacchihuaca

amotalnamiquilis huan amoyolo noixpa na, ni amoTECO. Pampa sint a amo, huajca nohueyi cualancayo amechezontamiltis noch i amojuanti por noch i cati amo cuali anquichijtoque. Nocualancayo eltoc quej se hueyi tit cati amo aqui huelis quisehuis.

<sup>5</sup> “Xiquintzajtzilica Jerusalén huan Judá ehuani, huan xitayolmelahuaca ica tapitzali ipan noch i nopa tali. Xiquijtoca: ‘Xicholoca para anmomanahuise pampa hualahui amocualancaitacahua. Ximotatitij ipan nopa altepeme cati quipiyaj tepamit cati quinyahualojojtoc.’ <sup>6</sup> Xijtananaca se bandera ipan altepet Jerusalén huan xiquinilhuica: ‘¡Xicholoca, ayecmo ximochiyaca! Pampa na, ni amoTECO, nijhualicas campa amojuanti nopa tasosolojquet cati más fiero. Hualas ten nopa tali cati mocahua ica norte.’ <sup>7</sup> Yaya cati hualas ten nopa tali nelmosisinía quej se león huan cuali quimati quenicatza quinsosolos talme. Quisqui ipan ilugar huan huala ica noch i ichicahualis para quisosolos amotal. Huan amoaltepehua mocahuase sosolijoque huan tatzitzicatoc. <sup>8</sup> Huajca ama ximotalilica amoyoyo cati sosoltic para ma nesi anmotequipachohuaj. Huan ximochoquequila por nopa taiyohuilisti pampa nohueyi cualancayo ni amoTECO ya ajsitihuala ipan amojuanti huan amo amechcahuas. <sup>9</sup> Ni amoTECO niquijtohua para ipan nopa tonali quema ajsis nocualancayo, nopa tanahuatijquet huan nopa tayacanani huihuipicase ica majmajti. Huan nopa totajtzitzi huan tajtolpanextiani, majmahuise chicahuac.”

<sup>10</sup> Huajca na niJeremías niquijto: “¡Ay, noTECO Dios! Nelía teicneltique ni masehualme cati tali Judá huan altepet Jerusalén ehuani pampa eltoc quej san tiquincajcajqui ica cati tiquinilhui. Ta tiquintajtolcahuili tiquinmacas tasehuilisti, pero ama nopa macheta ya eltoc tacualtalili para quintzontamiltis.”

<sup>11</sup> Ya huala se tonali quema TOTECO quinilhuis nopa masehualme ipan Jerusalén: “Se ajacat cati totonic hualas campa huactoc tali. Huan amo elis se pilajacatzí para amechseselis cati ajhuiyac anquimachilise o se ajacat cati cuali quema anquiajcomajcahuaj iyol trigo, <sup>12</sup> pero elis se hueyi ajacat cati na nijtitanis. Huan hualas ica nochí ichicahualis para ica nimechtajtolsencahuas huan nimechtatzacuiltis.”

*Inincualancaitacahua  
quinyahualose*

*israelitame*

<sup>13</sup> Huan nopa israelitame quijtohuaj: “Xiquitaca, tocualancaitacahua hualahui topani quej se hueyi ajacat cati tasosolohua. Inincarrojhua motalohuaj chicahuac quej se ajcomalacat, huan inicahuayojhua motalohuaj más chicahuac huan amo quej patani se cuatojti. ¡Nelía titeicneltique pampa ya tiitztoque para techtatzacuiltise!”

<sup>14</sup> Huan TOTECO quijtohuaj: “¡Ay anJerusalén ehuani! Ximoyolpajpacaca ten nochí cati amo cuali anquichihuaj para noja hueli anmomaquixtise. Ayecmo xijpiyaca se amotalnamiquilis cati fiero. <sup>15</sup> Pampa hasta nepa ipan tali Dan huan hasta ipan nopa tepeme ten tali Efraín caquisti para nechcatitoc amotatzacuiltilis.

**16** “Xiquinyolmelahuaca inimasehualhua nochitame cati mocahuaj nechca huan nojquiya xiquinilhuica Jerusalén ehuani para nopa tatehuiani ya hualahuij ten nopa talme cati mopantíaj huejca. Huan tzajtzithualahuij para quitehuiquij altepet Jerusalén huan nochitamepe ten tali Judá. **17** Inijuanti quiyahualoquij altepet Jerusalén quej elisquíaj tamocuitahuij cati quinyahualohuaj tapiyalme ipan se cuatitamit para quinmocuitahuise. Huala intatzacuíttil ininpani pampa nomasehualhua mosisinijoque ica na. Quej nopa niinintECO niuijtohua.

**18** “Nochi ni taijyohuilisti hualajtoc por amo-tajtacolhua huan pampa anquitoquiljtoque se fiero ojti huan anquinhueyichijtoque teteyome. Huan ni tatzacuítlisti elis quej se pajti cati tahuel chicic huan ajsis quej se cuchillo cati calaquis ipan amoyolo, pero quej nopa quinamiqui.”

### *Jeremías moyoltequipacho por Judá ehuani*

**19** Nelía nitaijyohuía ipan noyolo huan nimomimilohua ica tacuajcualoli. Noyolo huihuitoca chicahuac huan amo hueli nimocahua san quej niitztoc pampa nijcactoc intapitzal tocualancaitacahua. Quena, tzajtzithualahuij nopa tatehuiani. **20** Niquinita hualahui tahuel miyac tatehuiani ipan ni tali para quitamisosolose, huan teipa hualahui tahuel miyac. Huan quema sempa nitachiya, niquinita noja más cati hualahui. San ipan se talojtzi mocahuase tasosololme nochitame huan nopa yoyoncalme campa masehualme chocaj.

<sup>21</sup> ¿Quesqui tonali huejcahuas ya ni? ¿Hasta quema noja niquitas motanantoc nopa bandera huan noja nijcaquis nopa tapitzali pampa noja onca tahuilancayot? ¿Hasta quema tamis ni miquilisti?

<sup>22</sup> TOTECO quijto: “Tiquitas ni taijyohuilisti hasta quema nomasehualhua quicahuase inihuihuiyo, pampa inijuanti huihuitique huan amo quinequij techtacaquilise. Inijuanti tahuel tzontochontique huan amo teno quimachilíaj. Inijuanti cuali quimatiq para quichihuase cati fiero, pero amo quipiyaj talnamiquilisti para quichihuase cati cuali.”

*Jeremías quiitac nopa tatzacuiltylisti cati quiaj-sis Jerusalén*

<sup>23</sup> Na nitachixqui ipan nochí ni tali hasta campa hueli, pero nochí mocajqui tasosololi huan cactoc. Huan niquitac ilhuicacti huan amo quipiyayaya taahuili. <sup>24</sup> Nitachixqui ipan nopa tepeme huan niquitac huihuipicayayaj huan mohuisohuayayaj. <sup>25</sup> Nitachixqui huan ayecmo niquitac yon se masehuali ipan nochí ni tali. Huan nochí totome ya cholojtoyaj. <sup>26</sup> Nitachixqui ipan nochí nopa tamayame cati tahuel taeliltiyayaj, pero mocajque quej huactoc tali huan nopa altepeme mocajque tasosololme pampa TOTECO quintahuiso ica ihueyi cualancayo.

<sup>27</sup> Ya ni cati quijto TOTECO: “Nochi ni tali mocahuas tasosololi, pero amo nijtamisosolos. <sup>28</sup> Elis quej nochí ni tali chocas huan elis quej ipan ilhuicacti nochí elis yayahuic pampa quipiyas tequipacholi por nomasehualhua huan por nopa camanali cati niquijtojtoc. Niquijtojtoc para

niquintatzacuiltis huan amo nimoyolcuepas ten cati niquijtojtoc nijchihuas. <sup>29</sup> Quema masehualme cati itztoque ipan altepeme quicaquise nopa tahuejchihualisti ten nopa soldados cati hualahui, cholose huan motatise campa cuatitamit huan campa tepeme. Nochi altepeme mocahuase tatzitzicatoc, pampa nochi masehualme cholose ica majmajti.

<sup>30</sup> “Masque anJerusalén ehuani amnoquentise amoyoyo cati más cuali huan anmotalilise nochi tamantzitzi cati yejyectzitzi huan anquipase amoixteyolhua para anquinnotzase nopa soldados cati hualahui para amechtasojtase, san tapic. Pampa cati anquintemohuaj para elise amomecahua amechcualancaitaj huan mocualtalíaj para amechmictise. <sup>31</sup> Na nijcaqui se choquisti quej tzajtzi se sihuat quema quipiya iachtohui cone. Pero nopa tzajtzisti eltoc ininchoquilis nomasehualhua. Quijtohuaj: ‘¡Ay techpalehuica pampa ya techmictise ni temictiani!’ ”

## 5

### *Inintajtacolhua Jerusalén huan Judá ehuani*

<sup>1</sup> TOTECO quiijtohua: “Xiyaca ipan nochi calles ipan altepet Jerusalén huan xijtemoca campa hueli sinta anquipantise se tacat cati itztoc xitahuac huan cati tatepanita. Xijtemoca ipan nochitianquis, huan sinta anquipantise se, huajca njapojpolhuis nopa altepet huan amo nijsosolos. <sup>2</sup> Pampa itztoque miyac cati techtestigojtalíaj, pero amo quichihuaj cati quiijtohuaj. San istacatij huan tacajcayahuaj ica inincamanal.”

<sup>3</sup> NoTECO, ta tiquintemohua masehualme cati temachme. Tiquintatzacuiltijtoc momasehualhua pampa tijnequiyaya ma tatepanitaca, pero injuanti amo quipataque ininemilis. Nojquiya tiquinechcapantalijtoc momasehualhua pero amo quicajtoque intintajtacolhua. Quipiyaj inixayac tetic quej se tet. Huan yeca amo quinequij moyolcuepase ten intintajtacolhua.

<sup>4</sup> Pero teipa na niquijto: Ni masehualme itztoque teicneltique. Monejnemiltíaj fiero pampa cati más huihuitique. Amo quiixmatij iojhui TOTECO huan cati xitahuac huan yeca amo tatepanitaj. <sup>5</sup> Huajca ama niyas campa itztoque nopa tayacanani cati más huejhueyi huan niquinccamanalhuis pampa injuanti, quena, quiixmatij iojhui TOTECO huan quimati para noch tamanti tajtacoli quihualica tatzacuiltili.

Pero san tapic pampa injuanti nojquiya quitahuelcajtoque ininTECO. <sup>6</sup> Yeca TOTECO quichihuas para nopa leones cati itztoque cuatita huan nopa tepechichime cati itztoque ipan huactoc tali ama quintzontamiltiquij nopa masehualme campa cholojtejtoque. Huan nopa huejhueyi tecuanime cati inintoca leopardos quinyahualojtinemise ni altepeme. Huan quej nopa, cati hueli cati quisas calixpa ten nopa altepeme, miquis imaco nopa tapiyali. Pampa intintajtacolhua ni masehualme tahuel miyac huan tahuel miyac mosisiniptoque nohuaya.

<sup>7</sup> TOTECO quijtohua: “¿Quenicatza nimechtapopolhuis noch ya ni? Pampa hasta amocone-hua nojquiya techtahuelcajtoque huan quinhueyitalíaj teteyome cati amo nelía Dios. Na niquin-

macac miyac tacualisti, pero inijuanti amo motascamatque. Inijuanti motemactilijque ica ahuilnencayot. Huan ilhuichijtenenque ipan nochicalme cati onca ipan nopa altepet campa ten hueli quichihuayayaj ica inintacayo iniixpa teteyome.

<sup>8</sup> Inijuanti itztoque quej cahuayojme cati tomahuaque cati quitemojtinemij se yehua. Sesen inijuanti quitoquilijtinemi ihuampo isihua. <sup>9</sup> ¿Amo quinamiqui niquintatzacuiltis por nochinintajtacol? Quena, quinamiqui niquincuepilis ni masehualme ten ni tali por nochicati techchihuilijtoque. <sup>10</sup> Inincualancaitacahua tejcose ipan inintepa huan quisosolose inialtepehuela. Quichihuase quej se cati quinempolohua imacuayohua se xocomeca mili, pero quicahua se ome tzonti. Quej nopa quichihuas pampa nopa xocomeca mili cati quinnextía noisraelita masehualhua ayecmo noaxcahua. <sup>11</sup> Nopa masehualme ten tali Israel huan Judá tahuel nechcajcajyajtoque. Quej nopa niininTECO niquijtohua.

### *Tayolmelahua ten tatzacuilstili*

<sup>12</sup> “Inijuanti istacatique ten na pampa quiijtoque: ‘TOTECO amo techtaijyohuiltis. Amo hualas topani yon se tamanti cati amo cuali. Amo tijpantise mayanti yon tatehuilisti.’ <sup>13</sup> Nojquiya quiijtohuaj: ‘Nopa itajtolpanextijcahua TOTECO san quinpectía tahuejchihuaj, pampa TOTECO amo quinnojnotztoc. Nopa tatzacuilstili cati inijuanti quiijtohuaj para hualas topani, huetzis ipan inijuanti. Pero amo huetzis topani.’ Quej nopa quiijtohuaj nopa Judá huan Jerusalén ehuani.

**14** “Huajca nimoTECO Cati Niquinyacana Noilhuicac Ejcahua Ma Tatanitij, quej ni nimitzilhuía, tiJeremías: ‘Pampa quijtojque ya nopa ten notajtolpanextijcahua, na nijtalis nocamanal ipan mocamac. Huan nocamanal elis quej tit huan nopa masehualme elise quej cuahuit. Huan nopa tit quintamitatis.’ ”

**15** Huan TOTECO quijto: “Xiquitaca anisraelitame, na niquinhualicas campa amojuanti miyac masehualme ten se tali cati mopantía huejca. Se tali cati tahuel quipiya chicahualisti huan cati ten huejcajquiya eltoc. Se tali cati amo anquimachilise inincamanal. **16** Nochi inijuanti tahuel mosemacaj tatehuise huan quihualicaj teposti cati tetzontamiltía. **17** Inijuanti quicuaquij nochi cati anquitoctoque cati eltoc para inintacualis amoconebla, amoborregojhua huan amohuacaxhua. Quicuase amohigos huan itajca amoxocomeca milhua. Huan nojquiya quitamisosolose nopa altepeme cati moyahualojoque ica tepamit cati ipan anmotemachíaj.

**18** “Pero masque quej nopa nijchihuas, amo nimechtzontamiltis nochi anisraelitame. Quej nopa niamoTECO niquijtohua. **19** Huan, Jeremías, quema nopa masehualme mitztatzintoquilise: ‘¿Para ten TOTECO Dios techchihuilá nochi ni tamanti cati fiero?’ huajca ta xiquinanquili quej ni: ‘Amojuanti anquitahuelcajque TOTECO huan anmotemactilijque ica sequinoc teteyome ipan amotal. Huajca ama anquintequipanose seyoc tali ehuani ipan inintal.’ ”

**20** “Nojquiya xiquinilhui nopa masehualme ten tali Judá huan Israel quej ni: **21** ‘Xijtacaquilica, anmasehualme cati anhuihuitique cati anquipiyaj amoixteyolhua, pero amo antachiyaj. Huan anquipiyaj amonacas, pero amo antacaquij. **22** Na niamotoTECO nimechtatzintoquilía: ¿Para ten amo antechtepanitaj yon se pilquentzi? ¿Para ten amo anhuihuipicaj yon se quentzi noixpa? Na cati huejcajquiya niquinextili nochí hueyi ame cati onca ipan nochí taltipacti hasta canque tamise huan nopona nijtali xali. Huan hasta ama injuanti amo hueli quiixpanoj ininepa masque tahuel mosisiníaj o tahuel mojmoliniaj. Huajca, ¿amo quinamiqui antechimacasise huan antechhueyichihuase?’ **23** Pero amo, ni masehualme tahuel yoltetique huan tahuel mosisiníaj, pampa mohuejcatalijtoque ten na huan yajque quinhueyichihuatoj teteyome. **24** Huan yon quentzi amo moyolilhuijtoque: ‘Ma tiquimacasica TOTECO Dios pampa yaya cati techmaca nopa at quema ipohual titocaj huan tipixcaj huan quichihua ma onca pixquisti.’ **25** Huan pampa anisraelitame amo antechtepanitaj, nimechquixtilijtoc nopa huejhueyi tatiochihualisti cati nimechmacatosquía. Amotajtacolhua quichijtoc para ma nimechquixtili nochí tamanti cati cuali. **26** Campa nomasehualhua, itztoque tacame cati fiero ininemilis, cati tachiyaj ixtacatzi quej se tapejquet. Quitalíaj taquetzti para quinmasiltise sequinoc masehualme. **27** Huan quej se caja temitoc ica piyome, quej nopa nojquiya

ininchaj temitoc ica tamanti cati quiichtectoque. Huan ye ca inijuanti mohueyichijtoque huan moricojchijtoque. <sup>28</sup> Motomajtoque huan moye jyeccchijtoque, huan tahuel miyac tamanti cati fiero quisehuiquiláj quichihuaj. Amo quintajtolsencahuaj xitahuac cati icnotzitzí, yon amo quinpalehuáj cati teicneltzitzí para ma quiselica cati quinamiqui. <sup>29</sup> ¿Amo anquiitaj para quinamiqui niquin cuepilis masehualme cati quej nopa quichihuaj huan niquinmactilis inintatzacuíttil? Quena, quinamiqui. Quej nopa ni amo TECO ni quijtohua.

<sup>30</sup> “Ipan ni tali panotoc se hueyi tamanti cati tahuel fiero huan temajmati. <sup>31</sup> Nopa tajtolpanextiani istacatij ica cati tayolmelahuaj para panos huan nopa totajtzitzí tanahuatíaj chicahuac ica san cati inijuanti inintequiticayo. Huan quej nopa quin pactía nomasehualhua. Pero ¿taya quichi-huase quema ajsis nopa tonali ten tatzacuíttili?”

## 6

### *Inincualancaitacahua israelitame quiyahualo-huaj Jerusalén*

<sup>1</sup> “¡Ximochololtica aniconehua Benjamín! ¡Xi-jchihuaca campeca para anmomaquixtise nochí cati anhuelise! ¡Xiquisaca ipan altepet Jerusalén huan xicholoca! Xijpitzaca tapitzali ipan altepet Tecoa huan xijchihuaca pocti para ma quiitaca ipan altepet Bet Haquerem. Quena, xiquinyolmelahuaca nochí masehualme para hualahui miyac soldados ten nopa tali cati mopantía ica norte para quisosolose ni tali. <sup>2</sup> Nijchihuas para

ma quisosoloca altepet Jerusalén huan imasehualhua masque tahuel yejyectzi quej se ichpocat. <sup>3</sup> Hualase tamocuitahuiani cati amocualancaitacahua cati mochantise yahualtic ten nopa altepet huan moaxcatise. Quitajcoitase nopa potreros para quintamacase ininborregojhua. <sup>4</sup> Huan amocualancaitacahua quiijtose: ‘Ximocualtalica para titatehuise ica tajctona. Pero teipa quiitase para ya tiotac para pehuas se tatehuilisti. <sup>5</sup> Huan nopa tatehuiani quiijtohuaj: Ma tiyaca tiquintachtequilitij ica tayohua huan ma tijssosolotij inincaltanahuatil huan quej nopa nochipa majmahuise.’ ”

<sup>6</sup> Pampa TOTECO Cati Quinyacana Iilhuicac Ejcahua Ma Tatanitij quej ni quinilhuijtoc: “Xitzontequica cuame para ica anquicojcoyonise itepa altepet Jerusalén para ancalaquise. Ya ni nopa altepet cati monequi anquitatzacuiltise por nochitajtacolhua. <sup>7</sup> Quej se ameli amo quema huaqui, quej nopa nojquiya ipan altepet Jerusalén quisehuiquilijtoque quichijtinemij tajtacoli huan nochitamanti cati amo cuali. Amo teno cati cuali caquisti ipan nopa altepet. San caquisti tatehuilisti huan tachtequisti. Mojmosta nijtachilijtoc inincocolis huan inintacuajcualol cati huala ten itajtacolhua. <sup>8</sup> Ximoxitahuaca, analtepet Jerusalén ehuani, para amo nimechtahuelcahuas huan nimechsosolos huan nijchihuas amoaltepe quej se huactoc tali campa amo aqui itztos.”

*Ya nechca nopa tatzacuiltili*

<sup>9</sup> TOTECO Cati Quinyacana Iilhuicac Ejcahua Ma Tatanitij quiijtohu: “Amocualancaitacahua

quichihuase quej se tacat cati quitequi xocomecat itajca huan quiompahuía quitemohua cati noja mocajtoc hasta amo mocahuas yon se. Quej nopa nojquiya quitemose sesen israelita campa anmotatise hasta amo aqui mocahuas. Huan amo mocahuas yon se.”

<sup>10</sup> Huan niJeremías niquijto: “Pero, ¿ajquiya techtacaquilis quema niquinnyolmelahuas ten nochicati panos? Nochi inijuanti quipixtoque intacacuolis tzactoc huan amo quinequij techtacuolis. Quema niquinpohuilia mocamanal, TOTECO, inijuanti cualanij. Amo quinpactia, yon se pilquentzi. <sup>11</sup> Yeca nitemitoc ica mocualancayo. Nelohui para nijpiya noyolo inihuaya huan amo niqintatzacuilitis pampa tahuel nicualani.”

Huan TOTECO quijto: “Na nijmajcahuas nocualancayo ipan nochicat Jerusalén ehuani. Huan nijchihuas ma huetzi ipan coneme cati mahuiltjtinemij ipan calles, ipan telpocame cati nemij san sejco para quichihuase cati amo cuali, ipan tacame cati mosihuajtijtoque, ipan sihuame cati monamictijtoque huan ipan huehuentzitzti. <sup>12</sup> Huan nopa seyoc tali ehuani moaxcatise ininchajchaj, inimilhua huan inisihuajhua, pampa na nimomatananas para niqintatzacuilitis nochicat masehualme cati itztoque ipan ni tali. Quej nopa nimoTECO niqijtohua.

<sup>13</sup> “Pampa nochicat masehualme quej cati más pisiltzitzti hasta cati huejhueyi, quiixtocaj moaxcatise cati seyoc iaxca huan quitachtequilíaj. Huan ten nopa tajtolpanextiani hasta nopa totajtzitzti, nochicat tahuel tacajcayahua. <sup>14</sup> Inijuanti

quincajcyahuaj nomasehualhua pampa quinilhuíaj para onca tasehuilisti huan para nochieltos cuali quema senquisa oncas tatehuilisti. <sup>15</sup> ¿Anquiiatj para pinahuayayaj nomasehualhua quema quinhueyichihuayayaj teteyome? ¡Amo neli! Amo mopinajque yon se quentzi, yon amo ixchichilijque, yeca temachti huetzise mictoque quema niquntatzacuiltis. Quej nopa nimoTECO niqijtohua.”

*Quihuejcacajtoque iojhui TOTECO*

<sup>16</sup> Huajca TOTECO quinilhui imasehualhua: “Ximocquetzaca campa anitztoque huan xitetatzintoquilica quenicatza elqui nopa ojti cati huejcajquiya anquitoquiliyayaj huan sempa xijpantica nopa ojti cati cuali o nopa ojti cati tatzejzelotic cati anquitoquiliyayaj achtohuiya. Xijtoquilica nopa ojti cati cuali huan anquipantise tasiyajquetzalisti para amotonaltzitzi. Pero amojuanti anquijtojque: ‘Amo tijtoquilise nopa ojti pampa amo techpactía.’ <sup>17</sup> Huajca niquntali tamocuitahuiani ipan nopa altepet cati teyolmelahuasquíaj quejni: ‘Xijtacaquilica quema molinis nopa tapitzali pampa ya nopa amechyolmelahuas para monechcahuía tatehuilisti.’ Pero inijuanti quijtojque: ‘¡Amo tijtacaquilise!’

<sup>18</sup> “Huajca nimechilhuía xijtacaquilica anmasehualme ipan nopa talme cati mopantíaj huejca. Xijmachilica taya ininpantis nomasehualhua ipan altepet Jerusalén. <sup>19</sup> ¡Xijtacaquilica anmasehualme ipan nochitaltipacti! Na nijhualicas se tamanti cati nelía fiero ipan nomasehualhua

quej quinamiqui por intintajtacolhua. Niquintatzacuiltis pampa amo quinequij quitacaquilise nocamanal huan quihuejcamajcahuaj notanahutil. <sup>20</sup> ¿Para ten noja antechhualiquiláj nopa copali ten tali Sabá huan nochí taajhuiyacayot cati patiyo cati anquihualicaj ten huejca ipan sequinoc talme? Ayecmo nijselis amotacajcahualis cati anquitatiyayaj noixpa huan cati ajhuiyac nijmatiyaya.”

<sup>21</sup> Huan nojquiya TOTECO quiijto: “Xiquitaca, na nijtalís tatzacuilti ipan iniojhui nomasehualhua. Huan nochí sentic motepotanise. Motepotanise tetajme, ininconehua, inincalnechcahua huan inihuampoyohua. Nochi huetzise sentic huan tzontamise.”

<sup>22</sup> Huan nojquiya TOTECO quiijto: “Xiquintachilica nopa soldados cati hualahui ten nopa tali cati mopantía ica norte. Motanantoque isoldados se hueyi tali cati eltoc huejca para amechtehuiquij. <sup>23</sup> Mocualtalijtoque ica inincuahuitolhua huan ica inincuataminhua para tatehuise. Inijuanti quipiyaj ininemilis cati tahuel fiero huan amo tetasojtaj. Quema inisoldados nejnentihualahui cahuayoxtipa, caquisti chicahuac quej molinía nopa hueyi at. Tahuel quinequij amechtehuiquij anJerusalén ehuani.”

<sup>24</sup> Huan nopa Jerusalén ehuani quiijtose se ica seyoc: “Tojuanti tijcactoque para nopa soldados cati hualahui techtehuiquij nelía temajmatíaj. Yeca tahuel timajmahuij huan ayecmo tijpiyaj fuerza. Timajmahuij huan titaijyohuáj quej se sihuat cati ya ajsic hora para coneipyas. <sup>25</sup> Huajca

amo xiyaca cuatita, yon amo xinejnemica ipan ojti pampa tocualancaitacahua itztoque campa hueli. Mocualtalijtoque ica inintepos para techmictise. Yeca onca majmajti campa hueli.”

<sup>26</sup> ¡Ay anJerusalén ehuani! Ximoquentica amoy-oyo ten tequipacholi huan ximosehuica ipan cuajnexti huan ximochoquequila quej mictosquía amo-cone cati iyojtzi pampa nimantzi hualase soldados campa amojuanti para amechtzontamiltise.

<sup>27</sup> Huan TOTECO quijito: “Jeremías nimitztalijtoc quej se tacat cati quimolonía teposti para quijitos sinta cuali o amo cuali. Xiquinyye yeco nomasehualhua huan xiquintachili sinta cuali cati quichihuaj huan sinta cuali nopa ojti cati quito-quilíaj o amo.”

<sup>28</sup> TOTECO, nochí inijuanti sentamique huan tahuel mitztaijilhuiáj campa hueli. Nelía yolte-tique. Quipiyaj iniyolo tetic quej nopa teposti bronce huan hierro. Nelía amo cuajcualme.

<sup>29</sup> Masque nopa tebos cilindro cati quipiya ajacat tailpitzasquía chicahuac ipan nopa teposti, huan nopa tit lemenisquía tahuel para quimolonaltis nopa teposti ten iniyolo, san tapic. Amo onca cati tapajpactic ipan iniyolo para tijpantise. San onca cati soquiyo. <sup>30</sup> Cuali niquintocaxtalis: “Masehualme cati TOTECO quinmajcajtoc ipan tasoli quej tebosplata cati amo teno ipati.”

## 7

*Jeremías tayolmelahua ipan tiopamit*

<sup>1</sup> Sempa TOTECO technojnotzqui na, niJeremías, huan techilhui: <sup>2</sup> “Xiya campa icalte notiopa huan

xiquinpo huiliti nopa masehualme nocamanal. Xiquinilhuiti ni camanal: ‘Antali Judá ehuani, xijtacaquilica icamanal TOTECO. Quena, xijtacaquilica amojuanti cati ancalactoque nica para anquihueyichihuase TOTECO.<sup>3</sup> Quej ni quijjtohua TOTECO Cati Quinyacana Iilhuicac Ejcahu Ma Tatanitij, yaya cati Toteco tiisraelitame: Ximonejnemiltica xitahuac huan xijchihuaca cati cuali, huan quej nopa, nimechcahuilis anitztose ipan amotal.<sup>4</sup> Ma amo amechcajcahuaca cati quiijjtohuaj para na amo nijcahuas ma quisosoloca altepet Jerusalén pampa nica eltoc notiopa.

<sup>5</sup> “ ‘San nimechta sojtas sintia anquicahuase nopa talnamiquilisti cati amo cuali huan nochí amotajtacolhua, huan anquinchihuile cati xitahuac nochí sequinoc.<sup>6</sup> Monequi ayecmo anquintaijyohuiltise cati seyoc tali ehuani, huan icnotzitzi huan cahual sihuame. Monequi ayecmo anquinmictise cati amo teno quichijtoque huan ayecmo anquinhueyichihuase teteyome pampa tahuel amechchihuilíaj cati amo cuali.<sup>7</sup> Sinta quej nopa anquichihuase, huajca na nimechcahuilis anitztose ipan ni tali cati niquinmacac amohuejcapan tatahua para nochipa.

<sup>8</sup> “ ‘¿Anmoilhuíaj amo quema antaijyohuise pampa nica eltoc notiopa niamotECO? Amo ximocajcahuaca ica se istacatili.<sup>9</sup> ¿Anmoilhuíaj cuali cati anquichihuaj? Antachtequij, antemictíaj, anmomecatíaj, anistacatij, anquihueyichihuaj nopa teteyot Baal huan nochí nopa sequinoc teteyome cati yancuique.<sup>10</sup> Teipa anhualahuij nica

para anmoquetzase noixpa ipan notiopa para antechhueyichihuase huan anquijtohuaj: Tojuanti timomanahuijtoque ten tatzacuiltili. Teipa sempa anyahuj para anquichihuase tamanti cati amo cuali. <sup>11</sup> ¿Anmoilhuíaj para tachtequini hueli mosentiláj ipan ni tiopamit cati quichijque para techtepanitase? Na niquitztoc nochi ni tamanti cati amo cuali cati nica anquichihuaj. Quej nopa niamotECO niquijtohuua. <sup>12</sup> Xiyaca ipan Silo, nopa altepet cati achtohuiya quipixqui nopa tiopamit para techhueyitepanitase. Xijtachilica taya nijchihuili nopa altepet por inintajtacolhua noisraelita masehualhua. <sup>13</sup> Huan quema amohuejcapan tatahua quichihuayayaj nochi nopa tajtacoli, na nijsenhuiquiliyaya niquinnojnotzayaya para ma moyolcuepaca, pero inijuanti amo techtacaquilijque, yon amo technanquilijque.’”

<sup>14</sup> Huajca TOTECO quiijtohuua: “Na nijsosolo Silo quej nojquiya nijchihuas ica ni tiopamit nica cati anquichijque para ma quihuica notoca. Quena, nijsosolos ni tiopamit cati ipan amotemachíaj para anquiselise tapalehuili huan cati nimechmacac amojuanti huan amotatahua. Nijchihuas san se quej nijchijqui ipan altepet Silo. <sup>15</sup> Huan nimechtitanis xitetequipanotij ipan sequinoc talme quej nijchijqui ica amoisraelita icnhua cati itztoyaj ica norte ipan tali Israel\*.”

### *Taixpanotoque israelitame*

---

\* **7:15** 7:15 O campa mocajque iixhuihua Efraín.

**16** “Huajca, ta tiJeremías, ayecmo ximotatajti por ni masehualme. Amo xichoca por injuanti, yon amo techtajtani ma niquinpalehui pampa amo nimitztacaquilis. **17** ¿Amo tiquita taya fiero quichijtinemij ipan nochi nopa altepeme ten tali Judá huan ipan nochi calles ten altepet Jerusalén? **18** Nopa coneme quisentilíaj cuahuit, huan nopa tetajme tipitzaj para ipan temacase tacajcahualisti. Inisihuajhua quixacualohuaj harina huan quichihuaj pantzi para quitencahuilise nopa sihua tanahuatijquet ten ilhuicac. Nojquiya quinmacaj tacajcahualisti tatoyahuali sequinoc teteyome ten sequinoc talme para techcualancamacase. **19** Pero amo na cati nihuetzis ipan pinahualisti. Eltoc injuanti cati más mosoqui-huise huan mopinahualtise. **20** Huajca ama njititanis nohueyi cualancayo ipan ni lugar. Huan nochi masehualme, tapiyalme, cuame huan xi-huime tamitatase ica nocualancayo. Huan nopa tit amo sehuis.” Quej nopa quiijto TOTECO Cati Más Quipiya Tanahuatili.

**21** Huan TOTECO Cati Quinyacana Iilhuicac Ejcahua Ma Tatanitij, yaya cati ininTeco israelitame nojquiya quiijtohua: “Xijtalica nopa tacajcahualisti tatatili cati antechmacaj ica nopa tacajcahualisti para amoteteyohua huan xiquincuaca amoselti. **22** Pampa ipan nopa tonali quema niquinquixti amohuejcapan tatahua ipan tali Egipto, amo niquinmacac tanahuatili ten tacajcahualisti o tapiyalme tatatilme, **23** pero niquinilhui: ‘Xijtacaquilica nocamanal huan na nielis niamoTeco huan amojuanti anelise anno masehualhua. Xijchihuaca senquisa cati

na nimechnahuatía, huan quej nopa, nochicati anquichihuase, quisas cuali.’<sup>24</sup> Pero inijuanti amo quinejque techtacaquilise. Huan quisehuiquijque quichijque cati inijuanti quinpactiyaya. Quitoquijque inintalnamiquilis pampa tahuel tetic iniyolo huan tahuel fiero. Huajca inijuanti moicancuetque huan más quichijque cati amo cuali, huan amo techtoquijque.<sup>25</sup> Hasta ipan nopa tonali quema amohuejcapan tatahua quisque ipan tali Egipto huan hasta ama, na mojmosta nijsenhuiquijltoc nimechtitanilijtoc notajtolpanextijcahua.<sup>26</sup> Pero amojuanti amo anquinejque anquintacaquilise. San más anmoyoltetilique, amotzontetilique huan anmosisiníaj que amohuejcapan tatahua.

<sup>27</sup> “Huajca, ta tiJeremías, xiquinilhui nochicati na nimitzilhuijtoc, pero inijuanti amo mitztacaquilise. Chicahuac xiquinilhui ten taya ininpantis, pero inijuanti amo mitznanquilise.<sup>28</sup> Huajca xiquinilhui: ‘Amojuanti anitztoque masehualme cati amo anquinequij anquitepanitase TOTECO cati amoDios, yon amo anquinequij anmoxitahuase. San anquisehuiquilíaj anquitoquilíaj nopa ojti cati amo cuali.<sup>29</sup> ¡Ay analtepet Jerusalén ehuani! Anitztoque ipan pinahualisti. Ximoximaca huan xijtepehuaca amotzoncal ica tequipacholi. Xiyaca ximochoquilitij amoselti ipan nopa tepeme pampa TOTECO amechtahuelcajtoc. Amechhuejcamajcajtoc nochicati amojuanti cati anitztoque ama pampa tahuel anquicualancamacatoque.’”

30 Huan TOTECO quiijo: “Nicualantoc pampa nopa masehualme ten tali Judá tajtacolchijtoque noixpa. Quintalijtoque inteteyohua ipan notiopa campa masehualme techhueyitaliyayaj huan quej nopa quichijtoque tahuel amo tapajpactic noixpa. <sup>31</sup> Nojquiya quicualtalijque se taixpamit ten nopa teteyot Moloc † ipan nopa tamayamit Ben Hinom. Huan nopona quintatiyayaj inioquichpilhua huan inisihuapilhua huan quimacayayaj inteteyo Moloc quej se tacajcahualisti tatatili. Nelía fiero para quimacase se masehuali quej se tacajcahualisti. Amo aqui niquilhui ma quichihuaca se tamanti fiero quej nopa, yon amo quema nimoilhujtoc para huelis nijchihuas se tanahuatili quej nopa fiero. <sup>32</sup> Pero ajsis tonali quema nopa taixpamit ten Moloc huan nopa tamayamit cati itoca Ben Hinom ayecmo quintocaxtise quej nopa. Teipa quintocaxtise Tamayamit Campa Temictíaj pampa nopona nopa soldados quinmictise tahuel miyac masehualme. Huan nopona quintalpachose hasta ayecmo oncas lugar campa hueli quintocase. <sup>33</sup> Huan intacayo nopa mijcatzitzi mocahuase para quincuase nopa totome huan tecuanime cati nemij cuatita. Huan amo mocahuas yon se masehuali para quinmajmatis nopa tapiyalme para ma amo quincuaca. <sup>34</sup> Nijtamiltis nochí yejyectzi huicat huan huetzquisti ipan nochí calles ten altepet Jerusalén huan ipan nochí altepeme ten tali Judá. Nojquiya ayecmo caquistis

---

† 7:31 7:31 O Tofet cati elqui seyoc itoca Moloc.

inintoscac nopa telpocame cati mocualtalijtoque para mosihuajtise huan nopa ichpocame cati mocualtalijtoque para monamictise, pampa quisosolos nochí nopa tali.”

## 8

<sup>1</sup> Huan TOTECO quijjtohua: “Ipan nopa tonali nopa tatehuiani cati hualahui quitapose nochí mijca ostome campa quintalpachojoque tanahuatiani huan tayacanani ten tali Judá huan quiquirxtise iniomiyohua. Nojquiya quiquirxtise iniomiyohua totajtzitzí, tajtolpanextiani huan cati hueli masehualme cati itztoyaj ipan Jerusalén huan Judá. <sup>2</sup> Huan quipatahuase iniomiyohua talchi iixpa tonati, metzti huan sitalime cati nomasehualhua quinicnelijque huan quinhueyimatque quej elisquíaj dioses. Huan iniomiyohua ayecmo quinpejpenase, yon ayecmo quintalpachose. San quincahuase ma tepejtoca talchi quej cuitat. <sup>3</sup> Huan quemá tamis inintequi nopa tatehuiani, nopa israelitame cati noja mocahuase yoltoque ipan ni fiero tali, quinequise miquise para amo yase ipan nopa talme campa niquintitanis para tetequipanotij. Quej nopa niquijtojtoc para panos ni amoTECO Cati Niquinyacana Noilhuicac Ejcahua Ma Tatanitij.

### *Tahuel fiero inintalnamiquilis israelitame*

<sup>4</sup> “Nojquiya Jeremías, xiquinilhui para quej ni niinintECO niquijtohua: ‘Quema se acajya huetzí, nimantzi mijquehua huan moquetza. Huan quemá se acajya mocuapolohua ipan ojti, sempá

mocuepa hasta quipantis nopa ojti cati xitahuac.

<sup>5</sup> Pero ni masehualme ten Jerusalén amo tanel-tocaj. Quisehuiquilíaj quitoquilíaj nopa ojti cati amo cuali. Quinequij itztose mocuapolojtoque masque taloitzitzi niquinilhuía ma mocuepacá.

<sup>6</sup> Na nijcactoc taya quijjtohuaj ni masehualme, pero amo nijcactoc yon se cati mocuesohua por itajtacolhua. Amo aqui moyolcuepa huan quijjtohuá nelía fiero cati quichijtoc. Nochi matalo-jtiyahuij para quichihuatij más tajtacoli quej se cahuayo matalohua para tatehuiti. <sup>7</sup> Nopa totot cigüeña quimati quema ajsi tonali para mocuepas ital pampa tantoc tasesecayot. Nojquiya nopa pichón, huan nopa golondrina huan sequinoc tote-me quimati quema mocuepase, pero nomase-hualhua amo quej nopa. Injuanti amo quimati quenicatza na niininTECO niquintajtolsencahuas huan niquintatzacultis por inintajtacolhua.

<sup>8</sup> “ ‘Huajca, ¿para ten anquijjtohuaj: Tojuanti titalnamiquij huan tijpiyaj itanahuatilhua TOTECO? Amo anquimatij notanahuatilhua pampa amoistacatica tajcuilojcahua ica inintajcuilol quipatatoque cati quijjtohuá notanahuatilhua. Huan ama cati quijjtohuá nelía se istacatili. <sup>9</sup> Pero por inintajtacol niquinpinahualtis nopa istacatica tajcuilohuani cati quijjtohuaj talnamiquij. Niquintemactilis para ma quintaijyohuiltica huan ma quinilpica pampa inijuanti quitahuelcajtoque nocamanal niininTECO. Huajca quimachilise para melahuac amo talnamiquij. <sup>10</sup> Yeca nochi inisihuajhua huan inimilhua, nijtemactilis inimaco cati quintanise para ma moaxcatica. Pampa

nochi inijuanti, masque pisiltzitzi o huejhueyi, tajtolpanextiani o totajtzitzi, nochi mojmosta quinequij moaxcatise tamanti cati sequinoc iniaxca. Inijuanti tahuel tacajcayahuaj. <sup>11</sup> Eltoc quej nomasehualhua quipiyaj se hueyi cocot, pero nopa tayacanani san quintaliláj se pilpajtzi cati amo teno ipati. Ya huala taijyohuilisti ipan nomasehualhua, pero quinilhuíaj para nochi eltoc cuali huan oncas tasehuilisti. <sup>12</sup> ¿Pinahuaj quema quichihuaj tamanti quej ni? ¡Amo! Amo pinahuaj yon se quentzi. Yeca huetzis inintacayohua inihuaya nopa sequinoc cati miquise quema niquntatzacuiltis nomasehualhua. Quej nopa niamoTECO niquijtohua.’”

<sup>13</sup> Huan TOTECO quijjtohua: “Nochi inixocomecamil huan inihigo mil, tamiixpolihuise. Nochi cuame cati temacaj inintajca, huaquise. Huan nochi tamanti cati cuali cati na nijsencajtoya para inijuanti, nimantzi ixpolihuise.”

<sup>14</sup> Huan huajca nopa masehualme quijjtose: “¿Para ten timochiyase para timiquise nica? Más cuali ma tiyaca ipan nopa altepeme cati moyahualojtoque ica tepamit huan ma timiquica noppa. Pampa TOTECO toDios techtemactilijtoc para ma techmictica. Eltoc quej techmacatoc ma tiquica at cati quipiya pajti cati temictía pampa tahuel titajtacolchijtoque iixpa. <sup>15</sup> Tojuanti timochiyayayaj para tijpiyase tasehuilisti, pero amo tijpixque. Nojquiya timochiyayayaj para timochicahuase ten campa timococojtoyaj, pero san tijpantijque más taijyohuilisti. <sup>16</sup> Caquisti para ya hualahui tocualancaitacahua ten nepa Dan ica norte. Nochi hualahui ipan cahuayojme cati

chicahuac moquiquinatzaj huan yeca ni tali huipica. Monechcahuíaj nopa soldados cati tahuel temajmatíaj. Inijuanti quintzontamiltise nochi cati quipantise. Quintamisosolose altepeme huan nochi tamanti nopona huan techtzontamiltise nochi timasehualme.”

<sup>17</sup> Huan TOTECO quijto: “Na niquintitanis ni soldados campa amojuanti quej elisquíaj co-huame cati tencocoque cati amo teno huelis an-quinchihuile. Inijuanti amechezacanise huan anmíquise.”

### *Moyolequipacho Jeremías por imasehualhua*

<sup>18</sup> Amo onca pajti para nimoyoltalis ten notaijyohuilis. Tahuel techyolcocohua huan nimocuesohua. <sup>19</sup> Xijtacaquilica quenicatza chocaj nomasehualhua ipan nochi nopa tali. Quijtohuaj: “¿Canque itztoc TOTECO? ¿Amo aqui ipan altepet Jerusalén? ¿Huelis ya techtahuelcajqui yaya cati Totanahuatijca?” Huan TOTECO quej ni quinilhuía: “¿Para ten antechchijtoque manicualani ica amoteteyohua huan amoteteyohua cati hualahui ipan sequinoc talme? ¿Para ten monequi nimechtemactilis inimaco sequinoc para nimechtatzacultis?”

<sup>20</sup> Huan nopa masehualme chocaj huan quiijtohuaj: “Panoc nopa tonali quema tatotonía huan ama ya panotoc pixquisti huan ayemo aqui hualatoc para techmaquixtis.”

### *Jeremías tahuel mocuesohua*

<sup>21</sup> Na nichoca por inintaijyohuilis nomasehualhua. Tahuel nimomajmatijtoc huan amo hueli nijneltoca hasta amo nimolinía. Niitztoc quej se

huihuitzi por nochí nopa tacuajcualoli cati niq- uita. <sup>22</sup> ¿Amo onca se pajti ipan tali Galaad? ¿Amo onca nopona se tepajtijquet cati hueli quinpa- jitis inincocohua nomasehualhua? ¿Amo aquí cati hueli quinpalehuis nomasehualhua?

## 9

<sup>1</sup> Cuali elisquía sinta ipan notzonteco mochihuasquía se pileta ten at para njipiyasquía noixayo para nichocas noja más. Quej nopa na nichocasquía para nochipa. Quena, nichocasquía tonaya huan tayohua por nomasehualhua cati mictoque. <sup>2</sup> Cuali elisquía sinta nihuelisquía niquincajtehuasquía huan niyasquía niitztoti ipan huactoc tali ipan se cali para nejnemini. Quej nopa niquinelcahuasquía nomasehualhua pampa nochí inijuanti tahuel momecatíaj huan quichihuaj cati tahuel fiero.

<sup>3</sup> TOTECO quiijtohua: “Ni masehualme nochipa moilhuíaj quenicatza istacatise. Quej se cuahuitoli quimajcahua cuataminti, inincamac quiqxistía senquisa istacatili. Amo quinequij quiijtose cati xitahuac. Más quichihuaj cati fiero mojmosta. Huan ayecmo techtepanitaj niininTECO.

<sup>4</sup> “Sese monequi momocuitahuis ten nopa mase- huali cati itztoc icalnechca pampa amo hueli ipan motemachis. Monequi sese momocuitahuis ten iicni pampa amo hueli quineltucas. Amo xiquin- pohuili taya mitzpano pampa inijuanti hueli mitzistacahuise huan mitzejelnamiquise. <sup>5</sup> Sese israelita quimati cuali quenicatza tacajcayahuas huan tehuihuiitas. Inijuanti senquisa quichihuaj tajtacoli. <sup>6</sup> Mojmosta quimiyaquilíaj inintajtacol

huan iniistacaticayo. Amo quinequij techixmatise na.” Quej nopa quiijto TOTECO.

<sup>7</sup> Huajca ama TOTECO Cati Quinyacana Iilhuicac Ejcahua Ma Tatanitij, quej ni quiijtohua: “Na niquinpanoltis ipan se taijyohuilisti cati elis quej tit para niquintapajpacchihuas. Niquinyejyecos huan niquintatzejzelolchihuas quej quichihuaj ica nopa teposplata. ¿Taya seyoc tamanti hueli nijchihuas ica nomasehualhua? <sup>8</sup> Ica ininenepil quimajcahuaj istacatili cati tecocohua quej se cuataminti. Huan inihuampo quicamanalhuíaj ica yejyectzi, pero ipan iniyolo moilhuíaj quenicatza quitzontamiltise seyoc. <sup>9</sup> ¿Amo quinamiqui niquintatzacuiltis por nochini tamanti cati quichihuaj? ¿Amo quinamiqui nimomacuepas por cati techchihuilijtoque ni masehualme ten ni tali?” Quej nopa quiijto TOTECO.

<sup>10</sup> “Huan nichocas por nopa tepeme huan nochini nopa cuatitamit huan potreros pampa ama nochiquintatijtoque huan ayecmo aqui itztoc nopona. Ayecmo aquijme huacaxme, yon totome, yon nopa tecuanime cati nemij cuatita pampa nochicholojque.

<sup>11</sup> “Huan altepet Jerusalén nijchihuas ma eli quej se tamontomit tet. Huan nopona quichihuase iniosto nopa tepechichime. Huan nopa altepeme ten tali Judá mocahuase quej se huactoc tali. Ayecmo aqui itztos nopona.”

<sup>12</sup> ¿Ajquiya quipiya miyac talnamiquilisti para quimachilis nochini ni tamanti cati panotoc? ¿Canque itztoque nopa tacajcayajca tajtolpanextiani para ma quiixtomaca ya ni? Ma

techilhuica para ten ni tali mocajtoc quej huactoc tali hasta ayecmo aqui motemaca nejnemis nica.

<sup>13</sup> Pero TOTECO quijtohua: “Nochi ya ni panoc pampa nomasehualhua quitahuelcajque notanahuatilhua cati niquinmacac. Amo quitepanitaque nocamanal huan amo nejnenque quej niquinilhui. <sup>14</sup> San quichijtenque cati injuanti quinpactiyaya huan quinhueyimatque nopa teteyome ten Baal quej intatahua quinnextiljque. <sup>15</sup> Yeca na niDIOS Cati Niquinyacana Noilhuicac Ejcahua Ma Tatanitij huan cati niininTeco israelitame, niquijtohua: Xiquitaca, quej se quinmacas masehualme ma quicuaca se tamanti cati chichic, na niquinmacas nomasehualhua taijyohuilisti huan niquinchihuas ma quiica at cati quipiya pajti cati temictía. <sup>16</sup> Huan quej se quijzelohua xinachti, niquintitanis campa hueli ipan nochi taltipacti ipan talme cati injuanti huan inihuejapan tatahua amo quiixmatque. Huan nopona nojquiya quintehuise ica macheta hasta quintamimictise.”

### *Tahuel chocase ipan Jerusalén*

<sup>17</sup> Nojquiya TOTECO Cati Quinyacana Iilhuicac Ejcahua Ma Tatanitij quijtohua: “¡Xiquinnotzatij nopa sihuame cati chocaj quema miqui se acajya! Xiquintemoca injuanti cati cuali quimatiq quichihuaj inintequi. <sup>18</sup> Ma hualaca nimantzi huan ma chocaca por israelitame. Ma quisa miyac iniixayo ipan iniixteyol. <sup>19</sup> Nochi nopa masehualme ten altepet Jerusalén chocase ica tequipacholi huan ayecmo quimatisse taya quichihuase. Quijtose:

Tahuel titeicneltique pampa techtamisosolojque huan techpinahualtijtoque. Ama monequi tijcategoahuase total huan tochaj pampa quitamisosolojque.’ ”

<sup>20</sup> Ansihuame cati anchocaj, xijtacaquilica ica-manal TOTECO huan xiquinmachtica amoich-pocahua huan amocalnechcahua nojquiya ma chocaca. <sup>21</sup> “Miquilisti ajsitoc ica nochi ichicahualis huan calactoc ipan amochajchaj huan ipan amocaltanahuatil huan quintzontamiltijtoc nochi masehualme. Quintzontamilti coneme cati mahuitiyayaj ipan calles huan telpocame cati mosentiliyyayaj ipan tianquis. <sup>22</sup> Huan xiquinil-huica para quej ni niininTECO niquijtohua: ‘Intacayohua nopa mijcatzitzi mocahuase tepej-toque quej cuitat ipan cuatitamit. Eltos quej trigo cati mocahua campa ya pixcatoque huan ayecmo aqui quinsentilía. Quej nopa nojquiya amo aqui quintalpachos nopa mijcatzitzi.’ ” Quej nopa quijtohua TOTECO.

<sup>23</sup> TOTECO quijtohua: “Cati talnamiqui ma amo mohueyimati ica italnamiquilis. Cati quipyia fuerza ma amo mohueyimati ica ichicahualis. Huan cati tominpiya ma amo mohueyimati ica itomi. <sup>24</sup> Pero sinta se acajya quinequi mohueyimatis, ma mohueyimati pampa cuali techixmati huan quimati para san na niDIOS. Na nitetasojta. Na niitztoc cuali huan nijchihua cati xitahuac. Huan quej ni niitztoc pampa quej nopa techpactía.” Quej nopa TOTECO quijtohua.

<sup>25</sup> Huan nojquiya TOTECO quijto: “Ajsis tonali quema san se niqintatzacuiltis nochi israelitame cati motequiliytoque nopa

machiyot circuncisión ipan intintacayo huan nochí tacame ten campa hueli tali cati amo quichijtoque. <sup>26</sup> Niquintatzacuiltis egipome, edomitame, amonitame, moabitame, Arabia ehuani huan nojquiya amojuanti cati anehuani tali Judá. Pampa masque antacame ten tali Judá anmotequilijtoque nopa machiyot para anquipajpacase amotacayo, amo anquipajpactoque amoyolo noixpa.”

## 10

*Cati quinhueyitalíaj teteyome monequi taijy-ohuise*

<sup>1</sup> Anisraelitame, xijtacaquilica icamanal TOTECO. <sup>2</sup> Quej ni yaya quijjtohua: “Amo xijtoquilica iniojhui nopa masehualme ipan seyoc talme cati motemachíaj ipan sitalime ipan ilhuicac para quimatise taya ininpantis. Amo xiquinimacasica nopa sitalime quej sequinoc quichihuaj. <sup>3</sup> Amo teno ipati cati inijuanti quichihuaj, san huihuitique. Inijuanti quitzontequij se cuahuit huan ica quichijchihuaj se teteyot. <sup>4</sup> Teipa quiyejyecchihuaj itejteno ica plata o ica oro. Teipa quiquetzaj campa quinequij huan ica se martillo quilavosminaj para amo huetzis ten ilugar. <sup>5</sup> Huan nopa teteyot nopona mocahua san moquetztoc xitahuac quej se cuatamajmatili cati quiquetztoque ipan mila para quinmajmatis totome. Nopa teteyot amo hueli camanalti huan monequi quiqechpanose para quihiucase ten se lugar hasta seyoc lugar pampa amo hueli nejnemi. Huajca amo xiquinimacasica nopa teteyome

pampa amo teno hueli amechchihuilise. Amo hueli amechchihuilise cati fiero, yon amo hueli amechchihuilise cati cuali.”

<sup>6</sup> ¡NoTECO, amo onca seyoc Dios quej ta! Pampa ta nelía tihueyi huan tijpiya nochí chicahualisti.

<sup>7</sup> ¿Ajquiya amo mitzimacasis ta cati titanahuatijquet ten nochí talme? San ta quinamiqui mitzimacasise pampa ten nochí talnamiquini huan tanahuatiani cati itztoque ipan ni taltipacti, amo aqui seyoc quej ta.

<sup>8</sup> Nochi masehualme cati quinhueyimatij teteyome nelía huihuitique huan amo teno quimati, pampa se pedazo cuahuit amo teno hueli mitznextilis. <sup>9</sup> Inijuanti nojquiya quihualicaj plata cati quitejtzontoque ten tali Tarsis huan oro ten tali Ufaz. Huan quinmacaj nopa teposchihuani para ma quinchichihuaca teteyome. Teipa nopa teteyome quinquentíaj yoyomit cati azultic huan moradojtic quej se tanahuatijquet cati quijtzontoque cati más quimati yoyonchihuase. <sup>10</sup> Pero TOTECO, san yaya nopa Dios cati melahuac huan cati itztoc. San yaya nopa Tanahuatijquet cati itztoc para nochipa. Quema yaya cunalani, nochí masehualme ipan talme huihuipicaj. Quimati para amo hueli quijjyohuíaj itatzacuilitilis.

<sup>11</sup> Anisraelitame, xiquinilhuica inijuanti cati quinhueyimatij teteyome: “Nopa teteyome amo nelía dioses huan amo quichichijque ne ilhuicacti huan taltipacti. Inijuanti tamiixpatholihuise.”

*Huicat para quihueyichihuase TOTECO  
(Jer. 51:15-19)*

**12** Pero cati tojuanti TOTECO, yaya, quena, quichijchijqui ni taltipacti ica ichicahualis. Huan ica italnamiquilis quitali sesen tamanti campa monequi. Nojquiya ica italnamiquilis quipatajqui ne ilhuicacti. **13** Quema caquisti itoscac TOTECO, mocojcoxonía nopa at ipan ilhuicacti huan tatomoni. Huan quichihua para ipan ni tali ma motanana mixti. Quititani nopa tapetanilot ma huala quema quichihua ma huetzi at. Quiquixtía nopa ajacat campa quiajoctoc huan quichihua ma taajaca.

**14** Quema tijhuicalotis masehualme ica TOTECO, nochí masehualme nesij huihuitique huan amo teno quimachilíaj. Quinchijchihuaj teteyome, pero nopa teteyome quinpinahaultise cati quinchijchijque. San se istacatili para nopa teteyome quipiyaj chicahualisti pampa amo quipiyaj nemilisti, yon amo taijyotilanaj. **15** San tapic nopa teteyome huan taixcopincayome, pampa amo teno ininpati. Huan ajsis tonali quema TOTECO quinixpolihuiltis. **16** Pero Dios cati iTeco Jacob \* amo quej se teteyot. Yaya nopa Tachijchijquet cati quichijqui nochí cati onca. Huan yaya quintapejpeni israelitame para iaxcahua. Yaya itoca TOTECO Cati Quinyacana Ilhuicac Ejcahua Ma Tatanitij.

**17** Huan TOTECO nojquiya quijtohua: “Xijcualtalica amotamantzitz para anquiitzquise amoojhui pampa nimantzi hualase para quiyahualose ni altepet. **18** Ica se talojtzi na nimechquixtis ten ni tali huan nimechtitanilis huejhueyi taijy-

---

\* **10:16** 10:16 O Israel.

ohuilisti. Huan quej nopa anquiyecose nohueyi cualancayo.” Quej nopa quijtohua TOTECO.

<sup>19</sup> Niteicnelti, pampa nelía temajmati nopa cocot cati nijpiya pampa techcoco. Tahuel techcocohua huan hueyi notaijyohuilis. Nococolis amo quipiya pajti para caxanis, huajca monequi niquijyohuis.

<sup>20</sup> Nochaj ixpolijqui huan amo teno nijpiya para nijsencahuas. Quinhuicaque nocone hua huan ama inijuanti tamimijque. Amo mocajqui yon se cati techpalehuisquía para sempa nijcualtal is nochaj ten yoyomit huan nijtal is cortinas.

<sup>21</sup> Nopa tamocuitahuiani ten israelitame nelía huihuitique. Ayecmo quitemohuaj TOTECO huan yeca amo quisas cuali para inijuanti. Ama nochí ininborrego jhua mosemantoque campa hueli. <sup>22</sup> Xijtacaquilica cuali nopa tahuejchihualisti cati hualahui. Nopa soldados cati temajmatijque ten nopa tali ica norte hualahui para quisosoloquij nochí altepeme ten ni tali Judá. Nopa altepeme mocahuase quej se huactoc tali campa quichihuase iniost tecuanime.

<sup>23</sup> Jeremías quijtohua: “NoTECO, na nijmati para se tacat amo iaxca inemilis, yon amo yaya cati quinahuatis cati panos ipan iojhui.

<sup>24</sup> Yeca techtatzaculti para ma nimoxitahua. Pero noTECO, nimitztajtanía amo techtatzaculti chicahuac. Amo techtatzaculti ica mocualancayo pampa huelis nimquis. <sup>25</sup> Más cuali xijmajcahua mohueyi cualancayo ipan nopa talme cati amo mitzixmatij huan cati amo mitzhueyimati, pampa inijuanti quitzontamiltijoque moisraelita masehualhua huan quichijtoc inintal quej se

huactoc tali.”

## 11

### *Quiixpanoque nopa camanali ica TOTECO*

<sup>1</sup> Teipa TOTECO technojnotzqui na, niJeremías, huan techilhui: <sup>2</sup> “Xiquinelnamiquilti nopa masehualme ten tali Judá huan altepet Jerusalén cati quiijtohua nopa camanali cati nijchijqui ica inihuejcapan tatahua. <sup>3</sup> Huan xiquinilhui para quej ni niquijtohua, niDios cati niininTeco israelitame: ¡Tatelchihuali ma eli nopa masehuali cati amo quitepanitas nopa camanali! <sup>4</sup> Pampa quema niquinquixti ipan tali Egipto campa tetequipanohuayayaj san tapic, niquinilhui: Xijtacaquilica nocamanal huan xijchihuaca nochí cati nimechnahuatía. Huan sinta quej nopa antechneltocase nochí amojuanti, anelise annoaxcahua huan na nielis niamоТeco Dios. <sup>5</sup> Huan sinta antechneltocase, nijtamichihuas ica amojuanti cati niquintajtolcahuili huan nijchijqui ica amohuejcapan tatahua huan nimechmacas para ximocahuaca ipan ni tali cati temaca nochí tamanti cati cuali, ni tali campa anitztoque hasta ama.”

Huajca na, ni Jeremías, nijnanquili huan niquilhui: “¡Quej nopa ma eli TOTECO!”

<sup>6</sup> Huajca TOTECO techilhui: “Xiya xitepohuiliti ni camanali ipan nochí calles ten altepet Jerusalén huan ipan nochí altepeme ten tali Judá. Xiquinilhuiti ni camanali: ‘Xijtacaquilica cati quiijtohua nopa camanali ipan nopa camanal sencahualli cati TOTECO quichijqui ica tohuejcapan tatahua huan nochí xijtamichihuaca. <sup>7</sup> Pampa hasta quema niquinquixti amohuejcapan tatahua ipan

tali Egipto huan hasta ama, na nijsenhuiquilitjoc nimechilhuijtihualajtoc anisraelitame para xijta-caquilica cati nimechilhuía.<sup>8</sup> Pero amohuejcapan tatahua amo techtacaquilihque. Yon quentzi amo quichijque campeca para nechcaquise. Sesen ten inijuanti quitoquili nopa amo cuali ojti cati quiyolpactiyaya. Huan pampa amo quinejque techtepanitase, na nijhualicac ininpani nochí nopa huejhueyi tatzacultili cati na nijtalijtoya ipan nopa camanal sencahuali.’”

<sup>9</sup> Teipa TOTECO sempa technojnotzqui huan techilhui: “Nopa masehualme ten tali Judá huan altepet Jerusalén, mosencajtoque san sejco para mosisinise ica na. <sup>10</sup> Inijuanti nojquiya taj-tacolchihuaj san se quej inihuejcapan tatahua. Amo quinequij quicaquise nocamanal huan quinhueyichihuaj teteyome. Quena, nopa israelitame ten tali Israel huan nojquiya ten tali Judá quixpanotoque nopa camanali cati nijchijqui inihuaya inihuejcapan tatahua. <sup>11</sup> Huajca ni-amoTECO niquijtohua para ama niquintitanilis huejhueyi taijyohuilsti huan amo momanahuis yon se. Huan masque techtzajtzilise miyac hueltas para ma niquintasojta, na amo niquintacaquilis. <sup>12</sup> Huan nochí tali Judá ehuani huan altepet Jerusalén ehuani quintzajtzilise ininteteyohua huan quintatilise copali, pero nopa teteyome amo huelise quinmaquixtise ipan inintequipachol huan inintaijyohuolis. <sup>13</sup> Pampa anisraelitame ten tali Judá, anquinpiyaj miyac teteyome quej imiyaca amoaltepehua. Huan amojuanti ipan altepet Jerusalén anquintalijtoque miyac taixpame cati se pinahualisti. Anquipiyaj

taixpame para nopa teteyot Baal quej imiyaca amocalles huan nopona anquitatilíaj copali.

<sup>14</sup> “Huajca, Jeremías, amo ximotatajti por ni masehualme, yon amo xichoca por inijuanti. Pampa na amo niquintacaquilis quema itztose ipan taijyohuilsti huan techtzajtzilise.

<sup>15</sup> ¿Quipiyaj caquihuili nomasehualhua cati niquinicnelía para noja hualase ipan ni tiopamit quema quichijtoque cati amo nijnequi niquitas huan quinhueyichijtinentoche teteyome? ¿Moilhuíaj amo niquintatzacuilitis pampa techtencahuilijtoque miyac nacat ten tacajcahualisti? ¡Amo! Amo niquinmacas paquilsti sempa, yon amo niquincahuilis ma itztoca.

<sup>16</sup> “NiamoTECO niquinitayaya nomasehualhua quej se yejectzi Olivo cuahuit cati temaca miyac itajca. Pero ama niquintitantoc miyac soldados para ma quintatica hasta mocahuase san cuajnexit huan san popocatose. <sup>17</sup> Na, niamoTECO Cati Niquinyacana Noilhuicac Ejcahua Ma Tatanitij nijchihuas quej se tacat cati quitoca se Olivo cuahuit huan teipa tanahuatis para ma quitati. Na niquinchijchijqui noisraelita masehualhua huan ama nitanahuatijtoc para sequinoc ma quintzon-tamiltica. Quej nopa elis pampa nomasehualhua ten tali Israel huan Judá quintencahuilijtoque copali nopa teteyome ten Baal huan tahuel techcualancamacatoque.”

### *Quinequij quimictise Jeremías*

<sup>18</sup> Huan TOTECO techilhui para nocualancaitacahua quinequiyayaj techchihuilise cati

fiero. Huan technextili nochí nopa tamanti catí quisencajtoyaj para techchihuilise. <sup>19</sup> Pero na niitztoya quej se borrego catí amo quimati quema quihuicaj para quimictitij, amo njimatiyaya sintá injuanti quichihuayayaj campeca para techmictise. Injuanti quijjtohuayayaj: “Ma tijtzontamiltica ni tacat huan quej nopa ayecmo tacamanalhuis. Ma tijmictica para ayecmo aquí quielnamiquis.”

<sup>20</sup> Pero ta tiTOTECO Cati Tiquinyacana Moilhuicac Ejcahua Ma Tatanitij, ta titetajtolsencahua xitahuac. Ta tijtachili iniyolo huan inintalnamiquilis ni masehualme. Techcahuili ma niquita quenicatza tiquintatzacuiltis por nochí catí moilhuijtoque techchihuilise. San ipan ta nimotemachía para tijchihuas catí xitahuac.

<sup>21</sup> Huajca TOTECO quijito: “Xiquita quenicatza niquintatzacuiltis nopa masehualme ten altepet Anatot catí quinequij mitzmictise. Injuanti mitzilhuíaj: ‘Amo xitacamanalhui ten TOTECO para amo timitzmictise.’ <sup>22</sup> Pero por ya nopa, nimoTECO Cati Niquinyacana Noilhuicac Ejcahua Ma Tatanitij niquijtohua para miquise inintelpocahua ipan tatehuilsti. Huan inioquichpilhua huan inisihuapilhua miquise ica mayanti. <sup>23</sup> Huan yon se masehuali ten nopona amo momanahuis. Pampa na njittanis ipan nopa tacame ten altepet Anatot se tatzacuiltili catí tahuel temajmati quema ajsis hora para nitetatzacuiltis.”

## 12

*Jeremías quicamanalhuía TOTECO*

<sup>1</sup> TOTECO, ta nochipa tiitztoc tixitahuac quema niya moixpa para nimitztajtanis se tamanti. Huajca ama techcahuili ma nimitzilhui ni tamanti cati techtequipachohua: ¿Para ten mohueyichihuaj nopa masehualme cati fiero ininemilis? Huan ¿para ten itztoque ica paquilsti nopa masehualme cati mosisiníaj? <sup>2</sup> Quej se cati quintoca cuame cati nimantzi monelhuayotíaj, moscaltíaj huan temacaj inintajca, ta tiquinchijqui nopa masehualme huan tiquintiochijtoc huan quisque cuali. Huan inijuanti quijjtohuaj para mitztascamatij por cati tiquinchihuajtij, pero ipan iniyolo amo mitzelnamiquij. <sup>3</sup> Pero ica na amo quej nopa. Pampa ta tiquixmati huan tijyejyecohua noyolo huan tijmati para miyac nimitzicnelía. Huajca xiquinhuica ni masehualme quej borregojme cati quinhuicaj para quinmictitij. Xiquiniyocatali para ma miquica ipan nopa tonali ten miquilisti.

<sup>4</sup> ¿Hasta quema elis huactoc ni tali huan pilintoc nopa sacat? Pampa por nochí cati fiero ni masehualme quichijtoque ayecmo onca tapiyalme, yon totome. Pero ni masehualme noja quijjtohuaj: “Toteco Dios amo techtatzacultis pampa amo quita cati tijchihuaj.”

### *TOTECO quinanquilía Jeremías*

<sup>5</sup> Huajca TOTECO technanquili huan techilhui: “Sinta tisiyahui quema timotalohua ini-huaya tacame cati san iniicxipa yahuij, ¿quenicitza huelis tiquijyohuis timotalos ica cati yahuij cahuajtipa? Sinta campa tamaya timotepotanía huan tihuetzi, ¿taya tijchihuas quema tiitztos ipan nopa cuatitamit nechca hueyat Jordán campa

tahuel tafiero? <sup>6</sup> Hasta mofamilia huan moicnihuа mochijtoque mocualancaitacahua. Inijuanti quichihuаj campeca para quinyoltilanase nochи nopa masehualme para ma mitzchihuilica cati fiero. Huajca amo ximotemachi ipan inijuanti, yon amo xiquineltoquili inincamanal masque mitzcamanalhuise ica yejyectzi.”

### *TOTECO mocuesohua por imasehualhua*

<sup>7</sup> Teipa TOTECO quiijto: “Na niquintahuelcajtoc nomasehualhua cati eliyayaj noaxcahua. Huan niquintemactilijtoc inimaco inincualancaitacahua masque tahuel niquinicneliyaya.

<sup>8</sup> Pampa nomasehualhua cati niquintapejpeni, cualanque nohuaya quej se león cati cualantinemi cuatita. Huan yeca ama niquinchihuilía quej niquincualancaitasquía. <sup>9</sup> Nomasehualhua itztoque quej se totot ica ijjhuiyo cati yejyectzi, pero nopa tzojpilome quinequij quicuase. Na niquijtos: Xihualaca antzojpilome huan antecuanime cati annemij cuatita para ma quicuaquij ininacayo nopa mijcatzitzí ten nomasehualhua.

<sup>10</sup> “Miyac tanahuatiani ten sequinoc talme hualase para quintzontamiltise nomasehualhua cati itztoyaj quej noxocomecamil. Ipan moquejquetzque nomil cati eliyaya nelyejectzi. Quichihuase quej se huactoc tali campa amo teno eli. <sup>11</sup> Quitamisosolose nochи huan eltos quej mochoquilía nopa tali huan mocuesohua pampa amo aqui monejnehuili ten taya cati tatzacuilty hualayaya ipan ni tali. <sup>12</sup> Ipan nochи tepeme hualase soldados cati tasosolose pampa

nopa macheta cati TOTECO quipixtoc imaco, quintzontamiltis nochi masehualme cati itztoque ipan nopa tali. Huan quintzontamiltis ten se lado hasta seyoc lado huan amo aqui momanahuis. <sup>13</sup> Eltoc quej nomasehualhua quitojque trigo, pero quipixcase huitzi. Tequipanojtoque chicahuac, pero san tapic, pampa amo quieliltise cati quitojque. San quipantise pinahualisti pampa ihueyi cualancayo TOTECO motalijtoc ininpani.”

### *Camanali para talme nechca Judá*

<sup>14</sup> Huan quej ni quijito TOTECO ten nochi nopa amo cual masehualme cati itztoque ipan nopa talme cati quiyahualohuaj ni tali cati TOTECO quinmacac israelitame: “Na nimechquixtis ten amotalhua san se quej nijchihuas ica nopa masehualme ten tali Judá. <sup>15</sup> Pero teipa sempa nimocuepas huan nimechtasojtas nochi amojuanti. Huan sempa nimechhualicas ipan amotal quej nojquiya niquinhuilicas tali Judá ehuani ipan intital. <sup>16</sup> Huan sinta amojuanti nimantzi anquitoquilise nopa ojti cati quitoquilíaj nomasehualhua huan antechitase huan antechhueyimatisé quej niamotECO quej anquinextilijque nomasehualhua ma quihueyimatica Baal, huajca anquipyase se cuali lugar tatajco nomasehualhua huan nochi elis cuali para amojuanti. <sup>17</sup> Pero nopa masehualme ten nochi talme cati amo quinequise techtepanitase, sempa niquinquixtis huan niquinixpolihuiltis.” Quej nopa quijito TOTECO.

## 13

*Tanextili ten nopa tzinquechilpicayot*

<sup>1</sup> Huan TOTECO techilhui: “Xiya ximocohuiti se motzinquechilpica cati tachijchihuali ica hilo ten lino, huan ximotzinquechilpi, pero amo xijpajpaca nopa tzinquechilpicayot, yon amo xijcalaqui ipan at.” <sup>2</sup> Huajca na nijcohuato nopa tzinquechilpicayot senquisa quej TOTECO technahuatijtoya huan nimotzinquechilpi. <sup>3</sup> Teipa TOTECO sempa nechcamanalhui huan techilhui: <sup>4</sup> “Xijcui nopa motzinquechilpica cati tijcojqui huan xiya campa nopa hueyat Eufrates huan xijtati ipan se ostot nopa tepexit.”

<sup>5</sup> Huajca na niyajqui campa nopa hueyat Eufrates huan nijtati nopena senquisa quej TOTECO technahuatijtoya. <sup>6</sup> Teipa quema ya panotoya miyac tonali TOTECO techilhui: “Xiya sempa ipan nopa hueyat Eufrates huan xijcuiti nopa tzinquechilpicayot cati nimitznaahuati xijtatiti nepa.” <sup>7</sup> Huajca na niyajqui campa nopa hueyat Eufrates huan nijquixti nopa tzinquechilpicayot ipan nopa ostot campa nijtati jtoya. Pero niquitac para ya tamipalantoya huan ayecmo huelisquia nijtequhuis ipan yon se tamanti. Ayecmo teno ipati eliyaya.

<sup>8</sup> Huajca TOTECO technojnotzqui huan techilhui: <sup>9</sup> “Ya ni quinextía para quej nopa nijsosolos huan nijtamiltis inihuayimatis nopa tali Judá huan Jerusalén ehuani. <sup>10</sup> Pampa nopa masehualme amo cualme huan amo quinequij techta-caquilise. Quichihuaj senquisa cati fiero cati inijuanti quinpactía huan motancuaquetzaj iniixpateteyome cati hualahui ipan sequinoc talme huan quinhueyimatij. Huajca inijuanti nojquiya elise

quej nopa tzinquechilpicayot cati amo teno ipati.  
**11** Pampa quej se tacat moilpía ica itzinquechilpica  
 itzinquechta, quej nopa nojquiya niquinchijqui  
 nopa israelitame ipan tali Israel huan tali Judá  
 para ma technechcahuica huan ma motatzquili-  
 ca ipan na para elise nomasehualhua huan para  
 techhueyitepanitase. Huan nojquiya para elise  
 quej nohueyitis huan noyejyejca. Pero inijuanti  
 amo quinejque techtacaquilise huan mociuapolo-  
 jque. Quej nopa ni amo TECO ni quijtohua.

**12** “Huajca xiquinilhui: ‘Quej ni quijtohua  
 TOTECO cati inin Dios israelitame: Nochi amocue-  
 taxhua temise ica xocomecat iayo. Huan inijuanti  
 mitzilhuisse: Quena, tojuanti tijmatij para  
 melahuac tocuetaxhua temise ica tailisti huan  
 tielise titominpiyani.’ **13** Huajca xiquinilhui:  
 ‘Quej ni quijtohua TOTECO: Amojuanti amo an-  
 quimachilíaj taya quijtosnequi ya nopa. Ya  
 nopa quijtosnequi para na niquinhuintis nochí  
 cati itztoque ipan nopa tali. Ni quinhuintis nopa  
 tanahuatijquet cati mosehuijtoc campa tanahu-  
 atiyaya David, huan nojquiya nopa totajtzitzí, taj-  
 tolpanextiani huan nochí nopa masehualme ten  
 altepet Jerusalén. **14** Quej se quitacanía se vaso ica  
 seyoc para quichihuas cuechtic, na nijchihuas ica  
 tetajme huan inincone hua. Amo ni quinta sojtas,  
 yon amo ni quinta pojpolhuis. Yon se tamanti amo  
 techtzacuilis para ma amo ni quinta tzaculti.’ ”  
 Quej nopa quijto TOTECO.

### *Amo ximohueyimatica*

**15** Israelitame, xijtacaquilica pampa  
 camanaltitoc TOTECO. Amo ximohueyimatica.

**16** Xijhueyichihuaca amo TECO Dios amantzi

quema noja onca tonali. Pero sintia amo anquitepanitase, yaya amechhualiquilis tzintayohuilot para ximotepotanica huan xihuetcica ipan nopa tepeme. Anquitemose taahuili, pero san anquipantise tzintayohuilot.

**17** Pero sintia amo anquitacaquilise icamanal TOTECO, nimochquilis noseltitzi ica tequipacholi pampa amojuanti tahuel amohueyimatij. Chicahuac quisas noixayo ipan noixteyolhua pampa amechhuicase amojuanti cati animasehualhua TOTECO ipan sequinoc talme para antetequipanotij san tapic.

*Camanali para nopa tanahuatijquet*

**18** Xiquilhui nopa tanahuatijquet huan nopa sihua tanahuatijquet: “Xitemoca ten amosiyas yejyectzi huan ximosehuica talchi campa taltepochi pampa nopa yejyectzi corona cati anquipixtoque nimantzi huetzis ten amotzonteco.

**19** Nochi nopa altepeme cati mocahuaj ipan Neguev ica tani quitzacuase inincaltenhua huan amo aqui huelis calaquis nopona. Pero quinhuicase nochia masehualme ten tali Judá ipan sequinoc talme para tetequipanotij san tapic.

**20** “Xiquintachilica nopa soldados cati hualahui ten nopa tali cati mocahua ica norte. Analtepét Jerusalén ehuani, ¿canque itztoque nopa yejyectzitzi borregojme cati na nimechmacac para xiquinmocuitahuica?

**21** ¿Quenicatza anquimachilise quema niquntalis quej amotanahuatijcahua cati eliyayaj amohuampoyohua? Temachti anmomimilose ica

tacuajcualoli quej se sihuat cati ajsitoc ihora para quitacatiltis icone. <sup>22</sup> Huan huelis timoilhuis: ‘¿Para ten techpano nochí ya ni?’ Nochi ya nopa mitzpanos por amotajtacolhua. Yeca ama amechpinahualtise huan amechtehuise nopa soldados cati hualahui.

<sup>23</sup> “¿Hueli mochihuase chipahuaque nopa masehualme ten tali Etiopía cati quipiyaj inincuetaxo yayahuic? ¿O hueli nopa tigre quiixpolos nopa manchas cati quipiya ipan iijhuiyo? ¡Amo! ¡Amo hueli! Quej nopa nojquiya amojuanti cati ya anmomajtoque antajtacolchihuaj amo hueli anquipehualtise para anquichihuase cati cuali.”

<sup>24</sup> Nojquiya TOTECO quijito: “Antechelcajque huan ammotemachijque ipan teteyome cati amo nelía Dios, yeca ama na nimechpasolos quej trigo itasolo cati mosemana ica nopa ajacat cati huala ten campa huactoc tali. <sup>25</sup> Pampa ya nopa cati amehttocarohua. Ya nopa cati na njtamachijtoc para nimechmacas amojuanti. <sup>26</sup> Na noseltitzi nimechpinahualtis quej quema quicuextanana se sihuat huan nelía pinahua. Tanemijya nesis amonemilis cati fiero. <sup>27</sup> Na niquitztoc quenicatza antechtahuelcajtoque huan antechixpanotoque quej se sihuat quicahua ihuehue para yas ica seyoc tacat. Anquinhueyichijtoque teteyome ipan campa hueli mila huan campa hueli tepeme. Anteicneltique amojuanti cati analtepét Jerusalén ehuani. ¿Hasta quema ammotapajpacchihuase ten amotajtacolhua?”

## 14

*Nopa hueyi tahuaquisti*

<sup>1</sup> TOTECO technojnotzqui na, niJeremías, huan techpohuili para ten amo taahuetziyaya. Quiijo:

<sup>2</sup> “Xiquita, nochí Judá ehuani chocaj, huan nopa tanamacani caltzactoque. Nochí masehualme nopena motancuaquetzaj talchi huan nochí altepet Jerusalén ehuani tzajtziж chicahuac. <sup>3</sup> Nopa masehualme cati tominpiyani quintitanij inintequipanojcahua campa ameli para ma quicuitij at, pero quema ajsitoj, amo quipantijque pampa ya tamihuactoya. Huajca mocuepaj ica pinahualisti huan ica tequipacholi pampa nochí ininco cactoc huan amo quimatiж taya quichihuase. Yeca quitzacuaj inintzonteco ica se yoyomit para quinextíaj mocuesohuaj. <sup>4</sup> Nopa tali tahuel huactoc huan tatapacatoc pampa ayecmo huetzi at. Nochí tacame cati miltequitij quitzacuaj inintzonteco ica tequipacholi. <sup>5</sup> Nopa tenan masat quitahuelcahua icona pampa amo onca sacat para quicuas. <sup>6</sup> Huan nopa burrojme cati nemij ipan cuatitamit moquetzaj ipan tepeme campa tahuactoc huan quijyotilanaj ajacat quej nopa tepechichime. Inixteyol hasta quincocohua pampa quitemojtine mij xihuit para quicuase, pero amo quipantíaj.”

*Jeremías quinotza TOTECO por nopa israelitame*

<sup>7</sup> TOTECO, nelía titajtacolchijtoque miyac huan cati tijchijtoque techtelhuia moixpa, pero timitztajtaníaj techpalehui para amo aqui mitzmahuis polos por cati fiero tijchijtoque. Tahuel titajtacolchijtoque ica ta. <sup>8</sup> ¡Ay tiTOTECO! Tiisraelitame ipan ta timotemachíaj. Ta titotamanahuijca quema tiitztoque ipan taohuijcayot. ¿Para

ten techchihuilá quej amo techixmati? Timochihua quej se tise sejcoyoc ejquet ipan ni tali o quej se tinejnenquet cati mocahua san para se yohuali nica tohuaya.<sup>9</sup> ¿Huelis nojquiya acajya mitzmajmati ta huan amo tijmati taya tijchihuas? Ta tijpiya miyac chicahualisti, ¿amo huelis techmaquixtis? TOTECO, ta tiitztoc tatajco ten tojuanti huan nochí quimatiј para tojuanti timoaxcahua huan timitzhueyimatij. Huajca TOTECO, amo techtahuelcahua.

<sup>10</sup> Ya ni cati TOTECO quiijtohua ten nopa masehualme: “Quinpacti Judá ehuani para mohuej catalise ten na. Ayecmo quitoquilíaj noojhui huan ayecmo niquinselis quej nomasehualhua. Yeca amo techpactía cati quichihuaj. Huajca san niquelnamíquis nochí tamanti cati amo cuali cati inijuanti quichijtoque huan niquintatzacuiltis por inintajtacolhua.”

<sup>11</sup> Teipa TOTECO sempa techilhui: “Amo techtajtani ma niquinpalehui ni masehualme. Amo ximotatajti por inijuanti. <sup>12</sup> Quema mosahuase noixpa, na amo nijtachilis. Huan quema inijuanti techhualiquilise tacajcahualisti tatatili huan ofrendas, amo nijselis. San niquintzontamiltis ica tatehuilisti, mayanti huan huejhueyi cocolisti.”

<sup>13</sup> Huajca na niquijto: “¡Ay TOTECO Cati Más Tijpiya Tanahuatili! Inintajtolpanextijcahua ni masehualme quinilhuiј para nochí eltos cuali. Quinilhuiј para amo oncas tatehuilisti, yon mayanti. Tayolmelahuaj para tiquintitanilis tasehuilisti cati huejcahuas.”

<sup>14</sup> Huan TOTECO techilhui: “Nopa tajtolpanextiani san tayolmelahuaj istacatili huan quijtohuaj ya nopa niquipijtojtoc. Amo niqintitantoc, yon amo niquinmacac nopa camanali cati quijtohuaj huala ten na. Amo niquinilhuijtoc yon se camanali. Tepohuilíaj ten tanextili cati amo quiitztoque, yon amo quicactoque. Tepohuilíaj huihuiyot cati san injuanti quiqxintíaj ipan iniyolo.” <sup>15</sup> Huan nojquiya ama TOTECO quijito: “Huajca niqintatzacuiltis nopa istacatica tajtolpanextiani cati tayolmelahuaj para hualas tamanti cati san istacatili. Camanaltij quej elisquía niquntequimacatoc, pero amo niqintitantoc. Quijtohuaj para amo oncas tatehuilisti, yon mayanti. Huajca nopa tajtolpanextiani iniselti miquise ipan tatehuilisti huan ica mayanti. <sup>16</sup> Huan nopa masehualme cati nopa tajtolpanextiani quinyolmelajtoque, inintacayohua quintepehuase ipan nopa calles ten altepet Jerusalén pampa miquise ica mayanti huan ipan tatehuilisti. Huan amo aqui itztos para quintalpachos. Inisihuajhua, inintelpocahua huan iniichpocahua tamiixpolihuise, pampa nijtitanis ipan injuanti se hueyi tatzacuiltili por inintajtacolhua.

<sup>17</sup> “Huajca, Jeremías, ama xiquinilhui nomasehualhua quej ni: ‘Tahuel nichocas tayohua huan tonaya quema ajsis amotatzacuiltil. Amo huelis nimoyoltalis pampa nomasehualhua ya quintzon-tamiltijtose ica macheta huan tepejtose talchi. <sup>18</sup> Quema niyas cuatita, nopona nojquiya niquitas tepejtoc inintacayo cati quintzontamiltijque ica macheta. Huan quema niyas ipan icalles nopa

altepét, nōpona niquitas masehualme cati miquij ica mayanti huan cocolisti. Huan nōpa tajtolpanextiani huan totajtzitzi yahuij campa hueli ipan nōpa tali huan teilhuíaj para nochi eltos cuali, pero amo quimati j taya quichihuaj.” ”

*Jeremías motatajtía por israelitame*

**19** ¡TÓTECO! ¿Tiquintahuelcajqui nochi masehualme ipan tali Judá? ¿Tijcualancaita altepet Jerusalén? ¿Para ten techcocojtoc hasta amo onca pajti? Tojuanti timoilhuiyayaj para hualas tasehuilisti huan para ama, quena, TÓTECO techchicahuas huan techpajtis campa ticocojtoque. Pero ama campa hueli onca taiyohuilsti huan majmajti. **20** TÓTECO, tojuanti tijmatij para melahuac tahuel titajtacolchijtoque ica ta huan tohuejcapan tatahua nojquiya mitzixpanotoque **21** TÓTECO, amo techtahuelcahua pampa sintia ya nōpa tijchihuas nochi mitztaijilhuise huan ayecmo mitztepanitase, yon ayecmo quitepanitase nōpa siyaj campa titanahuatía. Amo techelcahua. Amo xijtamilti nōpa camanali cati tijchijqui tohuaya para techtiochihuas. **22** ¿Ten nochi teteyome cati quinhueyichihuaj ipan nochi talme, yon se amo hueli quichihua ma taquiyahui? ¡Yon se! Amo aqui hueli quitalis at ipan mixti para ma huetzí, pampa amo aqui seyoc Dios. San ta tiTÓTECO huan toDios. Huan tojuanti timotemachijtoque ipan ta pampa ta tihueli tijchihua ni tamanti.

## 15

*Tayolmelahualisti ten nōpa tatzacuiltoni*

<sup>1</sup> Huan TOTECO techilhui: “Masque Moisés huan Samuel hualasquíaj huan moquetzasquíaj noixpa para techtajtanise por ni masehualme, amo niquinpalehuisquía. ¡Xiquinquitxi ni masehualme noixpa! ¡Ma quisaca! <sup>2</sup> Huan sintia israelitame mitzillhuise: ‘¿Canque tiyase?’, huajca xiquinilhui para quej ni niininTECO niquijtohua: ‘Cati niquintalijtoc para miquise ica cocolisti, ma miquica ica cocolisti. Cati niquintalijtoc para miquise ipan tatehuilisti, ma miquica ipan tatehuilisti. Cati niquintalijtoc para miquise ica mayanti, ma miquica ica mayanti huan cati niquintalijtoc para quinhuicase ipan sequinoc talme para tetequipanotij san tapic, ma quinhuicaca ipan seyoc tali.’ <sup>3</sup> Pampa ya nijsencajqui para niquintitanilis nahui tamanti cati fiero para niquintatzacuiltis; niquintitanilis nopa macheta cati temictía, chichime cati quihuilanase inintacayohua nopa mijcatzitzí para quinhuejhuelose; tzojpilome para quincuase huan tecuanime cati quitamiltise cati noja mocahuaj ten inintacayohua. <sup>4</sup> Niquintatzacuiltis chicahuac nochí nomasehualhua por nochí nopa tajtacoli cati Manasés, icone Ezequías, quichijqui ipan altepet Jerusalén quema yaya elqui tanahuatijquet ipan tali Judá. Huan tahuel momajmatise nochí masehualme ten nochí talme ipan taltipacti cati quitachilise cati niquinchihuilijtoc nomasehualhua.

<sup>5</sup> “Amo aquí amechtasojtas, analtepet Jerusalén ehuani. Amo aquí chocas por amojuanti quema hualas amotaohuijcayo. Amo aquí tatzintocas por amojuanti para quimatis quenicatza anitz-

toque. <sup>6</sup> Amojuanti antechtahuelcajtoque huan antechcajque ica amoica. Huajca ama na nimo-matananas para nimechtzontamiltis. Nimech-macatoc miyac tonali para ximoyolcuela hasta ya nisijayqui. Pero amo anmoyolcuelo que. Quej nopa niqijtohua niamotECO. <sup>7</sup> Na nimechquixti ipan inincaltenhua amoaltepehua huan nimech-majcajtoc ipan ajacat quej se cati quitzejzelohua trigo quimajcahua itasolo ajacatipa. Nimechquixtilis nochí cati anquipiyaj masque tahuel miyac ipati. Nimechtzontamiltis nochí annomasehualhua pampa amo anquinequiyaj anquicahuase nopa nemilisti cati fiero para anmocuepase ica na. <sup>8</sup> Oncas más miyac cahual sihuame ipan amotal que xali cati onca iteno hueyi at. Teipa nijchi-huas ma miquica nopa telpocame quema más quipiyaj fuerza inihuaya ininanahua nojquiya. Ica se talojtzi nijchihuas ma huala ipan nopa altepet tequipacholi huan majmajti. <sup>9</sup> Se sihuat cati quinpiyayaya chicome iconehua tapolos pampa quimictilijque nochí iconehua. Elis quej tamis inemilis quema ayemo ajsi ihora. Huan nopa tenantzi pinahuas pampa elis quej amo quema quinpixqui iconehua pampa nochí iconehua quinmic-tise. Quej nopa niininTECO niqijtohua.”

### *Jeremías camanalti*

<sup>10</sup> ¡Nelía niteicnelti! ¡Mamá, más cuál nimictosquía quema nitacatqui! Campa hueli niya nochí techcualancaitaj. Na amo aquí techtahuiquilía, yon na amo aquí nijtahuiquilía, pero nochí techtelchihuaj. <sup>11</sup> TOTECO, sinta amo nijchijtoc cati cuál moixpa, ma quisá

melahuac cati quijtojtoque nopa tacame cati techtelchihuaj. Hasta nimotatajtijtoc moixpa por nocualancaitacahua quema onca tequipacholi huan taohuijcayot.

*TOTECO quintatzacuiltis israelitame*

<sup>12</sup> “Amo aqui huelis quipostequis nopa teposti hierro huan nopa teposti bronce cati huala ten norte. <sup>13</sup> Quej nopa nojquiya ica israelitame. Iniyolo tetic quej teposti. Yeca ama nochí iniricojo huan nochí cati quipixtoque niquinmactilis inincualancaitacahua por nochí nopa tajtacoli cati quichijtoque. <sup>14</sup> Huan nijchihuas inincualancaitacahua ma quinhuicaca para tetequipanotij ipan se tali cati amo quiixmatij huan campa amo quema itztoyaj, pampa tahuel nicualani. Huan nocualancayo eltoc quej se tit cati temachti quintamitatis.”

*Jeremías quinanquili TOTECO*

<sup>15</sup> TOTECO, techelnamiqui huan techpalehui. Xiquincuepili nocualancaitacahua por na. Amo xiquincahuili ma techmictica. Ta tijmati para na nitaijyohuía pampa nimitzicnelía. <sup>16</sup> Quema ta techcamanalhui, nijcajqui mocamanal huan njseli. Huan mocamanal techmacac fuerza quej elisquía se tacualisti para notonal. Tahuel nipaqui pampa mocamanal techmacac paquilsti ipan noyolo pampa na nimoaxca, ta tiTOTECO Cati Tiquinyacana Moilhuicac Ejcahua Ma Tatantij. <sup>17</sup> Na amo quema nimosehuijtoc inihuaya nopa fiero masehualme cati tehuetzquilíaj huan san moilhuíaj quichihuase cati fiero. Pampa ta technojnotzayaya, na nimocajtoc noseltitzi huan

tahuel nicualanqui inihuaya nopa masehualme por inintajtacolhua. <sup>18</sup> ¿Para ten noja nitaijyohuía? ¿Para ten amo hueli pachihui nococohua? ¿Amo quema tamis techcocose? Motapalehuil eltoc quej se atajti cati quemantica quipiya miyac at huan quemantica mopantía huactoc.

### *TOTECO quinanquili Jeremías*

<sup>19</sup> Huajca TOTECO technanquili huan techilhui: “Sinta timocuepas ica na, nimitzchicahuas para huelis techtequipanos. Sinta ayecmo ticamanaltis cati amo teno ipati, huan ticamanaltis nocamanal cati hueyi ipati, huajca noja tielis tinotayolmela-jca. Huan israelitame mocuepase ica ta. Amo monequi para ta tiyas campa inijuanti. <sup>20</sup> Na nimitzchihuas quej se tepamit ten bronce cati tetic huan ohui para cati quicoyonis. Masehualme mitztehuise, pero amo mitztanise pampa na niitz-toc mohuaya para nimitzmocuitahuis huan nim-itzmanahuis, quej nopa nimoTECO niquijtohua. <sup>21</sup> Na nimitzmanahuis ten nopa fiero masehualme cati tahuel mosisiníaj. Nimitzmaquixtis masque tiitztos inimaco.”

## 16

### *TOTECO quitequihui Jeremías quej se tanextili*

<sup>1</sup> Teipa TOTECO sempa technojnotzqui huan techilhui: <sup>2</sup> “Jeremías, ta amo hueli timosihuajtis, yon amo hueli tiquinpiyas mocone hua ipan ni lugar. <sup>3</sup> NimoTECO nimitzilhuis ya ni cati nijtal-ijtoc para ininpantis nopa coneme cati tacatise ipan ni altepet ihuaya nochí ininanahua huan inintatahua. <sup>4</sup> Nochi miquise. Sequij miquise ica

huejhueyi cocolisti cati tahuel quincocos. Huan amo aqui mocahuas para chocas por injuanti, yon amo aqui quintalpachos. Inintacayohua mocahuase tepejtoque talchi quej cuitat para ma lochonica. Sequinoc miquise ipan tatehuilisti huan ica mayanti. Huan inintacayohua quincoco-totzase nopa tzojpilome huan tecuanime.

<sup>5</sup> “Pero ta amo xicalaqui ipan se cali campa quichoquiláj se cati mijqui, yon amo ximocueso por injuanti, yon amo xiquinylchicahua. Pampa na ayecmo niquinmanahuis, yon ayecmo niquin-macas notasehuilis. Huan nojquiya ya niquin-quixtilijtoc noteicnelijcayo huan notasojtacayo. Quej nopa nimoTECO niqijtohua. <sup>6</sup> Quej cati huejhueyi huan cati pisiltzitzi miquise ipan ni tali, huan amo aqui quintalpachos, yon amo aqui quinchoquilis. Inihuampoyohua amo mococose ipan inintacayo, yon amo aqui moximas quej momajtoque quichihuaj para quinextise mocuesohuaj. <sup>7</sup> Amo aqui quihiucas tacualisti para quinyoltalise cati mocajtose yoltoque, masque mijqui ininana o intatata. Yon amo aqui quintitanilise se quentzi xocomecat iayo para quinyolchicahuas.

<sup>8</sup> “Huajca Jeremías, amo xiya ipan nopa pilhuitzitzti cati quichihuaj pampa quimatiij huala cati ohui. Amo ximosehui inihuaya para titacuas o titais. <sup>9</sup> Pampa na, nimoTECO Cati Niquinyacana Noilhuicac Ejcahua Ma Tatanitij huan na cati niiniDios israelitame niqijtohua: Xiquita, ipan monemilis na nijtamiltis campa amojuanti nochí huetzquisti cati onca ipan ni tali huan nochí yejyectzi huicat. Ayecmo aqui quicaquis itoscac se mosihuajtijquet, yon amo quicaquise nopa ich-

pocat cati quichiya para yas ihuaya ipan se nemictili.

**10** “Quema tiquinyolmelahuas israelitame ten nochí ni tamanti, inijuanti mitztatzintoquilise quej ni: ‘¿Para ten TOTECO techyolmelahua para techtitanilis ni huejhueyi taijyohuilisti? ¿Taya tamanti cati amo cuali tijchijtoque? ¿Taya tajtacoli tijpiyaj iixpa TOTECO Dios?’

**11** Huajca ta xiquinilhui para niininTECO nijchijtoc pampa intintahua techtahuelcajque huan quinhueyichijque teteyome ten sequinoc talme. Nojquiya quintequipanojque huan motancuaquetzque iniixpa. Huan inijuanti techelcajque huan amo quitepanitaque notanahuatilhua. **12** Huan amojuanti noja más fiero anquichijtoque que amohuejcapan tatahua. Nelía anyoltetique huan antochontique. Anquichihuaj ten hueli cati fiero cati amo amoyolo quinequi quichihuas. Amo anquinequij antechtacaquilise. **13** Huajca nimechquixtis ten ni tali huan nimechtitanis ipan seyoc tali campa amo quema anitztoyaj amojuanti, yon amotatahua. Huan nopona anquinhueyimatise teteyome tayohua huan tonaya quej anquinequij huan na ayecmo nimechtasojtas yon nimechpalehuis. Quej nopa xiquinilhuiti.

**14** “Pero ajsis tonali quema masehualme cati tatestigojquetzaj ayecmo quijtose: ‘Nijtestigojquetza TOTECO cati quinquixti israelitame ipan tali Egipto’, **15** pero quijtose: ‘Nijtestigojquetza TOTECO cati quinquixti israelitame ipan nopa tali ica norte huan ipan nochí sequinoc talme campa

quintitantoya huan sempa quinhualicac ipan intatal cati quinmacac inintatahua.'

<sup>16</sup> "Pero ama xiquitaca, na niquntitanis miyac tacame para ma quinitzquica israelitame ten campa motatijtoque. Huan niquntitanis miyac tapehuani para ma quintepotztocaca campa motatijtoque ipan tepexit para cholose ten nopa tatzacuiltli cati hualas. <sup>17</sup> Pampa na nijtachili-jtoc nochि cati inijuanti quichihuaj huan niquitztoс nochि inintajtacolhua. Amo hueli qui-tatise cati amo cuali quichihuaj ten noixteyol. <sup>18</sup> Huan niquntatzacultis ome huelta imiyaca por nochि inintajtacolhua pampa quisoquihuijtoque notal ica ininteteyohua cati na niquinijiya huan quitemitijoque ica inintajtacolhua."

*Jeremías camanalti*

<sup>19</sup> TOTECO, ta tinochicahualis huan tinotamanahuijca. Techpalehuía quema niitztoc ipan taijyohuilisti. Hualase masehualme ten miyac talme huan quiijtose: "Totatahua elque tahuel huihuitique pampa quinhueyichijque teteyome cati amo teno ininpati. <sup>20</sup> Masehualme amo hueli mochijchihuilise dioses para quinhueyichihuase inijuanti, pampa nopa tamanti cati quichihuaj amo nelía Dios."

<sup>21</sup> Huan TOTECO quiijo: "Yeca niquinnextilis noyajatil huan nochicahualis, huan quej nopa quimatise para san na niDIOS.

## 17

*Inintajtacol tali Judá ehuani*

<sup>1</sup> “Masehualme ten tali Judá quisehuiquiliij-toque tajtacolchihuaj. Huan inintajtacol eltoc quej se tanahuatili cati monequi quichihuase huan yeca quinijcuilojtoque ica cincel ipan iniyolo para amo quielcahuase quichihuase. Eltoc quej ijcuiliitoc nopa tajtacoli cati quichihuase campa hueli hasta ipan icuacua nopa taixpamit. <sup>2</sup> Amoconebla amo quielcahuase tajtacolchihuase. Inijuanti monechcahuíaj ipan sesen taixpamit para quinhueyichihuase teteyome huan quinechcahuíaj sesen cuahuit cati anquietztoque ica nopa taixcopincayot para nopa fiero dios, Asera, cati eltoc campa hueli ipan tepeme huan tamayamit. <sup>3</sup> Huajca nochí amoricojyo niquinmactilis amocualancaitacahua por nochí nopa tajtacoli cati anquichijtoque. <sup>4</sup> Huan anquipolose nopa yejyectzi tali cati na nimechmacatoya. Huan nimechchihualtis anquicahuase amotal. Huan nimechtitanis para anquintequipanotij amocualancaitacahua ipan sequinoc talme, pampa tahuel antechcualancamacatoque huan nohueyi cualancayo elis quej se tit cati amo sehuis.”

### *Miyac camanali*

<sup>5</sup> Huan TOTECO nojquiya quej ni quiijo: “Tatelchihuali nopa tacat cati motemachía ipan se masehuali huan mohuejcatalía ten na niiTECO. <sup>6</sup> Yaya elis quej nopa xihui tzonti cati amo hueli moscaltía cuali pampa eltoc ipan nopa huactoc tali campa nopa tali quipiya miyac istat. Amo aqui itztoc para quinpalehuis.

<sup>7</sup> “Pero nijtiochihuas nopa tacat cati motemachía ipan na, niiTECO huan san ipan na mochiya huan san na techneltoca. <sup>8</sup> Yaya elis quej se cuahuit cati eltoc iteno hueyat huan inelhuayohua yahuij nelhuejcata hasta quipantíaj at. Nopa cuahuit amo momajmatía quema tatotonía, yon amo mocuesohua masque tahuaquisquía para miyac metzti. Ixihuiyo nochipa moxoxohuilijtoc huan nochí tonali temaca itajca.

<sup>9</sup> “Iniyolo masehualme más tacajcayahua j huan mosisiníaj que nochí tamanti. Amo aqui yajati para quiixmatis nochí tamanti cati amo cuali cati quinequi quichihuas iniyolo masehualme. <sup>10</sup> Pero na nimoTECO niquixmati. Na niquijita iniyolo huan inintalnamíquilis nochí masehualme para niquintaxtahuis quej quinamiqui ica cati quichijtoque ipan nochí ininemilis.”

<sup>11</sup> Se tacat cati moricojchihua ica tamanti cati san quiichtectoc eltoc quej se totot cati quipachohua itecsis seyoc tamanti totot. Teipa nopa tacat quipolos nochí cati quiichtectoc huan mocahuas iseltitzi quej cati hueli huehuentzi cati huuhuitic.

<sup>12</sup> Pero tojuanti timitzhueyichihuaj nopena campa timosehuía para titanahuatis ipan mosiya. Motanahuatil eltoc tahuel cuajcualtzí huan tahuel hueyi, huan eltos para nochipa. <sup>13</sup> ¡Ay TOTECO! Ta cati titotemach tiisraelitame. Nochi cati mitztahuelcahuaj mopinahualtise huan amo quipiyase yon quentzi tatepanitacayot. Inijuanti polihuise quej se tajcuiloli ipan xali, pampa

mitztahuelcajtoque ta, tiTOTECO. Ta tiitztoc quej se ameli campa meya at cati temaca nemilisti.

<sup>14</sup> Techchicahua TOTECO huan nimochicahuas. Techmaquixti huan nielis tamaquixtili, pampa san ta nimitzhueyitalía. <sup>15</sup> Xiquinita nopa masehualme cati techpinajtíaj huan techilhuíaj: “¿Taya ipati icamanal TOTECO cati talojtzitzi titayolmehahua? Sinta nochí nopa camanali ten fiero tamanti nelía huala ten TOTECO, ma quichihua ma pano nimantzi.”

<sup>16</sup> Pero masque techpinajtíaj israelitame, na amo quema nimitztajtanijtoc para xiquintatzaculti, pampa na amo nijnequi ma tzontamica ica tamanti cati fiero. San ta tijmati taya tijchihuas, na amo nijmati. San na niquinpo-huilía senquisa cati ta mocamanal, quej ta tijmati. <sup>17</sup> Amo techtahuelcahua, TOTECO. San ipan ta nimotemachía para techmanahuis quema nitai-jyohuía. <sup>18</sup> Xiquinpinahaulti huan xiquintajiyohuilty nochí cati techquixtíaj. Pero na techmaca tasehuilisti. Xiquintatzaculti nelchicahuac huan xiquintzontamilti.

### *Nopa tonali para mosiyajquetzase*

<sup>19</sup> Huajca TOTECO techilhui: “Xiya huan ximoquetzati campa nopa caltemit ipan altepet Jerusalén campa nochí masehualme calaquij huan campa calaqui huan quisa nopa tanahuatijquet ten tali Judá. Teipa ximoquetzati ipan sesen ten nopa sequinoc caltemit. <sup>20</sup> Huan xiquinlhui nopa tanahuatiani huan masehualme ten tali Judá huan nochí masehualme ten altepet Jerusalén para ma quitacaquilica

nocamanal. <sup>21</sup> Xiquinilhui sintu quinequij itztose, ma amo quichihuaca ten hueli tequit ipan sábado nopa tonali para mosiyajquetzase. Yon ma amo quipanoltica tamamali campa icaltenyo ni altepet. <sup>22</sup> Nojquiya ma amo quiqxistica tamanti cati etic ten ininchaj ipan sábado. Monequi quitepanitase nopa tonali pampa niquiyocatalijtoc para elis tatzejzeloltic. Ni tanahuatili niquinmacac amohuejcapan tatahua, <sup>23</sup> pero inijuanti amo techchihuilijque cuenta, yon amo techtepanitaque. Inijuanti tahuel moyoltetilijque huan amo quinejque techtacaquilise, yon amo quinejque ma niquinxitahua.”

<sup>24</sup> TOTECO quijtohua: “Pero sintu inijuanti techneltoquilise cati na, niininTECO, niquijtohua huan amo quihuicase tamamali ipan sábado, nopa tonali para mosiyajquetzase, huan quitepanitase nopa tonali pampa tatzejzeloltic huan iyoca ten sequinoc tonali. Huan sintu amo quichihuase yon se tequit, huajca inijuanti mocahuase para nochipa. <sup>25</sup> Huan sintu quej nopa quichihuase, se itepan ixhui Tanahuatijquet David mosehuis ipan ihueyi siyaj huan tanahuatijiyas para nochipa nica ipan altepet Jerusalén. Huan nochipa quipiyase se tanahuatijquet huan taya-canani cati tejcose ipan cahuayoyme huan nentinemise ica yejectzi huan ica paquilisti ipan nopa miyac caltemit huan tatajco ten ni masehualme. Huan ni altepet eltos para nochipa. <sup>26</sup> Huan masehualme hualase ten nopa altepeme cati quiyahualohuaj Jerusalén huan ten nopa altepeme ten tali Judá. Hualase ten tali Benjamín

huan ten nopa tachiquilme huan tepeme huan nopa tali ica tatzinta ten tali Judá. Huan qui-hualicase inintacajcahuialis cati tatatili, huan ten harina huan ten copali. Huan quihualicase inintacajcahuialis ipan notiopa para techtascamatise por nochí cati cuali niquinchihuilijtoc. <sup>27</sup> Pero sinta inijuanti amo techtacaquilise, yon amo qui-iyocacahuase nopa tonali tatzejzelotic, o sintia quicalaquise tamamali ipan icaltehua ni altepet quej elisquía san ten hueli tonali, huajca niquin-tatis nochí nopa caltemit. Huan nopa tit ajsis hasta ipan nochí tequicalme huan quintamitatis. Huan amo aqui huelis quisehuis nopa tit.”

## 18

### *Tanextili ipan ichaj nopa soquichijquet*

<sup>1</sup> Huan TOTECO sempa technojnotzqui na, ni-Jeremías, huan techilhui: <sup>2</sup> “Xiya ipan nopa cali campa quichijchihuaj comit huan ajpasti huan nopona nimitzcamanalhuis.”

<sup>3</sup> Huajca na niyajqui ichaj nopa soquichijquet huan nijpantito tequitiyaya. <sup>4</sup> Pero nopa comit cati quichihuayaya amo quisqui cuali quej ya quinequiyaya. Huajca quisosolo huan sempa pe-jqui quichijchihua se cati más cuali.

<sup>5</sup> Huajca TOTECO technojnotzqui huan techilhui:

<sup>6</sup> “¿Amo huelis nijchihuas na ica anisraelitame quej nopa soquichijquet quichijqui ica nopa comit? Anisraelitame anitztoque nomaco quej nopa soquit eltoc imaco nopa soquichijquet.

<sup>7</sup> Ipan se talojtzi hueli niquijtos para quiyahualose se altepet o se tanahuatijcayot, huan quitahuisose

itepa huan quisosolose huan quej nopa elis.  
<sup>8</sup> Pero sinta nopa masehualme ten nopa altepet quicahuase inintajtacolhua, huajca amo nijsosolos quej nimoilhuijtoya. <sup>9</sup> Huan sinta nitayolmelahuas para nijtiochihuas se altepet o se tanahuatijcayot, huajca nijmacas chicahualisti huan nijhueyichihuas. <sup>10</sup> Pero sinta nopa masehualme pehuase tajtacolchihuase huan amo techtepanitase, huajca na nojquiya nimoyolpatas huan amo niquintiochihuas quej nimoilhuijtoya.

<sup>11</sup> “Huajca ama xiya huan xiquinyolmelahuati nochí nopa Judá ehuani huan Jerusalén ehuani. Xiquinilhuiti para niininTECO nijsencajtoc para niquinchihuilis miyac tamanti cati amo cuali. Huajca ma quicahuaca iniojhui cati amo cuali huan ma quichihuaca cati cuali.

<sup>12</sup> “Pero inijuanti quijitoque: ‘Amo ximoton-alpolo pampa tojuanti amo tijnequij tijchihuase cati TOTECO technahuatía. Tojuanti timonejne-miltise quej tojuanti techpactía huan tiquinto-quilise toteteyohua. Tijchihuase senquisa nochí nopa fiero tamanti cati tijnequij tijchihuase ipan toyolo. Huan amo aqui techtzacuilis para amo tijchihuase.’ ”

<sup>13</sup> Teipa TOTECO quijito: “Amo aqui quicac-toc ten se tamanti quej ni, yon ipan nopa talme cati amo techneltocaj. Nomasehualhua quichij-toque se fiero tamanti cati amo aqui quimachilía. <sup>14</sup> Temachti amo atiya nopa chipahuac sitalset cati huetzi ipan nopa teme cati más huejcapan-tic ipan tali Líbano. Huan temachti amo quema

huaqui nopa at cati sesec cati meya ipan tepet Hermón. <sup>15</sup> Pero nomasehualhua amo temachti quej nopa. Amo aqui hueli motemachis ipan inijuanti. Inijuanti techtahuelcajtoque huan quintoquiláj teteyome cati amo teno ininpati huan quintatiláj copali. Quicajtoque nopa ojti cati cuali cati huejcajquiya quitoquiliyayaj, huan ama yahuij ipan ojti cati fiero campa senquisa onca tajta-colot. <sup>16</sup> Yeca inintal elis tasosololi. Huan nochí cati panose nopona san quitachilise huan momajmatise. Quitapose inincamac huan quiojolinise inintzonteco pampa mocahuas tahuel sosolijtoc. <sup>17</sup> Huan niquinsemanas nomasehualhua iniixpa inincualancaitacahua. Niquinsemanas quej nopa ajacat cati huala ica campa hualquisa tonati huan quisemana taltepocti. Huan ipan nopa tonali quemá itztose ipan taijyohuilisti, na niquinnextilis nocuitapa huan amo niquinpalehuis.”

### *Quinequij quimictise Jeremías*

<sup>18</sup> Huajca nopa masehualme quijitoque: “Matiyaca. Ma timocamanalhuica ten taya huelis tijchihuase ica Jeremías. Tojuanti tiquinpiyaj cati tojuanti tototajtzitz para techmachtise, huan talnamiquini para techconsejomacase huan tajtolpanextiani para techilhuise cati TOTECO quijitohua. Huajca amo monequi más icamanal Jeremías. Ma tijtatelhuica iniixpa tequichihuani para ma quimictica. Ma ayecmo tijtacaquilise icamanal.”

### *Jeremías motatajti ica TOTECO*

<sup>19</sup> ¡Ay NoTECO, techpalehui! Xijtacaquili taya quinequij techchihuilise nocualancaitacahua.

<sup>20</sup> ¿Tiquita para quinamiqui techtaxtahuise ica cati amo cuali quema na niquinchihuilitoc cati cuali? Injuanti quisencajtoque se taquetzti para ipan nihuetsis para techmictise. Pero xiquelnamiqui na nimitzcamanalhuijtoc cuali ten injuanti huan nochipa nijchijtoc campeca para niquinmanahuis ten mocualancayo. <sup>21</sup> Huajca ama NoTECO, ininconebla xiquintemactili para ma miquica ica mayanti huan ma quinmictica ica macheta. Huan nopa sihuame ma mocahuaca cahualme huan ma quinpoloca nochi ininconebla. Inihuehuejhua ma miquica ica cocolisti huan inintelpocahua ma quinmictica ipan tatehuilisti. <sup>22</sup> Ma caquisti nopa choquisti cati oncas ipan ininchaj ipan nopa talojtzi quema tiquintitanilis soldados para ma quintachtequilitij, pampa injuanti quichijque se ostot para ma nihuetsi iijtic huan ixtacatzi quitalijoque taquetzti campa nípano. <sup>23</sup> NoTECO ta tiquixmati nochi cati injuanti quisencajtoque quichihuase para techmictise. Huajca amo xiquintapojojpolhui yon amo xiquixpolo inintajtacolhua. Más cuali xiquintzontamilti moixpa huan xiquintatzaculti chicahuac ica mohueyi cualancayo.

## 19

### *Nopa comit cati tapantoc*

<sup>1</sup> Huan TOTECO techilhui: “Xiya ichaj nopa soquichijquet huan xijcohuati se comit ten soquit. Xiquinhuica mohuaya se ome huehue tacame ten ni altepet huan se quesqui totajtzitzi cati ya huehuentzitzti. <sup>2</sup> Huan xiquisaca ipan nopa Tepalcat

Caltemit ica campa hualquisa tonati huan xiyaca ipan nopa tamayamit Ben Hinom. Nepa xiquinilhuis nochí nopa camanali cati na nimitzmacas.

<sup>3</sup> Quej ni xiquinilhui: ‘Xijtacaquilica icamanal TOTECO nochí amojuanti antanahuatiani ten tali Judá huan anmasehualme ten altepet Jerusalén. TOTECO Cati Quinyacana Iilhuicac Ejcahua Ma Tatanitij huan yaya cati ininteco israelitame quej ni quijtohua: Na nijtitanis se tamanti cati tahuel fiero ipan ni lugar. Huan nochí cati quicaquise cati nijchihuas tahuel momajmatise hasta amo huelise tacaquise.

<sup>4</sup> “Pampa nochí nopa israelita masehualme techtahuelcajque huan ni tamayamit quitequihuijque para quichihuase tajtacoli huan miyac tamanti cati quihualica pinahualisti. Huan nopa masehualme quintatilíaj copali nopa teteyome cati inijuanti, huan inintatahua huan nopa tanahuatiani ten tali Judá amo quema quinixmatque, yon amo quema quinhueyichijque. Huan ni lugar quitamixolonijque ica inieso nopa coneme cati amo teno quichijtoyaj.

<sup>5</sup>

Nojquiya quichijchihuilijsque huejhueyi taixpamit nopa teteyot Baal. Huan ipan nopa taixpame quintatíaj ininconehua quej tacajcahualisti para nopa teteyot. Ya nopa eli se tamanti cati na amo quema niquinnaahuati ma quichihuaca, yon amo quema nimoilhui para quej nopa quichihuasquíaj.

<sup>6</sup> Yeca niininTECO niquijtohua: Ajsis tonali quema ni tamayamit ayecmo quitocaxtise: Tofet. Yon ayecmo quitocaxtise: Tamayamit ten Ben Hinom. Ama quitocaxtise: Tamayamit

Campa Temictíaj. <sup>7</sup> Na nijsosolos nochí catí nopa masehualme ten tali Judá huan altepet Jerusalén quisencajtoque quichihuase ipan nopa tatehuilisti. Huan nijchihuas ma hualaca soldados para ma quinmictiquij nica. Huan intacayo niquinmacas nopa tzojpilome huan tecuanime catí nemij cuatita para ma quincuaca. <sup>8</sup> Huan altepet Jerusalén niquixpolos ten ni tali. Huan quej nopa nochí catí panose nica quitapose inincamac huan momajmatise quema quiitase quenicatza nijsosolojtoc. <sup>9</sup> Na nijchihuas para inincualancaitacahua ma quiyahualoca nopa altepet hasta tamis nochí tacualisti. Huan quej nopa, nopa masehualme catí itztose calijtic ten nopa altepet pehuase quincuase ininconehua huan inihuampoyohua.’’

<sup>10</sup> Huan nojquiya TOTECO techilhui ‘‘Huan ama, Jeremías, xijtapana nopa comit iniixpa nopa masehualme catí tiquinhualicatoc nohuaya, <sup>11</sup> huan xiquinilhui para quej ni niquinilhuía, niininTECO Cati Niquinyacana Noilhuicac Ejcahua Ma Tatanitij: ‘Na niquintzontamiltis israelitame huan nochí Jerusalén ehuani quej nijtapanqui nopa comit huan mocajqui payaxtic. Huan quej se comit catí tapani ayecmo hueli quicualchijchihuaj, quej nopa nojquiya elis ica israelitame huan catí itztoque ipan ni altepet. Oncas se hueyi miquilisti huan quintalpachose inimijcahua ipan Tofet catí amo tapajpactic noixpa pampa amo quiaxilis campa quintalpachose nica pampa tahuel miyaqui miquise. Huan intacayohua quinmontonose ipan ni tamayamit. <sup>12</sup> Altepet Jerusalén nijtamiltis

huan nijcahuas amo tapajpactic quej nijchijqui ica nopa tamayamit Tofet, pampa altepet Jerusalén nojquiya nijtemitis ica mijcatzitzit. <sup>13</sup> Huan na niquinso los nochi nopa calme ten altepet Jerusalén huan nojquiya inincaltanahuatil nopa tanahuatiani ten tali Judá. Ni quinso los nochi calme campa quitatijque copali para quinhueyimatisse sitalime huan nochi campa quito yajque tacajcahualisti para sequinoc teteyome huan nochi nica mocahuas amo tapajpactic noixpa quej nopa fiero tamayamit ten Tofet.”

<sup>14</sup> Teipa na niJeremías ni quisqui ten nopa tamayamit Tofet campa TOTECO techtitantoya ma nitacamanalhuiti icamanal. Huan teipa niyajqui nimoquetzato iixmelac itiopa TOTECO huan quej ni niquinilhui nochi nopa masehualme: <sup>15</sup> Quej ni quiijtohua TOTECO Cati Quinyacana Ilhuicac Ejcahua Ma Tatanitij huan cati toTeco tiisraelitame: “Na nijtitanis ipan ni altepet huan ipan nopa altepeme cati mocahuaj nechca nochi nopa tamanti cati amo cuali cati ni quiijtojtoc nijtitanis, pampa inijuanti tahuel moyoltetilijque para amo techtacaquilise.”

## 20

### *Nopa totajtzi Pasur, icualancaitaca Jeremías*

<sup>1</sup> Huan Pasur, icono Imer, cati eliyaya totajtzi huan eliyaya se tayacanquet ipan itiopa TOTECO quicajqui cati na, niJeremías, ni quiijtohuayaya. <sup>2</sup> Huan techitzqui huan tanahuati ma techhuitequica huan ma techmetzcua pachoca ica cuahuit

nechca nopa caltemit Benjamín nechca itiopa TOTECO.

<sup>3</sup> Huan tonili, Pasur techtojtonqui huan niquilhui: “TOTECO quipatatoc motoca huan masehualme ayecmo mitztocaxtise Pasur. Ama mitztocaxtise Magor Misabib cati quijtosnequi: ‘Nopa Tacat Cati Itztoc Ipan Hueyi Majmajti.’ <sup>4</sup> Pampa TOTECO quititanis se hueyi majmajti ipan ta huan ipan nochí mohuampoyohua. Huan tiquitas quenicatza nochí inijuanti miquisse ica macheta inimaco inincualancaitacahua. Nochi Judá ehuani niquintemactilis imaco nopa tanahuatijquet ten tali Babilonia. Sequij yaya quinhuicas ipan ital para quitequipanotij san tapic huan sequij quinmictis nimantzi. <sup>5</sup> Huan niquincahuilis para mocualancaitacahua ma quitachtequilica altepet Jerusalén. Nochi tamantzitzí cati patiyo cati quipiya ni altepet, nochí nopa piltetzitzí cati tahuel pajpatiyo, nopa oro huan nopa plata cati iniaxca nopa tanahuatiani; nochí quihiuicase tali Babilonia. <sup>6</sup> Huan ta, Pasur, huan mochan ehuani huan nochí moteixmatcahua antetequipanotij san tapic ipan tali Babilonia huan nepa anmiquise. Nopona timquis ta, huan nochí cati tiquincajcajqui huan tiquinyolmelajqui istacatili para nochí quisasquía cuali.”

### *Jeremías quitaijilhuía TOTECO*

<sup>7</sup> NoTECO, ta techchihualti ma nieli motajtolpanextijca. Huan na nimotemaca para nijchihuas. Tiitztoc más chicahuac que na huan techtani. Pero xiuita, ama nochí masehualme ipan ni altepet san techhuetzquilíaj huan techpinajtíaj. <sup>8</sup> Pampa sesen huelta quemá nicamanalti,

monequi niteyolmelahuas ten tatehuilisti huan tasosololisti. Huan yeca por nopa camanali cati techmacatoc, masehualme techpinajtíaj huan techhuetzquilíaj. Huan nochí quitequihuíaj notoca quej se ahuilcamanali.<sup>9</sup> Pero amo hueli nijcahuas para nitacamanalhuis mocamanal. Amo hueli niquijtos para ayecmo nicamanaltis nopa camanali cati ta techmaca o ayecmo nimitzelnam quis pampa mocamanal eltoc ipan noyolo quej se tit cati quitatía noomiyohua. Huan masque nijchihua campeca para niquijyohuis huan amo nitacamanalhuis, amo nihueli.

<sup>10</sup> Campa hueli nijcaqui para masehualme techejelnamiquij huan tahuel onca majmajti campa hueli. Quiijtohuaj para techtatelhuise. Hasta nopa masehualme cati eliyayaj nohuampoyohua techtajtachilíaj pampa quinequij quiitase para nijchihua se tenijqui para huelis techtatelhuise. Huan quiijtohuaj: “Tiquitase sinta se hueli quicajcayahuas huan tiquitzquise huan tijtacuepilise.”

<sup>11</sup> Pero ta, TOTECO, tiitztoc nohuaya quej se hueyi tatehuijquet cati amo aqui hueli quitani. Huan moixpa motepotanise nochí cati techtepotztocaj. Huajca inijuanti amo huelis techtanise. Ta tiquinechcapantalis huan tiquinpinahaultis. Quena, itzose ipan pinahualisti para nochipa. <sup>12</sup> Ay NoTECO Cati Tiquinyacana Moilhuicac Ejcahua Ma Tataniij, ta tiquinyejyeco cati xitahuaque moixpa huan tiquixmati inintalnamiquilis huan iniyolo. Techcahuili ma niquita quenicatza tiquincuepilis ni masehualme cati techejelnamiquij pampa

na nijtalijtoc momaco nochí catí inijuanti techchihuilijtoque.

<sup>13</sup> Nihuicas para nijtascamatis TOTECO. Ni-jhueyichihuas TOTECO pampa na catí niteicneltzi techmanahui inimaco catí techtaijyohuiltyayaj.

### *Jeremías mocuesohua*

<sup>14</sup> Tatelchihuali ma eli nopa tonali quema nitacatqui. <sup>15</sup> Tatelchihuali ma eli nopa tacat catí quiyolmelahuato notata para ya tacatqui se ioquichpil. <sup>16</sup> Ma tzontami nopa tayolmelajquet quej nopa altepeme ten Sodoma huan Gomorra catí huejcajquiya TOTECO quintamisosolo yon amo quintasojtac. Nopa tayolmelajquet semilhuit ma quicaqui tzajtzisti ten tatehuilisti, <sup>17</sup> pampa amo techmicti quema nitacatqui. Más cuali nimicosquía ipan iiji nonana. Quej nopa, iiji nonana eltosquía quej noosto. <sup>18</sup> ¿Para ten nitacatqui? Pampa ipan nochí nonemilis san nijpantijtoc taijyohuilsti huan tacuajcualoli. Huan tamis nonemilis ica pinahualisti.

## 21

### *Quisosolose Jerusalén*

<sup>1</sup> Huajca nopa Tanahuatijquet Sedequías quiti-tanqui Pasur, icone Malquías huan nopa totajtzi Sofonías, icone Maasías para ma techitaquij na, niJeremías, huan para quej ni ma techilhuiquij:

<sup>2</sup> “Xijtajtani TOTECO para ma techpalehui pampa Tanahuatijquet Nabucodonosor ten tali Babilonia hualajtoc para techtehuis. Huan huelis TOTECO techtasojtas huan quichihuas se tiochicahual-nescayot quej quichijqui huejcajquiya, huan ica

ya nopa quichihuas para Nabucodonosor ma quinijcueni isoldados para amo techtehuise.”

<sup>3</sup> Huan na niJeremías niquinilhui: “Xiyaca sempa campa Tanahuatijquet Sedequías huan xiquilhuica, <sup>4</sup> para quej ni quijjtohua TOTECO Dios ten israelitame: ‘Sedequías na nijchihuas para nochí amotepos cati ica antatehuíaj ma elica amo teno ininpati. Huan yeca amo huelis anquintehuise nopa Babilonia ehuani huan nopa caldeos cati amechyahualojtoque. Huan niquinhualicas amocualancaitacahua hasta tatajco ten ni altepet, <sup>5</sup> huan na huan inijuanti timechtehuise ica nochí nohueyi chicahualis pampa tahuel nicualantoc ica amojuanti. <sup>6</sup> Huan niquinmictis nochí cati itztoque ipan ni altepet. Míquise nochí masehualme huan tapiyalme ica se hueyi cocolisti cati na njtitanis.’” <sup>7</sup> Huan teipa TOTECO quijjto: “Nijtemactilis Sedequías cati tanahuatía ipan tali Judá imaco Tanahuatijquet Nabucodonosor ten tali Babilonia. Nojquiya niquintemactilis imaco nochí isoldados Sedequías huan itayacancahua huan nochí nopa masehualme cati noja mocahuase ipan ni altepet huan cati amo mijque ica cocolisti, tatehuilisti huan mayanti. Huan Nabucodonosor quintamimictis. Amo quintapojpolhuis, yon amo quintasojtas.

<sup>8</sup> “Nojquiya xiquinilhui masehualme para quej ni niquijtohua, niininTECO: ‘Xiquita ama njtalijtoc amoixpa nopa ojti para nemilisti huan nopa ojti para miquilisti para anquitapejpenise. <sup>9</sup> Pampa nochí cati mocahuase ipan ni altepet míquise ipan tatehuilisti, ica mayanti huan ica cocolisti. Pero nochí cati quisase ten ni altepet huan

motemacase ica nopa caldeos, quimanahuise ininemilis. <sup>10</sup> Pampa na njtapejpenijtoc para senquisa nijsosolos ni altepet. Na nimochijtoc niicualancaitaca ni altepet huan amo niihuampo. Yeca hualas nopa tanahuatijquet ten tali Babilonia huan quitamitatis.’ ” Quej nopa quiijtohua TOTECO.

*Itatzacuiltlis nopa tanahuatijquet ten Judá*

<sup>11-12</sup> Nojquiya TOTECO quiijto: “Xiquilhui nopa tanahuatijquet ten tali Judá cati itztoc se iteipan ixhui David quej ni: ‘Xitacaquili icamanal TOTECO. Yaya ya mocualtalijtoc para mitztajtolsencahuas nimantzi por noch tamanti cati amo cuali cati tijchihua. Huajca mojmosta xiquinchihuili cati xitahuac nopa masehualme cati tiquintajtolsencahua. Xijpehualti xijchihua cati xitahuac semilhuit. Xijmanahuica cati amo quipiya fuerza inimaco cati quitajyohultíaj para nocualancayo amo huetzis mopani quej se tit cati amo aqui huelis quisehuis.

*TOTECO quintatzacuiltis Jerusalén ehuani*

<sup>13</sup> “‘Pampa xiquita, analtepet Jerusalén ehuani, na nimochijtoc amocualancaitaca. Nimechtehuis masque amoaltepe eltoc huejcapa huan anmo-hueyimatij huan anquijtohuaj: Tojuanti tiitz-toque temachti ipan ni tepet. Nica amo aqui huelis calaquis para techtehuis. <sup>14</sup> Pero na noseltitzi nimechtatzacuiltis para nimechtzontamiltis por amotajtacolhua. Huan nojquiya njticuiltis noch cuatitamit huan quitatis noch cati nechca. Quej nopa niamotECO niquijtohua.’ ”

## 22

### *Camanali para Tanahuatijquet Sedequías*

<sup>1</sup> Teipa TOTECO techilhui: “Xiya ipan ichaj noipa tanahuatijquet ten ni tali Judá cati mosehuía ipan isiya David ten huejcajquiya huan xiquilhuiti: <sup>2</sup> ‘Xijtacaquili icamanal TOTECO, ta titanahuatijquet ten tali Judá cati timosehuijtoc ipan isiya Tanahuatijquet David ten huejcajquiya. Nojquiya ma quitacaquilica nochi motequipanojcahua huan momasehualhua. <sup>3</sup> TOTECO amechilhuía: Xijchihuaca nica cati xitahuac huan cati cuali. Xiquinmanahuica masehualme cati taijyohuiáj inimaco cati quintaijyohuiltáj. Amo xiquincajcyahuaca yon amo xiquintachtequilda noipa seyoc tali ehuani, yon cati icnotzi o cati cahual sihuame. Xiquinchihuila cati cuali. Huan ayecmo xiquinmictica masehualme cati amo teno quichijtoque. <sup>4</sup> Sinta anquicahuase nochi noipa fiero tamanti cati anquichihuaj, na njmanahuis ni tali huan sempa niquintalis tanahuatiani cati mosehuise ipan isiya Tanahuatijquet David. Huan amotanahuatijcahua calaquise ipan icaltehua ni altepet ipan carros huan ipan cahuayoje inihuaya intapalehuijcahua huan oncas paquilsti para nochi masehualme. <sup>5</sup> Pero sinta amojuanti amo anquitacaquilise nocamanal, huajca na nimotestigojquetza noseltitzi huan niquijtohua para ni caltanahuatili mocahuas tasosololi. Quej noipa niamoteco niquijtohua.’ ”

<sup>6</sup> Pampa TOTECO quej ni quijtojtoc ten ni caltanahuatili: “Niquicnelía ni caltanahuatili quej noipa yejyectzi tali Galaad huan quej

nopa yejyectzi cuatitamit cati xoxohuic ten tali Líbano. Pero nijtamisosolos huan nijcahuas quej huactoc tali huan ayecmo aqui itztos ipani. <sup>7</sup> Na niquinnotzas masehualme cati tasosolohuaj para ma hualaca ica inintepos huan ma quisosoloca. Inijuanti quiquixtilise nochí nopa yejyectzitzí cuatetomit ten nopa caltanahuatili huan quintalise ipan tit para ma tataca.

<sup>8</sup> “Huan miyac masehualme ten miyac talme panose ipan ni altepet cati tasosololi huan moilhuise se ica seyoc: ‘¿Para ten TOTECO quichijqui ya ni? ¿Para ten quisosolo ni hueyi altepet?’ <sup>9</sup> Huan quinnanquilise quej ni: ‘Quisosolo ni altepet pampa masehualme cati itztoyaj nica quielcrajque ininTECO. Quiixpanoque nopa camanali cati TOTECO Dios quichijtoya inihuaya huan quinhueyichijke huan quintequipanoque teteyome ten sequinoc talme.’”

### *Jeremías camanalti ten Joacaz*

<sup>10</sup> Amo xichocaca por nopa Tanahuatijquet Josías cati mijqui, yon amo ximocuesoca por ya. Más cuali xichocaca por nopa tanahuatijquet cati quihiucase ipan seyoc tali huan ayecmo quema mocuepas sempa ipan ital campa tacatqui. <sup>11</sup> Pampa TOTECO camanaltitoc ten Tanahuatijquet Salum\*, icono Josías cati pejqui tanahuatía ipan tali Judá quema mijqui itata. Huan quej ni quijito: “Salum ayecmo quema mocuepas nica

---

\* **22:11** 22:11 O Joacim. Itoca eliyaya Joacim, pero quitocaxti Salum pampa quej Salum cati achtohuiya elqui tanahuatijquet, amo huecajqui tanahuati.

ipan ital,<sup>12</sup> pampa miquiti ipan seyoc tali campa quihuicaque para tetequipanoti san tapic.”

*TOTECO camanalti ten Joacim*

<sup>13</sup> “Fiero elis para Tanahuatijquet Joacim pampa quinfuerzajhui ma tequitica chicahuac nopa masehualme cati quichijchihuilijque icaltanahuatil, pero amo quintaxtahui. Yeca nijtatzacuiltis.<sup>14</sup> Yaya quijito: ‘Nimochijchihuilis se hueyi caltanahuatili cati quipiyas miyac cuartos huan nijchijchihuilis miyac ventanas. Nopa tapamit nijchijchihuas ica tiocuahuit huan nijpas ica chichiltic.’

<sup>15</sup> “Pero Tanahuatijquet Joacim, amo tielis se cuali tanahuatijquet pampa tijpiya tiocuahuit cati mitzyahualohua ipan se yejyectzi caltanahuatili. Motata huejcajqui tanahuati pampa yaya quichijqui cati cuali huan amo techicoicneli. Quichijqui cati xitahuac ipan noch tamanti huan yeca nijtiochijqui.<sup>16</sup> Yaya quinpalehui cati teicneltzitzti cati amo teno quipixque huan quintajtolsencajqui xitahuac. Huan noch cati motata quichijqui, quisqui cuali. ¿Amo ya nopa cati quinequi quijitos para techixmati? Quej nopa niDIOS niquijtohua.

<sup>17</sup> “Pero ta, san timoilhuía quenicatza huelis timoaxcatis tamanti cati sequinoc iniaxca huan san titacajcayahua. Tiquinmictía cati amo teno quichijtoque. Tiquintajyohuiltía cati teicneltzitzti. Huan titanahuatía chicahuac huan ica miyac cualanti.”

<sup>18</sup> Huan nojquiya TOTECO quijito ya ni ten nopa tatzacuiltli cati quititaniliyaya Joacim, icone Josías, cati pejqui tanahuatía quema mijqui itata.

Quiijto: “Ma amo aqui chocas por Joacim quema miquis. Ifamilia amo quiijtos: ‘¡Ay, panotoc cati fiero huan mijqui toicni!’ Huan imasehualhua ma amo mocuesoca quema quiitase ya mijqui inintanahuatijca. <sup>19</sup> San quitepanitase itacayo quej elisquía se burro. San quihuahuatatzase para quiqxistise calixpa ten altepet Jerusalén. Huan quicahuatij campa quitepehuaj tasoli huan cuitat.”

*Camanali ten altepet Jerusalén ehuani*

<sup>20</sup> AnJerusalén ehuani, xichocaca pampa ayecmo aquijme nochí nopa talme cati amechpalehuiyaj. Xiquintemotij ipan tali Líbano, huan xiquintzajtzilitij chicahuac ipan tali Basán o xiquintemotij campa hueyat Jordán. Nelía nimechilhuía para ayecmo anquinpantise pampa nochí ya mijque. Huan amo mocajqui yon se para amechpalehuis. <sup>21</sup> Quema anitztoyaj cuali na nimechyolmelajqui cati anmopantisquía teipa, pero amojuanti antechnanquilijque: “¡Amo techcuatotonil!” Huan quej nopa anquichijtihualajque hasta quema pejqui altepet Jerusalén. Senquisa amo anquinequij antechcaquise. <sup>22</sup> Huan ama nochí amotayacancahua ixpolihuise. Elis quej quinhuicas se hueyi ajacat huan quinhuicase nochí amohuampoyohua ipan sequinoc talme para tetequipanotij san tapic. Huan huajca quena, anmoilhuise ten nochí amotajtacolhua huan tahuel anpinahuase. <sup>23</sup> Ama nopa tanahuatijquet paqui pampa itztoc ipan se yejyectzi caltanahuatili cati tachijchihuali ica

nopa tiocuame cati onca ipan tali Líbano. Pero amo miyac tonali polihui para yaya chocas huan taijyohuis quej se sihuat cati ya ajsic hora para quitacatiltis icone.

*TOTECO quitajtolsencahuas Jeconías*

<sup>24</sup> Huan ta tiJeconías † cati tiicone Joacim cati tanahuatijquet ten tali Judá, masque tielisquía nopa anillo ica nosello cati nijhuica ipan nomane-jmat, nimitzquixtis. <sup>25</sup> Huan nimitztemactilis inimaco cati tahuel tiquinimacasi cati mitztemohuaj para mitzmictise. Nimitztemactilis imaco nopa Tanahuatijquet Nabucodonosor ten tali Babilonia huan inimaco nopa caldeos. <sup>26</sup> Ta huan monana cati mitztacatilti, nimechquixtis ten ni tali huan nimechtitanilis ipan se tali cati amo anquixmatij huan nopona anmiquise. <sup>27</sup> Huan masque tahuel anquinequise anmocuepase sempa ipan ni tali campa antacatque, amo quema anmocuepase.

<sup>28</sup> Pampa ni tacat Jeconías ayecmo teno ipati. Eltoc quej se plato cati tapantoc huan cati amo aqui quinequi. Yeca ya huan iconehua niquinquixtis huan yase ipan seyoc tali cati mopantíaj huejca para tetequipanotij. <sup>29</sup> ¡Nochi ipan ni tali, xijtacaquili icamanal TOTECO! <sup>30</sup> TOTECO quijto-hua: “Xiquipuilo para ni Jeconías amo quinpixqui iconehua. Quitamipolo nochitonalí ipan inemilis. Huan yon se icone amo quema mosehuis ipan isiya David para tanahuatis ipan tali Judá.”

## 23

*Teipa se ome mocuepase ten nopa seyoc tali*

---

† **22:24** 22:24 O Conías.

<sup>1</sup> TOTECO quiijtohua: “Fiero elis para nopa tayacanani ten israelitame cati inintequi elqui para quinmocuitahuise nomasehualhua cati itztoque quej noborregojhua. Inijuanti amo quinmocuitahuijque, san quinsosolojque huan quinsemanque.”

<sup>2</sup> Huajca ama TOTECO cati toDios tiisraelitame quej ni quinilhuía nopa tacame cati quinmocuitahuíaj imasehualhua: “Quinamiquiyaya anquinhucasquíaj nomasehualhua ipan se lugar campa itztosquíaj temachme. Pero amojuanti amo ya nopa anquichijque. Anquintahuelcajque huan anquinquixtijque. Huajca ama na nimechtatzacuiltis por nochí tamanti cati amo cuali cati anquinchihuilijque noisraelita masehualhua. <sup>3</sup> Pero se tonali na niquinsentilis noisraelita masehualhua cati noja mocajtoque ipan campa hueli talme campa niquintitantoya, huan sempa itztose quej noborregojhua huan niquinhualicas ipan ni corral campa quipiyase miyac tacualisti. Huan nopona nomasehualhua momiyaquilise huan moscaltise. <sup>4</sup> Huan na niquintalis tamocuitahuiani cati temachme para ma quinmocuitahuica. Huan quej nopa ayecmo majmahuise, ayecmo polihuise, yon ayecmo mocuesose. Quej nopa niamotECO niquijtohua.”

<sup>5</sup> TOTECO quiijtohua: “Ajsis tonali quema na nijitalis para tanahuatis ipan isiya David se iteipan ixhui cati xitahuac quej David. Yaya elis se tanahuatijquet cati tanahuatis xitahuac huan ica miyac talnamiquilisti. Huan yaya tetajtolsencahuas cuali huan nojquiya quichihuas para nochí sequinoc ipan ital ma quichihuaca cati xitahuac.

**6** Huan ipan nopa tonali Judá ehuani itztose ica temachili huan tali Israel quipiyas tasehuilisti. Huan quitocaxtise nopa tanahuatijquet: ‘TOTECO Cati Techchihua Tixitahuaque Iixpa.’ ”

**7** Huan TOTECO quijtohua: “Ipan nopa tonali masehualme ayecmo quijtose: ‘Nijtestigojquetza TOTECO cati quinquixti israelitame ipan tali Egipto.’ **8** Pero quijtose: ‘Nijtestigojquetza TOTECO cati quinquixti israelitame ten nopa talme campa quinhuicatoya huan sempa quinhualicac ipan inintal.’ ”

### *Camanali para nopa istacatica tajtolpanextiani*

**9** Na tahuel nimoyoltequipachohua por nopa tacajcayaajca tajtolpanextiani pampa inijuanti senquisa istacatij. Nochi noomiy o huihuipica huan nelia nimajmahui hasta nimomimilohua quej se ihuintiquet, pampa tahuel fiero ininpantis nopa tacajcayaajca tajtolpanextiani pampa TOTECO quijtojtoc camanali cati tatzejtzelotic ten inijuanti huan ten nopa tatzacuiltili cati quinajsis. **10** Ni tali temitoc ica momecatiani. Quicajtejtoque TOTECO para quinhueyichihuase teteyome huan yeca TOTECO quitechijtoc. Ni tali cactoc huan nochi nopa potreros huactoc pampa ni masehualme senquisa quinequij quichihuase cati fiero. Huan nopa tacame cati quipiyaj tanahuatili amo quichihuaj cati xitahuac.

**11** “Nopa tajtolpanextiani huan totajtzitzi mosis-iníaj huan yon quentzi amo quitepanitaj TOTECO. Na niquitztoc nochi nopa fiero tamanti cati inijuanti quichihuaj nica ipan notiopa. Quej nopa niamotECO niquijtohua. **12** Yeca ama njchihuas

iniojhui ma eli taalahua huan nopona oncas tzintayohuilot. Na niquinquixtis huan motepotanise huan huetzise, ipan nopa tonali quema na niquintanilis tatzacuiltyli cati quinamiqui por inintajtacolhua. Quej nopa niamotECO niquijtohua.

<sup>13</sup> “Na niquinitztoe inintajtacolhua nopa tajtolpanextiani ten tali Samaria cati tahuel amo tatepanitaj. Tacamanalhuiyayaj cati panos teipa huan quijtohuayayaj para nopa teteyot Baal quinmacayaya inincamanal. Quej nopa quinchihualtijque noisraelita masehualhua ma tajtacolchihuaca huan ma quihueyichihuaca Baal. <sup>14</sup> Pero noja más fiero quichihuaj nopa tajtolpanextiani ten altepet Jerusalén. Tahuel momecatíaj huan mojmosta istacatitinemij. Quinyolchicahuaj nopa masehualme cati quichihuaj cati fiero. Amo quinequij yon se ma moyolcuepa huan ma quicahua itajtacolhua. Para na nopa tajtolpanextiani itztoque tahuel fiero quej nopa masehualme huejcajquiya ten altepet Sodoma huan Gomorra.

<sup>15</sup> “Yeca na niamotECO Cati Niquinyacana Noilhuicac Ejcahua Ma Tatanitij niquijtohua: Na niquinmacas ma quicuaca xihuit cati chichic huan niquinmacas ma quiica at cati quipiya pajti cati temictía. Pampa ten ni tajtolpanextiani ipan Jerusalén momajtoc tajtacoli campa hueli ipan nochí ni tali. Por inijuanti cati quichihuaj ome inixayac, ni tali temic ica tamanti cati tahuel fiero.”

<sup>16</sup> Huajca ama TOTECO Cati Quinyacana Iilhuicac Ejcahua Ma Tatanitij, quej ni quinilhuía israelitame: “Amo xiquintacaquilica nopa tajtolpanextiani quema amechcamanalhuíaj pampa ininca-

manal amo teno ipati. San inijuanti quiyoliltíaj cati tacamanalhuíaj. Na amo niquinnojnotztoc. **17** Inijuanti quinpohuilijtinemij masehualme cati techcualancaitaj: ‘¡Amo teno amopantis!’ Huan nopa masehualme cati san quitoquilíaj cati fiero quinequij quichihuase, quinilhuíaj: ‘¡TOTECHO quiijtohua para anquipiyase tasehuilisti huan amo teno cati amo cuali panos! ’ ”

**18** Huan na niquijto: Yon se ten nopa tajtolpanextijquet quixmati TOTECHO, yon cati yaya ixtacatzi moilhuía. Yeca amo huelis quicaquis icamanal. Yon se ten inijuanti amo quichijtoc campeca para quitacaquilis TOTECHO. **19** Xiquitaca, icualancayo TOTECHO hualas quej se hueyi ajcomalacat cati quinajsis ipan inintzonteco nopa amo cuajcualme. **20** Icualancayo TOTECHO amo tamis hasta quintamitatzacultis nopa masehualme cati fiero ininemilis, senquisa quej yaya moilhuijtoc para quichihuas. Teipa quema altepet Jerusalén ya huetztos, israelitame sempa quimachilise nochí ya ni.

### *Icamanal TOTECHO para nopa istacatica tajtolpanextianí*

**21** “Na amo niquintitantoc nopa tajtolpanextianí, yon amo niquinmacatoc yon se camanali, pero inijuanti quiijtohuaj para tayolmelahua na nocamanal. **22** Sinta inijuanti elisquíaj na notajtolpanextijcahua, quimajtosquíaj cati nimoilhuía ixtacatzi ipan noyolo huan quicactosquíaj nocamanal. Nojquiya quinpohuilisquíaj nomasehualhua huan quinyolcuepasquíaj ten inintajtacolhua.

<sup>23</sup> “Na amo niDios cati niitztoc san ipan se lugar. Na niquita nochí cati anquichihuaj ica huejca. <sup>24</sup> Amo aqui hueli motatis para amo niquitas. Na niitztoc campa hueli. Nijtemitía ilhuicacti huan taltipacti. Quej nopa niquijtohua niamotECO.

<sup>25</sup> “Na nijcactoc nopa tajtolpanextiani quiijtohuaj: ‘Xijtacaquilica ni temicti cati TOTECO technextili ipan ni yohuali.’ Huan teipa tepohuilíaj istacatili huan quiijtohuaj na niquinmacac nopa camanali, pero amo. <sup>26</sup> ¿Hasta quema ni tajtolpanextiani tacajcayahuase huan tepohuilise camanali cati san inijuanti quiyoliltíaj ipan iniyolo? <sup>27</sup> Moilhuíaj ica nopa temicti cati inijuanti tepohuilíaj, quichihuase para nomasehualhua ma techtahuelcahuaca quej techtahuelcajque inintatahua para quinhueyichihiuase nopa teteyome ten Baal. <sup>28</sup> Pero xiquincagua nopa istacatica tajtolpanextiani ma tepohuilica inintemic. Huan xiquincagua notayolmelajcahua cati temachme ma tepohuilica xitahuac sesen camanali cati na niquinmaca. Itasolo nopa trigo amo teno ipati, pero iyol nopa trigo, quena, miyac ipati. Quej nopa niamotECO niquijtohua.” <sup>29</sup> Huan TOTECO quiijto: “¿Amo tetatía nocamanal quej tit? Quena, nocamanal quipiya chicahualisti quej se martillo cati quitapana tet.

<sup>30</sup> “Xiquitaca nimochijtoc niinincualancaitaca ni tajtolpanextiani cati moichtequilíaj camanali se ica seyoc huan quiijtohuaj para na niquinmacatoc nopa camanali. <sup>31</sup> Nimotalía niinincualancaitaca nopa tajtolpanextiani cati camanaltij yejyectzi para más quincuapolose nomasehualhua huan

quijtohuaj: ‘¡TOTECO quijtojtoc ni camanali!’  
 32 Nojquiya nimochijtoc niinincualancaitaca injuanti cati tepohuiláj temicti cati san istacatili pampa san injuanti quiyoliltáj. Ica ya nopa quincuapolohuaj nomasehualhua huan quinchihuáltaj ma tajtacolchihuaca. Na amo niquintantoc huan amo niquinmacatoc yon se camanali para quinyolmelahuase nomasehualhua. Injuanti amo quinpalehuáj nomasehualhua yon quentzi. Quej nopa niamotECO niquijtohua.”

*Quenicatza nitepohuilis icamanal TOTECO*

33 Huan nojquiya TOTECO techilhui: “Huan sinta se masehuali, o se istacatica tajtolpanextijquet, o se totajtzi mitzhuihuiitas huan mitzilhuis: ‘¿Taya camanali o tamamali cati etic tijhualica ama ten TOTECO?’ Huajca xiquinnanquili quej ni: ‘Amojuanti anitztoque nopa tamamali cati etic huan TOTECO amechtepexihuis ten icuitapa.’ Quej nopa xiquinilhui. 34 Sinta se istacatica tajtolpanextijquet, se totajtzi o se masehuali mitzhuihuiitas huan quijtos: ‘Na nijpiya se camanali cati etic ten TOTECO,’ nijtatzacuiltis yaya huan noch i f amilia. 35 Cuali para anmotatzintoquilise se ica seyoc quej ni: ‘¿Quenicatza mitznanquilitoc TOTECO? ¿Taya quijtojtoc?’ 36 Pero ma amo aqui quitequihui nopa camanali cati quijtohua: ‘Nijpiya se camanali ten TOTECO cati etic o cati quihualica tequipacholi.’ Pampa cati quitequihuis, nijchihualtis ma eli para ya se tamamali cati tahuel etic huan cati quihualica tequipacholi. Pampa nopa masehualme cati mitzhuihuitaj huan quej nopa quijtohuaj, teipa quipatase

nocamanal, na nimoTeco huan na cati niitztoc huan Na Cati Niquinyacana Noilhuicac Ejcahua Ma Tatanitij.

<sup>37</sup> “Jeremías, ya ni cati tiquinilhuis nopa tajtolpanextiani: ‘¿Taya quijtohua TOTECO? ¿Taya mitzilhuijtoc?’ <sup>38</sup> Huan sinta mitzhuihuitase huan mitznanquilise ‘Tijpiyaj se camanali ten TOTECO cati etic huan cati quihualica tequipacholi’ masque niquinilhuijtoc para amo quijjose nopa camanali, <sup>39</sup> huajca niquinquixtis ten nica noixpa. Huan niquinquixtis ten ni altepet cati nimechmacac amojuanti huan amohuejapan tatahua. <sup>40</sup> Huan niquintalilis pinahualisti huan niquinechcapantalis para nochipa huan nochi quinhuetzquilise para nochipa.”

## 24

### *Tanextili ten nopa higos*

<sup>1</sup> Tanahuatijquet Nabucodonosor ten tali Babilonia quihuicac Jeconías, icone Joacim, cati elqui tanahuatijquet ten tali Judá ipan tali Babilonia inihuaya nochi nopa tayacanani, cuaximani huan teposchihuani. Huan quema ya quinhuicatoya, ipan se tanextili TOTECO technextili ome chiquihuit ten higos cati eltoya iixpa nopa tiopamit ipan Jerusalén. <sup>2</sup> Se chiquihuit quipiyayaya higos cati cuajcuali, cati sanoc icsitoya. Huan nopa seyoc chiquihuit quipiyayaya higos cati ya lochontoyaj hasta ayecmo aqui huelisquía quicuas.

<sup>3</sup> Huajca TOTECO techilhui: “¿Taya tiquita, Jeremías?” Huan na niquilhui: “Niquita higos.

Sequij tahuel cuajcuali huan sequij tahuel nenpolijtoc hasta amo aqui hueli quicuas.”

<sup>4</sup> Huan TOTECO technojnotzqui huan techilhui: <sup>5</sup> “Quej ni nimoTECO huan niiniDios israelitame niquijtohua: Nopa higos cati cuajcuali quinixnextía nopa masehualme cati niquinquixtijtoc ten tali Judá huan niquintitanqui ipan tali Babilonia campa itztoque nopa caldeo masehualme. Niquinquixtijtoc para niquinchihuilis cati cuali.

<sup>6</sup> Na niquinmocuitahuis para ma quinchihuilica cati cuali huan sempa niquinhualicas ipan inintal. Niquinpalehuis huan amo niquincocos. Elise quej tocti cati nijtocas huan amo nijhuihuitas.

<sup>7</sup> Huan na niquinmacas se talnamiquilisti para ma techixmatica para na NIDIOS huan ni ininTECO. Inijuanti elise nomasehualhua huan na nielis ni ininTeco pampa mocuepase ica na ica nochí iniyolo.

<sup>8</sup> “Pero nopa higos cati lochontoque quiixnextía Sedequías, cati ama tanahuatijquet ten tali Judá. Huan quinixnextía nojquiya itequiticahua, huan nochí nopa Jerusalén ehuani cati noja mocajtoque ipan ni tali huan nochí cati yajque ipan tali Egipto. Inijuanti niquitas quej nopa higos cati lochontoque hasta ayecmo aqui hueli quicuas.

<sup>9</sup> Na nijchihuas para masehualme ma quinijiyaca ipan nochí talme. Quinpinajtise huan ten hueli quinilhuise. Campa hueli campa na niquintitanis, nochí masehualme quinitase para tatelchihualme. <sup>10</sup> Huan na niquintitanilis tatehuilisti, mayanti huan cocolisti hasta tamimiquise ipan nopa tali Israel cati niquinmacac inijuanti huan inihuejcapan tatahua.”

## 25

*Israelitame tetequipanose 70 xihuit ipan seyoc tali*

<sup>1</sup> Ni camanali TOTECO techmacac quema Tanahuatiijquet Joacim, icone Josías, yahuiyaya para nahui xihuit tanahuatis. Huan ni camanali eliyaya para nochí masehualme ten tali Judá. Ya ni nojquiya elqui ipan nopa xihuit quema Nabucodonosor pejqui tanahuatía ipan tali Babilonia.

<sup>2</sup> Huan na niJeremías quej ni niquinilhui nochí nopa masehualme ten tali Judá huan nochí cati itztoyaj ipan altepet Jerusalén: <sup>3</sup> “TOTECO nechcamanalhuijtoc para 23 xihuit. Pejqui quema Josías, icone Amón, yahuiyaya para 13 xihuit tanahuatis ipan itanahuatil ipan tali Judá. Huan sesen huelta quema techmacac icamanal, nimechilhuijtoc, pero amojuanti noja amo anquitacaquilijtoque.

<sup>4</sup> “Ipan nochí nopa tonali, TOTECO talojtzitzí amechtitaniliyaya itajtolpanextijcahua, pero amojuanti amo anquitacaquilijke inincamanal.

<sup>5</sup> Nopa tajtolpanextiani nochipa amechilhuiyaj quej ni: ‘Xiquisaca ipan nopa fiero ojti cati anquitoquilíaj huan xijcahuaca nochí cati amo cuali anquichihuaj. Quej nopa huelis anquisehuiquilise anitztose ipan ni tali cati TOTECO amechmacac amojuanti huan amohuejcapan tatahua para ximoaxcatica para nochipa. <sup>6</sup> Amo xiquinhueyichihuaca teteyome, yon taixcopincayome cati anquinchijtoque ica amomax para amo anquicualancamacase

TOTECO. Sinta anquitepanitase TOTECO, amo amechtatzacuiltis.'

<sup>7</sup> "Huan ama TOTECO quijjtohua: 'Pero amojuanti amo anquinequij antechtacaquilise. Tahuel anyoltetique. Anquinhueyichihuaj teteyome cati amojuanti anquinchijtoque huan ica ya nopa antechchijtoque ma nicualani. Yeca noch tamanti cati hualajtoc amopani eltoc quej amoseltitzitzi anmotemohuilijque.'

<sup>8</sup> "Huan yeca ama niamoTECO Cati Niquinyacana Noilhuicac Ejcahua Ma Tatanitij, niquijjtohua: Pampa amo anquitacaquilijtoque nocamanal, quej ni nijchihuas. <sup>9</sup> Niquinsentilis nopa soldados ten nopa tali ica norte cati quinyacana notequipanojca Nabucodonosor, yaya cati itztoc tanahuatijquet ten tali Babilonia. Huan niquinhualicas para ma quitehuiquij ni tali huan noch nopa masehualme huan nopa talme cati mopantíaj amonechca. Nimechtzontamiltis noch amojuanti huan nijcahuas amotal tasosololi huan noch cati quiitase momajmatise huan quijjiyase. Quej nopa niamoTECO niquijjtohua. <sup>10</sup> Na nijtamiltis noch paquilisti huan huetzquisti cati onca ipan ni tali. Ayecmo quicaquise itoscac se mosihuajtijquet, yon iichpoca ipan se ilhuit ten nemamictili. Nochi tamanti nijtamiltis. Nochi calme mocahuase ipan tzintayohuilot pampa ayecmo oncas aceite para inintaahuil. Ayecmo tequitis molino pampa amo oncas trigo para quichihuase harina para pantzi. <sup>11</sup> Ni tali mocahuas cactoc quej huactoc tali. Huan noch talme ipan taltipacti momajmatise por cati ipantis ni tali. Huan israelitame huan noch cati ehuani

ipan sequinoc talme cati quiyahualojtoque, quitequipanose nopa tanahuatijquet ten tali Babilonia para 70 xihuit.

**12** “Teipa quema nopa israelitame ya tequipanojtose 70 xihuit, na nijtatzacuiltis nopa tanahuatijquet ten tali Babilonia huan nochí imasehualhua por inintajtacolhua. Quena, nijchihuas intal nopa caldeos para ma elis se huactoc tali para nochipa. **13** Huan na nijtitanis ipan injuanti nochí cati fiero cati nijtencajtoc ipan ni amatapohuali. Niquintitanilis nochí nopa tatzacuiltili cati Jeremías tayolmelajqui para quinajsisquía nochí talme. **14** Huan niquincuepilis nopa caldeos por nochí cati quinchihuiljtoque nomasehualhua. Huan miyac talme huan huejhueyi tanahuatiani quichihuase para nopa caldeos ma quintequipanoca san tapic.”

### *Tanextili ten nopa caxit*

**15** Huan TOTECO Dios cati toTeco tiisraelitame, techilhui: “Xijcui ni caxit cati eltoc nomaco. Eltoc quej nopa caxit temitoc ica nocualancayo. Huan nijnequi xijchihua para ma quiica nochí cati ehuani nopa talme campa na nimitztitanis pampa nijnequi niquintatzacuiltis. **16** Huan quema injuanti quiselise notatzacuiltil, tahuel huihuipicase huan momimilose por nopa tatehuilisti cati na niquintitanilis.”

**17** Huajca na nijcuic nopa caxit cati eltoya imaco TOTECO, huan niquinmacac ma quiica nochí nopa talme campa TOTECO techtitánqui. **18** Huan nochí cati ehuani altepet Jerusalén huan nochí cati ehuani nopa altepeme ten tali Judá

quiique ten nopa caxit ten icualancayo TOTECO. Huan nochí inintanahuatijcahua huan inintaya- cancahua quiique. Huan ipan nopa talojtzi pe- jqui para mocahua tasosololi nopa talme, huan ipan pinahualisti huan tatelchihuali. Huan quej nopa mocajtoc hasta ama. <sup>19</sup> Nojquiya niya- jqui ipan tali Egipto. Huan nopa Faraón huan itequipanojcahua, nopa tayacanani huan nopa masehualme, <sup>20</sup> quiique ten icualancayo TOTECO inihuaya nopa seyoc tali ehuani cati itztoyaj no- pona. Nojquiya quiique nopa tanahuatiani ten tali Uz huan nopa tanahuatiani ten nopa talme campa itztoque nopa filisteos ipan nopa altepeme Ascalón, Gaza, Ecrón huan nopa masehualme cati noja mocajtoyaj ipan altepet Asdod. <sup>21</sup> Huan nojquiya niquinpaxalo nopa talme Edom, Moab huan Amón. <sup>22</sup> Huan nochí nopa tanahuatiani ten tali Tiro huan Sidón huan nojquiya nopa tanahuatiani cati itztoque ipan nopa seyoc nali ten nopa hueyi at Mediterráneo. <sup>23</sup> Nojquiya niya- jqui ipan tali Dedán, Tema, Buz huan ipan nopa sequinoc talme cati mopantíaj huejca. <sup>24</sup> Huan nochí nopa tanahuatiani ten tali Arabia huan nopa tanahuatiani ten nopa masehualme cati itz- toque maneltic inieso ica sequinoc ipan nopa huactoc tali. <sup>25</sup> Huan nojquiya nopa tanahuatiani ten tali Zimri, Elam huan Media. <sup>26</sup> Huan nochí nopa tanahuatiani cati mopantíaj ica norte, cati huejca huan cati nechca, se huan seyoc, huan nochí nopa tanahuatiani cati itztoque ipan nochí taltipacti. Huan teipa ica itamiya, nopa tanahuati- jquet ten tali Babilonia nojquiya quiic ten icualan- cayo TOTECO.

<sup>27</sup> Teipa TOTECO techilhui: “Xiquinilhui masehualme para nimoTECO Cati Niquinyacana Noilhuicac Ejcahua Ma Tatanitij, huan ni ininTeco israelitame, quej ni niquijtohua: Xiquica nohueyi cualancayo cati eltoc ipan ni caxit hasta anihuintise, anmisotase huan anhuetzise para ayecmo quema anmoquetzase, pampa na nimechtitanilis huejhueyi tatehuilisti. <sup>28</sup> Huan sinta inijuanti amo quinequise quiselise nopa caxit para quiise ten nocualancayo nimoTECO Cati Niquinyacana Noilhuicac Ejcahua Ma Tatanitij, huajca xiquinilhui para monequi quiise masque quinequij o amo quinequij. <sup>29</sup> Xiquitaca, na nipejtoc niquintatzacultía nomasehualhua ipan Jerusalén, nopa altepet cati quihuica notoca. Huan sinta niquintatzacultía ni altepeme, ¿anmoilhuíaj ansequinoc tali ehuani anmomanahuise? ¡Amo! Amo huelis anmomanahuise ten nopa tatzacuiltyli. Pampa na nijchihuas ma onca tatehuilisti ipan nochi talme. Quej nopa niquijtohua nimoTECO Cati Niquinyacana Noilhuicac Ejcahua Ma Tatanitij.

<sup>30</sup> “Huajca ta, tiJeremías, xiquinyolmelahua masehualme nochi ni camanali cati na nimitzilhuijtoc. Xiquinilhui: ‘Na nicamanaltis ten nepa ilhuicac ipan nochaj cati tatzejzeloltic para niquintatelhuis nomasehualhua huan nochi cati itztoque ipan taltipacti. Nitzajtzis chicahuac quej nopa masehualme cati tzajtziq quema moquejquetzaj ipan xocomecat itajca. <sup>31</sup> Nitahuejchihuas chicahuac pampa niquintajtolsencahuas huan niquintalilis tatzacuiltyli nochi masehualme hasta campa ontantoc taltipacti. Quena, nijsecajtoc niquintatzacultis cati ehuani ipan nochi talme.

Huan niquinmictis nochí tajtacolchihuani.’ ”  
Quej nopa quiijto TOTECO.

<sup>32</sup> Nojquiya TOTECO Cati Quinyacana Iilhuicac Ejcahua Ma Tatanitij quiijto: “Xiquitaca, nopa tatzacuiltili ajsis ipan se tali huan teipa panos hasta ipan seyoc tali. Nohueyi cualancayo motananas quej se hueyi ajcomalacat huan quinajsis nochí talme ipan taltipacti.”

<sup>33</sup> Huan ipan nopa tonali quema TOTECO tetzontamiltis, inintacayohua mocahuase tepejtoque talchi ten se lado hasta seyoc lado ten ni taltipacti. Elise tahuel miyaqui hasta nochí taltipacti temis ica mijcatzitz. Huan amo aqui quinchoquilis, yon amo aqui quintananas para quintalpachos. Inintacayohua mocahuase tepejtoque talchi quej cuitat.

<sup>34</sup> ¡Anfiero tamocuitahuiani! Xichocaca huan ximocuesoca. Amojuanti cati anquinyacanaj masehualme ipan nochí taltipacti, ximomimiloca ipan cuajnexti para anquinextise amocuesol pampa ya ajsic hora para amechezontamiltise. Anhuetzise quej sihuame cati yamanic inintacayo.

<sup>35</sup> Huan yon se tamocuitahuijquet amo huelis motatis, yon amo huelis cholos. <sup>36</sup> Xijtacaquilica quenicatza tzajtzij nopa tamocuitahuiani huan nopa tayacanani. Ayecmo quimatiq taya quichihuase pampa TOTECO quisosolojtoc ininpotrero.

<sup>37</sup> Quena, TOTECO ica ihueyi cualancayo quisolos nochí tamayamit ica yejyectzi sacat. <sup>38</sup> TOTECO quincajtoc imasehualhua quej se león cati quicahua iosto huan yahui quitemoti seyoc tapiyali para quicuas. Inintal imasehualhua mocahuas tamisosolijtoc por nopa soldados cati hualase

ipan nopa hueyi tatehuilisti huan ica ihueyi cualancayo TOTECO.

## 26

### *Quinequij quimictise Jeremías*

<sup>1</sup> Ipan nopa achtohui xihuit quema Joacim, icono Josías sanoc pehuayaya tanahuatis ipan tali Judá, TOTECO technojnotzqui na, niJeremías, huan techilhui: <sup>2</sup> “Ximoquetza iixpa notiopa huan xiquincamanalhui nochí nopa masehualme cati ehuani ipan altepeme ten tali Judá cati hualahui ipan nopa tiopamit para techhueyichi-huaquij. Xiquinilhui nochí cati na nimitzilhuijtoc. Amo xijquixtili yon se camanali cati mon-equi quitacaquilise. <sup>3</sup> Huelis inijuanti mitzta-caquilise huan quicahuase nochí nopa fiero ojti cati inijuanti quitoquilíaj, huan huajca na nimoyolcuerpas huan amo niquintatzacuiltis por inintatjacolhua quej niquijtojtoya.

<sup>4</sup> “Xiquinilhui para na ni ininTECO quej ni niquijtohua: ‘Sinta amo anquitepanitase nopa tanahuatili cati nimechmacatoc, <sup>5</sup> huan amo anquintacaquilise notajtolpanextijcahua cati na niquintantoc taloitzitzí para ma amechyolmelahuaca ximoyolcuepaca, <sup>6</sup> huajca nijsosolos ni tiopamit quej nijsosolo nopa yoyon tiopamit cati eltoya ipan altepet Silo, huan cati ehuani nochí talme ipan ni taltipacti quitocaxtise altepet Jerusalén quema quinequij quintelchihuase sequinoc.’ ”

<sup>7</sup> Huan nopa totajtzitzi, nopa tajtolpanextiani huan nochí cati ehuani ipan ni altepet quicajque cati na, niJeremías, niquijto nepa ipan tiopamit

cati iaxca TOTECO.<sup>8</sup> Huan quema nitantoya nica-manalti nochí nopa camanali cati TOTECO tech-nahuatijtoya ma niquijto, huajca nopa totajtzitzi, tajtolpanextiani huan nochí nopa masehualme cati mosentilijtoyaj ipan nopa tiopamit techitzqui-jque huan techilhuijque: “¡Timquis! <sup>9</sup> ¿Para ten tiquijtohua para TOTECO quisosolos ni tiopamit quej quichijqui ica nopa yoyon tiopamit cati el-toya ipan altepet Silo? Huan ¿para ten tiquijtohua para altepet Jerusalén mocahuas tasosololi huan nochí timiquise huan amo aqui momanahuis?” Huan nochí masehualme ten nopa altepet pe-jque quitemajmatíaj Jeremías quema moquetza-yaya iniixpa ipan nopa tiopamit.

<sup>10</sup> Huan quema nopa huejhueyi tayacanani ten tali Judá quicajque cati panoyaya, quisque ten nopa caltanahuatili huan mosehuijque san sejco campa nopa yancuic caltemit ten nopa tiopamit para tetajtolsencahuase. <sup>11</sup> Huajca nopa totajtzitzi huan nopa tacajcayajca tajtolpanextiani quinnex-tilijque nopa tayacanani huan nopa masehualme ten nopa altepet ten taya techtatelhuiyaya. Quiij-tojque: “Ni tacat quinamiqui miquis pampa quiij-tojtoc para ni altepet ipantis ten fiero. Amojuanti anquicactoque cati yaya quiijto.”

<sup>12</sup> Huajca na, niJeremías, niquincamanalhui nopa tayacanani huan nochí nopa masehualme ten nopa altepet, huan niquinilhui:

“TOTECO techtitanqui para ma nitayolme-lahuaqui taya ipantis ni tiopamit huan ni altepet. Huan yaya techmacac nochí nopa camanali cati niquijtojtoc. <sup>13</sup> Pero sintia amojuanti anquicahuase amotajtacolhua huan anpehuase

anquitepanitase TOTECO cati toDios, huajca yaya amo amechtitanilis nopa tatzacuiltili cati quiijtojtoya quititanis amopani. <sup>14</sup> Huan ica na, nica niitztoc amomaco. Amo hueli nimomanahuis. Huajca techchihulica cati amojuanti anquijitaj para xitahuac. <sup>15</sup> Pero xijmatica cuali ya ni: Sinta antechmictise, huajca amojuanti huan ni altepet huan nochi masehualme anquihuicase tajtacoli pampa anquimictijque se tacat cati amo quipiya tajtacoli. Melahuac nimechilhuía para yaya TOTECO cati techtitanqui ma nimechyolmelahaqui nochi camanali cati anquicajque niquijto.”

<sup>16</sup> Huajca nopa tayacanani huan nopa masehualme ten nopa altepet camanaltique inihuaya nopa totajtzitzi huan nopa tacajcayajca tajtolpanextiani, quinilhuijque: “Ni tacat amo quinamiqui miquis pampa yaya techcamanalhuijtoc ica camanali ten TOTECO Dios.”

<sup>17</sup> Huajca se ten nopa huehue tacame cati quipiyayaya tanahuatili moquetzqui huan quincamanalhui nochi nopa masehualme cati quiyahualojtoyaj, quinilhui: <sup>18</sup> “Ya ni nelia xitahuac, pampa quema Ezequías eliyaya tanahuatijquet ipan tali Judá, nopa tajtolpanextijquet Miqueas cati ehua Moreset quinyolmelajqui nopa masehualme huan quinilhui para TOTECO Cati Quinyacana Iilhuicac Ejcahua Ma Tatanitij quiijtohua para quipoxonise ni tepet quej se tali campa quitocaj xinachti. Huan quiijto ni altepet Jerusalén mocahuas quej se tamontomit ten tet. Huan nopa lugar campa

eltoc itiopa TOTECO elis quej se hueyi cuatitamit. Quej nopa quiijto Miqueas.

**19** “Pero Tanahuatijquet Ezequías huan nochí nopa Judá ehuani amo quimictijque Miqueas san pampa quinilhuijtoyaj ya nopa. ¡Amo! Inijuanti quicajque inintajtacolhua huan motatajtijque iixpa TOTECO. Huan quitajtanjque tapojpolhuili ten inintajtacolhua. Huan quena, TOTECO quintasojtac huan amo quintatzaculti quej quinilhuijtoya. Huan sinta tojuanti tijmictise Jeremías san pampa techyolmelahua icamanal TOTECO, huajca TÓTECO huelis techchihuilis se tamanti cati noja más fiero.”

**20** Nojquiya itztoya seyoc tajtolpanextijquet cati itoca Urías, cati elqui icone Semaías ten altepet Quiriat Gearim. Huan yaya nojquiya tayolmelahuayaya cati ipantis ni altepet huan ni tali ipan nopa tonali quema na, niJeremías, ni tacamanalhuiyaya. Huan yaya nojquiya quiijtohuayaya para san se ipantis altepet Jerusalén quej na nojquiya niquijtohuayaya. **21** Pero quema nopa Tanahuatijquet Joacim huan nopa taya-canani ten soldados huan nochí nopa tequichi-huani quicajque cati Urías quiijtohuayaya, nopa tanahuatijquet tanahuati ma quimictica. Huan Uriás quiitac para quinequiayaj quimictise, huajca majmajqui huan mochololti hasta tali Egipto. **22** Pero nopa Tanahuatijquet Joacim quintitanqui Elnatán, icone Acbor huan sequinoc tacame hasta tali Egipto para ma quiitzquitij Urías. **23** Huan inijuanti quiqxistijque ipan Egipto huan qui-huicaque campa Tanahuatijquet Joacim. Huan

yaya quimicti ica macheta huan tanahuati ma quitalpachoca ipan se hueyi ostot.

<sup>24</sup> Pero quema techtatelhuiyaya na, niJeremías, techpalehui Ahicam, icono Safán, cati eliyaya itajcuilojca nopa tanahuatijquet. Huajca yaya quincamanalhui nopa tayacananí para ma amo techtemactilica inimaco nopa masehualme para techmictise.

## 27

### *Jeremías quihuica se cuamaxali iquechta*

<sup>1</sup> Ipan nopa achtohui xihuit ten itequi Joacim, icono Josías, quej tanahuatijquet ten tali Judá, TOTECO technojnotzqui na, niJeremías, huan techilhui: <sup>2</sup> “Ximochijchihuili se cuamaxali huan xiquilpi moquechta ica cuetaxti quej se tacat quiquechilpía se huacax para ma tapoxoni. <sup>3</sup> Teipa xiquintitanili camanali nopa tanahuatiani ten tali Edom, Moab, Amón, Tiro huan Sidón. Nochi nopa tanahuatiani ama quinpiyaj tapalehuiani ipan altepet Jerusalén para quipaxalose Tanahuatijquet Sedequías. Sinta tiquinmacas nopa camanali inintapalehuijcahua huelis quinhuiquilise inintanahuatijcahua quema mocuepase ipan inintal. <sup>4</sup> Xiquinilhuica amotecohua para TOTECO Cati Quinyacana Ilhuicac Ejcahua Ma Tatanitij, yaya cati ininteco israelitame, quintitanilía ni camanali: <sup>5</sup> Ica nohueyi chicahualis nijchijchijqui taltipacti, masehualme huan nochi tapiyalme cati itztoque ipan taltipacti. Nochi noaxca huan nijmaca cati na nijnequi. <sup>6</sup> Huan ama nochi amotalhua na nijmactilijtoc notequipanojca Nabucodonosor,

yaya cati tanahuatijquet ipan tali Babilonia. Huan nochí tapiyalme cati nemij cuatita nojquiya nijmactilijtoc para quitequipanose. <sup>7</sup> Huan nochí masehualme ipan nochí talme quitequipanose Nabucodonosor, icone huan iixhui hasta ajsis tonali quema yaya nojquiya huetzis inimaco sequinoc. Ipan nopa tonali masehualme ten miyac talme huan huejhueyi tanahuatiani moaxcatise ital huan quichihuase ma quintequipanoti. <sup>8</sup> Huajca ximotemacaca ica Nabucodonosor huan xijtequipanoca. Xijtepanitaca nopa tanahuatili ten tali Babilonia. Pampa nochí talme cati amo quinequise quitequipanose nopa tanahuatijquet ten tali Babilonia, na niquintatzacultis ica tatehuilisti, mayanti huan cocolisti hasta motemactilise imaco Nabucodonosor.

<sup>9</sup> “Yeca nimechilhuía para amo xiquinneltoquilica nopa istacatica tajtolpanextiani, tetonalitani, tatemiquini huan tenahualhuiani cati amechilhuíaj para amo anquitequipanose nopa tanahuatijquet ten tali Babilonia. <sup>10</sup> Pampa nochí ini juanti san istacatij. Huan sintá amojuanti anquin neltoquilise cati inijuanti quijtohuaj huan amo anquinequise amotemacase ica nopa tanahuatijquet ten tali Babilonia, huajca na nimechquixtis ipan amotal huan nimechtitanis huejca huan noppa anmiquise. <sup>11</sup> Pero nochí masehualme cati motemacase ica nopa tanahuatijquet ten tali Babilonia, na niquincahuilis ma itztoca ipan inintal para tapoxonise huan quitocase inixinach quej momajtoque quichihuaj. Quej nopa ni amoTECO niquijtohua.”

<sup>12</sup> Huajca na, niJeremías, nojquiya nijpohuili ya ni nopa tanahuatijquet ten tali Judá cati itoca Sedequías, niquilhui:

“Sinta tijnequi tiitztos, huajca ximotemaca ica nopa tanahuatijquet ten tali Babilonia. <sup>13</sup> ¿Para ten timquis inihuaya nochí momasehualhua ipan tatehuilisti, o ica mayanti huan cocolisti? Pampa TOTECO quiijtojtoc quititanilis tatehuilisti, mayanti huan cocolisti ten hueli tali cati amo quinequis motemacas ica nopa tanahuatijquet ten tali Babilonia. <sup>14</sup> Huajca amo xiquintacaquili nopa tajtolpanextiani cati mitzilhuiáj para amo tijtequipanos nopa tanahuatijquet ten tali Babilonia pampa nochí inijuanti san istacatij. <sup>15</sup> Na amo niquintitantoc nopa tajtolpanextiani masque inijuanti quiijtohuaj niquinmacac inincamanal. Huan sinta ta tijsenhuiquilis tiquinneltoquilis, nimitzquixtis ten ni tali huan timquis ipan seyoc tali sentic ica ni istacatica tajtolpanextiani.”

<sup>16</sup> Nojquiya niquincamanalhui nopa totajtzitzi huan nochí nopa masehualme huan niquinilhui:

“Quej ni quiijtohua TOTECO: ‘Amo xiquinneltoquilica nopa istacatica tajtolpanextiani cati amechilhuiáj para nopa tamantzitzi ten oro cati quiqxijque ipan itiopa TOTECO huan quihuicaque ipan tali Babilonia nimantzi amechcuepilise, pampa nochí ya nopa senquisa istacatili. <sup>17</sup> Amo xiquintacaquilica. Más cuali ximotemaca para anquitequipanose nopa tanahuatijquet ten tali Babilonia para anitztose. ¿Para ten anquichihuase para ma nijssolos ni altepet huan para ma mocahua quej

huactoc tali? <sup>18</sup> Huan sinta nopa tacame nelía itajtolpanextijcahua TOTECO, ma motatajtica ica TOTECO Cati Quinyacana Iilhuicac Ejcahua Ma Tatanitij. Ma quitajtanica para ma amo quinhuicaca ipan tali Babilonia nopa tamantzitz ten oro cati noja mocajtoc ipan ni tiopamit, huan ipan icaltanahuatil nopa tanahuatijquet ten tali Judá huan ipan nopa caltanahuatilme ten altepet Jerusalén.’

<sup>19</sup> “Pampa TOTECO Cati Quinyacana Iilhuicac Ejcahua Ma Tatanitij quej ni quijito ten nopa taquetzalme ten bronce cati eltoc iixpa nopa tiopamit, huan nopa pileta ten bronce campa quitecaj at cati eltoc calixpa ten nopa tiopamit huan nochí sequinoc tamanti cati mocahua ipan ni altepet. <sup>20</sup> Nabucodonosor, tanahuatijquet ten tali Babilonia, amo quihuicac ni tamanti quema quihuicac ipan ital nopa Tanahuatijquet Jeconías, icone Joacim, huan nopa tayacanani ten tali Judá huan altepet Jerusalén. <sup>21</sup> Pero TOTECO Cati Quinyacana Iilhuicac Ejcahua Ma Tatanitij, huan cati toTeco tiisraelitame quijjtohua ya ni ten nochí nopa tamantzitz cati mocajque ipan tiopamit huan ipan caltanahuatili ten tali Judá huan altepet Jerusalén: <sup>22</sup> ‘Quihuicase ipan tali Babilonia nochí ni tamanti cati noja mocajtoc. Huan nepa mocahuase hasta quema na nitanahuatis para sempa ma quinhualicaca ipan altepet Jerusalén.’ Quej nopa quijjtohua TOTECO.”

## 28

*Jeremías huan Hananías*

<sup>1</sup> Se tonali ipan metzti macuili ipan toisraelita calendario\*, quema Sedequías yahuiyaya para nahui xihuit tanahuatía ipan tali Judá, Hananías, icone Azur, nechcamanalhui. Hananías eliyaya se istacatica tajtolpanextijquet ten tali Gabaón huan nechcamanalhui miyacapa ipan itiopa TOTECO iniixpa nopa totajtzitzi huan nochi nopa masehualme. Techilhui:

<sup>2</sup> —TOTECO Cati Quinyacana Iilhuicac Ejcahua Ma Tatanitij huan yaya cati toTeco tiisraelitame quiijtohua: ‘Na nimechtojtomas ten nopa tanahuatili cati ica amechilpitoc nopa tanahuatijquet ten tali Babilonia. <sup>3</sup> Ten nica para ome xihuit sempa nijhualicas ipan ni notiopa nochi nopa tamantzitzí cati motequihuiyaya nopona cati Tanahuatijquet Nabucodonosor quinhuicac ipan tali Babilonia. <sup>4</sup> Huan nojquiya sempa nijhualicas Jecónias, icone Joacim, nopa tanahuatijquet ten tali Judá. Huan niquinhuialicas nochi nopa sequinoc masehualme cati quinquixtijtoque huan itztoque ipan tali Babilonia. Huan nijtamiltis nochi nopa tanahuatili cati ohui cati ica amechilpitoc nopa tanahuatijquet ten tali Babilonia.’ Quej nopa quiijto TOTECO.

<sup>5</sup> Huajca na, nitajtolpanextijquet Jeremías, nijnanquili nopa istacatica tajtolpanextijquet Hananías iniixpa nopa totajtzitzi huan nochi nopa masehualme cati itztoyaj ipan itiopa TOTECO, huan niquilhui:

<sup>6</sup> —Se paquilisti sinta quej nopa elisquía. Nipaquisquía sinta TOTECO quichihuas quej titay-

---

\* **28:1** 28:1 Ni metzti elqui ipan agosto huan septiembre 593 a.C. ipan tocalendario ten ama.

olmelajtoc huan quihualicas nochí nopa tamantzitzí cati eltoya ipan itiopa huan nochí nopa masehualme cati quinhuicatoque ipan tali Babilonia. <sup>7</sup> Pero ama xijtacaquili ni camanalí cati na nimitzilhuis iniixpa nochí ni masehualme: <sup>8</sup> Nopa tajtolpanextiani cati tayolmelajque huejcajquiya quema ta huan na ayemo titacatiyayaj, inijuanti tayolmelajque para ipan miyac talme san oncas tatehuilisti, mayanti huan cocolisti. <sup>9</sup> Huajca se tajtolpanextijquet cati tayolmelahua para oncas tasehuilisti monequi quinextis para melahuac TOTECO quititantoc. Quena, sintia hualas tasehuilisti quej quijitojtoc, huajca nochí quimatise para icamanal melahuac hualajqui ten TOTECO.

<sup>10</sup> Huajca Hananías, nopa istacatica tajtolpanextijquet, techcuili nopa cuamaxali cati nijhuicayaya ipan noquechcuayo huan quipostejqui. <sup>11</sup> Huan quej ni quijito iniixpa nopa masehualme cati mosentilijtoyaj nopona:

—Amo panos ome xihuit hasta TOTECO quej ni quipostequis nopa cuamaxali ten tetequipanojcayot cati Tanahuatijquet Nabucodonosor ten tali Babilonia quitalía ipan ininquechcuayo nochí talme huan nochí quinmanahuis cati amantzi tetequipanohuaj san tapic.

Huan ipan nopa talojtzi na niquistejqui huan ni-mohuejcatali. <sup>12</sup> Teipa quema Hananías ya quipostectoya nopa cuamaxali cati nijhuicayaya ipan noquechcuayo, TOTECO technojnotzqui na, ni-Jeremías, huan techilhui: <sup>13</sup> “Xiya campa Hananías huan xiquilhui para quej ni niamotoTECO niquijtohua: ‘Ta tijpostejqui se cuamaxali ten cuahuit,

pero ama ni masehualme quipiyaj se cuamaxali ten teposti ipan ininquechcuayo. <sup>14</sup> Pampa niamotECO Cati Niquinyacana Noilhuicac Ejcahua Ma Tatanitij niquijtohua: Na niquintalilijtoc ipan ininquechta nochí masehualme ten nochí ni talme se cuamaxali ten teposti. Huan niquinchihaultis ma yaca quitequipanotij Tanahuatijquet Nabucodonosor ten tali Babilonia. Huan ni tanahuatili amo aqui quipatas pampa hasta nochí tapiyalme nojquiya njmactilijtoc ya.’ ”

<sup>15</sup> Huajca na, niJeremías, quej ni niquilhui Hananías, nopa istacatica tajtolpanextijquet:

—Xiquita, Hananías, TOTECO amo mitztitantoc. Nelía hueyi tiquincajcayajtoc ni masehualme pampa inijuanti quineltocaj moistacaticayo. <sup>16</sup> Yeca ama TOTECO quijtohua para ta timquis. Quena, timquis ipan ni xihuit pampa ta timosisinijtoc ica TOTECO.

<sup>17</sup> Huan quena, ica ome metzti, Hananías mijqui.

## 29

### *Jeremías quintajcuilhui cati ya quinhuicatoque Babilonia*

<sup>1</sup> Ya ni nopa camanali cati na, nitajtolpanextijquet Jeremías, niquintajcuilhui nopa huehue tacame, totajtzitzí, tajtolpanextiani huan nochí masehualme ipan altepet Jerusalén cati Tanahuatijquet Nabucodonosor quinhuicatoya ipan tali Babilonia. <sup>2</sup> Ya ni panoc teipa quema Tanahuatijquet Nabucodonosor ya quihuicatoya Babilonia Jeconías huan inana cati eliyaya nopa sihua tanahuatijquet, nopa tayacanani ten icaltanahutil, nopa tayacanani ten sesen familia huan

nopa masehualme cati yajatij quichihuase ten hueli tequit. <sup>3</sup> Huan ni amatajcuiloli nijtitanqui ica Elasa, icono Safán, huan ica Gemarías, icono Hilcías, quema Tanahuatiquet Sedequías quintitanqui ipan tali Babilonia para ma quiitatij Tanahuatiquet Nabucodonosor. Huan nopa amatajcuiloli quijtohuayaya quej ni:

<sup>4</sup> TOTECO Cati Quinyacana Ilhuicac Ejcahua Ma Tatanitij, huan yaya cati toTeco tiisraelitame, quintitanilia ni camanali nochí nopa masehualme cati quinquixti ipan altepet Jerusalén huan quinhuicac tali Babilonia. Quej ni quinilhuía:

<sup>5</sup> “Ximochihuilica amochajchaj huan ipan xiitztoca. Nojquiya xijtocaca xocomecat pampa nopona anmocahuase miyac xihuit. <sup>6</sup> Ximosihuajtica huan xiquinpiyaca amoconehua. Xiquinsihuajtica amotelpocahua huan xiquinnamictica amoichpocahua. Huan xiquinpiyaca miyac amoixhuihua. Quena, ximomiyaquilica. <sup>7</sup> Xitequitica para panquisas huan quipiyas tasehuilisti nopa tali Babilonia. Ximotatajtica por ya, pampa sintia tali Babilonia quipiyas tasehuilisti, huajca amojuanti nojquiya anquipiyase.”

<sup>8</sup> TOTECO Cati Quinyacana Ilhuicac Ejcahua Ma Tatanitij huan yaya cati toTeco tiisraelitame quijtohua: “Amo xiquincahuilica ma amechcajcajahuaca nopa istacatica tajtolpanextiani huan nopa tenahualhuiani cati itztoque campa amojuanti. Amo ximoilhuica

nopa temicti cati inijuanti quiyoliltíaj,  
<sup>9</sup> pampa inijuanti san tacajcayahuaj huan  
 quijtohuaj niquinmacac inincamanal.  
 Pero na amo niquintitantoc.” Quej nopa  
 quijtohuaj TOTECO. <sup>10</sup> Huan nojquiya  
 TOTECO quijito: “Anitzose ipan tali  
 Babilonia 70 xihuit. Pero quema ya  
 ajsitos nopa 70 xihuit, na nihuallas huan  
 nimechtamichihuilis nochí nopa cuali  
 tamanti cati nimechtajtolcahuilijtoc huan  
 sempa nimechhualicas ipan amotal.  
<sup>11</sup> Pampa na nijmati cuali nopa tamanti cati  
 nijsencajtoc para amojuanti,” quijtohuaj  
 TOTECO. “Nijsencajtoc cati cuali huan amo  
 aqui fiero, para nochí quisas cuali para  
 amojuanti teipa huan para anquiselise  
 cati anquichiyaj. <sup>12</sup> Huan ipan nopa tonali  
 amojuanti anhualase ammonatajtiuij ica  
 na, huan na nimechtacaquilis. <sup>13</sup> Huan  
 antechtemose huan antechpantise pampa  
 antechtemose ica nochí amoyolo.

<sup>14</sup> “Quena, antechpantise, huan na nimechquix-  
 tis ipan nopa talme campa nimechtitanqui  
 para xitetequipanotij huan sempa nimech-  
 hualicas ipan amochaj huan ipan amotal  
 campa anquisque.

<sup>15</sup> “Pampa amojuanti anquijtohuaj: TOTECO  
 techhualtitanilijtoc tajtolpanextiani nica  
 ipan tali Babilonia. Ya nopa quinequi  
 quijtos anquintacaquilíaj iniistacatica  
 camanal. <sup>16</sup> Huajca TOTECO Cati  
 Quinyacana Iilhuicac Ejcahua Ma Tatanitij

quijtohua: Xijtacaquilica cati niqijtohua ten nopa tanahuatijquet cati mosehuijtoc ipan isiya David ipan Jerusalén huan nochí amoteixmatcahuá cati noja mocajtoque ipan altepet Jerusalén huan amo yajque amohuaya para tetequipanotij san tapic.”

<sup>17</sup> Huan TOTECO Cati Quinyacana Iilhuicac Ejcahuá Ma Tatanitij nojquiya quijtohua: “Niquintitanilis tatehuilisti, mayanti huan cocolisti. Huan niquinchihuas quej nopa higos cati pano icsitoque huan ya lochontoyaj hasta amo aqui hueli quicuas.

<sup>18</sup> Niquinquixtis huan niquinsemanas para ma yaca campa hueli ipan taltipacti. Huan nochí masehualme ipan nopa talme campa niquintitanis quintelchihuase, quinpinajtise huan ten hueli quinilhuise.

<sup>19</sup> Quej nopa nijchihuas pampa inijuanti amo quinejque techtacaquilise masque talojtzitzí niquincamanalhui ica notajtolpanextijcahuá cati techtequipanohuaj.” Quej nopa quijtohua TOTECO.

<sup>20</sup> Huajca, xijtacaquilica icamanal TOTECO nochí amojuanti anisraelitame cati anitztoque ipan tali Babilonia. <sup>21</sup> TOTECO Cati Quinyacana Iilhuicac Ejcahuá Ma Tatanitij huan yaya cati toTeco tiisraelitame, quej ni quijtohua ten nopa istacatica tajtolpanextiani cati inintoca Acab, icode Colaías huan Sedequías, icode Maasías cati tepohuilíaj istacatili huan quijtohuaj para na niquintantoc: “Na niquintemactilis imaco Nabucodonosor para yaya ma quinmicti iniixpa

nochi masehualme. <sup>22</sup> Huan quej nopa quemá se masehuali ten tali Judá cati itztoctipan tali Babilonia quinequis quitelchihuas se acajya, quiilhuise: Ma TOTECO mitztatis tiyoltoc quej nopa tanahuatijquet ten Babilonia quichijqui ica Sedequías huan Acab. <sup>23</sup> Pampa ni tacame quichijque se tamanti cati tahuel fiero iniixpa noisraelita masehualhua. Injuanti quinsihuacuili-jque nopa tacame cati itztoque inincal-nechca. Huan quiyoliltíaj camanali huan istacatili huan quijtoque para na niquimacayaya nopa camanali. Na nijmati para melahuac quichijtoque ni tamanti pampa niquitztoc huan yeca niquijtohua para melahuac quichijtoque.” Quej nopa quijtohua TOTECO.

### *Camanali para Semaías*

<sup>24</sup> Huan nojquiya TOTECO quititanili ni camanali Semaías cati ehua Nehelam. Techilhui ma niquilhui ya ni: <sup>25</sup> “TOTECO Cati Quinyacana Ilhuicac Ejcahua Ma Tatanitij huan yaya cati toTeco tiisraelitame quijtohua: ‘Ta tititanqui se amatajcuiloli ica ta motoca para nopa totajtzi Sofonías cati icone Maasías, huan nochimasehualme cati itztoque ipan altepet Jerusalén. Huan nopa amatajcuiloli quijito:

<sup>26</sup> “‘Sofonías:

“‘TOTECO mitztalijtoc quej titotajtzi para tipatas nopa totajtzi Joiada para titamocuitahuis ipan itiopa TOTECO. Huan motequi ta para tiquitzquis cati hueli loco tacat cati tayolmelahuas huan

mochihuas quej se tajtolpanextijquet huan tijtzacuas ipan tatzacti cati eltoc tatzinta tali huan tijmetzcuapachos ica cuahuit huan tiquilpis iquechcuayo ica tepos cadenas. <sup>27</sup> Huajca, ¿para ten amo teno tijchihuilijtoc Jeremías cati ehua Anatot cati teyolmelajtinemi quej se tajtolpanextijquet? <sup>28</sup> Pampa yaya techtajcuihuijtoc nochí tojuanti cati tiitztoque nica ipan tali Babilonia huan quijjohua para huejcahuas titetequipanose nica. Huan nojquiya techilhuijtoc para monequi ma timochihuilica tochaj huan ma tijtocaca cuame cati temacaj intintajca, pampa huejcahuas tiitzose nica para tijcuase itajca.’”

<sup>29</sup> Huan nopa totajtzi Sofonías quihualicac nopa amatajcuiloli campa na, niJeremías, huan techpohuili. <sup>30</sup> Huajca TOTECO technojnotzqui huan techilhui: <sup>31</sup> “Xiquintitanili se amatajcuiloli nochí nopa masehualme cati itztoque nepa ipan tali Babilonia huan xiquinilhui para quej ni na, ni-amTECO, niquijjohua: ‘Pampa Semaías cati ehua Nehelam amechyolmelajtoc quej se tajtolpanextijquet masque na amo njtitantoc huan amechchihualli xijneltocaca iistacaticayo, <sup>32</sup> huajca ma quicaqui ni camanali. Nijtatzacuiltis ya huan nochí cati ehuani ipan ya ifamilia. Yon se iixhui amo quiitas nopa cuali tamanti cati na nicajoctoc para nomasehualhua pampa yaya amechchijtoc para ayecmo techtepanitaca na.’” Quej nopa quijjohua TOTECO.

## 30

*Israelitame sempa mocuepase inintal*

<sup>1</sup> TOTECO sempa technojnotzqui na, niJeremías, huan techmacac seyoc camanali, quijito: <sup>2</sup> “Quej ni niDIOS huan niamTECO anisraelitame niquijtohua: Xiquijcuilo ipan se amatapohuali nochicati nimitzilhuijtoc. <sup>3</sup> Pampa ajsis tonali quema sempa niquinhualicas nomasehualhua ipan tali Israel huan Judá cati na niquinmacac inihuejapan tatahua. Huan inijuanti sempa moaxcatise huan itztose ipan inintal para quitequipanolise huan quicuase cati temacas.” Quej nopa quijtohua TOTECO.

<sup>4</sup> Huan ya ni nopa camanali cati TOTECO techmacac ten tali Israel huan Judá, <sup>5</sup> quijito: “Campa hueli nijcaqui tzajtzisti huan majmajti huan masehualme cati huihuipicaj. Amo cana nijcactoc se camanali ten tasehuilisti. <sup>6</sup> Campa hueli niquinita nochitacame istaltique huan quiitzquíaj inintzinquech quej se sihuat cati cuajcualo quema ajsi hora para conepiyas. <sup>7</sup> ¡Ay! Monechcahuía se hueyi tonati cati tahuel fiero. Amo quema oncatoc se tonali quej nopa. Elis se tonali ten taijyohuilisti para israelitame\*. ¡Pero teipa, TOTECO quinmanahuis!

<sup>8</sup> “Pampa TOTECO Cati Quinyacana Iilhuicac Ejcahua Ma Tatanitij quijtohua: ‘Ipan nopa tonali, na nijpostequis nopa cuamaxali cati quinalilijtoque ipan ininquechcuayo nopa israelitame huan niquintojtomas ten nopa tanahuatili

\* <sup>30:7</sup> 30:7 O iixhuihua Jacob. Jacob eltoc seyoc itoca Israel cati ica pejque israelitame.

cati ohui para quitequipanose Nabucodonosor. Huan quej nopa ayecmo quintequipanose masehualme ten sequinoc talme. <sup>9</sup> Pampa noisraelita masehualhua techtequipanose na, ni ininTECO, huan niiniDios huan nijtalis David para elis inintanahuatijca.’

*TOTECO quinmaquixtis imasehualhua  
(Jer. 46:27-28)*

<sup>10</sup> “Huajca amo ximajmahuica amojuanti cati anisraelitame. Na nimoTECO nimechilhuis: ‘Amo ximocuesoca pampa na nimechmaquixtis campa amantzi anitztoque ipan talme cati mopantíaj huejca. Huan amocone hua nojquiya niquinhualicas ten campa nimechtitanc. Huan nochí amojuanti anmosiyajquetzase huan anquipiyase tasehuilisti ipan amotal huan amo aqui amechtemajmatis.’ <sup>11</sup> NiamoTECO niquijtohua: ‘Na niitztos amohuaya huan nimechmanahuis. Huan masque niquintamiixpolos nopa talme campa nimechtitanc, amojuanti amo nimechtzontamiltis. Pero, quena, nimechtatzacuiltis por amotajtacolhua pampa amo hueli nimechcahuas san quiaja huan amo nimechtatzacuiltis.’”

<sup>12</sup> TOTECO quijtohua: “Amo onca pajti para amococo. Amotajtacolhua eltoc quej se cocot cati tahuel lochontoc huan amo hueli pachihuis iseli.

<sup>13</sup> Amo aqui mocuesohuayaya para amechpajtis campa anmococojtoque huan yon se pajti amo quinamiqui para quipachihueltis amotajtacolhua.

<sup>14</sup> Nochi nopa teteyome cati niquinita quej amomecahua cati amechicnelyayaj, ama amechtahuelcajtoque. Na tahuel nimechcocojtoc

quej nielisquía niamocualancaitaca. Yon amo nimechtasojtac pampa amotajtacolhua tahuel miyac huan nelía huejhueyi. <sup>15</sup> ¿Para ten antzajtzij pampa nimechtatzacuiltía? Amotacuajcualol amo quipixqui pajti. Quinamiquiyaya antaijyohuijtose para nochipa pampa tahuel hueyi antajtacolchijitoque huan yeca nimechtatzacuiltijtoc chicahuac.

<sup>16</sup> “Pero nochí cati amechtaijyohuiliyyayaj nojquiya taijyohuise. Nochi amocualancaitacahua teipa elise tetequipanohuani ipan seyoc tali. Cati amechtachtequilíaj, nojquiya quintachtequilise. Huan cati amechtehuíaj, nojquiya quintehuise. <sup>17</sup> Na niamoTECO nimechpajtis campa ancocojtoque por tajtacoli huan nimechchicahuas. Masque masehualme quitocaxtise: ‘Ya ni Jerusalén, nopa altepet cati quitahuelcajtoque huan amo aquí mocuesohua por ya.’ ”

<sup>18</sup> Pero niamoTECO niquijto: “Pero teipa nochí annoisraelita masehualhua cati amechhuicatoque ipan sequinoc talme nimechhualicas sempa ipan amotal huan na nimechtaojtas. Huan sempa quicualtalise altepet Jerusalén. Huan sempa quichijchihuase nopa caltanahuatili quej achtohuiya eliyaya. <sup>19</sup> Huan ipan nochí nopa altepeme techtascamatilise huan quipiyase miyac paquilisti. Huan na niquinmiyaquilis israelitame huan niquinchihuas se hueyi altepet ten masehualme. Nochi israelitame quinitase para miyac ininpati huan nochí quitepanitase inintal. <sup>20</sup> Ininconehua itztose cuali quej quema tanahuatiyaya David,

huan inintal huan inintanahuatijcayo eltose temachme noixpa. Huan niquintatzacuiltis nochí inincualancaitacahua cati quinequise quintaijyohuiltise. <sup>21</sup> Huan se inintanahuatijca motananas campa inijuanti. Huan ayecmo quinnahuatis se seyoc tali ejquet. Huan na nijnotzas para ma techtequipano quej se totajtzi ipan notaixpa, pampa amo motemacasquía technechcahuis sinta amo nijnotza. <sup>22</sup> Huan inijuanti elise nomasehualhua huan na nielis niiniDIOS.” Quej nopa quijjtohua TOTECO.

<sup>23</sup> Xiquitaca. Icualancayo TOTECO huala quej se ajcomalacat huan quinajsis nopa masehualme cati mosisiníaj ica ya. <sup>24</sup> Huan TOTECO amo quisehuis icualancayo hasta quichihuas nochí cati moilhuijtoc quichihuas. Ipan itamiya tonali ni taltipacti anquimachilise nochí ya ni cati ama nimechilhuía.

## 31

### *Israelitame sempa mocuepase ipan inintal*

<sup>1</sup> TOTECO quijjtohua: “Ipan nopa tonali cati hualas, na nielis niiniDIOS nochí familias ten israelitame huan inijuanti elise nomasehualhua.

<sup>2</sup> Na niquinmocuitahuis cati momanahuijtoque ten miquilisti ica macheta ipan sequinoc talme. Huan niquintasojas ipan nopa huactoc tali huan quema quitemohuaj canque mosiyajquetzase.

<sup>3</sup> Pampa huecjajquiya na nimonexti ica israelitame nepa campa huactoc tali huan niquinilhui: Nimechicnelía ica se teicnelijcayot cati huejcahuas para nochipa, huan yeca nijsenhuiquilijtoc nimechchihuilía cati cuali.

<sup>4</sup> Noisraelita masehualhua cati nimechicnelía, na sempa njcuaultalis amotal. Sempa anquipiyase tasehuilisti huan anmijtotise ica paquilisti quema antatzotzonase ica panderos. <sup>5</sup> Sempa anquitocase xocomecat ipan nopa tepeme ten tali Samaria huan anpaquise quema anquicuase itajca cati anquitocase. <sup>6</sup> Ajsis tonali quema nopa tamocuitahuiani cati itztoque ipan nopa tepeme ten tali Efraín amechtzajtzilise huan amechilhuese: ‘Ma tiyaca ipan altepet Sion \* campa itztoc TOTECO Dios.’ ”

<sup>7</sup> Pampa TOTECO quijtohua: “Xihuicaca ica paquilisti por ni tali Israel pampa Israel eltoc nopa tali ica itanahuatijcayo cati más quipiya tatepanitacayot que nochí sequinoc talme. Huan Israel eltos nopa tayacanquet ten nochí sequinoc talme. Xihuicaca chicahuac ica paquilisti. Xiquijtoca: ‘TOTECO quinmaquixtijtoc iisraelita masehualhua cati noja itztoque.’ <sup>8</sup> Na niquinhuilicas ten nopa talme cati mopantíaj ica norte huan ten nopa talme campa hueli hasta campa ontami taltipacti. Hualase cati popoyotzitzí, cati amo hueli nemij. Hualase sihuame cati conehuejque huan cati ya quipixque ininconehua. San sejco mochihuase nelía tahuel miyaqui israelitame cati mocuepase nica. <sup>9</sup> Chocatihualase ica miyac paquilisti para mocuepase ipan inintal. Huan niquinhyacanas ica miyac teicnelijcayot hasta ajsitij ininchaj. Nejnentihualase iteno hueyat cati quipiya miyac at huan ipan se ojti cati xitahuac campa amo motepotanise. Pampa niitztoc ni inin-

---

\* **31:6** 31:6 Jerusalén.

Tata israelitame huan niquinitas nopa israelitame cati ehuani tali Israel † eltoc quej noachtohui cone cati más quiselis notatiochihual.

**10** “Xitacaquica antalme, xijtacaquilica icamanal TOTECO huan xitepohuilica campa hueli. Xiteilhuica: ‘TOTECO cati quinsemanqui iisraelita masehualhua, sempa quinsentilis huan quinmocuitahuis quej se tamocuitahuijquet quinmocuitahuía iborregojhua.’ **11** Pampa ni ininTECO niquinmanahuis noisraelita masehualhua inimaco nopa masehualme ipan se tali cati más quipiyaj chicahualisti que injuanti.

**12** “Quena, injuanti sempa hualase ipan inintal huan huicase ica paquillisti ipan nopa tepeme cati más huejcapantique ipan Jerusalén. Mopaqulismacase por nochí tamanti cati ni ininTECO ica niquintiochihuas. Na niquinmacas cuajcuali pixquisti, trigo, xocomecat iayo, aceite, borregojme huan huacaxme. Huan ininemilis elis quej se tatocti cati nochipa nicatequía. Huan ayecmo quema taijyohuise. **13** Huajca nopa ichpocame mijtotise ica paquillisti, huan nojquiya nopa telpocame huan tacame cati huehuentzitz. Pampa ininchoquilis nijpatas ica paquillisti huan niquinyolchicahuas. Huan niquinchihuas para nochí ininpinahualis huan inintaijyohuilis ma mopata ica paquillisti. **14** Huan niquintamacas nopa totajtzitz ica tahuel miyac tacajcahualisti cati masehualme quinhuiquilise ipan nopa tiopamit para injuanti huelis tacuase cuali. Huan nomasehualhua nojquiya niquinmacas miyac

---

† **31:9** 31:9 O Efraín.

tacualisti. Quej nopa niquijtohua ni ininTECO.”

<sup>15</sup> TOTECO sempa nechcamanalhui huan techilhui: “Onca se hueyi choquisti ipan altepet Ramá. Raquel ‡ choca por iconehua. Huan amo quinequi moyoltalis pampa nochí ya mictoque.”

<sup>16</sup> Pero TOTECO quiilhuúa: “Ayecmo más xichoca. Xijhuatza moixteyol pampa tjselis motaxtahuil por nochí motequi. Tiquinitas moconeňua sempa mocuepase inintal ten nopa talme campa quinhuicatoque, quej nopa nimoTECO niquijtohua. <sup>17</sup> Ximochiya ipan na huan moconeňua mocuepase campa inintal. Quej nopa nimoTECO niquijtohua. <sup>18</sup> Nojquiya nijcactoc inintequipachol israelitame§. Inijuanti techilhuíaj quej ni: ‘Eltoc quej ta techhuitectoc quej se quihuitequi se toro cati amo quinequi quiselis se cuamaxali para huelis tijtequihuise para tapoxonis. Quena, techtatzaculti chicahuac para ma timoxitahuaca. Huajca ama techpalehui para timoyolcuepase huan timitztequipanose pampa san ta titotECO Dios. <sup>19</sup> Pampa quema timohuejcatalijque ten ta, tihuetezque ipan hueyi tequipacholi. Nelía timomaquilijtoque chicahuac ipan totacayo por tohuihuiyo. Huan tahuel timopinajque por nochí cati tijchijque quema tieliyaya se altepet cati yancuic quej se telpocat.’”

<sup>20</sup> Huan TOTECO quijito: “Israelitame \* itztoque

---

‡ **31:15** 31:15 Raquel elqui se isihua Jacob o Israel huecjajquiya huan elqui inihuejcapan nana miyac israelitame. § **31:18** 31:18 O iixhuihua Efraín. Efraín elqui icone José huan iixhui Jacob o Israel. \* **31:20** 31:20 Miyac hueltas quitequihuíaj Efraín para nochí israelitame ica norte.

nocone hua cati yejyectzitzti. Quena, itztoque quej se tacat ioquichpil cati más quiicnelía. Huan noja niquinicnelía israelitame masque niquin-tatzaculti. Na tahuel nimoyoltequipachohua por nocone hua, huan niquinicnelía, huan temachti niquintasojtas.”

<sup>21</sup> Huan nojquiya TOTECO quijito: “Israelitame, xijtalica tanextili ipan ojti campa anyajque cati quinnextilis nochí sequinoc quenicatza ma mocuepaca ipan tali Israel. Xijpiyaca miyac cuidado para anquimatise canque annejnentoque para amo ohui anquipantise nopa ojti sempa, pampa melahuac sempa anmocuepase ipan amoaltepehua. <sup>22</sup> ¿Hasta quema tamis para san anmocuapolojtinemise amojuanti cati anitztoque quej se huihui ichpocat? TOTECO quichihuas ma pano se yancuic tamanti ipan ni tali: Israelitame quicuanajnahuase huan quiicnelise ininTECO.”

<sup>23</sup> Huan TOTECO Cati Quinyacana Iilhuicac Ejcahua Ma Tatanitij huan ininTeco israelitame, quijtohua: “Quema sempa niquinhuialicas ipan tali Judá huan ialtepehua, nopa masehualme cati quinhuicatoyaj seyoc tali, inijuanti quijtose: ‘¡Ma TOTECO quitiochihua ni tepet cati tatzejtzeloltic campa tanahuatía cati xitahuac!’

<sup>24</sup> Huan nopa masehualme itztose ipan nochí altepeme ten tali Judá. Huan elise miltequitini huan tacame cati quinmocuitahuíaj inintapiyal-hua huan quipiyase tasehuilisti. <sup>25</sup> Pampa na niquincahuas ma mosiyajquetzaca nopa masehualme cati siyajtoque. Huan niquinylchicahuas inijuanti cati mocuesohuayayaj.”

**26** Huan ipan nopa talojtzi quema niisac, niquijto: “Nelía cuali nicochqui.”

*Nopa yancuic camanal sencahualli*

**27** Huan TOTECO quiijtohua: “Ajsis tonali quema tahuel niquinmiyaquilis nopa masehualme huan tapiyalme cati itztose nica ipan tali Israel huan ipan tali Judá. **28** Quej ica miyac cuidado nighthuitac, nijosolo, nijtahuiso huan nijtamisosolo ni tali, ama ica miyac cuidado nijtocas huan nijsencahuas.

**29** “Huan huajca nopa masehualme ayecmo quiijtose para se masehuali taijyohuis por cati seyoc quichijqui. Ayecmo quiijtose: ‘Nopa tacame quicuajque xocomecat itajca cati xococ, huan ininconebla fiero quimatque ipan inintancoch.’ **30** Pampa sesen tacat miquis por ya itajtacolhua. Huan cati quicuas xocomecat itajca cati xococ, san yaya quimatis fiero ipan itancoch.”

**31** Huan TOTECO quiijtohua: “Ajsis tonali quema na nijchihuas se yancuic camanal sencahualli ica nopa masehualme ten tali Israel huan tali Judá. **32** Pero ni camanal sencahualli amo elis quej cati nijchijqui ica inihuejcapan tatahua, quema niquinmaitzqui huan niquinquixti tali Egipto, pampa inihuejcapan tatahua quiixpanoque nopa camanal masque niquinicneliyaya quej se mosihuajtijquet quiicnelía isihua. **33** Ya ni elis nopa camanal sencahualli cati nijchihuas inihuaya israelita masehualme: Na niquijcuilos notanahuatil ipan iniyolo para ma techhueyimatica. Huan huajca inijuanti nelía elise nomasehualhua huan na

nielis niiniDios. <sup>34</sup> Huan ipan nopa tonali ayecmo monequis para se masehuali quimachtis seyoc para ma techixmatica ni ininTECO, pampa sesen ten injuanti cati huejhueyi huan cati coneme, techixmatise cuali. Huan niquintapojojpolhuis huan niquelcahuas intintajtacolhua.” Quej nopa quiijto TOTECO.

<sup>35</sup> TOTECO yaya quitali tonati para techtaahuilis tonaya huan metzti huan sitalime para taahuise tayohua. Yaya cati quichihua ma moojolini nopa hueyi at huan ma mosisini. Yaya itoca TOTECO Cati Quinyacana Iilhuicac Ejcahua Ma Tatanitij huan yaya quiijtohua:

<sup>36</sup> “Quej mocahuas tonati huan metzti huan sitalime para nochipa, quej nopa nochipa noisraelita masehualhua itztose se hueyi altepet ten masehualme ica inintanahuatijcayo para nochipa. <sup>37</sup> Quej masehualme amo hueli quitamachihuase quesqui ihuexca ilhuicacti huan quipantise itzinpehualtil ni taltipacti, quej nopa nojquiya amo hueli niquintahuelcahuas noisraelita masehualhua por intintajtacolhua.”

<sup>38</sup> Huan TOTECO quiijtohua: “Ajsis tonali quema nochí nopa altepet Jerusalén sempa quicualtalise para na ni ininTECO. Quicualtalise ten campa eltoc nopa huejcapantic cali cati itoca nopa Torre ten Hananeel hasta campa nopa caltemit campa esquina ipan itepa. <sup>39</sup> Huan quitilinise se hilo para tatamachihuase ten nopona hasta iixco nopa tepet Gareb huan hasta campa Goa. <sup>40</sup> Huan nochí nopa altepet, huan nochí nopa tamayamit campa campo santo huan campa quitepehuaj cuajnexti, elis tatzejzeloltic

huan taiyocatalili para na ni ininTECO. Huan nojquiya elis tatzejtzeloltic para na nochí nopa talme cati eltoque hasta campa nopa hueyat Cedrón. Huan ten nopona hasta campa nopa Caltemit ten Cahuayojme cati mocahua ica campa hualquisa tonati ten nopa altepet. Huan ayecmo aqui quiyahualos nopa altepet para moaxcatis, yon ayecmo aqui quisosolos.”

## 32

### *Jeremías quicojqui se tali*

<sup>1</sup> Quema Tanahuatijquet Sedequías ten tali Judá yahuiyaya ipan majtacti xihuit ipan itequi ipan itanahuatil, huan Nabucodonosor yahuiyaya ipan majtacti huan chicueyi xihuit para tanahuatis ipan ten ya itanahuatil, TOTECO technojnotzqui na niJeremías. <sup>2</sup> Ipan nopa tonali nopa soldados ten tali Babilonia quiyahualojtoyaj altepet Jerusalén huan na nitzactoya ipan nopa tatzacti cati eltoc taltita tatzinta ten nopa caltanahuatili. <sup>3</sup> Tanahuatijquet Sedequías tanahuatijtoya ma techtzacuaca pampa nitayolmelahuayaya para nopa tanahuatijquet ten tali Babilonia quiitzquisquía nopa altepet. <sup>4</sup> Huan nojquiya niquijtohuayaya para quiitzquisquíaj nopa Tanahuatijquet Sedequías huan quihiucasquíaj iixpa nopa tanahuatijquet ten tali Babilonia para quitajtolsencahuase huan quitatzacuiltise. <sup>5</sup> Nojquiya taloitzitzi niquilhuiyaya Tanahuatijquet Sedequías para TOTECO quiijtojtoya para Nabucodonosor quihiucasquía ipan tali Babilonia huan nepa

quitzacuasquía para miyac xihuit hasta miquis. Huan niquilhui Sedequías masque quintehuisquía, amo quintanisquía huan elis más cuali sintia san motemacas ica ya. Quej nopa niquilhuiyaya.<sup>6</sup> Teipa TOTECO technojnotzqui na, niJeremías, huan techilhui:<sup>7</sup> “Xiquita, momachicni Hanameel, icone motío Salum, hualas mitzitaqui para mitztencahuili qui se tali cati quipixtoc nepa altepet Anatot. Pampa nopa tanahuatili quijtohua para nopa tali quinamiqui tijcohuas ta amantzi quema ayemo quitencahuilíaj seyoc.”

<sup>8</sup> Huajca Hanameel, icone notío Salum, hualajqui techpaxaloco campa nopa tatzacti huan techilhui: “Techcohuili nopa tali cati nijpixtoc ipan tali Benjamín pampa totanahuatil quijtohua para ta mitztocarohua tijcohuas.” Huan quej nopa nijmatqui para nopa camanali cati nijcajqui melahuac huala ten TOTECO.

<sup>9</sup> Huajca na nijcohuili ital nomachicni Hanameel cati quipixtoya nepa Anatot. Huan nijmacac diecisiete plata tomi. <sup>10</sup> Teipa iniixpa testigos nijtali nofirma, huan nijtzajqui huan nijtali nosello ipan nopa talamat. Teipa nijtamachijqui nopa plata huan nijtaxtahui. <sup>11</sup> Teipa nijcuic nopa talamat cati tzactoc huan quipixtoya nosello huan quijtohuayaya quenicatza nijcojqui nopa tali. Huan nojquiya nijcuic nopa iixcopinca cati tapojtoc cati amo nijtzajqui ica nosello,<sup>12</sup> huan nijmactili Baruc, icone Nerías cati icone Maasías, iixpa nomachicni Hanameel, huan iniixpa nopa testigos cati quifirmarojque nopa talamat huan iniixpa nochí

nopa Judá ehuani cati tamocuitahuiyayaj calixpa ten nopa tatzacti.

<sup>13</sup> Huan iniixpa nochí nopa masehualme niquilhui Baruc ni camanali: <sup>14</sup> “TOTECO Cati Quinyacana Iilhuicac Ejcahua Ma Tatanitij huan yaya cati ininTeco tiisraelitame quijtohua ya ni: ‘Xijcui nopa talamat cati quipiya nosello cati quinextía para nijcojqui nopa tali huan xijcui iixcopinca, huan xijtali ipan se comit para huejcahuas eltos. <sup>15</sup> Pampa TOTECO Cati Quinyacana Iilhuicac Ejcahua Ma Tatanitij huan cati ininTeco israelitame, quijtohua: Teipa ni amat elis miyac ipati, pampa se tonali nochí ni masehualme sempa moaxcatise talme ipan ni tali huan sempa quicohuase huan quinamacase calme. Nojquiya quicohuase tali huan xocomeca milme.’

### *Jeremías motatajti ica TOTECO*

<sup>16</sup> “Teipa quema ya nijmactilijtoya Baruc nopa amame, na nimotatajti ica TOTECO huan niquilhui: <sup>17</sup> ‘NoTECO Dios, ta tijchijqui ilhuicacti huan taltipacti ica momax huan ica mohueyi chicahualis, pampa para ta amo onca yon se tamanti cati ohui. <sup>18</sup> Ta titeicnelía miyac huan tijpiya hueyi moyolo ica nochí masehualme. Pero nojquiya ta tiquintatzacuiltía coneme por inintajtacolhua inintatahua. Nelía tihueyi huan tiDios cati tijpiya nochí chicahualisti. Motoca eltoc: TOTECO Cati Quinyacana Iilhuicac Ejcahua Ma Tatanitij. <sup>19</sup> Tijpiya miyac talnamiquilisti huan tijchihua huejhueyi tiochicahualnescayot. Tiquita nochí tamanti cati quichihuaj masehualme huan tiquintaxtahuía quej quinamiqui ica nochí cati cuali

huan amo cuali quichijtoque ipan nochí ininemilis. <sup>20</sup> Tijchijtoc huejhueyi tamanti ipan tali Egipto. Huan nochí cati tijchijqui nopena hasta ama quejipa quielnamiquij. Tijsehuiquilijtoc tijchihua huejhueyi tiochicahualnescayot ipan tali Israel huan ipan nochí taltipacti. Nelía timohueyichijtoc. Hasta ama nochí quicactoque ten motoca.

<sup>21</sup> “ ‘Ta tiquinquixti israelitame ipan tali Egipto ica mohueyi chicahualis huan ica huejhueyi tiochicahualnescayot. Huan nochí injuanti mitzimacasque por cati tijchijqui. <sup>22</sup> Huan tiquinmacac ni tali cati huejcajquiya tiquintajtolcahuili inihuejapan tatahua para tiquinmacasquía. Se tali yejyectzi cati temaca nochí tamanti cati cuali. <sup>23</sup> Huan quena, tohuejapan tatahua hualajque moaxcatico, pero injuanti amo quinejque mitztepanitase, yon amo quichijque cati quijjtohua motanahuatil. Amo teno quichijque cati tiquinnahuatiyaya. Huan yeca tiquintitanilijtoc ni hueyi tatzacuiltli.

<sup>24</sup> “ ‘Huan ama nopa Babilonia ehuani quimontonojtoque tali campa hueli para ixtejcose huan quipanose ni tepamit cati quiyahualojtoc ni altepet. Huan ama tijtatzacuiltia ni altepet ica tatehuilisti, mayanti huan cocolisti. Nochi pantotoc quej tiquijto. <sup>25</sup> Huan ta technahuatia ma nijcohua nopa tali, huan quena, nijchijtoc iniixpa ni testigos huan niquixtahua, masque ni altepet Jerusalén elis iniaxca nopa caldeos.’ ”

<sup>26</sup> Huajca TOTECO technojnotzqui na, ni Jeremías, huan techilhui: <sup>27</sup> “Na ní Dios, ni nin’ Teco nochí masehualme ipan ni taltipacti, amo onca se tamanti cati ohui para na. <sup>28</sup> Na nijtemactilis ni altepet imaco Nabucodonosor, tanahuatijquet ten tali Babilonia. <sup>29</sup> Huan nopa Babilonia ehuani calaquise huan quitatise ni altepet Jerusalén. Nojquiya quitatise nochí nopa calme campa quitatiyayaj copali para nopa teteyot Baal, huan campa quitencahuayayaj tacajcahualisti cati san quitoyahuayayaj iixpa huan ica ya nopa tahuel techcualancamacayayaj. <sup>30</sup> Nochi israelitame huan Judá ehuani quichijtoque cati amo cuali hasta quema noja eliyayaj coneme. Huan tahuel techcualancamacatoque ica nochí cati quichihuaj. <sup>31</sup> Techchijtoque ma nicualani hasta quema pejque quicualtalíaj ni altepet huan hasta ama. Huajca yeca ama niquixpolos ni altepet Jerusalén.

<sup>32</sup> “Nochi nopa masehualme ten tali Israel huan tali Judá, huan nopa tanahuatiani, taya-canani, totajtzitzi huan tajtolpanextiani, tahuel tajtacolchijtoque. Huan inintajtacol techchijtoc ma nicualani. <sup>33</sup> Inijuanti moicancuetque ica na huan nechcajque huan amo quinejque tech-toquilise. Huan na mojmosta niquinmachtijtoc para ma quimachilica taya cuali huan taya amo cuali, pero amo quinejque techtepanitase, yon amo quinejque ma niquintacahualti. <sup>34</sup> Hasta quichijtoque amo tapajpactic huan quimahuis-polojtoque notiopa pampa nopona quincalaqui-

jque teteyome huan quinhueyichijque. <sup>35</sup> Huan quichijtoque huejhueyi taixpamit para Baal ipan nopa tamayamit Ben Hinom. Nopona quintatíaj ininconehua quej tacajcahualisti para nopa teteyot Moloc. Ya nopa eli se tamanti cati na amo quema niquinnahuati ma quichihuaca, yon amo quema nimoilhui para quej nopa elis. Nelía huejhueyi nopa tajtacoli cati quichijtoque nopa tali Judá ehuani.

<sup>36</sup> “Huajca ama na niamoTECO Cati Niquinya-cana Noilhuicac Ejcahua Ma Tatanitij, huan cati ni ininTeco israelitame quej ni niquijtohua ten ni altepet: Ni altepet nijtemactilis imaco nopa tanahu-atijquet ten tali Babilonia huan yaya quitaijy-ohuilitis huan quihualiquilis tatehuilisti, mayanti huan cocolisti. <sup>37</sup> Pero na sempa niquinhualicas nomasehualhua ten nopa talme campa niquintitanis ica nohueyi cualancayo. Huan niquinhualicas sempa ipan ni altepet huan niquinchihuas ma itztoca temachme huan ma itztoca ica paquilisti. <sup>38</sup> Huan inijuanti elise nomasehualhua huan na nielis ni ininTeco Dios. <sup>39</sup> Huan na niquinmacas se cuali iniyolo huan se cuali talnamiquilisti para ma techimacasica huan ma techtepanitaca para nochipa para quej nopa itztose ica yejyectzi huan iniihxuihua nojquiya.

<sup>40</sup> “Huan inihuaya nijchihuas se yancuic camanal sencahualli campa ininca nimocahuas para ayecmo quema niqintahuelcahuas, huan san niquinchihuilis cati cuali nochipa. Huan ipan iniyolo nijtalnis nopa paquilisti para techhueyichi-huase huan para amo techtahuelcahuase. <sup>41</sup> Huan na nelía nimopaquilmacas inihuaya. Niquinchi-

huilis cati cuali huan niquincahuas ma itztoca ipan ni tali ica yejectzi.

<sup>42</sup> “Huan quej niquintitanili nopa huejhueyi taijyohuilisti huan tatzacuiltili, quej nopa nojquiya ama niquinchihuilis cati cuali senquisa quej niquinilhijtoc. <sup>43</sup> Huan sempa anquincohuase huan anquinnamacase talme ipan ni tali campa amantzi amo aquijme masehualme, yon tapiyalme pampa nopa Babilonia ehuani quisosolojtoque. <sup>44</sup> Quena, sempa anquincohuase huan anquinnamacase talme. Huan anquitalise amofirma huan amosello ipan talamame iniixpa testigos campa hueli, pampa se tonali na ni jchihuas ma mocuepac a noisraelita masehualhua huan quicohuase talme ipan tali Benjamín, ipan ni altepet Jerusalén huan ipan altepeme ten tali Judá. Quicohuase ipan nochí nopa tali campa onca miyac cuatitamit huan ipan nopa tamayamit ten tali Filistea huan ipan nopa altepeme ten tali Neguev. Quej nopa niamoTECO niquijtohua.”

## 33

### *Tatiochihualisti cati hualas teipa*

<sup>1</sup> Quema na, niJeremías, noja niitztoya nitzactoc ipan icalixpa nopa tatzacti, TOTECO technojnotzqui ica ompa huan techmacac más camanali. <sup>2</sup> Quena, TOTECO cati quichijchijqui taltipacti huan quitali campa quinejqui ma elto, technojnotzqui huan techilhui: <sup>3</sup> “Techtzajtzili huan na nimitznanquilis huan nimitznextilis tamanti cati huejhueyi huan cati eltoc ixtacatzi cati amo tijmati. <sup>4</sup> Pampa ni ininTECO huan

niiniDios israelitame niquijtohua para cati hualahui quisosolose nochi calme ipan ni altepet. Quisosolose icaltanahuatil nopa tanahuatijquet quema quiyahualose ni altepet huan quitehuise.

<sup>5</sup> Huan masque sequij israelitame quintehuise nopa caldeos, nopa caldeo masehualme calaquise huan quinmictise masehualme ten ni altepet huan quitemitise ni altepet ica inintacayohua mijcatzitz. Pampa na niquintahuelcajtoc cati ehuani nica por inintajtacolhua huan yeca amo niquintasojtas quema techtajtanise tapalehuili.

<sup>6</sup> “Pero teipa ajsis tonali quema na nijchicahuas altepet Jerusalén huan nochi imasehualhua itztose ica cuali. Huan nijmacas ni altepet tasehuilisti huan nijchihuas nochi ma itztoca ica temachti nopona. <sup>7</sup> Pampa na sempa niquinhualicas ipan tali Judá huan ipan tali Israel nochi nopa israelitame cati itztoque ipan seyoc tali. Huan sempa itztose quej achtohuiya. <sup>8</sup> Huan niquinyolpajpacas ten nochi inintajtacolhua cati ica techixpanoque huan niquintapojojhuis. <sup>9</sup> Huan elis se hueyi paquilsti para na pampa inijuanti techhueyitepanitase, techhueyichihuase huan techhueyitalise iniixpa nochi talme. Huan nochi masehualme ipan taltipacti quitase nochi nopa tamanti cati cuali cati niquinchihuilfá nomasehualhua huan huihuipicase ica majmajti.”

<sup>10</sup> Huan TOTECO quijtohua: “Amojuanti anquijtose para nochi altepeme ipan tali Judá huan nochi calles ipan Jerusalén san sosolijtoque huan quej se huactoc tali. Huan anquijtose amo quipiya masehualme, yon tapiyalme. Huan quena, melahuac cati anquijtose. <sup>11</sup> Pero

nimechilhuía para teipa sempa caquistis paquilsti huan huicat nica. Sempa caquistis inintoscac cati paquij ipan inintahuicaltilis nopa telpocame huan ichpocame. Sempa techpaquilmamacase na ni ininTECO Cati Niquinyacana Noilhuicac Ejcahua Ma Tatanitij pampa na niitztoc cuali huan nochipa nitetasoja. Huan caquistis masehualme cati quihualicase tacajcahualisti ipan nochaj para techtascamatise pampa niquinhualicatoc nopa masehualme cati quinhuicatoyaj ipan seyoc tali huan nica itztose quej achtohuiya. Quej nopa niamoTECO niquipijtohua.”

<sup>12</sup> Huan nojquiya TOTECO Cati Quinyacana Iilhuicac Ejcahua Ma Tatanitij quiijtohua: “Ipan ni tali cati amantzi sosolijtoc huan campa amo aquijme masehualme, yon tapiyalme; sempa oncas tamocuitahuiani cati quintamacatinemise inborregojhua. <sup>13</sup> Huan ininborregojhua sempa momiyaquilise ipan altepeme cati quipiyaj tepeume huan ipan talme cati tatzinta, huan ipan nopa altepeme cati mocahuaj ipan tamayamit. Momiyaquilise ipan tali Benjamín, huan ipan nopa talme cati nechca altepet Jerusalén huan ipan nochí altepeme ten tali Judá. Huan sempa quinitase tamocuitahuiani cati quinmocuitahuíaj huan quinpohuaj inintapiyalhua.”

<sup>14</sup> Huan TOTECO quiijo: “Huan ajsis se tonali quema na nijchihuolis tali Israel huan Judá ehuani nochí cati cuali cati niquntajtolcahuili. <sup>15</sup> Huan ipan nopa tonali nijchihuas para iteipa ixhui David ma mosehui ipan David isiya yejyectzi. Huan yaya tanahuatis xitahuac huan ica miyac

tequiticayot huan quichihuas cati cuali. <sup>16</sup> Huan ipan nopa tonali nopa masehualme ten tali Judá huan altepet Jerusalén itztose temachme huan quiijtose: 'TOTECO yaya techchihua tixitahuaque iixpa.' <sup>17</sup> Huan nimechilhuía xitahuac: Amo quema polihuis para itztos se iixhui David cati mosehuis ipan isiya para tanahuatis ipan tali Israel. <sup>18</sup> Huan nochipa itztose levitame cati quitencahuase tacajcahualisti tatatili, tacajcahualisti ten harina huan nochí tamanti tacajcahualisti para na, ni ininTECO."

<sup>19</sup> Teipa TOTECO technojnotzqui na, niJeremías, huan techilhui: <sup>20-21</sup> "Quej amo aqui hueli quisosolos nopa camanalí cati njchijqui ica tonali huan yohuali para ma ayecmo tatañesis, yon ayecmo tzintayohuas, nojquiya amo aqui hueli quisosolos nopa camanalí sencahuali cati njchijtoc ica notequipanojca David para nochipa se iixhui tanahuatis ipan ilugar. Nojquiya amo aqui hueli quisosolos nopa camanalí cati njchijtoc ica nopa levitame huan totajtzitzi cati techtequipanohuaj. <sup>22</sup> Huan quej amo aqui hueli quinpohua sitalime, yon amo aqui hueli quitamachihua nopa xali cati onca iteno hueyi at, quej nopa niquinmiyaquilis iixhuihua David huan nopa levitame cati techtequipanohuaj hasta amo aqui huelis quinpohuas."

<sup>23</sup> Huan TOTECO sempa technojnotzqui na, niJeremías, huan techilhui: <sup>24</sup> "¿Tijcactoc taya quiijtohuaj nopa masehualme cati amo israelitame? Quiijtohuaj para niquintapejpeni tali Judá huan Israel ehuaní para noaxcahua, pero teipa niquintahuelcajqui. Yeca inijuanti quinpinajtíaj nopa is-

raelitame huan quijtohuaj para amo quinamiqui niquitas quej se tali o se tanahuatijcayot. <sup>25</sup> Pero nimoTECO niquijtohua: Quej amo quema nijpatas nopa tanahuatilme cati quinahuatíaj tonali huan yohuali, taltipacti huan ilhuicacti, <sup>26</sup> nojquiya amo quema niqintahuelcahuas nopa israelitame, yon amo nijtahuelcahuas notequipanoja David. Yon amo nijpatas nopa camanali cati nisencajtoc para nijtapejpenis se iixhui David para quinnahuatis iixhuihua Abraham, Isaac huan Jacob. Pero sempa niquinhualicas noisraelita masehualhua ipan inintal huan niqintasojtas.”

## 34

### *Camanali para Sedequías*

<sup>1</sup> Quema Tanahuatijquet Nabucodonosor ten tali Babilonia huan nochí isoldados ten nopa talme cati yaya quinnahuatía quitehuiyayaj altepet Jerusalén huan nopa altepeme ten tali Judá, TOTECO technojnotzqui na, niJeremías, huan techilhui: <sup>2</sup> “Xiya campa Tanahuatijquet Sedequías ten tali Judá, huan xiçuilhuiti para quej ni niamoTECO niquijtohua: ‘Na nijtemactilis ni altepet imaco nopa tanahuatijquet ten tali Babilonia huan yaya quitamitatis. <sup>3</sup> Huan ta amo timomanahuis. Mitzitzquise huan mitzhuicase iixpa nopa tanahuatijquet ten tali Babilonia huan ammoixtachilise huan anmocamanalhuise. Huan yaya mitzhuicas ipan tali Babilonia. <sup>4</sup> Pero xi-jtacaquili ni, Sedequías, cati titanahuatíaj ipan tali Judá: TOTECO quijtohua para ta amo timquis ipan tatehuilisti. <sup>5</sup> Ta timquis campa momasehualhua, huan inijuanti quitatise copali

para mitzelnamiquise quej quichijque ica motata. Chocase por ta huan quiijtose: ¡Ay TOTECO, ya mijqui totanahuatijca! Quej nopa elis pampa ni-amotECO niquijtohua para quej nopa nijsencajtoc para ma eli.’ ”

**6** Huajca na, niJeremías, cati niitajtolpanexti-jca TOTECO, niyolmelajqui Tanahuatijquet Sede-quías ten tali Judá ten nochí ya ni ipan altepet Jerusalén, **7** ipan nopa tonali quema nopa soldados ten tali Babilonia quiyahualojtoyaj altepet Jerusalén. Nojquiya quiyahualojtoyaj altepeme Laquis huan Azeca. San ni altepeme ipan tali Judá noja quipixtoyaj tepamit cati quinyahualojtoya pampa ayemo teno quinchihuilijtoyaj inincualancaitacahua.

### *Amo quitepanitaque itanahuatil Sedequías*

**8** Ya ni elqui nopa camanali cati TOTECO techmacac na, niJeremías, quema Tanahuatijquet Sedequías ten tali Judá ya temacatoya nopa tanahuatili para ya majcajtoque nochí israelita tequipanohuani cati iniaxca se ininteco.

**9** Tanahuatijquet Sedequías quichijqui se tanahuatili para sesen israelita ma quinmajcahua itequipanojcahua cati quincojtoya, masque tacame o sihuame para ayecmo aqui quipiyas se iisraelita icni para iaxca. Yaya quiijtoya para se israelita amo hueli quitequipanoltis seyoc israelita san tapic, pampa nochí tojuanti tiicnime. **10** Huajca nopa tayacanani huan nochí nopa masehualme cati quiselijtoyaj nopa camanali cati quichijtoya nopa tanahuatijquet, quinmalacanijque inintequipanojcahua cati

eliyayaj iniaxcahua. Pero ya nopa elqui san para se talojtzi. <sup>11</sup> Teipa moyolcuetque huan quinfuerzajhuijque para sempá ma quintequipanoca san tapic quej achtohuiya.

<sup>12</sup> Yeca TOTECO technojnotzqui na, niJeremías, huan techilhui: <sup>13</sup> “Quej ni ni ininTECO huan niiniDios israelitame niquipijtohua: Na nijchijqui se camanali inihuaya amohuejcapan tatahua quema niquinquixti ipan tali Egipto campa tetequipanohuayayaj san tapic. <sup>14</sup> Huan niquinilhui para cati hueli israelita cati amechtequipanojtos chicuase xihuit, monequi anquimalacanise quema onpejtos chicome xihuit, pero injuanti amo quichijque, yon amo techtepanitaque. <sup>15</sup> Pero ama amojuanti nelía cuali anquichijtoque pampa anquinmalacanijque amotequipanojcahua senquisa quej nimechnahuati, pampa ipan notiopa anquitajtolcajque para quej nopa monequi anquichihuase. <sup>16</sup> Pero ama amojuanti amo anquinequij anquichihuase, huan antechmahuispolojoque na huan notoca pampa anquiixpanoque nopa camanali cati anquichijque. Sempá anquinfuerzajhuijtoque amotequipanojcahua cati ya anquinmajcajtoyaj ma amechtequipanoca san tapic quej achtohuiya.

<sup>17</sup> “Huajca ama niamTECO quej ni niquipijtohua: Pampa amo anquinequij antechtepanitase, yon amo anquinequij anquinmalacanise amoicnihua cati amechtequipanohuaj san tapic, huajca ama nimechtemactilis para anmiquise ipan tatehuilisti, huan ica mayanti huan ica cocolisti. Huan nochí talme ipan taltipacti amechpinajtise.

**18-19** Huan pampa ama anquiixpanotoque nopa camanali cati anquichijque nohuaya quema anquihuejuelo que nopa becerro huan anquitajcoitaque huan anpano que tatajco para anquichihuase temachti nopa camanali, ama san se nijchihuas ica amojuanti quej anquichijque ica nopa becerro. Nochi amojuanti cati antayacanani, antequichihuani, antotajtzitzi huan nochi sequinoc ten amojuanti nimechtemactilis ipan tatehuilisti, pampa anquiixpano que nopa camanali cati antaquejquetzque para anquitepanitasquíaj.

**20** Nimechtemactilis inimaco amocualancaitacahua para ma amechmictica huan amotacayohua niquinmacas nopa tzojpilome huan tecuanime para ma quincuaca. **21** Huan Tanahuatijquet Sedequías ten tali Judá huan nochi itapalehuijcahua, niquintemactilis inimaco inincualancaitacahua cati quinequi quinmictise. Quena, niquintemactilis inimaco isoldados nopa tanahuatijquet ten tali Babilonia, masque amantzi mohuejatalijtoque ten amojuanti san para se talojtzi. **22** Pampa na sempa niquinnotzas nopa soldados ten tali Babilonia para ma quitehuiquij ni altepet. Quiyahualoquij huan quitatiquij. Nojquiya nijchihuas para quintamisosolose nochi altepeme ten tali Judá hasta mocahuas quej se huactoc tali huan amo mocahuas yon se masehuali.”

## 35

*Nopa recabitame cati taneltocaque*

<sup>1</sup> Quema Joacim, icone Josías tanahuatiyaya ipan tali Judá, TOTECO technojnotzqui na, ni-Jeremías, huan techilhui: <sup>2</sup> “Xiya ipan inialtepe nopa recabita masehualme huan xiquinnotza para ma yaca ipan notiopa. Huan quema itztose nopona, xiquinhuica ipan se cuarto cati eltoc calijitic ten nopa tiopamit huan xiquinmaca xocomecat iayo.”

<sup>3</sup> Huajca na niyajqui niquitato Jaazanías, icone se tacat cati nojquiya itoca Jeremías, huan iixhui Habasinías. Huan nihuicac ya huan nochí iicnihua cati eliyayaj ifamilia Recab, <sup>4</sup> ipan itiopa TOTECO, ipan nopa cuarto cati quiaxcatijtoyaj nopa tajtolpanextijquet Hanán, icone Igdalías, se tacat cati quitequipano TOTECO. Ni cuarto tatzquitoya ihuaya nopa cuarto cati quitequihuiyayaj nopa tayacanani ipan caltanahuatili huan eltoya itzonpac nopa cuarto cati quitequihuiyaya Maasías, icone Salum cati tamocuitahuiyaya ipan icalte nopa tiopamit.

<sup>5</sup> Huan iniixpa nopa recabita masehualme ni-jitali tazas huan xarros cati temitoque ica xocomecat iayo. Huan niquinilhui: “Xiquica ni xocomecat iayo”, <sup>6</sup> pero injuanti amo quinejque huan quijtojque: “¡Amo! Tojuanti amo tiquise xocomecat iayo pampa tohuejcapan tata Jonadab cati elqui icone tohuejcapan tata Recab techilhui ma amo quema tiquica xocomecat iayo, yon tojuanti, yon toconehua. <sup>7</sup> Huan nojquiya techilhui ma amo tiquinchihuaca calme, ma amo titocaca tomilhua, yon ma amo tiquintocaca xocomeca milme, huan yon ma tijcohua calme. Techilhui para san ma tiitztoca ipan yoyon calme. Huan

techilhui sintu tijtepanitase cati techilhui, huajca tijpiyase se cuali nemilisti huan tihuejcahuase ipan ni taltipacti campa san tipaxalohuaj. Quej nopa techilhui. <sup>8</sup> Huan tojuanti tijtepanitztoque ipan nochu ni tamanti. Amo quema tiquitoque xocomecat iayo, tojuanti, yon tosihuajhua, yon totelpocahua, yon toichpocahua. <sup>9</sup> Nojquiya amo timochihuilijtoque calme para ipan tiitztose, yon amo tijpiyaj xocomeca milme, yon talme campa huelisquía tijtocase toxinach. <sup>10</sup> San tiitztoque ipan yoyon cali huan senquisa tijtepanitztoque nochu cati technahuati tohuejcapan tata Jonadab. <sup>11</sup> Pero quema Tanahuatijquet Nabucodonosor ten tali Babilonia, hualajqui ipan ni tali, tojuanti timomajmatijque huan timoilhuijque para más cuali tihualase tiitztoquij ipan altepet Jerusalén para timomanahuise. Huan yeca tiitztoque nica.”

<sup>12</sup> Huajca TOTECO technojnotzqui na, niJeremías, huan techilhui: <sup>13</sup> “NiamoTECO Cati Niquinyacana Noilhuicac Ejcahua Ma Tatanitij huan na cati ni ininTeco israelitame nimitznahuatía: ‘Xiya xiquincamanalhuiti nopa masehualme ten tali Judá huan ten altepet Jerusalén huan xiquinilhuiti para quej ni niamoTECO niquijtohua: Xijtepanitaca nocamanal quej quichihuaj nopa masehualme ten ifamilia Recab. <sup>14</sup> Injuanti amo quijij xocomecat iayo pampa inihuejcapan tata quinmacac tanahuatili ma amo quichihuaca. Pero na nimechnojnotztoc talojtzitzi huan amo anquinequij antechtacaquilise, yon amo anquinequij antechtepanitase. <sup>15</sup> Na

nimechtitanilijtoc miyac notajtolpanextijcahua cati amechyolmelajtoque para xijcahuaca nopa fiero ojti cati anquitoquilíaj. Nimechilhuijtoc para ayecmo xiquinhueyichihuaca teteyome huan taixcopincayome para huelis nimechcahuilis anitztose ica paquilisti ipan ni tali cati nimechmacac amojuanti huan amohuejcapan tatahua. Pero amojuanti amo anquinejque antechtacaquilise, yon amo anquinejque antechtepanitase. <sup>16</sup> Nopa familias ten Recab senquisa quitepanitztoque nopa tanahuatili cati quinmacac inihuejcapan tata, pero amojuanti amo antechtepanitztoque.

<sup>17</sup> “ ‘Huajca ama na niamoTECO Cati Niquinyacana Noilhuicac Ejcahua Ma Tatanitij huan niamoTeco anisraelitame niquijtohua: Pampa amo anquinequij antechtacaquilise, yon amo antechnanquilíaj quema nimechnojnotza, na nijtitanis ipan tali Judá huan Jerusalén nochi nopa tatzacuilty cati niquijtojtoc nijtitanis.’ ”

<sup>18-19</sup> Huajca na, nijJeremías, niquincamanalhui nopa recabita masehualme huan niquinilhui: “Quej ni quijtohua TOTECO Cati Quinyacana Iilhuicac Ejcahua Ma Tatanitij, yaya cati toDios ti-israelitame: ‘Pampa anquitepanitaque amohuejcapan tata Jonadab ipan nochi tamanti, huajca ama se ten amojuanti cati aniixhuihua Jonadab nochipa techtequipanos tiopan calijtic.’ ”

## 36

*Joacim quitati cati Baruc quipojqui*

<sup>1</sup> Quema Joacim, icone Josías yahuiyaya para nahui xihuit tanahuatis ipan tali Judá, TOTECO technojnotzqui na, niJeremías, huan techilhui:  
<sup>2</sup> “Xijcui se amat huan ipan xiquijcuilo nochí nopa camanali cati nimitzilhuijtoc ten taya ipantis tali Judá, Israel huan nochí nopa sequinoc talme. Xiquijcuilo nochí cati nimitzilhuijtihualajtoc hasta quema tanahuatiyaya Josías huan hasta ama.  
<sup>3</sup> Huan quej nopa quema inijuanti quiitase ijcuilijtoc nochí nopa huejhueyi taijyohuilsti cati nimoilhuijtoc niquinchihuilis, huelis moyolcuepase ten nochí inintajtacolhua. Huan huajca na niquintapojojhuis.”

<sup>4</sup> Huajca na, niJeremías, nitatitanqui ma quinotzatij Baruc, icone Nerías. Huan quema ajisco, na niquilhuijtiyajqui nochí cati TÓTECO techilhuijtoya huan Baruc quijcuilojtiyajqui ipan se amat.

<sup>5</sup> Quema Baruc tanqui quijcuilohua nochí cati niquilhuiyaya, na quej ni niquilhui: “Na nitztoc nica ipan tatzacti huan amo hueli niya ipan itiopa TOTECO. <sup>6</sup> Pero xiya ta ipan nopa tiopamit ipan nopa tonali quema israelitame mosahuaj huan xiquinpohuiliti ni amatajcuiloli. Ipan nopa tonali nopona mosentilise tahuel miyac masehualme ten tali Judá. <sup>7</sup> Huan huelis inijuanti moyolcuepase ten nochí inintajtacolhua huan quitajtanise TOTECO ma quintapojojhui amantzi quema noja onca tonali. Pampa TÓTECO tahuel cualantoc ica inijuanti huan quisencajtoc quintitanilis huejhueyi tatzacuiltyili.”

<sup>8</sup> Huan Baruc, icone Nerías, quichijqui quej na nitajtolpanextijquet Jeremías nijnahuatijtoya.

Yaya yajqui ipan itiopa TOTECO huan quipojqui miyacapa nopa camanali cati TOTECO techmacatoya huan ama ijcuilijtoya ipan nopa amatapohuali. <sup>9</sup> Ya ni panoc ipan nopa tonal quema israelitame mosajque iixpa TOTECO ipan nopa chichnahui metzti ipan toisraelita calendario \* quema Joacim, icono Josías, yahuiyaya para macuili xihuit tanahuatis ipan tali Judá. Huan quena, ipan nopa tonali hualajque masehualme ten nochitali Judá para mosahuase ipan itiopa TOTECO. <sup>10</sup> Huan Baruc yajqui ipan nopa cuarto ipan itiopa TOTECO campa mocahua Gemarías, icono nopa tajcuilojquet Safán. Ni cuarto mocahuayaya huejcapa ipan nopa tiopamit ipan se lado ten nopa hueyi cuarto campa mosentiliyayaj nochimasehualme nechca nopa Yancuic Caltemit.

<sup>11</sup> Huan quema Micaías, icono Gemarías, cati elqui icono Safán, quicajqui nochimicamanal TOTECO, <sup>12</sup> yajqui ipan icuarto nopa tajcuilojquet ipan ichaj nopa tanahuatijquet. Huan nochinopa tayacanani mosentilijtoyaj nopona. Nopona itztoya nopa tajcuilojquet Elisama. Nojquiyaitztoya Delaía, icono Semaías; Elnatán, icono Acbor; Gemarías, icono Safán; Sedequías, icono Hananías huan nochinopa tacame cati quipiyayayaj tequiticayot. <sup>13</sup> Huan Micaías quinpoihuili nochinopa camanali cati quicactoyaj ipan nopa amatajculoli cati Baruc quipojtoya iniiixpa nopa masehualme. <sup>14</sup> Huajca nopa tayacanani quititanque Jehudí, icono Netanías,

---

\* **36:9** 36:9 Ipan noviembre o diciembre ipan 604 a.C. ipan tocalendario ten ama.

cati icone Selemías, cati icone Cusi, para ma quiilhuiti Baruc ma huala huan ma quihualica nopa amatajcuiloli cati quipojtoya iniixpa nopa masehualme. Huajca Baruc quicuic nopa amatajcuiloli huan yajqui quinitato. <sup>15</sup> Huan inijuanti quiilhuijque:

—Ximosehui huan techpohuili nopa amatajcuiloli cati tijpojqui iniixpa nopa masehualme.

Huan Baruc quinpohuili.

<sup>16</sup> Pero ipan nopa talojtzi quema quicajque nochí nopa camanali, pejque mosisíníaj se ica seyoc huan nochí tahuel momajmatijque. Huajca inijuanti quej ni quiilhuijque Baruc:

—Monequi tijpohuilise nochí ya ni nopa tanahuatijquet para ma quimati. <sup>17</sup> Pero achtohui techilhui quenicatza tiquijcuilo nochí ya ni quema Jeremías camanaltiyaya.

<sup>18</sup> Huan Baruc quinilhui:

—Jeremías techilhuijtiyajqui sesen camanali huan na niquipuilojtiyajqui ipan ni amat.

<sup>19</sup> Huajca nopa tayacanani quiilhuijque Baruc:

—Ta huan Jeremías xiyaca ximotatitij huejca campa amo aqui amechpantis. Huan amo aqui xiquilhuica canque anitztoque.

### *Joacim quitati nopa tajcuiloli*

<sup>20</sup> Teipa nopa tayacanani quiajojque nopa amatajcuiloli ipan icuarto nopa tajcuilojquet Elisama huan yajque quicamanalhuitoj nopa tanahuatijquet.

<sup>21</sup> Huan nopa tanahuatijquet quititanqui Jehudí para ma quicuiti nopa amatajcuiloli. Huajca Jehudí quicuito nopa amatajcuiloli ipan icuarto

nopa tajcuilojquet Elisama huan quipohuili nopa tanahuatijquet iniixpa nochí nopa tayacanani cati itztoyaj nopona. <sup>22</sup> Huan nopa tanahuatijquet itztoya ipan se cuarto cati huejcapa ipan nopa caltanahuatili cati quitequihiyaya ipan nopa metzti ten tasesecayot. Huan eliyaya ipan metzti diciembre huan yaya mosehuijtoya iixmelac se tixicti pampa tahuel taseseyayaya. <sup>23</sup> Huan sesen huelta quema Jehudí tamiyaya quipohua se parte ten nopa tajcuiloli ipan nopa mimiltic amat, nopa tanahuatijquet quitejtectiyahuiyaya ica se cuchillo huan quimajcahuayaya ipan tit. Huan quej nopa quichijqui hasta tanqui nochí nopa amatajcuiloli. <sup>24</sup> Pero nopa tanahuatijquet huan nopa tayacanani amo momajmatijque quema quicajque ni camanali. Yon amo aqui mocueso para quilhuis nopa tanahuatijquet ma amo quitati. <sup>25</sup> San Elnatán, Delaía huan Gemarías quiilhuijque nopa tanahuatijquet ma amo quitati, pero yaya amo quintacaquili.

<sup>26</sup> Huajca nopa tanahuatijquet quinahuati Jerameel iconē Hamelec; Seraías, iconē Azriel; huan Selemías, iconē Abdeel, ma quiitzquitij nopa tajcuilojquet Baruc huan na nitajtolpanextijquet Jeremías. Pero TOTECO techtati.

### *Jeremías quijcuilo seyoc amat*

<sup>27</sup> Teipa quema nopa tanahuatijquet quitatijtoya nopa amatajcuiloli, TOTECO technojnotzqui na, niJeremías, huan techilhui: <sup>28</sup> “Xijtemo seyoc amat huan sempa xiquijcuilo nochí quej tiquijcuilojtoya achtohuiya ipan nopa achtohui amat cati quitati Tanahuatijquet Joacim ten tali Judá.

<sup>29</sup> Huan xiqualhui nopa tanahuatijquet: ‘Quej ni niDIOS niquipijtohua: Ta tijtati nopa amat pampa nopona ijcuilijtoya para nopa tanahuatijquet ten tali Babilonia quisosoloqui ni tali huan quintzontamiltis nochí masehualme huan tapiyalme.

<sup>30</sup> Cualtitoc, pero ama niDIOS quej ni nimitzihuía tiTanahuatijquet Joacim ten tali Judá. Amo tijpiyas yon se mocone cati mosehuis ipan isiya Tanahuatijquet David para tanahuatis quema ta timquis. Huan mitzmictise ta nojquiya huan motacayo mocahuas huetztoc talchi huan amo aqui quitalpachos. Huan tonaya, tonati tahuel quietatis motacayo huan ica tayohua quiajsis miyac tasesecayot, <sup>31</sup> pampa nimitztatzacuiltis ta, mofamilia huan motayancacahua por nochí amotajtacolhua. Na nimechtitanilis nochí nopa huejhueyi tatzacuilti cati nimechtajtoltcahuilijtoc nijtitanis. Nojquiya nijtitanis nopa tatzacuiltisti ipan altepet Jerusalén huan ipan nochí tali Judá pampa ta tiTanahuatijquet Joacim huan motapalehuijacahua amo anquinejque antechtacaquilise quema nimechcamanalhuiyaya.’ Quej nopa xiqualhuiti.”

<sup>32</sup> Huajca na, niJeremías, nijcuic seyoc amat huan nijmacac notajcuilojca Baruc. Huan yaya quiijcuilojtiyajqui nochí cati niqualhuijtiyajqui quej eltoya ipan nopa achtohui amat cati Tanahuatijquet Joacim quitati. Pero nojquiya niJeremías niqualhui más miyac camanali ma quiijcuilos.

<sup>1</sup> Quema mijqui Joacim cati elqui tanahuatijquet ten tali Judá, icone, cati itoca Conías, quitoquilitosquía ipan itequi. Pero Tanahuatijquet Nabucodonosor ten tali Babilonia amo quinejqui Conías ma eli tanahuatijquet. Huajca yaya quitapejpeni Sedequías, icone Josías huan quitali quej tanahuatijquet ipan tali Judá. <sup>2</sup> Pero Tanahuatijquet Sedequías, itayacancahua huan nopa masehualme cati noja mocajtoyaj ipan nopa tali, amo quitacaquilijque icamanal TOTECO cati na, niJeremías, niinintajtolpanextijca niquinmacac. <sup>3</sup> Pero Tanahuatijquet Sedequías quititanqui Jucal, icone Selemías, huan nopa totajtzi Sofonías, icone Maasías, para techilhuitij ma nimotatajti por injuanti. <sup>4</sup> Huan na, niJeremías, ninemiyaya campa hueli pampa noja ayemo techtzacuayayaj.

<sup>5</sup> Huan ipan nopa tonali isoldados nopa faraón cati itoca Hofra hualajque ten tali Egipto huan monextijque ica tatzinta ten tali Judá para quimanahuise altepet Jerusalén. Huan huajca nopa soldados ten tali Babilonia mijcuenijque ipan altepet Jerusalén huan yajque quintehuitoj nopa soldados ten tali Egipto.

<sup>6</sup> Huan TOTECO technojnotzqui na, niJeremías, huan techilhui: <sup>7</sup> “Na cati ni ininTECO huan niiniDIOS israelitame niquipjohua: Xijnanquili nopa tanahuatijquet ten tali Judá cati hualajqui para techtajtanis taya panos: ica ni camanali: ‘Nopa Faraón huan isoldados cati hualajtoque nica ten Egipto para mitzpalehuise, cholose huan mocuepase ipan inintal. <sup>8</sup> Huan nopa Babilonia ehuani sempa hualase huan quiyahualoquij ni altepet Jerusalén huan moaxcatise huan quitatise.

<sup>9</sup> Huajca amo ximocajcayahua, yon amo xiquijto para nopa Babilonia ehuani ya mohuejcatalijque ten ta pampa amo quej nopa elis. <sup>10</sup> Huan masque tiquintzontamiltisquía nochí nopa soldados ten tali Babilonia huan san mocahuasquíaj se quesqui cati cocojtoque, inijuanti motananasquíaj ica yolic para mitztanise huan quitatise ni altepet.’ Quej nopa xiquilhuiti.”

<sup>11</sup> Huan quema nopa soldados ten tali Babilonia mohuejcatalijque ten altepet Jerusalén para quintehuise isoldados faraón, <sup>12</sup> na, niJeremías, njchijqui campeca para niquisas Jerusalén huan niyas ipan tali Benjamín para niquitas nopa tali cati njcojtoya. <sup>13</sup> Pero quema niajsito ipan nopa caltemit ipan nopa tepamit cati itoca Benjamín, niquitac itztoya nopona se tayacanquet ten soldados cati itoca Irías, cati icono Selemías, iixhui Hananías. Huan yaya techitzqui huan techilhui:

—Ta tiyas para timosejcotilis inihuaya nopa Babilonia ehuani.

<sup>14</sup> Huajca na niquilhui:

—¡Amo! Na amo quema nimoilhuijtoc para nimosejcotilis inihuaya nopa caldeos.

Pero Irías amo techtacaquili. Yaya techitzqui huan techhuicac iniixpa nopa tayacanani.

<sup>15</sup> Huan nopa tayacanani tahuel cuanque ica na. Yeca tanahuatijque ma techhuitequica miyac. Teipa techtzajque ipan nopa tatzacti cati achtohuiya eliyaya ichaj nopa tajcuilojquet Jonatán, pero ama quitequihuiyayaj quej se tatzacti. <sup>16</sup> Huan nopona taltita campa más fiero techtali ipan cati eliyaya quej se caja huan nopona techpixtoyaj para miyac tonali.

**17** Pero teipa, Tanahuatijquet Sedequías tanahuati ma techquixtca ixtacatzi huan ma techhuicaca ipan icaltanahuatil. Huan yaya techtajtani:

—¿Tijpiya se yancuic camanali ten TOTECO?

Huan na niquilhui:

—Quena, TOTECO quijtohua para mitztemac-tilis imaco nopa tanahuatijquet ten tali Babilonia.

**18** Huan nojquiya na, niJeremías, nijtajtani Tanahuatijquet Sedequías para ten techtzajqui, niquilhui:

—¿Taya taixpanoli nijchijqui ica ta, o ica motay-acanahua, o ica nochí masehualme para techtzajqui? **19** Huan, ¿canque itztoque nopa tajtolpanextiani cati mitzilhuijque para nopa tanahuatijquet ten Babilonia amo hualasquía para amechte-huis? **20** Huajca Tanahuatijquet, xijtacaquili cati na nimitztajtanis: Techchihuili se hueyi favor, amo techtitani sempa ipan nopa fiero tatzacti cati eltoc ipan ichaj nopa tajcuilojquet Jonatán para amo nimquis nopona.

**21** Huajca Tanahuatijquet Sedequías tanahuati ma techhuicaca ipan nopa tatzacti cati eltoc calixpa ten nopa caltanahuatili, huan tanahuati para mojmosta ma techmacaca se pedazo pantzi cati yancuic quicojtoque campa nopa panchihuani. Huan quej nopa quichijque hasta tanqui nochí pantzi ipan nopa altepet. Quej nopa techpixtoyaj ipan nopa tatzacti cati eltoc calixpa ten nopa caltanahuatili.

## 38

*Quicalaquijque Jeremías ipan se ameli huactoc*

<sup>1</sup> Huan Sefatías, icone Matán; Gedalías, icone Pasur; Jucal, icone Selemías, huan Pasur, icone Malquías, quitacaquilijtoyaj nochí catí na, ni Jeremías, niquijtohuayaya iniixpa nopa masehualme. Niquinilhuiyaya ya ni: <sup>2</sup> “Quej ni quiijtohu TOTECO: ‘Nochí catí mocahuase ipan ni altepet, miquise ipan tatehuilisti, o ica mayanti o ica cocolisti, pero nochí catí motemactilise ica nopa caldeos, momanahuise.’ <sup>3</sup> Pampa TOTECO quiijtohu: ‘Ni altepet Jerusalén huetzis inimaco isoldados nopa tanahuatijquet ten tali Babilonia huan yaya moaxcatis.’ ”

<sup>4</sup> Huajca nopa tayacanani yajque quiitatoj nopa tanahuatijquet huan quihilhuique:

—Ma tijmictica ni tacat pampa yaya quintemajmatía nochí nopa masehualme huan nopa soldados catí noja mocajtoque ipan ni tali. Ni tacat amo quitemohua catí cuali para ni tali; yaya quitemohua catí fiero.

<sup>5</sup> Huajca Tanahuatijquet Sedequías quiilhui:

—¡Cualtitoc! Xijchihuaca catí amojuanti anquinequij ica ya. Na amo huelis nimechtzacuilis.

<sup>6</sup> Huajca inijuanti techquixtijque na, ni Jeremías, campa niitztoya huan techilpijque ica laso. Huan nechcalaquijque ipan se ameli huactoc catí eltoya calixpa ten nopa caltanahuatili huan elqui iaxca nopa tayacanquet Malquías, icone Hamelec. Nopa ameli amo quipiyayaya at, san quipixtoya miyac soquit huan nicalajqui huan nimasic ipan nopa soquit.

*Quisencahuaj taya quinchihuilise Gedalías*

<sup>7</sup> Huan quema Ebed Melec cati eliyaya se hueyi tayacanquet ipan nopa caltanahuatili, quicajqui para na nechcalaquijtoyaj ipan nopa ameli, <sup>8</sup> motalojejqui huan yajqui campa Icalte Benjamín campa mosehuijtoya nopa tanahuatijquet, huan quiilhui:

<sup>9</sup>—Tinotanahuatijca, nopa masehualme quichijtoque cati amo cuali, pampa quicalaquijs que Jeremías ipan ameli. Huan nopona miquis ica mayanti pampa ayecmo onca pantzi ipan ni altepet.

<sup>10</sup> Huajca nopa tanahuatijquet quinahuati Ebed Melec ma quinhuica 30 tacame para techquixtitij ipan nopa ameli para amo nim quis nopona.

<sup>11</sup> Huan quena, Ebed Melec quinhuicac 30 tacame huan yajqui ipan nopa caltanahuatili huan calajqui ipan nopa cuarto campa taajocuiyayaj huan quipanti sequij yoyomit cati ayecmo quitequihuíaj. Huan quiquixti nopa yoyomit cati sosoltic huan quihuicac campa nopa ameli. Huan ica se laso quitemohui nopa yoyomit hasta tatzinta campa niitztoya. <sup>12</sup> Huan Ebed Melec cati ehuayaya tali Etiopía techtzajtzili huan techilhui:

—Ximotalili ni yoyomit cati sosoltic moeltantita para amo mitztequis ni laso.

Huajca na nijchijqui quej technahuati. <sup>13</sup> Huan techquixtijque ica laso ipan nopa ameli huan nechcajque ipan nopa tatzacti cati eltoc icalixpa nopa caltanahuatili.

*Sedequías quinotzqui Jeremías*

<sup>14</sup> Se tonali, Tanahuatijquet Sedequías tanahuati ma techhualicaca iixpa para camanaltis nohuaya campa eltoc nopa expa caltemit ten nopa tiopamit. Huan techilhui:

—Nijnequi nimitztatzintoquilis se tamanti. Amo techthatili yon se tamanti. Techilhui cati melahuac.

<sup>15</sup> Huan na niquilhui:

—Sinta nimitzilhuis nochí cati melahuac, ta titanahuatis ma techmictica. Huan sinta nijnequis nimitztalnamictis para tijmatis taya monequi tijchihuas para timomanahuis, ta amo techta-caquilis.

<sup>16</sup> Huajca Tanahuatijquet Sedequías ixtacatzi quitestigojquetzqui TOTECO huan techilhui:

—Na nijtestigojquetza TOTECO cati techchijchijqui huan cati quipiya nochí chicahualisti para amo nitanahuatis ma mitzmictica, yon amo nimitzemactilis inimaco cati quinequij mitzmictise.

<sup>17</sup> Huajca na, niJeremías, niquilhui Sedequías:

—TOTECO Cati Quinyacana Iihuicac Ejcahua Ma Tatanitij, yaya cati toTeco tiisraelitame quej ni quijtohua: ‘Sinta ta huan mofamilia nimantzi anmotemactilise ica nopa tanahuatijquet ten tali Babilonia, huajca anquimanahuise amonemilis huan amo quitatise ni altepet. <sup>18</sup> Pero sinta amo timotemactilis ica nopa tanahuatijquet, huajca nopa soldados ten tali Babilonia, quitatise ni altepet huan ta amo timomanahuis inimaco.’

<sup>19</sup> Pero Tanahuatijquet Sedequías techilhui:

—Na nimajmahui para nimotemactilis ica nopa Babilonia ehuani pampa huelis techtemactilise inimaco nopa israelitame cati mosejcotilijoque

inihuaya huan techhuihuiitase huan ten hueli techchihuilise.

**20** Huajca na niquilhui:

—Amo mitztemactilise. San xijchihua cati TOTECO quinequi, huan quej nopa tijmanahuis monemilis huan tiquisas cuali. **21** Pero sinta ta amo tijnequis timotemactilis, huajca ya ni cati TOTECO quiijtohua para panos: **22** Nochi nopa sihuame cati mocahuase ipan mocaltanahuatil, quinquixtise huan quintemactilise inimaco nopa soldados ten tali Babilonia. Huan nopa sihuame mitzpinajtise huan quiijtose: ‘Mitzcajcayajtoque mohuampoyohua. Amo teno ininpati nopa egip-tome. Mitzilhuijque mitzpalehuise, pero ya mitz-cajtejque.’

Huan nojquiya niquilhui:

**23** —Huan nochis mosihuajhua huan moconebla quinquixtise huan quintemactilise inimaco nopa Babilonia ehuani, huan ta nojquiya amo timomanahuis. Nopa tanahuatijquet ten tali Babilonia mitzitzquis huan quitatise ni altepet.

**24** Huajca Sedequías techilhui:

—Amo aqui xijpohuili cati techilhuijtoc para amo timquis. **25** Huan sinta notayacancahua quimatise para nicamanaltitoc mohuaya huan hualase campa ta huan mitzilhuijse: ‘Techilhui taya tiquilhui nopa tanahuatijquet. Sinta amo techilhuis, timitzmictise. Nojquiya techilhui taya mitzilhui nopa tanahuatijquet.’ **26** Sinta quej nopa mitzmajmatisse, huajca ta quej ni xiquinilhui: ‘Na nijtajtani nopa tanahuatijquet para ma ayecmo nechcalaqi sempa ipan nopa tatzacti cati eltoc

campa ichaj Jonatán para amo nim quis npona.'  
Quej nopa xiquinilhui.

**27** Huan amo panoc miyac tonali quema nochí nopa tayacanani hualajque campa niitztoya, huan techtajtanijque taya camanali niquilhui o techilhui nopa tanahuatijquet quema technotzqui. Huan na niquinnanquili senquisa quej nopa tanahuatijquet techilhuijtoya ma niquinnanquili. Huajca injuanti mocuetque, yon amo quimatque cati melahuac, pampa amo aqui techtacaquilijtoya quema nicamanaltic ihuaya nopa tanahuatijquet. **28** Huan na nimocajqui npona ipan nopa tatzacti ipan icalixpa nopa caltanahuatili hasta ipan nopa tonali quema nopa Babilonia ehuani sempa quiyahualojque altepet Jerusalén.

## 39

*Nabucodonosor quiyahualo Jerusalén  
(2 R. 24:20–25:21; 2 Cr. 36:17-21; Jer. 52:3-30)*

**1** Ipan metzti majtacti ipan toisraelita calendario \* quema Sedequías yahuiyaya para chichnahui xihuit tanahuatis ipan tali Judá, Nabucodonosor tanahuatijquet ten tali Babilonia huan isoldados hualajque ipan altepet Jerusalén huan sempa quiyahualojque para quitehuise. **2** Huan ome xihuit huan tajco teipa quema Tanahuatijquet Sedequías yahuiyaya para majtacti huan se xihuit ipan itequi, ipan 9 itequi nopa metzti nahui

---

\* **39:1** 39:1 Ipan 15 itequi enero ipan 588 a.C. ipan tocalendario ten ama. Xiquita nojquia Jer. 52:4.

ipan toisraelita calendario<sup>†</sup>, quicoyonijque nopa tepamit ten nopa altepet huan calajque, huan quej nopa huetzqui nopa altepet. <sup>3</sup> Huan nochí nopa tayacanani ten soldados ten tali Babilonia, calajque ipan nopa altepet huan mosehuijque campa nopa caltemit cati eltoc tatajco. Huan ya ni intoca nopa tayacanani: Nergal Sarezer, Samgar Nebo, nopa hueyi tequitquet Sarsequín huan nopa seyoc Nergal Sarezer cati eliyaya iachtohui tayacanca nopa tanahuatijquet.

<sup>4</sup> Huan quema Tanahuatijquet Sedequías huan isoldados quiitaque para ya huetzqui nopa altepet, injuanti quisque ica tayohua ipan icalteyo nopa tepamit cati eltoc iica nopa xochimili, huan cholojque. Yajque ipan nopa ojti cati pano ipan nopa tamayamit cati eltoc nechca hueyat Jordán. <sup>5</sup> Pero nopa soldados ten tali Babilonia quitepotztocaque Tanahuatijquet Sedequías huan quiitzquitoj ipan tamayamit Jericó. Huan quihuicaque ipan altepet Ribla ipan tali Hamat campa itztoya Nabucodonosor, nopa tanahuatijquet ten tali Babilonia, huan nopona quitajtolsencajqui huan quijto taya elis itatzacuiltil. <sup>6</sup> Huan nopa tanahuatijquet ten tali Babilonia, nopona quiquetzqui Sedequías para ma quintachilito iconehua quema quinquechtzontequise inihuaya nochí nopa tayacanani ten tali Judá. <sup>7</sup> Teipa quiixteyolquixti Sedequías huan quiilpi ica cadenas huan quihuicac ipan tali Babilonia.

<sup>8</sup> Huan nopa soldados ten tali Babilonia quittatijque nopa caltanahuatili huan nochí calme

---

<sup>†</sup> 39:2 39:2 Ipan 18 itequi julio, 586 a.C. ipan tocalendario ten ama.

cati oncayaya ipan altepet Jerusalén huan qui-huelonijque nopa tepamit cati quiyahualojtoya.

<sup>9</sup> Huajca Nabuzaradán, nopa hueyi tayacanquet ten soldados, quinhuicac ipan tali Babilonia nochí nopa masehualme cati noja mocajtoyaj ipan nopa altepet huan nochí cati motemactilijtoyaj ica ini-juanti. <sup>10</sup> Pero ipan nochí tali Judá san quincajqui se quesqui cati más teicneltzitzí huan cati amo teno quipiyayaya. Huan quinmacac tali huan xocomeca milme para ma quitequipanolica.

*Nabucodonosor quimocuitahui Jeremías*

<sup>11-12</sup> Huan Tanahuatijquet Nabucodonosor, quinahuatijtoya Nabuzaradán, nopa hueyi tayacanquet ten soldados ma techtemo na, niJeremías. Quiilhuijtoya: “Xijtemo Jeremías huan xijpiya miyac cuidado para amo ipantis cati fiero. Xijmocuitahui cuali huan xijmaca nochí cati mitztajtanis.”

<sup>13</sup> Huajca Nabuzaradán nopa hueyi tayacanquet ten soldados, huan Nabusazbán cati inintayacanca nopa tacame cati quincaparojtoque, huan Nergal Sarezer cati quiconsejomacayaya nopa tanahuatijquet huan nochí nopa tayacanani mocualtajque para quichihuase senquisa quej quinnahuati nopa tanahuatijquet. <sup>14</sup> Huan quintitanque miyac soldados para ma techquixtica ipan nopa tatzacti huan techtemactilijque imaco Gedalías, icone Ahicam, cati icone Safán, para ma techhuica nochaj. Huan quej nopa na niitztoya tatajco noisraelita masehualhua cati noja mocajtoyaj ipan nopa tali.

*Nopa camanali para Ebed Melec*

<sup>15</sup> Pero quema na, niJeremías, noja niitztoya ipan tatzacti, huan quema ayemo hualayayaq nopa soldados ten tali Babilonia, TOTECO technojnotzqui huan techilhui: <sup>16</sup> “Xitatitani para quej ni ma quiilhuitij Ebed Melec cati ehua Etiopía. Ma quiilhuitij: ‘Quej ni na niquijtohua, nimoTECO, Cati niquinnyacana Noilhuicac Ejcahua Ma Tatantitij huan na cati ni ininTeco israelitame: Na njchihuas nochí cati niquijtojtoc njchihuilis ni altepet. Nijchihuilis cati fiero huan amo aqui cuali. Níjsosolos moixpa, <sup>17</sup> pero ta nimitzmanahuis. Amo timquis inimaco nopa masehualme cati tiquinimacasi. NimoTECO niquijtohua. <sup>18</sup> Na nijmanahuis monemilis huan nimitzmaquixtis. Huan ya ni elis quej motaxtahuil pampa timotemachi ipan na. Quej nopa nimoTECO niquijtohua.’”

## 40

### *Jeremías mocajqui ihuaya Gedalías*

<sup>1</sup> Ya ni nopa camanali cati TOTECO techmacac na, niJeremías, quema ya techmajcajqui ipan altepet Ramá huan nechcajqui ma nimocuepa ipan Jerusalén. Nabuzaradán, nopa hueyi tayacanquet ten soldados, techpanti niilpitoc ica tepos cadeñas ica sequinoc israelitame cati quinquixtijtoyaj ipan tali Judá huan ipan altepet Jerusalén huan quinhuicayayaq ipan tali Babilonia.

<sup>2</sup> Huan nopa tayacanquet ten soldados technozqui huan techilhui: “MoTECO Dios tayolmelajqui para quihuaticas ni tatzacuiltyli ipan ni tali, <sup>3</sup> huan quichijtoc ma pano senquisa quej quijito quichihuasquía pampa

ni masehualme tahuel tajtacolchijitoque ica moTECO huan amo quitacaquilijque quema quincamanalhuiyaya. Yeca ama hualajtoc nochí ni tamanti. <sup>4</sup> Xiquita, ama ni tonali na nimitzquixtilis nopa tepos cadenas cati ica mitzilpitoque huan nimitzcahuilis xiya. Sinta tijnequi tihualas nohuaya ipan tali Babilonia, huajca xihuala nohuaya huan na nimitzmocuitahuis. Pero sinta amo tijnequi tihualas nohuaya, huajca ximocahua. Huan xiquita, nochí ni tali eltoc moixpa huan huelis tijtapejpenis campa más mitzpactía para tiitztos. <sup>5</sup> Sinta timoilhuía timocahuas, huajca xiya campa itztoc Gedalías, cati Tanahuatijquet Nabucodonosor ten tali Babilonia quitalijtoc quej gobernador ipan ni tali Judá, huan xiitztoti inihuaya nopa masehualme cati yaya quinnahuatía. Ta xijtapejpeni canque tijnequi tiyas. Xiya campa más mitzpactía.”

Huan Nabuzaradán, nopa hueyi tayacanquet ten soldados, techmacac miyac tacualisti huan tomi huan technahuatijtejqui. <sup>6</sup> Huajca na, ni-Jeremías, niyajqui campa Gedalías huan niitztoya inihuaya nopa masehualme cati noja mocajtoyaj ipan ni tali.

(2 R. 25:23-24)

<sup>7</sup> Pero nopa tayacanani ten israelita soldados cati nemiyayaj cuatita, quimatque para nopa tanahuatijquet ten tali Babilonia quitalijtoya Gedalías quej gobernador ipan ni tali para quinnahuatis nopa teicneltzitzi cati noja mocajtoyaj cati amo quinhuicatoyaj Babilonia. <sup>8</sup> Yeca yajque quiitatoj Gedalías ipan Mizpa campa

quipiyayaya se hueyi cali para soldados. Ya ni inintoca nopa tayacanani cati yajque quiitatoj: Ismael, icono Netanías; Johanán huan Jonatán, iconehua Carea; Seraías, icono Tanhumet; iconehua Efai cati ehuani Netofa; huan Jezanías, icono cati se maacateo tacat. Nochi ni tacame yajque ica inisoldados para quiitatij Gedalías.

<sup>9</sup> Huan Gedalías tatestigojquetzqui huan quinilhui: “Amo ximomajmatica, ximotemacaca nica para anquitequipanose nopa tanahuatijquet ten tali Babilonia huan anquisase cuali ipan nochi tamanti. <sup>10</sup> Huan na nimocahuas nica ipan Mizpa huan nicamanaltis por amojuanti quema hualase nopa Babilonia ehuani para quitachilise notequi. Ximochantica ipan cati hueli altepet campa amojuanti amechpactía, huan ximopanoltica ica nochi tamanti cati eli ipan ni tali. Xijtequica itajca nopa xocomeca milme, huan inintajca cuame, huan aceite, huan xicajocuica ipan amochaj.”

<sup>11</sup> Huan teipa nochi tali Judá ehuani cati mochololtijtoyaj ipan tali Moab, Amón huan Edom huan nochi cati itztoyaj ipan sequinoc talme nojquiya quimatque para sequij tali Judá ehuani mocajtoyaj ipan tali Judá, pampa nopa tanahuatijquet ten tali Babilonia amo quinhuicatoya nochi ipan ital. Huan quimatque nojquiya para nopa tanahuatijquet ten tali Babilonia, quitalijtoya Gedalías quej gobernador. <sup>12</sup> Huajca inijuanti quisque ipan nopa talme campa mochololtijtoyaj huan mocuetque ipan tali Judá. Huan ajiscoj ipan Mizpa campa itztoya Gedalías para camanaltise ihuaya. Teipa yajque ipan nopa huejhueyi xocomeca milme huan quitejque miyac itajca para

quichihuase xocomecat iayo. Huan nojquiya quisentilijque miyac tamanti cuatacti.

<sup>13</sup> Pero teipa, Johanán, icone Carea, huan nochí nopa sequinoc tayacanani ten soldados, yajque quiitatoj Gedalías ipan Mizpa, <sup>14</sup> Huan quiilhuijque:

—¿Amo tijmati para Baalis cati inintanahuatijca nopa amonitame, quititantoc Ismael, icone Netanías para ma mitzmictiqu?

Quej nopa quiilhuijque, pero Gedalías amo quinneltoquili.

<sup>15</sup> Huajca Johanán camanaltic ixtacatzi ihuaya Gedalías, huan quiilhui:

—Techcahuili niyas njmictiti Ismael huan amo aquí quimatis aqquiya quimicti. Amo hueli tijcahuilise para ma mitzmicti. Pampa sintia mitzmictis, huajca nochí nopa tali Judá éhuani cati mosejcotilijtoque ica ta, mopasolose sempa huan quimictise nochí nopa masehualme cati noja mocajtoque nica ipan tali Judá.

<sup>16</sup> Pero Gedalías quiilhui:

—Amo xijmicti Ismael pampa san tiquistacahuía.

## 41

*Ismael quimicti Gedalías  
(2 R. 25:23-24)*

<sup>1</sup> Pero ipan nopa metzti chicuase\*, Ismael, icone Netanías, cati icone Elisama, cati hualayaya ipan nopa familia ten tanahuatiani huan cati eliyaya se itayacanca nopa tanahuatijquet, hualajqui ipan

---

\* **41:1** 41:1 Ipan metzti octubre o noviembre ipan 586 a.C.

Mizpa. Huan ihuaya ya hualajque seyoc majtacti tacame. Huan Gedalías quinnotzqui para tacuase sentic. <sup>2</sup> Huan quema tacuayayaj, Ismael huan nopa majtacti tacame cati hualajtoyaj ihuaya, moquetzque huan quiqixtijque inimacheta, huan quimictijque Gedalías, icono Ahicam, cati icono Safán cati nopa tanahuatijquet ten Babilonia quitalijtoya quej gobernador ipan tali Judá. <sup>3</sup> Teipa quisque ten nopona huan quinmictijque nochí nopa tayacanca Judá ehuani huan nochí nopa tayacanani ten soldados caldeos cati itztoyaj ihuaya Gedalías.

<sup>4</sup> Huan tonili quema ayemo aqui quimatiyaya para Ismael quimictijtoya Gedalías, <sup>5</sup> quej 80 masehualme cati ehuayayaj ipan altepet Siquem, Silo huan Samaria hualajque ipan Mizpa para quihueyitaliquij TOTECO ipan itiopa. Nochi injuanti quitejtectoyaj inintentzo, quitzayantoyaj iniyoyo, mococojtoyaj ipan inintacayo huan quihualicayayaj tacajcahualisti huan copali para quittatisquíaj iixpa TOTECO. <sup>6</sup> Huan Ismael quisqui ipan Mizpa chocatiyajqui. Huan ipan ojti quinnamiquito nopa masehualme. Huajca Ismael quincajcayajqui huan quinlhui:

—;Xihualaca huan xiquitaca taya quipanotoc Gedalías, icono Ahicam!

<sup>7</sup> Pero quema injuanti ajsicoj ipan altepet Mizpa, Ismael huan isoldados, quinmictijque nopa tacame huan quincalaquijque ipan se ameli cati amo quipiyayaya at. <sup>8</sup> Pero majtacti ten nopa tacame amo quinmicti, pampa injuanti quihilhuijque Ismael: “Amo techmicti huan timitzhualiquilise trigo, cebada, aceite huan necti

cati tijtatijtoque cuatita.” Huajca Ismael amo quinmicti.<sup>9</sup> Nopa ameli cati Ismael quitemiti ica inintacayohua nopa masehualme cati quinmicti eliyaya nopa hueyi ameli cati Tanahuatijquet Asa huejcajquiya quichijchijqui para quinmanahuis nopa masehualme ten altepet Mizpa quema quinlehuiyaya Tanahuatijquet Baasa ten tali Israel.

<sup>10</sup> Huan Ismael quinitzqui iichpocahua nopa tacat cati achtohuiya eliyaya tanahuatijquet noppa. Nojquiya quinitzqui nochí nopa masehualme cati Nabuzaradán, nopa hueyi tayacanquet ten soldados quincajtoya imaco Gedalías nopa gobernador para ma quinnahuati. Huan Ismael quinhuicac nochí nopa masehualme quej tetequipanohuani huan inintal nopa amonitame.

<sup>11</sup> Huan quema Johanán, icone Carea, huan nochí nopa tayacanani ten soldados cati itztoyaj ihuaya quimatque nochí cati Ismael quichijtoya,<sup>12</sup> quinsentilijque nochí inisoldados huan quitepotztoaque Ismael para quitehuitij. Huan quiajsitoj campa nopa pileta cati eltoc nechca altepet Gabaón.<sup>13</sup> Huan quema nopa masehualme cati quinhuicayaya Ismael quiítaque Johanán huan nochí nopa tayacanani ten soldados, tahuel yolpajque.<sup>14</sup> Huan mochololtijque huan motalojque quinamiquitoj Jonatán huan pejque quipalehuíaj.<sup>15</sup> Pero Ismael huan chicueyi isoldados, cholojque huan yajque ipan tali Amón.

<sup>16</sup> Huajca Johanán huan nochí isoldados quinhuicaque nochí nopa soldados, sihuame huan coneme. Nojquiya quinhuicaque nopa tacame cati quincaparojtoyaj para mochihuase huejhueyi

tequichihuani huan cati Ismael quinquijtoya ipan altepet Mizpa quema quimicti Gedalías, icone Ahicam. <sup>17</sup> Huan nochí yajque ipan altepet Gerut Quimam, nechca altepet Belén, para mocualtalise para yase ipan tali Egipto. <sup>18</sup> Inijuanti quiimacasij ten quichihuasquíaj nopa caldeos quema quicaquisquíaj para Ismael, icone Neganiás quimictijtoya Gedalías, icone Ahicam, cati nopa Tanahuatijquet ten Babilonia quitalijtoya quej gobernador ipan tali Judá.

## 42

### *Johanán quitemohua Jeremías huan TOTECO*

<sup>1</sup> Teipa nochí nopa tayacanani ten soldados huan Johanán, icone Carea, huan Jezanías icone Osaiás, huan nochí masehualme cati huejhueyi huan cati pisiltzitzi, nochí hualajque campa na, niJeremías, <sup>2</sup> huan techilhuijque:

—Timitztajtaníaj se hueyi favor. Tijnequij ximotatajti ica TOTECO por tojuanti, pampa ta tijmati cuali para achtohuiya tieliyayaj tahuel timiyaquij tiisraelitame, pero ama san tiitztoque se quesqui cati noja tiitztoque ipan ni tali. <sup>3</sup> Xijtajtanili TOTECO ma technextili canque tiyase huan taya tijchihuase.

<sup>4</sup> Huajca na niquinilhui:

—Cualtitoc, na nijtajtanis TOTECO por amojuanti huan teipa nimechilhuis nochí cati yaya techilhuis. Amo teno nimechtatilis.

<sup>5</sup> Huan inijuanti techilhuijque:

—Ma TOTECO techtelchihua sintia amo tijchihuase nochí cati technahuatis. <sup>6</sup> Sinta techpactis

o amo techpactis cati TOTECO technahuatis, tojuanti tijtepanitase huan tijchihuase cati yaya technahuatis. Yeca timitztajtaníaj ximotatajti ica ya por tojuanti, pampa tijmatij cuali, sintia tijtepanitase, huajca nochí cati tijchihuase quisas cuali.

*Motatajti Jeremías huan TOTECO quinanquili*

<sup>7</sup> Huan quema ya panotoya majtacti tonali, TOTECO technojnotzqui na, niJeremías huan techmacac cati nijtajtaniyaya. <sup>8</sup> Huajca na nijnotzqui Johanán icona Carea, huan nopa tayacanani ten isoldados huan nochí nopa masehualme cati huejhueyi huan cati pisiltzitzi, <sup>9</sup> huan niquinilhui: “Amojuanti antechtitanque iixpa TOTECO cati to-Dios tiisraelitame, para ma nimotatajtiti por amojuanti, huan ama quej ni techilhui ma nimechilhui: <sup>10</sup> Ximocahuaca ipan ni tali. Sinta ammocahuase, huajca na nimechtiochihuas huan amo aqui amechcuatotonis. Tahuel nimocuesohua por nochí nopa tatzacultili cati nimechitianili. <sup>11</sup> Ayecmo xiquimacasica nopa tanahuati-jquet ten tali Babilonia, pampa na niitztos amo-huaya para nimechmanahuis imaco. <sup>12</sup> Huan na nimechtaojtas huan nijchihuas para yaya nojquiya ma amechicneli. Amo amechmictis, yon amo amechchihualtis para xielica antete-quipanohuani. Huan amechcahuilis xiitztoca nica ipan amotal.”

<sup>13</sup> “Pero huelis amojuanti amo anquinequise anquitepanitase TOTECO. Huelis anquijjtose: ‘Tojuanti amo timocahuase ipan ni tali. <sup>14</sup> Tojuanti

tiyase ipan tali Egipto pampa nepa amo tiquitase tatehuilisti, yon mayanti, yon amo tijcaquise tapitzali.’ <sup>15</sup> Huajca sinta quej nopa inquiijtose, xijtacaquilica taya TOTECO amechilhuía anquesqui amojuanti cati noja anmocajtoque ipan tali Judá. TOTECO Cati Quinyacana Iilhuicac Ejcahua Ma Tatanitij huan cati ininDios tiisraelitame quijjtohua: ‘Sinta amojuanti anquisehuiquilise anquinequise anyase ipan tali Egipto para anitztotij nepa, <sup>16</sup> huajca nepa amechajsis tatehuilisti huan mayanti cati amojuanti tahuel anquimahuilíaj. Huan nepa anmiquise. <sup>17</sup> San ya nopa quinchiya nochí cati quinequij yase ipan tali Egipto. Nopona miquise ipan tatehuilisti, ica mayanti huan ica cocolisti. Yon se amo momanahuis ten nopa tatzacuiltyli cati njititanis nepa.’

<sup>18</sup> ‘TOTECO Cati Quinyacana Iilhuicac Ejcahua Ma Tatanitij huan yaya cati ininDios israelitame, quijjtohua: ‘Quej njititanqui nohueyi cualancayo ipan altepet Jerusalén, quej nopa nojquiya njititanis amopani quema anyase ipan tali Egipto. Huan amechselise ica tequipacholi huan ica cualanti. Amechtelchihuase huan amechpinajtise. Huan ayecmo quema anquiitase amotal.’ <sup>19</sup> Pampa TOTECO quej ni amechilhuía: Amojuanti cati noja anmocajtoque ipan tali Judá, amo xiyaca ipan tali Egipto. Teipa niquinilhui: ‘Amo quema xiquelcahuaca ni camanali cati nimechilhuijtoc ama. <sup>20</sup> Sinta anyase ipan tali Egipto, huajca temachti anmiquise. Pampa nijmati san anistacatiyayaj quema antechilhuijque ma niya nimotatajtiti por amojuanti huan antechilhuijque para ma nimechilhui taya quijjtohua TOTECO

huan amojuanti anquichihuasquíaj pampa amo neli. <sup>21</sup> Huan ama na nimechyolmelajtoc senquisa quej TOTECO technahuati ma nimechilhui. Pero amojuanti amo anquinequij anquitepanitase. <sup>22</sup> Huajca xijmatica cuali para melahuac anmiquise ipan tatehuilisti, ica mayanti huan ica cocolisti ipan tali Egipto campa amojuanti tahuel anquinequij anyase.’”

## 43

### *Quihuicaque Jeremías ipan Egipto*

<sup>1</sup> Quema na nitanqui niquinpoohuilía nopa masehualme icamanal TÓTECO ininDios, <sup>2-3</sup> Azarías, icone Osaías, huan Johanán, icode Carea, huan nochí nopa sequinoc masehualme cati tahuel mohueyimatiq, techilhuijque: “¡Tiistacati! TOTECO Dios amo mitznahuatijtoc para techilhui ma amo tiyaca ipan Egipto. Nochi ya nopa mitzilhui Baruc, icode Nerías, para techilhui pampa yaya quinequi ma timocahuaca nica para ma techmictica nopa caldeos o para ma techhuicaca ipan tali Babilonia para titetequipanotij san tacip.”

<sup>4</sup> Huan Johanán, huan nopa tayacanani ten soldados huan nochí nopa masehualme, amo quitepanitaque TOTECO, yon amo quinejque mocahuase ipan tali Judá. <sup>5</sup> Yeca Johanán huan nopa tayacanani ten soldados quinsentilijque nochí nopa masehualme cati mocajtoyaj ipan tali Judá, huan nochí cati mocuectoyaj ten sequinoc talme, huan quincuitejque huan yajque ipan tali Egipto. <sup>6</sup> Quinhuicaque tacame, sihuame huan

coneme, iichpocahua nopa tanahuatijquet, huan nochí nopa masehualme cati Nabuzaradán, nopa hueyi tayacanquet ten soldados, quincajtoya ipan itanahuatil Gedalías, icone Ahicam, icone Safán. Huan hasta na nitajtolpanextijquet Jeremías huan Baruc, icone Nerías nojquiya techchihualtijque ma tiyaca inihuaya.<sup>7</sup> Huajca nochí tojuanti tiyajque ipan tali Egipto huan tiajsitoj ipan altepet Tafnes pampa injuanti amo quinejque quitepanitase TOTECO.

*Tanextili ten nopa tet cati eltoc ixtacatzi*

<sup>8</sup> Huan ipan altepet Tafnes, TOTECO technojnotzqui huan techilhui: <sup>9</sup> “Xiquinsentili nopa masehualme ten tali Judá, huan iniixpa, xijcui se ome tet cati huejhueyi huan xiquintalpacho tatajco ipan nopa piso ten tet campa eltoc icalte icaltanahuatil Faraón nica ipan Tafnes. <sup>10</sup> Huan quej ni xiquinilhui nopa tacame ten tali Judá: ‘TOTECO Cati Quinyacana Iilhuicac Ejcahua Ma Tatanitij huan cati ininDios israelitame, quiijtohua: Temachti nijhualicas nica ipan tali Egipto notequipanojca Nabucodonosor, tanahuatijquet ten tali Babilonia. Huan yaya quitaliqui isiya para tanahuatis campa ni teme cati niquintalpachojtoc. Huan nica quichihuas ichaj. <sup>11</sup> Huan yaya quitamisoloqui ni tali Egipto. Huan quinmictis nochí cati na niquijtos para ma quinmicti, huan quinitzquis cati na niquijtos ma quinitzqui para quinhuicas ipan tali Babilonia huan miyac miquise ica cocolisti. <sup>12</sup> Nojquiya quitatis inintiopa nopa teteyome ten tali Egipto, huan quin-tatis nochí nopa teteyome huan quinhuicas nopa

masehualme ilpitoque ipan ital. Yaya quitamitachtequilis tali Egipto, quej se tamocuitahuijquet quinquixtía tecpime ipan iyoyo. Pero amo aqui huelis quichihuilis teno. <sup>13</sup> Huan quintapanas nochí nopa huejcapantique teteyome ten Heliópolis, huan quintatis nochí nopa tiopame ten nopa teteyome cati quinhueyimatiј ipan tali Egipto.’ ”

## 44

### *Tatzacuiltili para israelitame ipan Egipto*

<sup>1</sup> TOTECO techmacac icamanal na, niJeremías, para nochí nopa israelitame cati tali Judá ehuani cati itztoyaj ica norte ipan tali Egipto ipan nopa altepeme Migdol, Tafnes, Menfis huan Patros huan ipan nochí altepeme cati mocahuaj ica tatzinta ten tali Egipto, techilhui: <sup>2</sup> “TOTECO Cati Quinyacana Iilhuicac Ejcahua Ma Tatanitij huan yaya cati toTeco tiisraelitame quej ni amechilhúa: <sup>3</sup> ‘Amojuanti anquiitaque nochí nopa tatzacuiltili cati nijtitanqui ipan altepet Jerusalén ehuani huan cati ehuani nochí nopa altepeme ten tali Judá. Ama nochí inijuanti sosolijtoque por inintajtacolhua huan amo aqui itztoc nopona. Na tahuel nicualanqui ica cati nopona anehuani pampa anquinhueyichijque sequinoc dioses cati amojuanti huan amohuejcapan tatahua amo quema quinxmatque.

<sup>4</sup> “ ‘Na talojtzitzti niquintitanili notajtolpanextijcahua para ma quinilhuica ma amo quichihuaca nopa fiero tamanti cati amo nijnequi niquitas. <sup>5</sup> Pero nomasehualhua amo quinejque techtacaquilise, yon amo quicajque nopa ojti cati amo

cuali. Quisehuiquilijque quinmacaj tacajcahualisti nopa teteyome cati amo teno ininpati.<sup>6</sup> Huan yeca nohueyi cualancayo huetzqui quej tit ipan nopa altepeme ten tali Judá huan ipan nochicalles ten altepet Jerusalén. Huan yeca mocahuaj quej huactoc tali hasta ama.

<sup>7</sup> “ ‘Huan ama niamoTECO Cati Niquinyacana Noilhuicac Ejcahua Ma Tatanitij huan cati ni inin-Teco israelitame, quej ni nimechilhuá: ¿Para ten amotemohuilíaj miquilsti ica amoselti? Pampa melahuac yon se ten amojuanti amo mocahuas yoltoc. Amo momanahuis yon se tacat, yon se sihuat, yon se conet huan yon se conetzi cati noja chichi cati ehuani ipan tali Judá huan hualaj-toque nica ipan tali Egipto.<sup>8</sup> ¿Para ten anquinchi-jchihuaj teteyome huan anquintatilíaj copali quej se tacajcahualisti huan tahuel antechcualanca-macaj? Ica amotajtacolhua antechchihuaj ma nimechtzontamilti huan ma nimechchihua antatelchihualme. Amechhuihuitase masehualme ipan nochicalles talme.<sup>9</sup> ¿Huelis ya anquielcajque inintajtacolhua amohuejcapan tatahua, huan inintajtacolhua nopa tanahuatiani huan sihua tanahuatiani ten tali Judá? Xiquelnamiquica amotajtacolhua huan inintajtacolhua amosihuajhua cati anquichijque ipan tali Judá huan ipan altepet Jerusalén.<sup>10</sup> Pampa hasta ama, amo amoechcapanojtoque, yon amo aqui mocuectoc ica na. Amo aqui ten amojuanti motemacatoc para quito-quilis nopa tanahuatili cati nimechmacac amojuanti huan amohuejcapan tatahua.

<sup>11</sup> “ ‘Yeca ama niamoTECO Cati Niquinyacana Noilhuicac Ejcahua Ma Tatanitij huan cati

niiniDios israelitame, niquijtohua: Na tahuel nicualantoc huan yeca nijsencajtoc nimechtzontamiltis sesen ten amojuanti cati anehuani ipan tali Judá. <sup>12</sup> Na nimechtzontamiltis nochí amojuanti cati noja anmocajtoyaj ipan tali Judá quema quinhuicaque huejca nopa sequinoc huan teipa anhualajque nica ipan tali Egipto. Nochi amníquise nica ipan Egipto ica mayanti huan ica macheta. Amníquise nochí amojuanti cati anpisiltzitzi hasta cati anhuejhueyi. Huan nochí amojuanti amechcualancaitase, amechpinajtise, amechtelchiuase huan amechijiyase. <sup>13</sup> Pampa na nimechtatzacuiltis ipan tali Egipto quej nimechtatzaculti ipan altepet Jerusalén: ica tatehuilisti, ica mayanti huan ica cocolisti. <sup>14</sup> Huan yon se ten amojuanti amo momanahuis ten nocualancayo. San momanahuise inijuanti cati moilhuise para más cuál amo hualajtosquíaj ipan tali Egipto huan cholose para yase sempa ipan inintal.’”

<sup>15</sup> Huajca nochí nopa sihuame cati itztoyaj no-pona huan nopa tacame cati quimatiyaya para in-isihuajhua quintatiliyaya copali nopa teteyome huan nochí nopa sequinoc israelitame cati tali Judá ehuani cati mocahuayaya ica tatzinta ipan tali Egipto, nochí mosentilijtoyaj huan technan-quilique huan techilhuijque:

<sup>16</sup> —Tojuanti amo tijtacaquilise cati tiquijtohua pampa cati techilhuijtoc, amo huala ten TOTECO. <sup>17</sup> Tojuanti tijchihuase cati techpactía. Tijtatalise copali nopa sihua tanahuatijquet ten ilhuicac huan tijtoyahuase tacajcahualisti atic iixpa huan tijchihuase cati techpactía. Quej nopa

quichihuayabaj tohuejcapan tatahua, totanahuatijcahuia huan totayacancahua ten tali Judá ipan noch calles ten altepet Jerusalén. Huan ipan nopa tonali tijpiyayabaj miyac tacualisti, tipaquiyayaj huan amo techajsic yon se tamanti cati amo cuali.

**18** Pero hasta ipan nopa tonali quema tijcajque tijatilíaj copali nopa sihua tanahuatijquet ten ilhuicac huan ayecmo tijhueyichijque, yon ayecmo tijmacaque tacajcahualisti cati quityahuaj, hasta huajca pejqui para techpolohua noch tamanti. Huan talojtzitztechajsi taijyohuilisti huan techzontamiltíaj ica macheta huan ica mayanti.

**19** Huan nojquiya nopa sihuame quijtojque:

—Tojuanti tijhueyichihuayabaj nopa sihua tanahuatijquet ten ilhuicac. Tijmacayayaj tacajcahualisti cati tijtoyahuayabaj. Huan tijchihuayabaj taxcali huan ipani tijchihuayabaj iixcopinca nopa sihua tanahuatijquet. Pero amo quema tijchijque toseltitzitzi. Tohuehuejhua quimatiyayaj huan techpalehuiyayaj.

**20** Huajca na niquinnanquili nopa tacame huan sihuame cati quijtojtoyaj ya nopa huan niquinilhui:

**21** —¿Anmoilhuíaj para TOTECO amo quimatiyaya para amojuanti, amohuejcapan tatahua, amotanahuatijcahuia, amotayacancahua huan noch nopa sequinoc masehualme anquitatiyayaj copali para teteyome ipan noch altepeme ten tali Judá huan ipan noch calles ten altepet Jerusalén? **22** Huan TOTECO ayecmo huelqui quijyohui noch amotajtacolhua cati anquichihuayabaj, huan yeca quisosolo amotal. Huan quicajqui quej se huactoc tali

cati tahuel temajmati. Nojquiya quichijqui ma eli tatelchihuali huan yeca ayecmo aqui itztoc nopona hasta ama. <sup>23</sup> TOTECO amechtitanilijtoc ni huejhueyi tatzacultili pampa anquintatilijque copali nopa teteyome huan antajtacolchijque ica ya huan hasta ama, amo anquinectoque anquitepanitase.

<sup>24</sup> Teipa quej ni, niJeremías, niquinilhui nopa sihuame huan nochí nopa masehualme:

—Xjtacaquilica icamanal TOTECO nochí anmasehualme ten tali Judá cati anitztoque ipan tali Egipto. <sup>25</sup> TOTECO Cati Quinyacana Ilhuicac Ejcahua Ma Tatanitij, huan cati Toteco tiisraelitame, quiijtohua: ‘Amojuanti huan amosihuajhua anquijitoque para amo quema anquitahuelcahuase nopa sihua tanahuatijquet ten ilhuicac, yon amo quema anquicahuase anquimacase tacajcahualisti, Huan ica cati anquichihuaj, anquinextíaj para melahuac amo anquitahuelcahuase nopa sihua tanahuatijquet. Cualtitoc, xijmacaca cati anquitajtolcahuilijtoque anquimacase huan nochí cati antaquejquetztoque anquichihuile.

<sup>26</sup> Pero nochí amojuanti anisraelitame cati anehuani tali Judá huan ama anitztoque ipan ni tali Egipto, xjtacaquilica nocamanal niDios: Na nijtestigojquetza ica na notoca, huan niquijtohua para san tapic masque noja anquitemose notapalehuil huan notatiochihual, huan antatestigojquetzase huan anquijtose: ¡Na niquijtohua cati temachti quej temachti itztoc TOTECO Cati Más Quipyia Tanahuatili! Pero masque quej nopa antatestigojquetzaj, amo

nimechpalehuis, <sup>27</sup> pampa na nimechtachilis para nimechtatzacuiltis huan amo para nimechchihuilis cati cuali. Na nijchihuas ma huala amopani miyac tamanti cati amo cuali huan antzontamise ica tatehuilisti huan ica mayanti.

<sup>28</sup> “ ‘San mocuepase se quesqui Judá ehuani cati momanahuise ten nohueyi cualancayo. Pero nochí cati amo quinequise mocuepase, pero quinequise quisehuiquilise itztose ipan ni tali Egipto, quimachilise ajquiya camanalti xitahuac, sintá na o inijuanti. <sup>29</sup> Huan ya ni elis nopa tanextili cati amechnextilis para melahuac panos quej niquijtojtoc huan para melahuac nimechtatzacuiltis ipan ni tali: <sup>30</sup> Nijtemactilis nopa Faraón cati itoca Hofra, cati itztoc tanahuatijquet ipan tali Egipto inimaco icualancaitacahua cati quinequij quimictise. San se nijchijqui quema nijtemactili Sedequías, tanahuatijquet ten tali Judá, imaco Nabucodonosor, tanahuatijquet ten tali Babilonia para ma quimicti.’ ”

## 45

### *Jeremías quiyoltali Baruc*

<sup>1</sup> Quema Baruc ya quijcuilojtoya nochí nopa camanali cati achtohuiya niquilhuijtiyajqui, na, nijJeremías, sempa nijpohuili Baruc ni sequinoc camanali quema Joacim, icono Josías, yahuiyaya para nahui xihuit para tanahuatis. Niquilhui:  
<sup>2</sup> “Baruc, ya ni cati TOTECO huan toDios tiisraelitame mitzilhuía: <sup>3</sup> ‘Baruc, ta tiquijtohua para nelía

titeicnelti pampa TOTECO tahuel mitztaijyohuilitijtoc. Huan ama tiquijtohua para TOTECO noja más taohuijgayot mitzmacas. Tiquijtohua tahuel tisiyajtoc ica tequipacholi huan amo hueli timosiyajquetzas.' Quej nopa tiquijtohua. <sup>4</sup> Pero ama Baruc, TOTECO quijjtohua: 'Na nijsosolos ni tali cati njchijchijqui huan nijtamiltis nochi cati nj-tali. <sup>5</sup> ¿Huelis tijtemohua huejhueyi tamanti para ta? ¡Amo quej nopa xijchihua! Pampa masque na nijhualicas huejhueyi tatzacuiltyli ipan nochi ni masehualme, ta nimitzmanahuis campa hueli campa tiyas.' "

## 46

### *Camanali para cati amo israelitame*

<sup>1</sup> TOTECO technojnotzqui na, niJeremías, huan techmacac icamanal para nopa talme campa masehualme cati amo israelitame.

### *Camanali para Egipto*

<sup>2</sup> Ya ni nopa camanali cati TOTECO techmacac na, niJeremías, para tali Egipto ipan nopa xihuit quema Joacim, icono Josías, yahuiyaya para nahui xihuit tanahuatis ipan tali Judá\*. Elqui ipan nopa tonali quema oncac tatehuilisti ipan Carquemis, nechca hueyat Jordán. Huan ipan tatehuilisti Nabucodonosor, tanahuatijquet ten Babilonia, quitehui nopa Faraón cati itoca Necao, cati elqui tanahuatijquet ten tali Egipto. Huan Nabucodonosor quitzontamilti ya huan isoldados. <sup>3</sup> Huan TOTECO techilhui para quej

---

\* **46:2** 46:2 Ipan 605 a.C ipan tocalendario ten ama.

ni ma niquinilhui Egipto ehuani: “Ximotalilica amoteposhua huan xiyyaca ipan nopa tatehuilisti.

<sup>4</sup> Xiquintalilica siyaj amocahuayojhua huan ximocualtalica para antejcose ininpani. Ximotalilica amotepostzontzajca huan xijtentica amomachetas. Huan ximotalilica se teposti para anmotzacuase amoyolixco. <sup>5</sup> ¡Xiquitaca! Nopa soldados ten tali Egipto cholohuaj ica majmajti. Hasta nopa soldados cati tahuel mosemacaj nojquiya matalohuaj, yon amo moicancuepaj. Campa hueli onca majmajti. <sup>6</sup> Pero amo aqui momanahuis masque tahuel hueli matalohua o masque tahuel motemaca. Pampa nepa ica norte nechca hueyat Eufrates, motepotanise huan huetzise.

<sup>7</sup> “¿Ajquiya inijuanti ne soldados cati tahuel tequite? Motananaj quej nopa hueyat Nilo quema tatemi huan quitemitíaj nochí nopa tali. <sup>8</sup> Ya nopa, nopa soldados ten tali Egipto. Inijuanti motepanitaj pampa moilhuíaj quitemitise ne tali quej at huan quintzontamiltise nochí inincualancaitacahua. <sup>9</sup> Huajca ma hualaca nopa cahuayos, carros huan nopa tatehuiani cati tahuel tetique ten tali Egipto. Ma hualaca nochí nopa masehualme ten tali Etiopía huan Libia cati tahuel huelij quitequihuíaj macheta huan cuahuitoli. <sup>10</sup> Pampa ni tonali eltoc noaxca na niDIOS Cati Niquinyacana Noilhuicac Ejcahua Ma Tatanitij. Ama ni tonali niquintacuepilis nocualancaitacahua. Nopa macheta quinmictis masehualme hasta ayecmo huelis más. Eltoc quej ihuintis ica inieso. Pampa ama na nijselis se tacajcahualisti. Oncas se hueyi miquilisti nepa ipan nopa tali cati

mocahua ica norte, nechca hueyat Eufrates.

<sup>11</sup> “Senquisa amechtantoque huan amechcocojtoque anmasehualme ten tali Egipto. Xiyaca ipan tali Galaad xijtemotij nopa pajti ten bálsamo. Pero masque anquitequihuise tahuel miyac pajti, amo anmochicahuase. <sup>12</sup> Nochi talme quicactoque ten amopinahualis. Ipan nochi ni tali caquisti choquisti huan tzajtzisti pampa ya amechtanque. Amosoldados cati tahuel tetique motepotaníaj se ica seyoc huan san sejco huetzij.”

<sup>13</sup> Huan quema nopa Nabucodonosor, tanahuatijquet ten tali Babilonia hualajqui para quitehuis tali Egipto, TOTECO technojnotzqui na, niJeremías, huan techilhui: <sup>14</sup> “¡Xitayolmelahua chicahuac ipan tali Egipto! Xitepohuilica taya ininpantis nopa altepeme Migdol, Menfis huan Tafnes. Quej ni xiquinilhui: ‘Ximocualtalica para antatehuise pampa yaya cati huala ica nopa macheta cati tetzontamiltía quinmictis nochi masehualme cati itztoque yahualtic Egipto.’ <sup>15</sup> ¿Para ten cholo ica majmajti modios, Apis, cati tiquijtohuayaya para tahuel tetic quej se toro? Cholo pampa niDIOS nijtahuiso iniixpa icualancaitacahua. <sup>16</sup> Tahuel miyac masehualme huetzise. Huan huajca nopa israelitame cati tali Judá ehuani quijtose: ‘Xihuala, ma timocuepaca ipan tali Judá campa titacatque. ¡Ma timochololtica ten ni miquilsti!’

<sup>17</sup> “Xijpataca itoca nopa Faraón cati itoca Hofra huan xijtocaxtica: ‘Nopa tacat cati camanalti hueyi, pero amo quipiya chicahualisti.’

<sup>18</sup> “Na niTanahuatijquet huan niDIOS Cati

Niquinyacana Noilhuicac Ejcahua Ma Tatanitij nimechilhuía para temachti hualas ipan tali Egipto, se cati tahuel huejcapantic quej tepet Tabor o quej tepet Carmelo cati eltoc nechca hueyi at. Quej nopa elis amocualancaitaca cati huala. <sup>19</sup> Xijcualtalica amotamantzitz huan ximocualchijchihuaca para anyase ipan seyoc tali, nochí amojuanti cati anehuani ipan tali Egipto. Pampa quitamisosolose altepet Menfis hasta mocahuas cactoc quej huactoc tali huan amo mocahuas yon se masehuali. <sup>20</sup> Egipto nelía eliyaya yejyectzi quej se becerra, pero cholos quema hualas nopa tetzontamiltijquet cati ehua ipan nopa tali cati mopantía ica norte. <sup>21</sup> Hasta nopa isoldados ten sequinoc talme cati Egipto quintaxtahuía para tatehuise, nojquiya cholose ica majmajti quej becerros cati tomahuaque. Tahuel motalose pampa ama eli se tonali ten majmajti para tali Egipto, huan se tonali ten tatzacuiltyli. <sup>22</sup> Quema calaquiquij inincualancaitacahua para quintzontamiltiquij ica hachas nopa Egipto ehuani cholose ixtacatzi quej se cohuat cati mohuahuatza. Hualase tahuel miyac soldados hasta amo aqui huelis quinpohuas. <sup>23</sup> Huan inijuanti quinhuejhuelse nopa egyptome quej tacame cati quitzontequiv cuame ipan cuatitamit. Quipiyaj inimiyaca quej chapolime. <sup>24</sup> Quinpinahaultise nopa Egipto ehuani huan quintemactilise inimaco nopa masehualme cati hualahui ica norte huan amo huelis momanahuise.”

<sup>25</sup> TOTECO Cati Quinyacana Iilhuicac Ejcahua Ma Tatanitij huan yaya cati ininTeco israelitame,

quijtohua: “Na nijtatzacuiltis Amón, nopa taixcopincayot cati inindios nopa masehualme ten altepet Tebas huan nochí nopa sequinoc teteyome ipan tali Egipto. Nojquiya nijtatzacuiltis Faraón huan nochí itayacancahua huan nopa masehualme cati motemachíaj ipan ya.<sup>26</sup> Na niquintemactilis imaco Nabucodonosor, tanahuatijquet ten tali Babilonia huan inimaco isoldados. Pero teipa quema ya panotos miyac tonali, Egipto sempa temis ica masehualme quej achtohuiya. Quej nopa niDIOS niquijtohua.

*TOTECO quinmaquixtis imasehualhua  
(Jer. 30:10-11)*

<sup>27</sup> “Pero amojuanti annoisraelita masehualhua † amo ximajmahuica. Ximoyolchicahuaca, pampa masque ama anmopantíaj huejca, na nimechmanahuis. Sempa nimechhualicas amojuanti huan amoconebla ipan amotal huan anquipiyase tasehuilisti huan amo teno amechtemajmatis.<sup>28</sup> Amo ximajmahui annoisraelita tequipanojcahua, pampa na niitztoc amohuaya. Na niquintzontamiltis cati ehuani ipan nochí nopa talme campa nimechtitani, pero amojuanti amo nimechtzontamiltis. San nimechtzacuiltis quej quinamiqui por cati anquichijtoque pampa amo hueli nimechcahuas san quiaja.”

## 47

*Camanali para filisteos*

---

† **46:27** 46:27 Jacob huan Israel eltoc seyoc inintoca israelitame ten tali Israel ica norte.

<sup>1</sup> Quema Faraón ayemo quisosolojtoya altepet Gaza, TOTECO techmacac na, niJeremías, ni camanali para niquinyolmelahuas nopa filisteos.

<sup>2</sup> Yaya quijito: “¡Xiquitaca! Nopona ica norte hualahui miyac soldados cati nesij quej quema temi se hueyat. Nopa at quipachos nopa tali campa itztoque nopa filisteos. Huan nopa at quintzontamiltis nochí cati itztoque ipan nopa altepeme huan nochí tamanti catí moscaltiyayaj npona. Nopa tacame cati tetique tzajtzise ica majmajti. Huan nochí ipan nopa tali chocase ica tahuel miyac tequipacholi. <sup>3</sup> Nochí quicaquise caquisti nopa carros huan caquisti iniistihua nopa cahuayos. Huan huajca nochí nopa tetajme cholose, yon ayecmo quinmocuitahuise ininpilconehua.

<sup>4</sup> “Pampa ya ajsic tonali para TOTECO quintzontamiltis nopa filisteos huan nochí inintapalehuijahua cati ehuani ipan altepet Tiro huan Sidón. Pampa na niquintzontamiltis nochí nopa filisteos cati yajque itztotij ipan nopa piltaltzi cati itoca Caftor cati mopantía iteno hueyi at.

<sup>5</sup> Nijtamisosolos altepet Gaza huan Ascalón huan mocahuase alaxtique quej se tepexit. Huan nochí iixhuihua Anac quipiyase se hueyi choquisti huan se hueyi tequipacholi.

<sup>6</sup> “Antzajtzise: ¿Hasta quema mosiyajquetzas imacheta TOTECO? ¿Hasta quema sempa mosiyajquetzas huan quicalaquis ipan icuetax?

<sup>7</sup> Pero, ¿quenicatza huelis nijcalaqueis nomacheta quema nijtitantoc para ma quichihuaqui itequi? Pampa nochí masehualme ten altepet Ascalón

huan nochí catí itztoque iteno hueyi at, monequi tzontamise.”

## 48

### *Camanali para tali Moab*

<sup>1</sup> Ya ni nopa camanali catí TOTECO Catí Quinyacana Iilhuicac Ejcahua Ma Tatanitij huan catí ininteco israelitame techmacac para tali Moab, quijito: “¡Teicneltique nopa altepet Nebo ehuani pampa mocahuas tasosololi inialtepe! Huan nopa altepet Quiriataim nojquiya quiyahualose huan quihuelonise itepa. <sup>2</sup> Ayecmo oncas paquillisti ipan tali Moab, pampa ya tasencahuali para quitzontamiltise. Nepa ipan altepet Hesbón quisencahuase quenicatza quisosolose tali Moab. Quijitose: ‘Xihuala, huan ma tiquixpolihuítica nopa tali.’ Huan ipan altepet Madmena, nopa masehualme ayecmo molinise. <sup>3</sup> Teipa ipan altepet Horonaim nojquiya caquistis tahuejchihualisti ten tatehuilisti, <sup>4</sup> pampa nochí tali Moab ya mocajtos tasosololi. Huan caquistis para chocase nochí catí pisiltzitzí nopona. <sup>5</sup> Huan nochí masehualme chocatiyase huan ixtejcose ipan altepet Luhit para momanahuitij, pampa ipan nopa altepet tatzinta campa quisque quicaquise catí tzatzij ica miyac taiyohuilsti huan hueyi majmajti. <sup>6</sup> ¡Ximochololtica nochí catí anhuelij huan ximotatica ipan huactoc tali! <sup>7</sup> Pampa ammotemachijque ipan amotomi huan ipan nochí tamanti catí anquipiyayayaj, antzontamise. Huan amodios catí itoca Quemos, huan amototajtzitzí huan nochí nopa tayacanani, quinhuicase huejca ipan seyoc tali.

<sup>8</sup> “Nochi masehualme huan altepeme cati mopantíaj campa taixtejcolis o campa tamayamit, quintamisosolose; pampa quej nopa quijitojtoc TOTECO. <sup>9</sup> Nelcuali elisquía sintia tali Moab ehuani quipiyasquíaj inieltapalhua para patanise huan mochololtise, pampa ipan altepeme nopona, amo mocahuas yon se masehuali.”

<sup>10</sup> Tatelchihuali ma eli nopa tacat cati amo quinequi quichihuas ica paquilisti nopa tequit cati TOTECO quinahuatijtoc ma quichihua. Huan tatelchihuali ma eli nopa tacat cati amo quinequis quinmictis ica imacheta cati TOTECO quilhuía.

<sup>11</sup> Tali Moab nochipa eltoc ica tasehuilisti. Amo quema monequiyaya imasehualhua ma choloca hasta sequinoc talme huan mocahuase. Nochipa tali Moab eltoya quej se xocomecat iayo cati san quicahuiltoyaj ma elto huan amo quema quitectoyaj ipan seyoc cuetaxti huan amo quipolojtoya iajhuiyaca.

<sup>12</sup> Pero TOTECO quijito: “Nimantzi ajsis nopa tonali quema TOTECO quintitanilis tetaijyohuilitiani cati quinchihuase masehualme ipan Moab ma yaca ipan sequinoc talme. <sup>13</sup> Huan huajca tali Moab ehuani pinahuase por ininteteyo cati itoca Quemos quej nopa israelitame pinajque por nopa becerro ten teposti cati quichijchijque ipan altepet Betel para ipan motemachise.

<sup>14</sup> “¿Amo anquielnamiquij quenicatza anmohueyimatiyayaj huan anquijtohuayayaj: ‘Tojuanti tahuel timosemacaj huan tijpiyaj miyac chicahualisti para titatehuise’? <sup>15</sup> Pero ama quitamisosolose tali Moab inihuaya nochialtepehua, pampa ya huala cati quitzontamiltis.

Nochi itelpocahua cati más tapejpenilme ya eltoque para quinmictise. Quej nopa niquipijtohua na nopa niTanahuatijquet cati notoca niDIOS Cati Niquinyacana Noilhuicac Ejcahua Ma Tatanitij.

<sup>16</sup> Huan nopa tatzacuiltyli chicahuac huala para nimantzi ajsis ipan tali Moab. <sup>17</sup> Nochi amojuanti cati anitztoque nechca tali Moab, ximocuesoca huan xichocaca por nopa tali. ‘Xiquitaca quenicatza ya tzontanqui tali Moab masque eliyaya tahuel yejyectzi huan tetic.’

<sup>18</sup> “Huan amojuanti anmasehualme ten altepet Dibón, xijcajtehuaca amosiya yejyectzi huan ximosehuica talchi, pampa inijuanti cati quisosolohuaj tali Moab nojquiya quisosolose altepet Dibón huan quinhuelonise nochí nopa calme cati huejcapantique. <sup>19</sup> Nopa masehualme ten altepet Aroer moquetzaj ojtenti para tachiyase huan quintzajtzilíaj chicahuac nochí nopa masehualme cati cholohuaj ten altepet Moab, quinilhuíaj: ‘¿Taya panotoc nepa?’ ”

<sup>20</sup> Huan inijuanti quinnanquilíaj quej ni: “Moab ya tamisosolijtoc. Ximocuesoca huan xichocaca por ni tali. Xiquinpohuilitij nopa masehualme cati itztoque iteno hueyat Arnón para tali Moab ya quitamisosolojque.”

<sup>21</sup> Nochi nopa altepeme cati mopantíaj campa taixtejcolis ya tamisosolijtoque pampa nopa tatzacuiltyli cati TOTECO quititanqui, huetzqui ipan nopa altepeme: Holón, Jahaza, Mefaat, <sup>22</sup> Dibón, Nebo, Betdiblataim, <sup>23</sup> Quiriataim, Betgamul, Betmeón, <sup>24</sup> Queriot, Bosra huan nochí sequinoc ialtepehua Moab cati mopantiyayaj huejca huan cati mopantiyayaj nechca.

<sup>25</sup> Huan Toteco quijito: “Tanqui ichicahualis tali Moab. Eltoc quej se tacat cati quipostequilijtoque iajcol. Quej ni niamotECO niquijtohua. <sup>26</sup> Huajca ma huetzi tali Moab huan nochimasehualhua. Ma momimiloca ipan iniisotal quej ihuintini, pampa injuanti mosisiniijtoque ica na, niDIOS, huan yeca ama nochimasehualme amechpinajtiyayaj anisraelitame huan amechcualancaitayayaj quej elisquía antachtequini. Pero nelía mopinajtiyayaj ica iniselti.

<sup>28</sup> “Anmasehualme ten tali Moab, xicholoca ten amoaltepehua huan xiitztotij ipan tepexit quej palomajme cati motepasoltíaj iteno nopa tepexit. <sup>29</sup> Tojuanti tijcactoque para tali Moab ehuani tahuel mohueyimatiyayaj. Tijmatij motepanitayayaj, itzcui me eliyayaj huan tahuel mosisiniyyayaj ica na. <sup>30</sup> Na niquinixmati Moab ehuani huan nijmati para tahuel mosisiniáj. Pero san tapic mosisiniáj, pampa masque mohueyimatij huan quipiyaj miyac chicahualisti, amo teno quinpalehuis. Quej nopa niamotECO niquijtohua. <sup>31</sup> Yeca nichoca por Moab huan nimocuesohua por nopa masehualme ten altepet Kir Hares.

<sup>32</sup> “Antacame ten altepet Sibma, amojuanti anquipixque tahuel miyac xocomeca mili. Na más nichoca por amojuanti que nopa masehualme ten altepet Jazer, pampa nopa tetzontamiltijquet quitzontejqui nochimasehualme cuamacuayot cati moscaltiyaya huejca huan quitejqui itajca amoxocomeca. Huan nojquiya quitejqui nochimasehualme cuatacti. Huan amechcrajque san

amamax. <sup>33</sup> Ayecmo caquisti paquilsti, yon huetzquisti ipan mili ten tali Moab. Nochi xocomecat iayo tanqui huan tanqui nopa tzajtzisti ten paquilsti cati caquistiyaya quema quipatzcayabaj nopa xocomecat itajca. Amantzi onca tzajtzisti huan amo paquilsti. <sup>34</sup> Nochi nopa masehualme cati itztoque ipan nopa tali tzajtzij pampa nochi tahuel taijyohuáj. Ininchoquilis caquisti ten altepet Hesbón hasta Eleale huan Jahaza, huan ten Zoar hasta Horonaim huan Eglad Selisiya, pampa nochi nopa potreros ten Nimrim, tamihuactoque.”

<sup>35</sup> Pampa TOTECO quiijtohua: “Na niquintzon-tamiltis nochi nopa masehualme ten tali Moab cati quintatiliyabaj copali nopa teteyome huan nochi nopa teteyome cati amo teno ininpati cati injuanti quinhueyimatiyabaj.” <sup>36</sup> Yeca ama na nimocuesohua ipan noyolo por tali Moab ehuani huan nopa masehualme ten altepet Kir Hares, pampa nochi iniricojyo quipolojque. <sup>37</sup> Nochi tacame motamiximaj huan quihuataníaj inintentzo ica tequipacholi. Nojquiya mococojtoque ipan inintacayo huan moquentíaj iniyoyo cati quinextíaj para mocuesohuaj. <sup>38</sup> Ipan nochi calme ten tali Moab huan ipan nochi calles, onca choquisti huan tequipacholi. Pampa na nijmajcahuili nohueyi cualancayo huan yeca nijtapanqui tali Moab quej se comit cati amo teno ipati. <sup>39</sup> ¡Mocajtoc xacuáltic tali Moab! Huan ama tahuel mochoquilíaj huan pinahuaj imase-hualhua. Huan nochi nopa sequinoc talme cati mopantíaj inechca momajmatíaj huan pinahuaj.

<sup>40</sup> Huan TOTECO quiijtohua: “Icualancaitaca Moab huala quej se cuatojti. Huan yaya quipatahuas ieltapal ipan nochí nopa tali. <sup>41</sup> Ialtepehua ya huetzque huan nopa huejcapantique calme, ya huetzque inimaco inincualancaitacahua. Huan nopa soldados ten tali Moab cati más mosemacaj, huihuipicaj quej se sihuat cati coneipiya. <sup>42</sup> Huan tali Moab ayecmo quema elis se país, pampa yaya tahuel mosisisinijtoc ica na.”

<sup>43</sup> TOTECO quiijtohua para anMoab ehuani anquipantise majmajti huan taquetzti cati amechmasiltise. <sup>44</sup> Pampa nochí cati cholose, huetzise ipan se taquetzti; huan cati momanahuise ten nopa taquetzti, huetzise ipan se ostot. Amo aqui momanahuise pampa ya ajsic tonali para anquiselise tatzacuiltylisti. Quej nopa niDIOS niquijtohua.

<sup>45</sup> “Nochi injuanti cholose huan yase ipan tali Hesbón pampa amo huelise yase más huejca. Pero ipan tali Hesbón, cati iaxca Tanahuatijquet Seón, quisas se hueyi tit. Huan quitatis nochí nopa tali ten se lado hasta seyoc, inihuaya nochí nopa mosisisinijca masehualme.

<sup>46</sup> “¡Teicneltique tali Moab ehuani! Pampa nopa masehualme cati quihueyimatiyayaj nopa dios cati itoca Quemos, ya tzontanque. Huan quinhicase inintelpocahua huan iniichpocahua ipan seyoc tali para tetequipanotij san tapic. <sup>47</sup> Pero teipa, ica miyac tonali, na sempa niquinhualicas nopa Moab ehuani nica.” Quej nopa quiijto TOTECO.

Hasta nica tami nopa tatzacuiltli cati quinamiqui para tali Moab.

## 49

### *Camanali para tali Amón ehuani*

<sup>1</sup> TOTECO quej ni quinilhuía tali Amón ehuani: “¿Taya anquichihuaj? ¿Para ten anitztoque ipan nopa altepeme campa itztoque israelitame cati ehuani tali Judá? ¿Amo anquiitaj para nopa altepeme ya temitoque ica israelitame cati tali Judá ehuani? Huajca ¿para ten amojuanti cati anquihueyichihuaj nopa teteyot Milcom anmoaxcatijtoque tali Gad huan nochí ialtepehua?” <sup>2</sup> TOTECO quiijto: “Ajsis tonali nimechtatzacultis ica cati anquichijtoque huan nijsosolos amoaltepe Rabá. Huan teipa Rabá mocahuas quej se tamontomit ten tet. Huan nochí nopa sequinoc altepeme cati mopantíaj huejca, quintamatatise. Huan huajca nopa israelitame hualase huan sempa moaxcatise inintal. Quena, nopa israelitame amechtachtequillise pampa amojuanti nojquiya anquintachtequillije. Quej nopa ni ininTECO niquijtohua.

<sup>3</sup> “Anmasehualme ten altepet Hesbón, xichocaca pampa ya quisosolojtoque altepet Hai. Ansihuame ten altepet Rabá, xichocaca. Ximoquentica yoyomit cati quinextis para anmotequipachohuaj. Xichocaca huan ximotatica campa cuame, pampa quihuicase amoteteyo Milcom ipan seyoc tali inihuaya nopa totajtzitzí huan tayacanani. <sup>4</sup> Amojuanti tahuel ammohueyimatij por nopa tamayame cati tahuel taeliltíaj, pero nimantzi quintamisolose.

Amojuanti anmotemachiyayaj ipan amotomi huan anmoilhuiyayaj para amo aqui amechchihuilisquía cati fiero. <sup>5</sup> Pero xiquitaca, na nimechtitanilis hueyi majmajti, quej nopa quijtohua TOTECO Cati Quinyacana Iilhuicac Ejcahua Ma Tatanitij. Huan nochí nopa masehualme cati itztoque amonechca, amechquixtise ten amotal. Huan amo aqui yon se masehuali cati amechpalehuis quema amechquixtis. <sup>6</sup> Pero teipa, na sempa nimechhualicas anamonitame ipan amotal. Quej nopa niDIOS niquijtohua.”

### *Tatzacuiltli para tali Edom*

<sup>7</sup> TOTECO Cati Quinyacana Iilhuicac Ejcahua Ma Tatanitij, quijtohua: “¿Taya ininpantic nopa masehualme cati talnamiquij? ¿Amo mocajqui yon se cati talnamiqui ipan nochí altepet Temán? <sup>8</sup> Huan amojuanti anmasehualme ten tali Dedán, xicholoca huan ximotatitij ipan huactoc tali pampa quema niquintatzacuiltis nopa Edom ehuani, nojquiya nimechtatzacuiltis amojuanti. <sup>9</sup> Quema quitequij itajca xocomecat, nopa tacame quicahuaj se quesqui para ma quitequica cati teicneltzitzti. Yon tachtequini amo quihuicaj nochí tamanti quema tachtequij. <sup>10</sup> Pero amo quej nopa nijchihuas ica nopa tali Edom campa iteipan ixhuihua Esaú. Na nijcahuas tali Edom cactoc quej huactoc tali. Huan amo oncas yon se lugar campa huelise motatise. Niquintzontamiltis nochí ininconebla, iniicnihua huan inincalnechcahua. <sup>11</sup> Pero nopa coneme cati icnotzitzti cati mocahuase, na

niquinmocuitahuis. Huan nopa cahual toahuime motemachise ipan na.”

<sup>12</sup> TOTECO quej ni quiilhuía tali Edom ehuani: “¿Sinta taijyohuise masehualme cati amo quinamiqui taijyohuise, anmoilhuíaj para anmomanahuise ten tatzacuiltyisti? ¡Amo! ¡Amo anmomanahuise! Melahuac anquiise cati eltoc ipan nopa caxit huan anquiselise nopa tatzacuiltyili. <sup>13</sup> Pampa noseltitzi nimotestigojquetza huan niquijtohua para nijchihuas tali Bosra quej se tamontomit ten tet. Huan nochí quipinajtise huan quitelchihuase. Huan nochí ialtepehua mocahuase sosolijtoque para nochipa, quej nopa niDIOS niquijtojtoc para panos.”

<sup>14</sup> Huan na, nijJeremías, nijselijtoc se camanali ten TOTECO huan yaya techilhuijtoc para quititancoc se itayolmelajca ipan nochí talme para quinilhuis ma mosentilica para quitehuise tali Edom huan ma quitamisosoloca. <sup>15</sup> Na niquechcapantalis tali Edom huan nijchihuas para nochí talme ma quipinahualtica, quej nopa niDIOS niquijtohua. <sup>16</sup> Anmohueyimatij miyac huan anmocajcayajtoque. Anmotepanitaj huan anmoilhuíaj para amo aqui amechtanis pampa anquipyaj amochaj ipan nopa tepeme cati huejcapantique. Pero masque anitztoque tahuel huejcapa quej nopa cuatojti, na nimechtemohuis ten nopona, quej nopa na niDIOS niquijtohua.

<sup>17</sup> “Senquisa quisosolose tali Edom hasta nochí cati panose nopona momajmatise huan quitapose inincamac por cati quittase. <sup>18</sup> Panos san se ica tali Edom quej panoc ica altepeme Sodoma

huan Gomorra huan nopa altepeme cati eltoyaj nechca. Edom nojquiya mocahuas cactoc huan amo aqui itztos nopona. Quej nopa niDIOS niquijtohua. <sup>19</sup> Na niyas campa tali Edom ipan se taloxtzi quej quisa se león ipan cuatitamit nechca hueyat Jordán hasta nopa tamayamit cati yejyectzi para quiitzquis se pilborregoxtzi, quej nopa na ipan se taloxtzi nicalaquis ipan tali Edom huan nijchihuas ma cholotahuaca ten inintal. Teipa se tanahuatijquet cati na nijtapejpenis tanahuatis nopona. Pampa amo aqui seyoc quej na huan amo aqui huelis technotzas iixpa se juez para techtajtanilis cuentas. Amo aqui quipiya chicahualisti para moquetzas noixpa para quitzacuilis cati nijnequi nijchihuas.

<sup>20</sup> “Huajca xijcaquica cuali cati niDIOS nijsencajtoc para temachti niquinchihuialis nopa fiero masehualme ten tali Edom huan ialtepe Temán. Hasta nopa piloquichpiltzitzi nojquiya quinhuicase ipan seyoc tali para tequipanotij san tapic huan ininchajchaj mocahuas cactoc. <sup>21</sup> Elis quej nochí tali mojmolinis quema huetzis Edom. Nopa masehualme tahuel tzajtzise, huan caquistis hasta ipan nopa Hueyi At Cati Chichiltic. <sup>22</sup> Inincualancaitaca patantihuas quej se cuatojti, huan ieltapal quipatahuas ipan altepet Bosra. Huan huajca nopa tatehuiani ten tali Edom cati más mosemacaj, huihuipicase quej se sihuat cati coneipyia.” Quej nopa quijito TOTECO.

*Tatzacuiltli para altepet Damasco*

<sup>23</sup> Ya ni nopa camanali cati TOTECO techmacac ten Damasco: “Se hueyi majmajti quinitzquis nopa altepeme Hamat huan Arfad, pampa ya quicactoque para hualas cati quintatzacuiltis. Iniyolo mojmolinis ica majmajti quej mojmolinía nopa at ipan hueyi at quemahuala se ajcomalacat.

<sup>24</sup> Altepeta Damasco ehuani majmahuise hasta tamis ininchicahualis, huan nochi cholose. Tahuel majmahuise, mocuesose huan cuajcualose quej se sihuat cati coneipyia. <sup>25</sup> Nopa altepet cati yejyectzi huan cati temacayaya paquilisti, tamisosolihuis huan nochi quitahuelcahuase.

<sup>26</sup> Ipan nochi calles tepejtose inintacayohua nopa telpocame huan nopa soldados cati quintzontamiltijtoque san ipan se tonal. Quej nopa na niquijtohua niDIOS Cati Niquinyacana Noilhuicac Ejcahua Ma Tatanitij. <sup>27</sup> Huan na nijchihuas ma yoli se hueyi tit campa inepa altepet Damasco huan ma quitati nochi caltanahuatilme ten Ben Hadad.”

### *Tatzacuiltili para Cedar huan Hazor*

<sup>28</sup> Ya ni nopa camanali cati TOTECO techmacac ten nopa hueyi familia Cedar huan ten nopa tanahuatijcayot ten tali Hazor cati Nabucodonosor, tanahuatijquet ten tali Babilonia quintzontamiltis. Yaya quiijto para quititanis Nabucodonosor para ma quintzontamilti nochi cati itztoque ica campa hualquisa tonati.

<sup>29</sup> Huan quincuilis nochi ininborregojhua, ininchajchaj huan nochi cati quipiyaj. Quej nopa TOTECO quiijto. Huan nojquiya quincuilise inincamellos. Campa hueli oncas tzajtzisti huan

masehualme quiijtose: “Tocualancaitacahua techyahualojoque huan techchihuilíaj cati fiero.”

<sup>30</sup> Huan Toteco quiijto: “Anmasehualme ten tali Hazor, xipanquisaca nochí amojuanti cati anhuelij huan ximochololtica. Xiyaca ximotatitij ipan huactoc tali, pampa Nabucodonosor, tanahuatijquet ten tali Babilonia, quisencajtoc cati fiero para amojuanti huan mocualtalía para amechezontamiltiqui.

<sup>31</sup> “Pampa na niDIOS niquilhuijtoc Tanahuati-jquet Nabucodonosor: Xiya, xiquintehuiti nopa masehualme cati itztoque ica campa hualquisa tonati. Injuanti itztoque iniselti, yon amo quema quipantíaj tequipacholi. Nojquiya amo onca sequinoc altepeme ininechca. Itztoque temachme, yon amomoilhuíaj sintamonequí tepamit o caltemit. <sup>32</sup> Nochi inincamellos huan inihuacaxhua, elis amoaxcahua. Huan nopa masehualme niquintitanis campa hueli ipan nochí taltipacti. Huan campa hueli campa itztotij, quinajsis huejhueyi majmajti cati campa hueli hualas. <sup>33</sup> Huan tali Hazor elis ininchaj tepechichime. Ayecmo aqui itztos nopona pampa mocahuas tasosololi para nochipa.”

### *Tatzacuiltili para tali Elam*

<sup>34</sup> Quema Sedequías pejqui tanahuatía ipan tali Judá, TOTECO technojnotzqui na, niJeremías, huan techmacac ni camanali para tali Elam ehuani. Techilhui: <sup>35</sup> “Na niDIOS Cati Niquinyacana Noilhuicac Ejcahua Ma Tatanitij, niquijtohua: Na niquintzontamiltis nopa soldados ten tali Elam. <sup>36</sup> Huan niquintitanis nopa masehualme

ten tali Elam campa hueli. Quena, niquintitanis ipan campa hueli talme ipan nochitaltipacti. <sup>37</sup> NiDIOS niquijtohua para nijchihuas para Elam ehuani ma momajmatica iniiexpa incualancaitacahua cati quinequise quinmictise. Huan nijchihuas ma quintamiixpolihuiltica nopa Elam ehuani pampa tahuel nicualani inihuaya huan niquintamiltis. <sup>38</sup> Huan niDIOS niquijtohua para na nijtalis nosiya para nitanahuatis ipan tali Elam. Huan nijtzontamiltis inintanahuatijca huan inintayacancahua. <sup>39</sup> Pero teipa ipan taya-capan tonali, sempa niquinhualicas nopa masehualme ten tali Elam ipan inintal. Quej nopa niDIOS niquijtohua.”

## 50

### *Tatzacuiltyli para tali Babilonia*

<sup>1</sup> Ya ni nopa camanali cati TOTECO techmacacna, niJeremías, niitajtolpanextijca para tali Babilonia, inintal nopa caldeos. Techilhui:

<sup>2</sup> “Xiquinyolmelahua nochitalmehue para se tonali huetzis tali Babilonia huan elis tamitasosololi. Inindios cati itoca Marduc huetzis ipan hueyi pinahualisti. <sup>3</sup> Pampa motananase masehualme ten se tali cati eltoc ica norte huan hualase para quintzontamiltiquij Babilonia ehuani hasta amo mocahuas yon se masehuali, o yon se tapiyali, pampa nochitalmehue huan tapiyalme cholose.”

### *Israelitame mocuepase ipan inintal*

<sup>4</sup> Huan TOTECO quiijtohua: “Huan ipan nopa tonali, nopa israelitame cati ehuayayaj tali Israel

huan cati ehuayayaj tali Judá mosejcotilise huan mochoquilitihualase, huan sentic techtemose ni-ininTECO Dios. <sup>5</sup> Huan israelitame tatzintocase catijqui nopa ojti cati huala para altepet Jerusalén. Huan quema quinnextilitose nopa ojti, inijuanti quitoquilitihualase huan ajsise ipan nopa altepet. Huan quijjtose: ‘Ma tiyaca timosentilitij ica TOTECO. Ma tijchihuaca se camanali ihuaya cati huejahuas para nochipa huan cati ayecmo quema tiquixpanose.’

<sup>6</sup> “Nomasehualhua itztoque quej borregojme cati mocuapolojtoque. Inintamocuitahuijcahua quincuapolojque huan teipa quintahuelcajque ipan cuatitamit. Huan inijuanti más mocuapolojque huan ayecmo quimatque quenicatza mocuepase ipan inincorral. <sup>7</sup> Huan campa hueli campa quinpantiyayaj inincualancaitacahua, quinmictiyayaj huan quijtihuayayaj: ‘Tojuanti tijpiyaj tanahuatili para tiquintehuise israelitame quej tojuanti techpactía, pampa inijuanti tajtacolchijtoque ica ininTECO, yaya cati xitahuac huan cati ipan mochiayayaj inihuejcapan tatahua.’

<sup>8</sup> “Pero ama nomasehualhua, xicholoca ten tali Babilonia campa itztoque nopa caldeos. Xiquisaca sesen ten amojuanti ipan inintal quej elisquía nopa tayacanquet cati tiquinyacantiya nochí sequinoc. <sup>9</sup> Pampa xiquitaca, na niquintananas miyac soldados ten nopa talme cati mocahuaj ica norte huan niquinhualicas para ma quitehuiquij tali Babilonia. Huan nochí inijuanti cuali quiixmatij para quitequihiuse cuataminti. Huan quema quimajcahuase

inincuataminhua, nochipa ajsise campa quinequiyayaj. <sup>10</sup> Huan inincualancaitacahua quitachtequilise tali Babilonia hasta quipiyase nochí cati quinequise. Quej nopa niDÍOS niquijtohua.

### *Tatzacuiltyli para tali Babilonia*

<sup>11</sup> “Ancaldeos cati anquintachtequilijque nomasehualhua, anyolpactoque. Anmotomajque quej huacaxme cati tacuaj campa onca cuajcuali sacat, huan antzajtzij ica paquili quej oquich cahuayoyme. <sup>12</sup> Pero amotal campa antacatque huetzis ipan se hueyi pinahualisti, pampa eltoc se país cati más fiero ten nochí sequinoc. Mocahuas cactoc quej huactoc tali campa amo teno eli. <sup>13</sup> Tali Babilonia mocahuas quej se huactoc tali por nohueyi cualancayo niDÍOS. Nochi masehualme cati panose nopona momajmatise huan quipinajtise por nochí nopa tatzacuiltyli cati quiseli.

<sup>14</sup> “Nochi anmasehualme ipan nopa talme cati mocahuaj yahualtic ten tali Babilonia, ximocualtalica para anquitehuise. Huan nochí amojuanti cati anhuelij anquitequihuíaj nopa cuahuitoli, xiquinmajcahuaca amocuataminhua para ma quiajsi Babilonia huan cati nopona ehuani, pampa tajtacolchijtoque noiexpa. <sup>15</sup> Xitzajtzica chicahuac ten nochí lados huan xiquijtoca: ¡Ya motemactili Babilonia! ¡Ya huetzqui nopa tepamit cati ica moyahualojtoya! TOTECO ya momacuetqui ica ya. Quena, xiquinchihuilica Babilonia ehuani senquisa quej quinchihuilijtoque sequinoc. <sup>16</sup> Nochi tacame cati tatojtocayayaj huan pixcayayaj ipan mili

ipan Babilonia ma choloca ten nopa tali. Ma quisaca ipan nopa tali inihuaya nochi sequinoc cati achtohuiya ehuayayaj ipan sequinoc talme, pampa ya monechcahuía nopa tatzacuiltli para nopa masehualme ten tali Babilonia.”

*Israelitame mocuetque ipan inintal*

<sup>17</sup> TOTECO quijtohua: “Israelitame itztoque quej borregojme cati quintepotztocaj tecuanime hasta quinsemanaj campa hueli. Eltoc quej achtohui nopa tanahuatijquet ten tali Asiria quincuaqui, huan teipa Nabucodonosor, tanahuatijquet ten tali Babilonia, quinpostequili iniomiyohua.

<sup>18</sup> Yeca ama ni ininTECO Cati Niquinyacana Noilhuicac Ejahua Ma Tatanitij huan cati niininTeco israelitame, niquijtohua: Na nijtatzacuiltis nopa tanahuatijquet ten tali Babilonia huan nochi ipan ital san se quej nijtatzacuilti nopa tanahuatijquet ten tali Asiria. <sup>19</sup> Huan sempa niquinhualicas nopa israelitame ipan inintal para ma tacuaca ipan nopa tepet Carmelo huan ipan Basán: huan para sempa ma itztoca ica paquilsti ipan tepet Efraín huan ipan Galaad. <sup>20</sup> Huan ipan nopa tonali, amo aqui huelis quipantis se inintajtacol israelitame ipan tali Israel o tali Judá, pampa na niqintapojojhuis nopa quentzi masehualme cati noja niquincajtos para itztose. Quej nopa niininTECO niquijtohua.

*TOTECO quitatzacuiltis Babilonia*

**21** “¡Annotatehuijcahua, xiyaca xijtehuitij tali Babilonia \* huan nopa masehualme ten Pecod†! Quena, xiyaca ipan tali Babilonia campa itztoque nopa masehualme cati mosisiníaj. Xiquintatzacuiltica huan xiquintamiixpolihuiltica senquisa quej na nimechnahuatijtoc. Quej nopa ni amoTECO niquijtohua. **22** Ma caquisti tahuejchihualisti ten tatehuilisti ipan nopa tali, huan ma tzajtzica nopa masehualme cati quiselíaj tatza-cultili. **23** Tali Babilonia cati eltoya quej se hueyi martillo cati quintejtzonayaya nochi talme, ama ya huetztoc huan imasehualhua tepejtoque talchi. Tali Babilonia ya sosolijtoc huan eltoc iseltitzi tatajco ten nochi talme. **24** Na niquinalili se taquetzti nopa Babilonia ehuani pampa tahuel mote-huijque nohuaya na, niDIOS, huan amo quiitaque quema masique.

**25** “Na nijtapo nopa cuarto campa nicajocui nochi notepos para ica nitatehuis. Huan por nohueyi cualancayo na nijquixtijtoc noteposhua cati ica nitatehuía pampa na, niDIOS Cati Niquinyacana Noilhuicac Ejcahua Ma Tataniij, nijpiya tequit para nijchihuas ipan tali Babilonia. **26** Huajca nochi amojuanti cati anitztoque huejca, xihualaca xijtehuiquij. Xijtaopoquij nochi nopa calme campa quiajocuij miyac teposme. Xijhueloniquij itepa huan nochi calme ipan ni altepet hasta mocahuas quej se tamontomit ten tet. Huan xiquintamimictica nopa masehualme.

---

\* **50:21** 50:21 O Merataim cati elqui seyoc itoca Babilonia. Merataim quinequi quijtos ‘Ome huelta quintatzacuiltise.’ † **50:21** 50:21 Se altepet ipan Babilonia. Pecod quinequi quijtos ‘Lugar ten tatzacuiltili.’

Ma amo mocahua yon se. <sup>27</sup> Xiquinmictica nochi inisoldados. Xiquintzontamiltica. Yon se masehuali ten tali Babilonia amo momanahuis. Monequi nochi ma miquica pampa ya ajsic hora para quitamisosolose tali Babilonia.

<sup>28</sup> “Xijtacaquilica cati quiijtohuaj nopa masehualme cati cholojtejque ten Babilonia huan momanahuijque. Tepohuilitij quenicatza TOTECO Dios quintatzacultijtoc nopa Babilonia ehuani cati quisosolocoj itiopa.

<sup>29</sup> “Xiquinnotzaca nochi cati huelij quitequi-huiáj cuahuitoli para quimajcahuase cuatamínti huejca. Ma quitehuiquij tali Babilonia. Ma quiyahualoca nopa altepet para amo aqui huelis cholos. Xiquinchihuili Babilonia ehuani senquisa quej injuanti quinchihuilijtoque sequinoc. Pampa Babilonia ehuani tahuel mohueyimatque noixpa na cati nitatzejzeloltic huan ni ininTECO israelitame. <sup>30</sup> Huajca nochi inintelpocahua Babilonia huetzise ipan calles huan mique, huan nochi nopa tatehuiani tamimique.”

<sup>31</sup> Huan niamTECO Cati Niquinyacana Noilhuicac Ejcahua Ma Tatanitij niquijtohua: “Antali Babilonia ehuani, tahuel anmohueyimatij huan huajca na nimochijtoc niamocualancaitaca. Huan ya ajsic hora para nimechtatzacultis.

<sup>32</sup> Nochi amojuanti ipan amotal tahuel anmohueyimatij huan temachti anmotepotanise huan anhuetzise inihuaya nochi amoaltepehua. Amo aqui amehtananas, pampa TOTECO quiticuiltis se hueyi tit ipan tali Babilonia huan quintatis nochi amoaltepehua.”

<sup>33</sup> Quej ni quijtohua TOTECO Cati Quinyacana Iilhuicac Ejcahua Ma Tatanitij: “Nopa israelitame ten tali Israel huan Judá taijyohuíaj chicahuac pampa inincualancaitacahua quinhuicaque ipan seyoc tali para tetequipanotij san tapic huan amo quinequij quinmalacanise para ma yaca.

<sup>34</sup> Pero na, niinintamanahuijca, israelitame ni-jpiya miyac chicahualisti. Na notoca niDIOS Cati Niquinyacana Noilhuicac Ejcahua Ma Tatanitij. Na niquinpalehuis huan nijchihuas ma quinmalacanica para hualase huan niquinhualicas ipan tali Israel para ma mosiyajquetzaca. Pero Babilonia ehuani tahuel majmahuise.”

<sup>35</sup> Huan TOTECO quijtohua: “Nopa tatehuilisti huetzis ipan nochí nopa caldeos huan ipan nochí Babilonia ehuani. Huan yon se tayacanquet huan talnamijquet amo momanahuis. <sup>36</sup> Nochí nopa istacatica tajtolpanextiani miquise ica macheta. Huan nochí nopa tatehuiani cati más mosemacaj, majmahuise quema ajsise tacame ica macheta para quintzontamiltise. <sup>37</sup> Nopa tatehuilisti quintzontamiltis inincahuayojhua huan inincarrojhua. Huan nopa soldados ten sequinoc talme cati mosentilijtoque ihuaya Babilonia para quipalehuise, elise amo tetique quej sihuame. Huan cati hualase quitehuiquij quinichtequilise nochí cati quipiyaj. <sup>38</sup> Huan hasta nopa at ipan Babilonia nojquiya tamihuaquis. ¿Para ten quej nopa elis? Quej nopa elis, pampa nochí nopa tali temitoc ica taixcopincayome huan teteyome cati nopa masehualme tahuel quinhueyimati.

<sup>39</sup> “Yeca ni altepet Babilonia elis ininchaj nopa totome cati amo tapajpacti quej avestruces

huan nopa tepechichime. Nopona quichihuase ininchaj nochi nopa tecuanime cati itztoque ipan huactoc tali. Ayecmo quema itztoquij masehualme nopona pampa nopona mocahuas tasosololi para nochipa. <sup>40</sup> Temachti nijsosolos Babilonia quej huejcajquiya nijsosolo altepet Sodoma huan Gomorra huan nochi sequinoc altepeme cati eltoyaj nechca. Huan quej ipan nopa altepeme ayecmo aqui itztoc, quej nopa nojquiya elis ica tali Babilonia. Ayecmo aqui itztos nopona. Quej nopa niamoTECO niquijtohua.

<sup>41</sup> “Hualase tahuel miyac soldados ten nopa tali cati mopantía ica norte. Huan inihuaya hualahui miyac tanahuatiani cati niamoTECO niquinnotztoc ten campa hueli talme. <sup>42</sup> Nochi inijuanti mocualtalijtoque ica inintepos huan hualahui para quichihuaqui se hueyi miquilisti. Inijuanti tahuel mosisiniáj, yon amo tetasojtaj. Inintahuejchihualis caquisti nelchicahuac quej quema molinía nopa hueyi at. Teicneltique tali Babilonia ehuani, pampa nochi inijuanti hualahui ipan inincarrojhua para quintehuise. <sup>43</sup> Pero quema nopa tanahuatijquet ten tali Babilonia quimatis ten panos ipan ital, momajmatis huan tamis ichicahualis. Huan pehuas taijyohuis quej se sihuat cati coneipyia.

<sup>44</sup> “Na nihualas quej se león cati quisa ipan cuatitamit nechca nopa hueyat Jordán huan talo-jtzi huitoni ipan nopa borregojme cati itztoque nopona ipan potrero. Huan niquinquixtis Babilonia ehuani ten inintal huan nijchihuas ma quinnahuati se tanahuatijquet cati na techpactis. Pampa amo aqui seyoc quej na. Amo aqui

hueli technotzas na iixpa se Juez para techtajtanis cuenta. Amo aqui se tanahuatijquet cati huelis moquetzas noixpa.

<sup>45</sup> “Xijtacaquilica taya quisencajtoc TOTECO para tali Babilonia huan nopa caldeo masehualme campa itztoque nopona. Hasta cati noja conetzitzti nojquiya quinhuicase ipan seyoc tali. Huan ininchajchaj mocahuas cactoc huan nochitahuel majmahuise. <sup>46</sup> Nochi taltipacti mojmolinis quema huetzis Babilonia. Huan ininchoquilis caquistis hasta ipan nochis sequinoc talme.”

## 51

### *Quintzontamiltise Babilonia ehuani*

<sup>1</sup> Quej ni quijjtohua TOTECO: “Na nijttitanis ipan tali Babilonia se tasosolojquet para ma quintzontamilti nochis nopa caldeo masehualme. <sup>2</sup> Hualase masehualme cati ehuani seyoc tali cati quintzelose nopa Babilonia ehuani quej quitzejtzelohuaj trigo para ma quinhuica ajacat itasolo. Hualase ten campa hueli talme huan motananase para quitehuise ipan nopa tonali ten taijyohuili ipan tali Babilonia. <sup>3</sup> Huan ni tatehuiani quintahuisose nopa soldados ten tali Babilonia ica inincuataminhua. Huan yon se Babilonia ejquet amo momanahuis. Miquise huehuentzitzti huan telpocame, huan quintamimictise nochis inisoldados. <sup>4</sup> Campa hueli ipan nopa tali nochis caldeos mocahuase mictoque. Huan ipan nochis calles tepejtose cati miquise ica cuataminti. <sup>5</sup> Pampa amo ni quintahuelcajtoc israelitame ten tali Israel,

yon tali Judá. Na noja nieli niiniDios. Na niinTECO Cati Niquinyacana Noilhuicac Ejcahua Ma Tatanitij. Nopa caldeo masehualme tahuel tajtacolchijtoque ica na cati nitatzejzeloltic huan niininTECO israelitame.

<sup>6</sup> “Xiquisaca ipan tali Babilonia huan ximochololtica nochí amojuanti cati anhuelij. ¡Amo ximocahuaca nopona! Sinta anmocahuase, huajca nojquiya antzontamise quema nimomacuepas ica nopa Babilonia ehuani. Pampa na niamoTECO niqintaxtahuis quej quinamiqui por nochí intajtacolhua. <sup>7</sup> Babilonia eliyaya quej se caxit ten oro nomaco niDIOS cati nijtequihui para nochí talme ipan taltipacti ma quiica ten nocualancayo huan moihiuntise hasta molocojchihuase. <sup>8</sup> Pero ama, ipan se talojtzi, huetztoc tali Babilonia huan mochijqui cuechtic. Huajca xijchoquilica. Xijmacaca pajti pampa huelis noja mochicahuas.” <sup>9</sup> Huan nopa masehualme ten sequinoc talme quiijtohuaj: “Ya tipajtijque Babilonia, pero amo hueli mochicahua pampa ayecmo quipiya pajti. Huajca xijcahuaca huan techcahuili sesen ten tojuanti timocuepase ipan total canque tiehuani pampa TOTECO quititanilijtoc tatzacuiltyli Babilonia huan ajsi hasta nepa ilhuicac. <sup>10</sup> TOTECO techchihuilijtoc cati xitahuac. Ma tiyaca huan ma titayolmelahuatij ipan altepet Jerusalén nochí cati cuali quichijtoc TOTECO DIOS.”

<sup>11</sup> ¡Xijtentica nopa cuataminti! Xiquincualtalica amoyolixtzajcahua ten teposti pampa TOTECO quinnojnotztoc nopa tanahuatiani ten tali Media para ma quisosolotij tali Babilonia. TOTECO quincuepilis pampa inijuanti

quintaijyohuiltijque imasehualhua huan quimahuispolo que itiopa. <sup>12</sup> Xijtananaca nopa bandera iixco itepa Babilonia. ¡Xiquintalica tamocuitahuiani ipan tepamit! Xiquintalica soldados campa hueli, pampa TOTECO quichihuas nochí cati quijitojtoc quichihuas ica tali Babilonia.

<sup>13</sup> Babilonia eliyaya se altepet nechca miyac hueyame. Quipixqui miyac ricojoyot. Pero ya ajsic hora para tamis. <sup>14</sup> TOTECO Cati Quinyacana Ilhuicac Ejcahua Ma Tatanitij, motestigojquetztoe iseltitzi huan quijitojtoc: “Ialtepehua Babilonia temis ica inincualancaitacahua quej elisquia se mili cati temitoc ica chapolime. Huan quema inincualancaitacahua ya quintantose, inijuanti tzatzise ica paquilisti. Huan nopa tzajtzistí caquistis hasta ilhuicac.”

*Se huicat para TOTECO  
(Jer. 10:12-16)*

<sup>15</sup> TOTECO quichijchijqui ni taltipacti ica ihueyi chicahualis. Quiquetzqui campa eltoc ica italnamiquilis. Huan quipatajqui ilhuicacti ica itaixmatilis. <sup>16</sup> Quema yaya camanalti, tatomoni nepa ilhuicac. Yaya cati quichihua ma motanana apocti ipan nochí taltipacti huan ma mochihua mixti. Yaya quichihua ma tapetani quema huetzi at huan quiqxintia nopa ajacat ipan icuarto campa quiajocui huan quititani campa quinequi. <sup>17</sup> Quema masehualme quiitaj cati TOTECO hueli quichihua, nochí nesij tahuel huihuitique. Nesi quej tapiyalme cati amo quipiyaj inintalnamiquilis, pampa amo aqui talnamiqui quej ya. Tacame quinchijchihuaj

taixcopincayome huan teteyome, pero cati quinchijtoque tahuel pinahuaj pampa san tacajcayahuaj. Quijtohuaj para nopa teteyome elij dioses, pero amo cana. Amo quipiyaj nemilisti, yon amo quipiyaj yon se chicahualisti. <sup>18</sup> Nopa teteyome amo teno ininpati. Nochi eltoc san istacatili. Huan se tonali TOTECO hualas quintachiliqui huan quintamisosolos. <sup>19</sup> Pero TOTECO cati ininDios israelitame, yaya amo se teteyot. Yaya eli Dios cati quichichijqui nochi cati onca, huan quintapejpeni israelitame para elise iaxcahua cati más quinicneli. Yaya itoca: TOTECO Cati Quinyacana Iilhuicac Ejcahua Ma Tatanitij.

*TOTECO quitequihui Babilonia para quintatzacuiltis sequinoc*

<sup>20</sup> TOTECO camanalti ten Babilonia: “Babilonia eltoc quej se hacha cati ica nitatehuis huan quej nomacheta. Quena, elis quej notepos para ica niquinsosolos talme huan para niquntzontamiltis tanahuatiani. <sup>21</sup> Na nijtequihuis Babilonia para quintzontamiltis soldados, cahuayoyme huan tacame cati tejcotoque cahuajtipa. Quinsosolos carrojme huan cati tejcotoque carrojtipa. <sup>22</sup> Huan nojquiya nijtequihuis para niquntzontamiltis masehualme cati huehuentzitz huan telpocame. Quintzontamiltis coneme huan ichpocame, <sup>23</sup> tamocuitahuiani huan ininborregojhua, tacame cati quipoxoníaj tali huan inintorojhua cati tapoxoníaj, tayacanani ten soldados huan tanahuatiani.

*Tatzacuiltili para tali Babilonia*

**24** “Huan teipa amoixpa annoisraelita masehualhua, niqintaxtahuis nopa caldeo masehualme huan nochí Babilonia ehuani por nochí nopa fiero tamanti catí quichihuilijque notiopa ipan Jerusalén. Quej nopa niamotECO niquijtohua.

**25** “¡Ay anBabilonia ehuani! Na niamocualancaitaca. Anitztoque quej se tepet catí tahuel tetic huan anhuelij anquintzontamiltíaj sequinoc talme. Pero na nimomatananas para nimech-tatzacuiltis huan nimechtepexihuis ten nopona tahuel huejcapa campa ama anitztoque. Huan nimechchihuas quej se tepet catí tamitatatoc. **26** Amoaltepe mocahuas tasosololi para nochipa. Huan yon se ayecmo quintequihuis nopa teme para calchihuase. Nelía amoaltepe elis quej tasoli para nochipa. Quej nopa niDIOS niquijtohua.

**27** “Xijtanana se bandera quej se tanextili para ma mocualtalica para quitehuise tali Babilonia. Xijpitzaca tapitzali para ma panquisaca nopa soldados ten tali Ararat, Mini huan Azkenaz. Xijtal-ica se tayacanquet para quinyacanas nopa soldados huan xiquinhualicaca tahuel miyac cahuayoje. **28** Xiquintitanica miyac talme inisoldados huan tayacanani para quitehuitij tali Babilonia. Ma yaca inintanahuatiyahua Media ica inisoldados huan inintayacanahua nochí nopa talme catí eltoc inimaco.”

**29** Nochi tali Babilonia mojmolinis huan mohuisos ica tacuajcualocayot pampa TOTECO quichihuas senquisa quej quiijtojtoc quichihuas. Babilonia mocahuas cactoc quej huactoc tali. Yon se masehuali ayecmo

itztos nopona. <sup>30</sup> Nopa soldados ten tali Babilonia cati más mosemacayayaj ayecmo tatehuíaj. San mocaltzactoque ipan nopa hueyi cali cati quitequihuíaj soldados. Tanqui ininchicahualis, huan ama majmahuij quej sihuame. Inincualancaitacahua ya quitatijque ininchaj. Huan nochí caltemit ten nopa altepet ya quitapanque. <sup>31</sup> Miyac tayolmelahuani hualahui ten campa hueli huan quiilhuíaj nopa tanahuatijquet ten altepet Babilonia para icualancaitacahua ya quiitzquitoque ialtepe. <sup>32</sup> Nochi ojti campa pano nopa hueyame ya quinitzquitoque inincualancaitacahua. Ya quinticuiltijoque nopa huejcapantique calme para tajtachiyase. Huan quiilhuíaj nopa tanahuatijquet para se hueyi majmajti quinitzquitoc nopa soldados ten tali Babilonia.

<sup>33</sup> Pampa TOTECO Cati Quinyacana Iilhuicac Ejcahua Ma Tatanitij huan yaya cati ininteco israelitame quijtohua: “Nechcatitoc para hualase inincualancaitacahua Babilonia ehuani huan quiuitequise quej elisquía trigo para quiqxtilise itasolo.”

<sup>34-35</sup> Nopa israelitame cati tali Judá ehuani cati itztoque ipan tali Babilonia, quijtohuaj: “Nabucodonosor, tanahuatijquet ten tali Babilonia quitamilti tochicahualis huan techtolojtoc quej se hueyi tapiyali. Yaya mocuili nochí toricojyo huan techquixti ten total. Huajca ama, ma taijyohui tali Babilonia por nochí cati techchihuili. Ma quiseli se taxtahuili quej quinamiqui pampa quinmicti toicnihua.”

<sup>36</sup> Huan TOTECO quinilhui Jerusalén

ehuani: “Na nimechтенpalehuis huan niquincuepilis amocualancaitacahua por nochicati amechchihuilijque. Na nijchihuas ma huaqui inihueyaj huan nochicatimel campa meya at.<sup>37</sup> Huan tali Babilonia mocahuas quej se tamontomit ten tet campa itztose tepechichime. Nochicati quiitase tahuel momajmatise huan yon se masehuali ayecmo itztos nopona.

<sup>38</sup> “Amantzi nopa Babilonia ehuani tahuel taij ipan inilhuihua huan nanalcaj quej leones huan quej ininpilcone hua. <sup>39</sup> Huan quema noja ihuititose ica taili, na niquincualtalilis seyoc ilhuit. Niquinchihuas ma taica hasta huetzise talchi quej mictoque. Huan cochise para nochipa. Ayecmo quema isase. Quej nopa niDIOS niquijtohua. <sup>40</sup> Huan niquinhuicas nopa Babilonia ehuani quej pilborrego jtzitzti, oquich borregos huan oquich chivos ipan nopa lugar campa quinquechtzontequivise.”

<sup>41</sup> Ya huetzqui Babilonia, nopa hueyi altepet cati quihueyimatiyayaj masehualme ten nochicatimel. Ama nochicati taltipacti momajmatiāj huan amo hueli quinelto caj sintamela huac ya huetzqui Babilonia. <sup>42</sup> Eltoc quej nopa hueyi at motanantoc huan hualajqui quite mitico tali Babilonia. <sup>43</sup> Nochicati ialtepehua ya tamiso solijtoque. Mocajtoc quej huactoc tali campa amo aqui itztoc huan campa amo panoj paxalohuani.

<sup>44</sup> “Na nijtajtol sencahuas nopa teteyot Bel, inindios nopa Babilonia ehuani. Huan nijquixtilis nochicati moaxcatijtoc para iaxca. Huan nochicatimel sequinoc talme ayecmo hualase

para quihueyichihuase. Hasta nopa tepamit cati quiyahualojtoc tali Babilonia, nojquiya huetzis.

<sup>45</sup> “Annomasehualhua, xiquisaca ipan nopa altepet Babilonia. Xicholoca para anmomanahuise ten nohueyi cualancayo quema nitetatzacuiltis nopona. <sup>46</sup> Pero amo ximomajmatica quema amechilhuise para monechcahuíaj nopa tatehuiani, pampa sesen xihuit anquicaquise miyac tamanti cati fiero. Teipa nopa gobernadores ten tali Babilonia mocualanise huan motehuise. <sup>47</sup> Huajca monechcahuía tonali para nijtatzacuiltis nopa hueyi altepet huan nochi iteteyohua. Quena, huetzis ipan se hueyi pinahualisti huan nopa mijcatzitztepejtose ipan calles campa hueli. <sup>48</sup> Nochi cati itztoque ipan ilhuicacti huan taltipacti paquise quema nopa soldados ten nopa tali cati mopantía ica norte hualase quitehuiquij tali Babilonia. Quej nopa niamTECO niquijtohua. <sup>49</sup> Quej Babilonia ehuani quinmictijque nopa israelitame huan sequinoc campa hueli ipan ni taltipacti, quej nopa nojquiya miquise inijuanti.”

### *Camanali para Judá ehuani ipan Babilonia*

<sup>50</sup> Nochi amojuanti cati anmomanahuique ten nopa tatehuilisti, amo ximoquetzaca. Xicholoca amantzi quema noja onca tonali. Xiquelnamiquica TOTECO huan xiquelnamiquica altepet Jerusalén huan ximocuepaca nica. <sup>51</sup> Amojuanti anquijtohuaj: “Tojuanti tahuel tipinahuaj pampa nopa Babilonia ehuani quimahuispolohuaj itiopa TOTECO.”

<sup>52</sup> Pero TOTECO quijtohua: “Quena, pero ajsis tonali para niquinsosolos nochí nopa teteyome ten tali Babilonia. Ipan nochí nopa tali caquis-tis ininchoquilis nopa masehualme cati quinco-cojtoque. <sup>53</sup> Huan masque Babilonia tejcosquía hasta ilhuicac huan quipiryasquía tahuel miyac chicahualisti, na niquintitanisquía tasosolohuani para ma quitzontamiltica.”

### *Quisosolose tali Babilonia*

<sup>54</sup> Xijcaquica quenicatza tzajtzij nopa masehualme cati quintzontamiltíaj ipan tali Babilonia campa itztoque nopa caldeos. <sup>55</sup> Pampa amantzi TOTECO quisosolohua tali Babilonia. Nopa tatehuiani quitemitijtoque nopa tali huan hualahui chicahuac quej at cati mosisinía. <sup>56</sup> Nopa soldados ajsij ipan tali Babilonia huan quintzontamiltíaj nochí nopa tacame cati tahuel mosemacaj. Nochi inintepos cati ica momanahuíaj, quinpostequilíaj, pampa TOTECO yaya nopa Dios cati nelía taxtahua cuali huan quitaxtahuía sesen Babilonia ejquet quej quinamíqui por inintajtacolhua.

<sup>57</sup> Huan TOTECO quijtohua: “Na niquinihiuntis nopa tayacanani, talnamiquini, gobernadores, tayacanani ten soldados huan tatehuiani ten Babilonia. Huan cochise para ayecmo quema isase. Quej nopa niquijtohua na nitanahuatijquet cati notoca: nopa DIOS Cati Quinyacana Iilhuicac Ejcahua Ma Tatanitij.

<sup>58</sup> “Huan ni amoTECO Cati Niquinyacana Noilhuicac Ejcahua Ma Tatanitij niquijtohua: Nopa tepamit cati tilahuac cati quiyahualojtoc tali Babilonia, quitamihuelonise. Huan nojquiya

quitatise nopa huejhueyi caltemit. San tapic tequitique nopa masehualme ten sequinoc talme, pampa nochí tamanti cati quichijchijque, tamitatas.”

*Quititani icamanal Jeremías ipan tali Babilonia*

<sup>59</sup> Quema Tanahuatijquet Sedequías yahuiyaya para nahui xihuit tanahuatis quipixqui itapale-huijca cati itoca eliyaya Seraías huan elqui icono Nerías, cati elqui icono Maasías. Huan na, ni-Jeremías, niquilhui Seraías taya ma quichihua pampa yaya yahuiyaya tali Babilonia ihuaya nopa Tanahuatijquet Sedequías ten tali Judá. <sup>60</sup> Na, ni-Jeremías, niquijcuilojtoya ipan se amat nochí nopa huejhueyi tatzacuiltili cati TOTECO quijitojtoya amantzi quititanis ipan tali Babilonia huan nochí sequinoc tamanti ten Babilonia. <sup>61-62</sup> Huan na, ni-Jeremías, niquilhui: “Quema tiasiti ipan tali Babilonia, xijpoahuas nochí cati niquijcuilojtoc nica huan xiquijto: ‘TOTECO, ta tiquijtojtoc para tijsosolos altepet Babilonia hasta amo mocahuas yon se masehuali huan yon se tapiyali nica, huan ni tali mocahuas sosolijtoc para nochipa.’ <sup>63</sup> Huan teipa, quema ya tijtamipojtos ni amat, xiquilpili se tet huan xijmajcahua ipan nopa hueyat Eufrates. <sup>64</sup> Huan tiquijtos: ‘Quej ni amatapohuali atzon-polihuis, nojquiya tali Babilonia temos hasta tatzinta huan ayecmo quema motananas sempa por nochí nopa huejhueyi tatzacuiltili cati nijhualicas ipan ya.’ ”

Hasta nica tami nopa camanali cati Jeremías quiseli ten TOTECO huan tayolmelajqui.

## 52

*Tanahuatijquet Sedequías  
(2 R. 24:18-20; 2 Cr. 36:11-16)*

<sup>1</sup> Sedequías quipiyayaya 21 xihuit quema pejqui tanahuatía ipan altepet Jerusalén huan tanahuati majtacti huan se xihuit. Inana itoca eliyaya Hamutal huan eliyaya iichpoca Jeremías cati ehua altepet Libna. <sup>2</sup> Pero Sedequías quichijqui cati amo cuali iixpa TOTECO quej nojquiya quichijtoya Joacim cati achtohuiya eliyaya tanahuatijquet. <sup>3</sup> Huan TOTECO tahuel cuanqui ica nopa masehualme ten altepet Jerusalén huan tali Judá huan quinquixti ten iixpa. Quichijqui para nopa tanahuatijquet ten Babilonia ma quinquixti ten inintal huan ma quinhuica ipan tali Babilonia. Huan teipa Tanahuatijquet Sedequías mosisini ica nopa tanahuatijquet ten tali Babilonia.

*(2 R. 24:20–25:7; Jer. 39:1-7)*

<sup>4</sup> Huan ipan 15 itequi nopa metzti majtacti ipan tocalendario israelita \* quema Sedequías yahuiyaya para chicnahui xihuit para tanahuatis, Nabucodonosor, tanahuatijquet ten tali Babilonia, yajqui ica nochí isoldados ipan altepet Jerusalén huan quiyahualotoj nopa altepet huan quichijque tamontomit ten tali hasta iixco nopa tepamit para calaquise ipan nopa altepet. <sup>5</sup> Huan quiyahualo Jerusalén para ome xihuit hasta Sedequías yahuiyaya para majtacti huan se xihuit tanahuatis.

<sup>6</sup> Huan ipan 9 itequi nopa metzti nahui †

\* **52:4** Ipan 15 itequi enero ipan 588 a.C. ipan tocalendario ten ama. † **52:6** Ipan 18 itequi julio 586 a.C. ipan tocalendario ten ama.

ten nopa xihuit, senquisa tanqui nochí tacualisti ipan nopa altepet huan oncac se hueyi mayanti.  
<sup>7</sup> Huajca nopa masehualme cati calijtic ipan altepet Jerusalén quicoyonijque nopa tepamit. Huan ica tayohua cholojque nochí nopa israelita soldados huan panoque ipan nopa caltemit cati eltoya tatajco nopa ome tepamit nechca nopa xochimili cati iaxca nopa tanahuatijquet. Huan quisque ten nopa altepet masque yahualtic itztoyaj nopa caldeos. Huan matalojejque para quipanose nopa milme para ajsisquíaj ipan nopa tamayamit nechca hueyat Jordán†.

<sup>8</sup> Pero nopa caldeo soldados quitepotztocaque Tanahuatijquet Sedequías huan quiitzquitoj ipan se tamayamit nechca altepet Jericó, pampa nochí isoldados ya quitahuelcajtoyaj. <sup>9</sup> Huan quihuicaque Sedequías ipan altepet Ribla ipan tali Hamat campa itztoya Nabucodonosor, tanahuatijquet ten tali Babilonia. Huan nopona quitajtolsencajqui huan quiijto taya elis itatzacuiltyil. <sup>10</sup> Huan nopona ipan altepet Ribla, Nabucodonosor quichijqui para Sedequías ma quintachilijto iconehua quema quinquechtzon tequisquíaj. Huan nojquiya iixpa quinquechtzon tejque nochí nopa tayacanani ten tali Judá. <sup>11</sup> Teipa Nabucodonosor tanahuati ma quiixteyolquixtica Sedequías. Huan teipa quilpijque ica tepos cadena huan quihuicaque ipan tali Babilonia. Huan nopona quitzajque hasta mijqui.

---

† **52:7** 52:7 O Arabá. Arabá eltoc seyoc itoca nopa tamayamit nechca hueyat Jordán.

*Quitatijque tiopamit  
(2 R. 25:8-21; 2 Cr. 36:7-21; Jer. 39:8-10)*

<sup>12</sup> Huan ipan 10 itequi nopa metzti macuili ipan nopa calendario israelita§, quema Nabucodonosor yahuiyaya para diecinueve xihuit para tanahuatis ipan tali Babilonia, Nabuzaradán, nopa hueyi tayacanquet ten soldados hualajque ipan altepet Jerusalén. <sup>13</sup> Huan quitati itiopa TOTECO huan nopa caltanahuatili huan nochí huejhueyi calme. <sup>14</sup> Huan nopa Nabuzaradán quinnahuati nopa caldeo soldados cati hualayayaj ihuaya ma quihuelonica nochí nopa tepamit cati quiyahualojtoya altepet Jerusalén. <sup>15</sup> Teipa Nabuzaradán quinhuicac ipan tali Babilonia sequij masehualme cati teicneltzitzí, huan nochí cati momanahuijque ten nopa tatehuilisti. Nojquiya quinhuicac nochí cati motemactilijtoyaj ica nopa tanahuatijquet ten tali Babilonia huan nochí nopa masehualme cati quimatiyayaj quichihuase ten hueli tequit. <sup>16</sup> Pero sequij masehualme cati más teicneltzitzí quincajqui para ma quichihuaca xocomeca milme huan ma quipoxonica nopa tali.

<sup>17</sup> Huan nopa soldados ten tali Babilonia quintapanque nopa ome huejhueyi taquetzalme ten bronce cati eltoya campa icalteyo nopa tiopamit. Huan nojquiya quintapanque nopa piletas ten bronce campa quitecayayaj at huan nopa huacaxme ten bronce cati eltoyaj quej inintaqueztzalhua huan nochí quihiuicaque ipan tali Ba-

---

§ 52:12 52:12 Ipan 17 itequi agosto 586 a.C. ipan tocalendario ten ama.

bilonia. <sup>18</sup> Nojquiya quihuicaque nochí nopa chachapalme ten bronce, huan nopa palas cati ica quiijcueniyayaj cuajnexti ipan nopa taixpamit; huan nochí cucharas, huejhueyi tazas huan nopa huitzcucharas huan nochí tamanti ten bronce cati quitequihuiyayaj ipan tiopamit quema temacayayaj tacajcahualisti. <sup>19</sup> Huan nojquiya quihuicaque nopa tixicti, taahuil quetzali huan nopa tazas huan platos cati senquisa oro huan plata.

<sup>20</sup> Nopa bronce ten nopa ome huejhueyi taquetzalme cati Salomón quinchijchijtoya, huan nopa piletas huan nopa huacaxme cati eltoyaj inintantita eliyayaj tahuel etique hasta amo aqui huelqui quitamachihua quesqui ietica. <sup>21</sup> Sesen taquetzali quipiyayaya 9 metros huan 45 centímetros ihuejcapanca. Huan inintomajca eliyaya 6 metros huan 30 centímetros. Nopa taquetzalme eliyayaj ijticacahuaxtique Huan inintilajca quipiyayayaj 8 centímetros. <sup>22</sup> Huan inintzonpac nopa taquetzalme quiyyocatalijtiyajqui pano 2 metros. Huan ipan nopa lugar quinixcopintoyaj miyac granadas. <sup>23</sup> Oncayaya 96 granadas ipan sesen lado huan seyoc 100 granadas quiyahualojtoyaj nopona huejcpa.

### *Quinhuicaque israelitame campa huactoc tali*

<sup>24</sup> Huan nopa hueyi tayacanquet ten soldados quihiuicac Seraías cati eliyaya nopa hueyi totajtzi huan Sofonías, nopa totajtzi cati eliyaya itapalehuijca, huan eyi tacame cati quimocuitahuiyayaj nopa tiopamit. <sup>25</sup> Huan ten nopa masehualme

cati noja motatijtoyaj ipan nopa altepet, quihuicac se hueyi tayacanquet ten soldados, huan chicome tacame cati quitalnamictiyayaj nopa tanahuati-jquet. Huan quihuicac nojquiya nopa taya-canca tajcuilojquet cati quinnahuatiyaya nopa soldados ten tali Judá huan 60 huejhueyi mase-hualme cati motatijtoyaj ipan Jerusalén. <sup>26</sup> Huan Nabuzaradán, nopa hueyi tayacanquet ten soldados, quinhuicac nochí inijuanti ipan altepet Ribla iixpa nopa tanahuati-jquet ten tali Babilonia. <sup>27</sup> Huan nopona, nopa tanahuati-jquet tanahuati ma quinhuitequica huan ma quinmictica. Huan quej nopa, quintamiquixtijque nochí Judá ehuani ten cati inijuanti inintal.

<sup>28</sup> Huan nopa masehualme ten tali Judá cati quinhuicaque ipan tali Babilonia quema Nabucodonosor yahuiyaya para chicome xihuit para tanahuatis, elque para nochí: 3 mil 23 masehualme. <sup>29</sup> Huan quema yahuiyaya para diecinueve xihuit ipan itanahuatil Nabucodonosor, Nabuzaradán quinhuicac 832 masehualme ten altepet Jerusalén. <sup>30</sup> Huan quema yahuiyaya para 23 xihuit ipan itanahuatil Nabucodonosor\*, Nabuzaradán, nopa hueyi tayacanquet ten soldados quinhuicac 745 masehualme. Huajca para nochí cati quinhuicaque ipan tali Babilonia elque 4 mil 600 masehualme ten tali Judá huan altepet Jerusalén.

*Quiquixtijque Joaquín ipan tatzacti  
(2 R. 25:27-30)*

---

\* **52:30** 52:30 Ipan nopa xihuit 581 a.C. ipan tocalendario ten ama.

<sup>31</sup> Teipa quema Joaquín, tanahuatijquet ten tali Judá, quihuicayaya 37 xihuit para quihuicatoyaj ipan tali Babilonia, pejqui tanahuatía ipan tali Babilonia, Evil Merodac. Huan ipan 25 itequi nopa metzti doce ipan calendario israelita<sup>†</sup>, Evil Merodac quitasojtac Joaquín huan quiqxinti ipan nopa tatzacti. <sup>32</sup> Huan quichihuili cati cuali huan quichijqui ihuampo huan más quipacti ten nochí nopa sequinoc tanahuatiani cati itztoyaj ihuaya ipan tali Babilonia. <sup>33</sup> Nojquiya quimacac se yoyomit cati yancuic quej quinamiqui para se tanahuatijquet. Huan Joaquín tacuayaya mojmosta ihuaya nopa tanahuatijquet ipan imesa. <sup>34</sup> Huan nojquiya mojmosta quimacayaya nochí cati quipolohuayaya. Huan quej nopa quichihuili nochipa hasta quema mijqui.

---

<sup>†</sup> **52:31** Ipan 31 itequi marzo, 561 a.C. ipan tocalendario ten ama.

**Icamanal toteco; Santa Biblia  
Bible without Deuterocanon in Nahuatl, Huasteca  
Central (MX:nch:Nahuatl, Huasteca Central )**

copyright © 2005 Wycliffe Bible Translators, Inc.

Language: Nahuatl, Huasteca Central

Translation by: Wycliffe Bible Translators, Inc.

**Copyright Information**

© 2005, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The Bible without Deuterocanon**

in Nahuatl, Central Huasteca

© 2005, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

c565d9f9-d202-544b-b78a-3c93df26508e